

The Ohio State University



3 2435 05259518 8

THE OHIO STATE UNIVERSITY BOOK DEPOSITORY



D	AISLE	SECT	SHLF	SIDE	POS	ITEM	C
8	04	23	01	7	13	006	0





OHIO STATE  
UNIVERSITY  
LIBRARIES



A NOTE TO THE READER:

Because of its value and condition,  
this volume has been microfilmed to  
preserve its content.

Please check the Libraries' catalog  
for location of a copy of that  
microform.

Thank you,  
The Preservation Office

Feb. 1993  
Dag







شیخ وصفی

# بدایع

رسمی، ادبی بعض مسوداتی حاویدر

معارف نظارت جلیله سنک رخصتیه

صاحب و نامری : کتابچی آراکل

استانبول

مطبعة نشان بربریان — اسکی ضبطیه جاده سی نومرو ۶۱

۱۳۱۰



STX

PL248

A387 B49

1892




## ﴿ افادۀ مخصوصه ﴾

مکاتب عالیہ نیک برنجیلرندن معدود اولان و تحت  
نظارت جناب شیخ الاسلامیدہ بولنان مکتب فیض مکسب  
نوابدہ من غیر لیاقہ انشا معلی بولندیغم جہتله طلبہ یه  
عاجزانه استکتاب ایتدیکم مسوداتی بوندن اول «لوامع»  
نامی آلتندہ طبع ونشر ایتدیرمش ایدم .

الده استکتاب طریقله ینه بر طاقم مسودات بیرکد-  
یکنندن بونلرکده طبع ونشرینی طلبه موما الیهم رجا  
ایتدکلری جہتله دکر سزلکنه باقیه رق «بدایع» عنوانی  
آلتندہ میدان انتشاره وضعی خصوصنه جسارتیاب  
اولدم . ومن الله التوفیق .

شیخ وصفی







## بدایع

— ۱ —

### نظرگاه سائی جناب مشیختپناهیلرینه

#### معروض داعی دیرینه لریدرکه

امیرالمؤمنین نائب مناب رسول امین پادشاهمیز افندمز  
حضرتلری روز جلوس عدالت افروز هایونلرندن بری  
بالجمله مناصبی اربابنه احسان وجهان عثمانینک ازدیاد  
شاننه مصروف اولان ارادات محاسن غایات خسروانه لريله  
بتون تبعه صادق شاهانه لرینی سرفرو برده زمین شکران  
بیورمقده اولدقلری مثللی بوکرده ده جاه جلیل فتوایی  
اهلیت و صداقتی جمله غننده مسلم افندمز کی برذات  
مکارم شیمک عهد استیبال دولترینه تودیع بیوره رق  
انوار عبودیت ایله مالی بولنان قلوب داعیانی مستغرق  
بحر شادمانی بیورمشلردر.



کمتر لری ده بوشوق ایله صبح و مسا پیرایه السنه اصدقا  
 اولان : « جناب یزدان حامی شرع مبین نجبه سلاطین  
 عدل آیین خلیفه بی مدانی غازی عبدالحمید خان ثانی  
 افدمز حضرتلرینی انوار جلیله قرآن رونق طراز محکمه  
 جهان اولدقجه سریر شوکت مصیر عثمانیده حکمران  
 بیورسون . » دعای فیض انتماسنه اردافاً ذات ستوده  
 صفات ولی النعمیلرینک سایه آسمانیایه حضرت پادشاهیده  
 کامبین والی آخرالدوران مقام معلای مشیخته کمال اقبال  
 ایله مکن اولملری ایچون بارگاه قاضی الحاجاته رفع دست  
 نیاز اتمکده اولدیغمک عرض و بیانه ابتدار و تأیید  
 رابطه رقیته وسیله اولور امیدیه ترجمان وجدانم اولان  
 قصیده آتیه نک خاک پای ناصیه پیرای فتواپناهیلرینه تقدیمه  
 اجتسار قیلندی .

قصیده مذکوره دکر سرلکنه باقلیه رق تنزلاً نظر  
 التفاته آله حق اولورسه عاجزلری ایچون نه بیوک شرفدر .  
 هر جهتله مستلزم مباحثات عظیمه اوله حق بویله  
 بر شرفدن محروم بیر اقلما قلم خصوصنی شیمه کریمه عجزه  
 نوازیلرینه استناداً تمنا و حق درویشانه میده ابدال بیوریه



کلن توجهات مکارم غایات بنده پروریلرینک بقا و تزیادی  
استرحامنه اجترا ایلرم . هر حالده امر و فرمان حضرت  
ولی الامر کدر .

### ﴿ قصیده ﴾

ای سر افراز عالی معالی عنوان  
اعقل دهری ایدر فکر متینک حیران

سنسین اول ناطقه آرای حکم پرور کیم  
لال اولور مجلس فیضکده سخن پردازان

سنسین اول مردکر مکستر دریادل کیم  
لجه مرحمت و لطفکه یوقدر پایان

سنسین اول زبده ارباب اصالت که مدام  
وجه پاککده ایدر نور نجات لمعان

سنسین اول مردمک اعین اصحاب دها  
که ایدر مسلك عالیکی جهان استحسنان



بوله‌ماز شیمه پاکیزه که بر کیمسه قصور  
حسن اطواریکه دلبسته در اهل عرفان

اعتراف ایلپور اهلیتکی دشمن و دوست  
فضل و عرفانکه بوندن بیوک اولماز برهان

ایلدی فروه بیضا ایله قدرک برتر  
راه صدق ایچره کوروب ذاتکی شاه دوران

اوله برشاه دل آگاه کرم پیرا کیم  
درکه اقدسیدر ملجأ اهل ایمان

سایه انداز اوله‌لی تختکه سلطنته  
اولدی کوندن کونه انوار عدالت رخشان

روش معدلتی باعث شان دولت  
مسلك مرحمتی السنه آرای جهان

نه شرفدر بوکه بر بویله شهک عصرنده  
شیخ الاسلام جهان اولدک ایا نادره دان



نه قدر ایلسه اطرا قلم اوصافکده  
ایده مز بیکده برین سلك بیانہ اتیان

کنج معنیده بولنماز سکا لایق تعبیر  
عاجزم ایلیم مدحکی حقیله بیان

عجزمی معترقم وصفکه قارشى یوقسه  
شمدی اعجاز معانیده بنمدر میدان

شعرم آرایش کلزار سختدانیدر  
طرز انشادم ایدر بلبل نظمى رقصان

ایلرم ملک معانی بی سراسر تسخیر  
هرنه دم وادی نظم ایچره ایدر سه جولان

رفعت شعرمه دلداده علو معنی  
برغزلله ایدیم پایه طبعم اعلان

« اولدی عشقیله کوکل برکوزلك سرکردان  
نازنینانی ایدر حسن اداسی حیران



زلفی سنبل رخی کل دیده سی ترکس لی مل  
 اوپری صورتہ عاشق نصل اولماز انسان

رشك ايدر قامت بالاسنه سرو آزاد  
 ايمر نيز شيوة رقتارينه تسنيم روان

نيز برج ملاحتر او شوخ طناز  
 جان ويرر حسن دلاراسنه ماه كنعان

ايتسه ده ايتسه ده لطفنه شايسته بني  
 قرش خاك قدم نازكي اولسون دل و جان «

پايه طبعي اظهار نه حاجت وصفي  
 سني اعلى بيلير اول عارف پيداوتنهان

ايدرك طي كلام ايله كمافي الاول  
 روز و شب ادعيه عاليه سن ورد زبان

سايه معدلت آراي شهنشاهيده  
 ايله ذاتي هرايشده موفق يزدان



دمبدم قصر دلی کعبه اشواق اولسون  
ایلدکجه دوران طاق سمدده قمران

\*  
\* \*

— ۲ —

معروض داعی دیرینه لریدرکه  
توجهات باهر الفیوضات بی کس نوازیلرینک ادای  
حق تشکرندن عاجز ایسه مده هر زمان:

یارب بشرع انور مفتی الانام عصرک  
کوندن کونه جهانده اقبالن ایله مزداد  
کوسترمه روی محنت لطفکله قیل تجلی  
کاشانه فؤادی اولسون مسرت آباد

قطعه سنی ورد زبان ایتکده اولدیغم کبی وسائل انبساط  
افروز چهره کشای بروز اولدجه ده برای تجدید رشته  
انتساب خاک پای ناصیه پیرای جناب شیخ الاسلامیلرینه  
دخی عرض عبودیته شتاب ایتکلکی لازمه صداقت بیلدیکم



جهتله سنه جديدهنك شرف حلولنى نعم الذريعه عد ايله :

يارب بعصر سيد كونين حشره دك  
ايام عمرين ايت اوكر مكسرك مديد

نوسال خوش ورودينى فرخنده فال قيل  
هر لحظه ايله رونق اقبالنى مزيد

قطعه سنى كويا اوله زق ايفاي فريضه رسم تبريكه مثابرت  
ويكانه باعث فيضم اولان انظار محاسن دثار گراميلرينك  
استزاده ابذالى بابنده تقديم قبالة رقيه مجاسرت ايلرم.  
هر حالده

\*  
\* \*

— ۳ —

معروض داعى ديرينه لريدركه

آستان جناب مفتى الاناميلرينه كسب انتساب من كل  
الوجوه باعث شرف بى حساب اولوب بونك ايفاي  
تشكرى ايجون هر بار ادعيه خيريه مشيختپناهيلريه تزيين  
لسان صداقت شعار ايتكده اولديغم كى وسائل جميله



دوشد كجهدده خصوص مذكورك عرض و بياني جمله  
وظائف رقيتن بيلديكم جهته ايله معراج باهرا لابتهاج  
حضرت فخر رسالتك حسن حولني فرصت عد ايددرك  
تقديم عبوديتنامهيه مسارعت وعاجزانه ليله شريفه  
مذكوره نك تبريكنه اردافاً حق كمتريده بي دريغ بيوريلان  
توجهات فيض غايات ولي النعميلرينك بقا وازديادي  
تمنيسنه محاسرت ايلرم. هر حالده



— ٤ —

معروض داعي ديرينه لريدر كه

عبد احقر لري يتمش اوج تاريخندن بري باب والاي  
مشيخت عظمي ايله بر چوق نيا بتلرده بولنه رق ايفاي  
حسن خدمت ورضاي بارييه موافق حر كته استجلاب  
دعوات خيريه حضرت پادشاهييه غيرت ايتمش داعيانندن  
اولوب مأموريت اخيره عاجزانهم اولان . . . ولايت  
جليله سي مركز نيا بتنده ايكن ظهور ايدن حادثه مندفعه ده



مجرد توجهات محاسن غایات جناب فتواینهایلرینک  
 ثمره باهره سی اوله رق حصوله کلن موفقیت ناچیزانهم  
 لطفاً رهین تقدیر عالی بیورلمسیله و ذاتاً رؤس داعیانهمک  
 توجیهی یکر می سکر سنه بی متجاوز بولنمسیله احسان  
 بیوریلان از میر پایه مجردینک موصل بلاد خسه اولمق  
 اوزره مخرج پایه سیله تصحیحینه ولایت مذکوره دن در سعاده  
 عودت عیدانه می متعاقب خاکی پای امل بخشای ولی التعمیلرینه  
 وضع جبین عبودیت ایتدیکم صیره ده و عد جلیل  
 مراحم دلیل کر مکاریلری شرف تعلق ایتمش اولدیغندن  
 عاطفت مسلمة بنده نوازیلرینه استناداً وعد عالی وجه ایله  
 تصحیح رتبه کترانهم خصوصنه مساعدۀ جلیله شیخ الاسلام  
 میلرینک رایکان بیورلمسی نیازینه محاسرت و یکانه باعث  
 ازدیاد فیضم اولان انظار مکارم دثار گرامیلرینک استزاده  
 ابذالی باینده شفقت معالی منقبت منعمانه لرینه کمال ابتهال  
 ایله دخالت ایلرم. هر حالده



— ۵ —

## معروض داعی دیرینه لریدرکه

بوندن برسنه مقدم بعض اسنادات واهیه اوزرینه  
 تحت محاکمه یه آلتش و جریان ایدن محاکمه نتیجه سنده  
 من کل الوجوه برائتی اثبات ایتش ایسه مده هنوز محل  
 مأموریت کترانه اولان . . . سنجاغی وکالتله اداره  
 ایدلمکده اولوب احقرلری شوراده بوراده سرکردان  
 کز مکده وکوندن کونه احوال ضجرت اشتالم اشتداد  
 ایتکده اولدیغندن و مظلومیتی تظاهر ایدن داعیلری کبی  
 بر عاجزک مدت مدیده معزول بیراقیله رق پامال اولمسنه  
 مرحمت معالی منقبت جناب ولی النعمیلری هیچ بروجه  
 ایله راضی اولمیه جفی بدیهی بولندیغندن نیابت مذکوره یه  
 اعاده ایله احیا بیورلمقلغم خصوصنی تمنی یه جرأت ایلرم.  
 هر حالده



## معروض داعی دیرینه لریدرکه

رادو یشته قضا سنک آب وهواسیله امتزاج اولنه میوب  
 ناسلیج قضا سنه تحویل نیابت ایدلمش وهنوز کالیه کسب  
 عافیت ایدیه میوب مدت نیابت عاجزانه مک ختامنده  
 پک آز برشی قالمش اولدیغندن تجدید مدته عنایت  
 مراحم منقبت جناب مفتی الانامیلری ساحه آرای بروز  
 اولورسه دوچار اولدیغم دیون بی شمار ایله خسته لکک  
 پنجه قهرندن قورتاریلوب یکیدن احیایورلمش اوله جغمندن  
 — هر نه قدر موافق لوازم عبودیت دکلسه ده — خاک پای  
 ناصیه پیرای ولی النعمیلرینی تصدیعه مجبور اولدم.  
 آستان دولترلندن باشقه پناهم واحوال ضجرت  
 اشتمال کترانه می عرض ایله استدعای مرحمت ایده جک  
 برامیدکاهم اولدیغندن بیان حاله اجترا و پیرایه لسانم  
 اولان: «جناب پروردکار ذات ستوده صفات فتواینا -  
 هیلرینی شمس و قمر طاق سماده جلوه کر اولدجه مقام  
 معلائی مشیخته برقرار بیورسون آمین.» درود مسعودینه



تردیفاً مسئول ناچیزانه مک اسعافی خصوصنی کمال ابتها  
ایله تمنا ایلرم. هر حالده

\*  
\* \*

— ۷ —

معروض داعی دیرینه لریدرکه

من غیر لیاقة عهدۀ عاجزانه مه تحمیل بیوریلان  
عشاق مفتیلکنده اون سنه دن بری ابراز حسن خدمته  
ورزش تام وزیور السنۀ اسلامیان اولان دعوات خیریت  
آیات حضرت پادشاهی ایله امرار ایام ایلکده ایسه مه ده  
خدمت مذکورۀ عائله کمترا نه مک امر تعیشنی تأمین  
ایده میوب بار کران ضرورت آلتنده ازملکده بولندیغمندن  
وبوکا ایسه بتون داعیانه مددرس یکانه اولان شفقت  
بنده پرورلری راضی اولمیه جغی بدیدار اولدیغندن حال  
یأس اشتماله مرحمة طریق فیض رفیق نیابته قید و قبولم  
ایله عهدۀ عبیدانه مه صنف رابعدن برقضا نیابتی احسان  
ودوچار اولدیغم شو درد تحمیل سوزدن بو صورتله رهایاب



اولمقلغم خصوصنه مساعده جلیله جناب فتواپناهیلرینک  
ارزان بیورلمسی تمناسنه اجتسار اولندی. هر حالده

\*  
\* \*

— ۸ —

معروض داعی دیرینه لریدرکه

(. . .) نیابتندن انفصالم ایکی سنه بی تجاوز ایتدیکی  
حالده هنوز مناسب بر قضا نیابتنک عهدۀ عاجزانه مه  
تودیعی خصوصنه عنایت بیورلمدیغندن احوال ضرورت  
اشتمال کمترانه ناقابل تحمل بر درجه یه کلدیکی و بوکا ایسه  
آثار فیض مداری هر آن برر صورتله ساحه زیب شکران  
اولمقلده بولنان مرحمت عجزه پروریلری هیچ بر وجه ایله  
قائل اولمیه جنی بدیهی بولنسدیغی جهتله یقینده آچیله جق  
اولان . . . قضاسی نیابتنک احسانیه احیا بیورلمقلغمه  
مساعده جلیله جناب ولی النعمیلرینک بی دریغ بیورلمسی  
نیازی بابنده خاک پای مکارم احتوای دولترینه وضع  
جبین عبودیته هر نه قدر موجب تصدیع ایسه ده متجاسر  
اولدم. هر حالده

\*  
\* \*



— ۹ —

## معروض داعی دیرینه لریدرکه

ایچ ایل سنجاغی مفتیلکی اون بش سنه مقدم عهدۀ  
 داعیانه مه احاله بیوریلهرق ایفای حسن خدمتله مغایر  
 شرع شریف هر بر حرکتدن اجتناب و طرف ذی شرف  
 حضرت پادشاهی یه ادعیۀ خیریه جلبنه سعی بی حساب  
 ایتمش اولدیغم لوای مذکور مجلس اداره سندن تنظیم  
 و مربوطاً پیشگاه دقایق اکتناه جناب فتوایناهی لرینه  
 تقدیم ایدیلن مضبوطه دن آکلاشیاه جنی کی بو خدمت هر نه  
 قدر باعث منجرت ایه ده مفتیلکه مخصوص وظیفه یوز  
 الی غروشدن عبارت اولوب بونکله طقوز نفره بالغ  
 اولان عائلۀ عبیدانه مک اعاشه سی تأمین ایدیه میه جکی  
 بدیهی بولندیغندن و شمعی یه قدر اوته دن بریدن استدانه  
 ایله یاشانه بیلوب بو حالده دوام ایه قابل اوله میه جغندن  
 احوال ضرورت اشتماله مرحمة طریق سعادت رفیق  
 قضایه قید و قبول ایله شو مضیق اضطرار بدن رها



بیور لمقلغمی هر حالدہ مددرس بی چارکان اولان عاطفت  
مسئلہ شیخ الاسلامیلرندن تمنییه مجاسرت ایلرم. اول بابده

\*  
\* \*

— ۱۵ —

معروض داعی دیرینه لریدرکه

محکمه شرعیه تعمیر قبول ایتمز درجه لرده مشرف  
خراب اولوب تجدیدی خصوصنده اصحاب حمیتک مروت  
دیندارانه لرینه مراجعت اولندقدہ بذل مقدور ایلیه جکلری  
آکلا شملغله بوصورته مساعدۀ جلیله جناب فتواپناهیلری  
بی دریغ بیوریلورسه اشراف مملکتک معرفت لریله براعانه  
دقتری کشادینه مبادرت ومفتی افندی داعیلریله قائم مقام  
بک بنده لرینک نظارتی آلتنده جمع اعانه یه مباشرت  
وتقدیم خاک پای دولتلری قیلنان رسم موجبنجہ امر  
انشاسنه مسارعت ایدیه جکنک عرض وبیاننه مجاسرت  
اولندی. هر حالدہ

\*  
\* \*



— ۱۱ —

معروض داعی دیرینه لریدرکه  
مفتی افندی داعیلرینک تحقیق احواله دائر شرف  
وارد اولان امرنامه جناب مشیختپناهیلری مال منیفی  
معلوم کترانه اولدی.

بوابده اطرافلیجه تحقیقاته کیریشلده افندی  
موما الیه هریرده اولدینی کی بوراده ده اکسک اولمیان  
بعض متمولینک اغراض نابجالرینه قضا منر قائم مقامی فلان  
بک بنده لری مثلی آلت اولیه رق سرمو شریعت غرادن  
انحراف ایتمه مک بذل مقدور وبویله لره هیچ بر وقت یوز  
ویرمیه رک اصلاحنه جهد نامحصور ایلکده بولندینی تبیین  
ایتمکله تقدیم عریضه یه ابتدار قیلندی. اول بابده

\* \*

— ۱۲ —

معروض داعی دیرینه لریدرکه  
فلان و فلان آغالر بینده متکون دعوانک سورونجمده



پیرا قلیوب سرعت فصل و جسمنی آمر فی ۱۷ ربیع الاول  
سنه ۳۰۸ تاریخلی و ۴۹ نومرولو امرنامه فتوا پناهیلری  
واصل انامل تکریم ومال منیفی مدرکه پیرای تعظیم  
اولدی.

دعوای محووث عنهانک شمدی یه قدر تأخیری رخا-  
وتدن تولد ایتیموب منازع فیه اولان باغک محالنده کشف  
ومعاینه سی لازم کلمسندن ومذکور باغ قضایه سکر ساعت  
مسافه سی اولان فلان قریه ده اولوب بورالرده ایسه اوچ  
آیدن بری شتا فوق العاده حکمنی اجرا ایتمکده بولمسنندن  
ایلری کلدیکی وهوالر آجیایر آچماز کشف ومعاینه خصو-  
صی بعدالاجرا فصل وحسنه شتاب ایدیه جکی حضور  
معدلت نشور مفتی الانامیلرینه عرض اولنور. هر حالده

\*  
\* \*

— ۱۳ —

معروض داعی دیرینه لریدرکه  
بورا محکمه شرعیه سی اوطورلماز درجه ده مشرف



خراب اولمغله تجیدی ایچون متمولین اهالی لسان مناسب  
ایله تشویق اولنه رق اعطای اعانه خصوصنده بذل مقدرت  
و بوبابده مفتی افندی داعیلر یله قائم مقام قضا فلان بك  
بنده لری عاجزلرینه معاونت ایتدکلرندن پیشگاه معالی  
اكتناه جناب شیخ الاسلامیلرینه تقدیم اولنان رسم موجنبجه  
محکمه مذکورہ نك وضع اساسنه مشابرت قیلندیغی فی ۱۱  
مارت سنه ۳۰۶ تاریخیلہ خاک پای سامی فتوا پناهییلرینه  
عرض و بیان ایدلمشدی .

بوکره محکمه مذکورہ بحول الله تعالی اکمال اولنه رق  
رسم کشادی ولادت باهر السعادة حضرت نبویه مصادف  
اولان یوم مسعودده صورت مظننه ده اجرا و بو وسیله  
جمیله ایله ده هر زمان آرایش السنه اسلامیان اولان :  
« جناب رب عزت مجدد بنیان سلطنت اولان شهریار  
عمران پرور و تاجدار معالی کستر افندمن حضر تلیزینك  
قلب شاهانه لرنی مشرق انوار سرور و سایه معموریتوایه  
خسروانه لرنده ممالك عثمانیه یی برقات دها معمور بیور -  
سون آمین . »

دعای فیض انتماسی ایصال اجابتگاه جناب کبریا



قیلیمش اولدیغنك عرض وانباسنه مسارعت وشو موفقیت  
 کترانه مک محضا حق نامستحق عاجزیده ابدالنسه تنزل  
 بیوریلان توجهات باعث المباهاة مشیختپناهیلرینك اثری  
 اولدیغنی کمال افتخار ایله اعتراف ایدهرک محتاجی بولندیغم  
 حسن انظار محاسن دثار بنده نوازیلرینك بقا وازدیادی  
 نیازینه مجاسرت ایلرم . هر حالده

\* \*  
 \*

— ۱۴ —

معروض داعی دیرینه نریدرکه

مفتی افندی داعیلری مداخلات ناجاسیله موکول  
 عهدء داعیانهم اولان امور قضایی تشویش وحق عاجزیده  
 برطاقم اسناداتده بولنه رق اذهان اهالی بی تخدیش ایتمکده  
 اولدیغندن واقندی موما الیهک اغراض نفسانیه سنه قربان  
 اولمازدن اول بورادن تباعد ایتمککم وجائب احتیاط  
 پروریدن بولندیغندن همان استغفای کترانه مک قبولیله  
 چراغ بیورلمقلغم بابنده امرو فرمان حضرت ولی الامر کدره

\* \*  
 \*



— ۱۵ —

معروض داعی دیرینه لریدرکه

محکمه شرعیه باش کاتبی فلان افندی داعیلرینک  
علیهنه اقامه اولنان دعوانک فصل و حسمیله نتیجه حکمک  
خاک پای مراحم احتوای مفتی الانامیلرندن استعلامنی  
متضمن فی ۲۷ ربیع الآخر سنه ۳۰۸ تاریخلی و ۲۵  
نومرولو امرنامه جناب شیخ الاسلامیلری زیور هامة  
عاجزانهم ومال حقایق اشتمالی معلوم کترانهم اولدی .

کاتب مومالیه کویا فلان محلهده واقع معلوم الحدود  
برقطعه منزل عرصه سنی بنمدر دیه فلان اوغلی فلان آغایه  
فراغ ایتمک اوزره بیک غروش آلمش و حال بوکه سالف -  
الذکر عرصه شریفه خانم نامنده بریسینک عهده سنده  
اولدیفی آکلاشلش اولمغله علیهنه طولاندیر یحیلق دعواسی  
اقامه اولنمش ایسه ده مزبورده شریفه خانم افندی مومالیهک  
خاله سی اولوب عرصه مذکوره مؤخرأ آغای مرقومه  
فراغ ایدلدیکی و بوبابده جزایه تعلق ایدر برجهت کوریلله -  
میوب افندی مومالیهک برائتنه حکم اولنه رق منع



محاکمه سنه قرار ویرلدیکی حضور معدلت نشور فتواینا -  
هیلرینه عرض اولنور. هر حالده

\*  
\* \*

— ۱۶ —

معروض داعی دیرینه لریدر که

بورایه کله لی وجودم آب وهواسیله امتزاج ایده میوب  
صیتمه دینیلن یادکارک اضطراب طاقت شکنانه سنه تحمل  
ایله برابر ادای وظیفه ده قصور ایتمه مکه غیرت ایلور سه مده  
بوکونلرده علت مذکوره حکمنی شدتله اجرایه باشلایوب  
مقاومته محالم قالدیغندن مناسب بر قضایه تحویل نیابتم  
خصوصنه مساعدۀ مرحمت عادۀ جناب ولی النعمیلرینک  
بی دریغ بیورلمسنی یکانه التجا کاهم اولان دارالامان  
سماحتلرینه ناصیه سای عبودیت اوله رق تمنی ایدرم .  
هر حالده

\*  
\* \*



معروض داعی دیرینه لریدرکه  
 نیابتی عهده کترانه مه احاله بیوریلان فلان قضایه  
 مواصلت ایده لی بغایه الله تعالی امور مأموره می حسن  
 ایفایه چالیشیور سه مده ایکی آیدن بری مبتلا اولدیغ صیتمه  
 دینیلن علت طاقت کدازدن خلاصک چاره سنی بوله میوب  
 علت مذکوره الان حکم فرما اولدیغی واطبای حاذقه دن  
 فلان بك بنده لرینک ویرمش اولدیغی راپور مألندن  
 آکلاشیله جنی وجه ایله تبدیل آب وهوا ایتکلکم لازمه دن  
 بولندیغی و حال بوکه بوجوارده هواسی کوزل بریر اولدیغی  
 جهتله فلان قضا نائی فلان افندی داعیلریله مخبره  
 اولنوب افندی مومالیه بجایش قضایه موافقت ایلدیکندن  
 مسلم انام اولان شفقت عالم پسندان لرینه صیغنه رق بجایشمزه  
 مساعدۀ جلیله فتواپناهیلری رایکان وشاید بو خصوصه  
 مساعدۀ بیورلمازسه یرمه دیکرینک تعینیه استغفای  
 عاجزانهمک قبولی خصوصنده اظهار احسان بیورلمسنی  
 کمال ابتهال ایله استرحام ایلرم. هر حالده



## — ۱۸ —

معروض داعی دیرینه لریدرکه

عاجزانه شمدی به قدر بولندیغم نیابتلرده منهج استقامتدن آیرلامغه غیرت وبوصورتله استجلاب دعوات خیریة حضرت پادشاهی به بذل مقدرت ایتمکده اولدیغم باب فتواجه معلوم ایسه ده اوتهدن بری محکمه نظامیه مدعی عمومی معاونی فلان افندی بنده لری محکمه شرعیه به عائد دعاوی به مداخله به آلمش اولدیغندن افندی مومالیه به بوبابده میدان ویرلمدیکی جهته حق کترانه مده عداوت پیدا ایدوب داعیلرینی لکه ملک ایچون بوکونلرده علیهمده خاک پای جناب شیخ الاسلامیلرینه تقدیم اولنحق اوزره برطاقم اسنادات واهییه بی حاوی بر مضبطه تنظیمی خصوصنه اهالی بی تشویق ایتمکده اولدیغی خبر آلمغله حضور عدالت نشور مفتی الانامیلرینه عرض حاله مجاسرت ایلرم . هر حالده

\*  
\* \*

## — ۱۹ —

معروض داعی دیرینه لریدرکه

من غیر لیاقة نابی بولندیغم . . . قضاسی نیابتندن



مدت عاجزانه مک انقضاسنه آلتی آی قاله . . . قضاسی نای  
ایله حسب الایجاب بجایشمره فرمان بیورلمش ایدی.  
هو الرک فبالغنه باقلمیه رق همان یوله چیقلمش و بناءً علیه  
بر چوق مصارف اختیار یله قضای مذکوره وارلمش  
اولدیغندن تلافی مافات ایچون مددرس بی چارکان اولان  
مرحمت مسلمة مشیختینا هیلرینه دخالتله مدت کترانه مک  
تجدیدی خصوصنی تمنا ویکانه مدار تفیضم اولان حسن  
توجه ولی النعمیلرینک حق داعیانه مده بقا وازدیادی  
استرحامیه خاک پای امل پیرای دولتارینه - مجبول  
اولدقلری خصلت نحبیه عجزه پروریلرینه استناداً -  
تقدیم عریضه ناچیزی یه اجترا ایلرم. هر حالده

\*  
\* \*

— ۲۰ —

معروض داعی دیرینه لریدرکه  
نیابتی عهده داعیانه مه احسان بیوریلان . . .  
قضاسنه کیتدیکم کوندن بری مصالح عبادی برسرعت



ممکنه ايله برنامج شرع شريف رؤيت وبوصورتله استجلا ب  
 دعوات خيريه حضرت پادشاهي به صرف ماحصل غيرت  
 ايلكده ذره قدر قصور ايتديكم حالده كويا محكمه ده  
 ايشلره باقليوب اعلاملر زمانيله اصحابنه ويرلمديكي  
 حضور معدلت نشور شيخ الاسلاملرينه برغر ضكار طرفدن  
 اخبار وبونك مقام مشيخت عظمادن مقارن صواب اولوب  
 اولمديغي خصوصي قائم مقام قضادن لى السؤال موما -  
 اليه ده مجلس اداره اعضاسندن فلان آغانك تشويقيه  
 اسنادات واقعه يي طوغرى اولمق اوزره خاك پاى  
 دولترلينه عرضه تصدى ايتديكي استخبار اولمغله - هر  
 نه قدر بوكي احباب اغراضك عوعوه قيلندن اولان  
 تفوهات نابجالرينه حواله سمع اعتبار بيورلماز سده ده -  
 اسنادات مذكوره يه وجود ويريلوب لايقيه تحقيق  
 اولنمقسزين عزلم طرفنه كيدلمه مسى استرحامنه مجاسرت  
 وحمايه شفقت وايه مفتى الاناميلرينه دخالتله كبار وصغار  
 حقنده مبذول اولان مرحمت مسله فتواپناهيلارندن  
 حصه دار عاطفت بيورلمقلغم نيازينه مبادرت ايلرم،



— ۲۱ —

معلم الکمال افندمر

مشاهده دیدار دها دثاریکز ایله هنوز قریرالین  
اولق دولته مظهر اوله مدمسده اوته دن بری آثار  
برکزیده فاضلانله ری مطالعه سیله شرفیاب اولمده بولندیغ  
جهتله ینه مختیارم.

بو بایده عهده تلیدانه مه ترتب ایدن وظیفه شکر-  
گذاری بی اداده قصور اتمه مک چالیشیور سه مده شمدی به  
قدر تقدیم عبودیتنامه به جسارت ایده میشمه سبب ذات  
والای فضیلت اتمای نحریرانه کزی تصدیعی تجویز  
ایده مدیکمدر.

نام کترانه مک دفتر تلامذه ده - اگرچه یر بولمغه  
استحقاقی یوقسه ده - مقید بولنمق شرف عالمهاسنه مظهر  
اولق آرزوسی بوورقپاره بی تسطیره جرأت بخش اولدیغندن  
شو قصورمک عفوینی استرحام ایدرم. باقی...



— ۲۲ —

## فضیلت‌آب افندمز

ذکر جمیل فاضلانہ لری سامعہ پیرای کمتری اولنجہ  
 بر حس مین ولا کوکلی سراسر استیلا ایتش ایدی .  
 احساننامہ کزده ابرازینہ تنزل بیوریلان مآثر و داد  
 نوازش اتما او حس مینی دو بالا ایلدی .  
 بونک حقیله لازمه تشکرینی ایفا ایدہ میہ جکمی  
 اعتراف ایله قصور واقعک عفوینی تمنا و خاک پای فضیلت  
 احتوای سامیلرینہ عاجزانہ تحیات فائزہ اتخافیلہ قبولنی  
 رجا ایدرم . باقی...

\*  
\* \*

— ۲۳ —

## افندمز !

نزد عالی‌کرده معامله اخوتکارانه‌ک هرکسه بردرلو  
 اولسی تجویز ایدیایر مواددن بولمیدیغنی بیلدیکم ایچون



دکرسز لکمدن قطع نظر له خاک پایکزه بعض شیلر سپارش  
ایتمشدم، بونلر هنوز ورود ایتمدی.

یوقسه داعیکزی — استانبولدن مبادت ایتدیکم کی  
— اونوتدیکم می؟ بویله اولسه — حبل متین اخوته  
استناداً سپارش ایتمش اولدیغم شیلری — اهل ایتیموب  
ارسال بیورردیکز.

بوابده کی مؤاخذمک حقسز اولدیغنی اثبات ایده جک  
بر دلیل کوستره بیلیرسه کز منکسر اولان دل بی کینه می  
آباد و بو صورتله مخلصکزی شاد ایتمش اولورسکز. باقی  
اخوت.

\*  
\* \*

— ۲۴ —

سماحتلو افندم حضرتلری

پیرایه انامل عاجزی اولان احساننامه گرامیلری  
مسرت بخش دل کتری اولدی. مطالعه سی شرفیاه تشرف  
ایدن کوزلرم پرتوافشان نور سرور اولوب — معشوقه سنک

التفات حیات بخشاسنه مظهر اولان عاشق متحسر کی -  
پر ابتهاج کسلا م.

کوندن کونه حسن توجه سمو حیلریله بین الاقران  
کسب تمیز ایتمکده اولدیغم جهته اعلان بختیاری ایتمکدن  
گندمی آله میورم.

بونک حق تشکرینی ایفا ایچون لسان اخلاصمی  
ازدیاد عمر و اقبال ولی نعمتیلری دعاسنه حصر ایله وظیفه  
رقیتده قصور ایتمه مک چالیشیور سه مده بوبابده کی عجزم  
لایقیله وجیبه شکر گذاری نی ادایه مانع اولیور.

هر حالده قصور مک عنویله حق کتریده ابدال بیوریلان  
حسن نظر فیض اثر منعمانه لرینک دوامی استرحام ایلرم.

تسریری امر بیوریلان فلان افندی داعیلری همان  
مناسب بر قریه یه کوندردی . موما الیهک استحصا  
مسرورتی ایچون الدن کلن معاونتده قصور ایدلیه جگنی  
حضور عالیترینه عرض ایله افتخار ایلرم . باقی



فضیلتلو افندم حضر تتری

صبح غزته سنده برادر عالیترینک ترك محكمه جهان  
ایتدکلرینه دأر کوریلن فقره غم پرور عاجزلرینی پانال  
گذر ایلدی.

مرحوم هر جهته اودا و بندکاننه شفیق بر وجود  
مراحم رفیق اولدیغندن ضیاعی جمله بی متأسف ایتشد.  
باخصوص مشارالیهك ارتحالی کمتلری کبی سایه سامیلرنده  
تقیض ایدن ارباب ابتهالی داغدار والی آخر العمر روح  
پرفتوحته فاتحه خوان ایلیهرك اشکبار ایتسی طبعیدر.  
خدا بیایر ممکن اولسه ایدی مرحومک پرینه  
بی امتنان فدای جان و جهان ایدردم. نه جاره که عاده الله  
جاری اولمامش!

ذات فضائل سمات کریمانه لری کبی « الموت تحفة  
المؤمن » نه دیمک اولدیغنه واقف بر مرد عارفک محتاج  
تسلیت اولمدقلری بدیهی بولندیغندن بو بابده کف لسان  
واو وجود معالی منقبت غنوده خاک رحمت اولدقجه خاندان

عالی‌لریله افندمرك صدر عافیتده کامران اولملری دعاسنی  
رفع بارگاه مستعان ایتمکده اولدیغمک عرضنه محاسرت  
وتوجهات بنده پروریلرینک بقاسنی استرحامه مبادرت  
ایلرم.

\*  
\* \*

— ۲۶ —

فضیلتندم افندم

محل مأموریت علیه‌لرینه سالمأ مواصلت فاضلانه‌لرینی  
مبشر وحق عاجزانهمده ابدال بیوریلان حسن توجه  
سامیارینک دوام وتزایدینی مشعر التفاتنامه کریمانه‌لری  
رونق افزای نظر تکریم اولدی.

کرمنامه گرامیارینک دل بی‌کینه‌مه پرتوانداز اولان  
اشعه نشاط افزاسی باعث شکران عظیم اولوب بوبابده‌کی  
منتدارلغمک - صداعی موجب اولور دیه - عرض  
وبیانندن اجتناب وخال‌پای حقوق پروریلرینه تقدیم  
عریضه وجیزه‌یه شتاب ایدلدی. باقی

\*  
\* \*



افندمز!

ذات عالی‌رندن صیق صیق آلمقده اولدیغم احساننامه‌لرک  
بوگونلرده آردسی پک اوزادی. حتی فی ۱۱ تشرین اول  
سنه ۳۰۶ تاریخلی التفاتنامه‌لرندن صکره ایکی آی مرور  
ایتدیکی حالد هنوز برکرمنامه‌لرینه دسترس اوله مدم.  
هرپوسته دیده حسرت دیده‌سنی مکتوب عالی‌لرینه  
وقف ایتمش اولان بر غربت زده‌یی بویله اوزون اوزادی‌یه  
مه‌جور التفات پیرامق روامیدر؟  
بنده‌لری کبی پامال نحول اولان بر بی چاردنک  
گرمنامه‌لر ارسالیله تلطیف خاطرینه تنزل بیورملرینی  
شیئه عاجز نوازانه‌لرینه استناداً استرحام ایلرم. باقی

\*  
\* \*

سماحتلو افندم حضر تلری

خاک پای فیض بخشای جناب سمو حیلرینه برای تأیید

رشتهٔ اختصاص و سیاه جوی عرض اخلاص ایکن لیلہ  
 مبارکہ و غائبک شرف حلولی بو مقصد عبیدانہ می ایفا  
 ایچون ذریعۂ یکانہ اولملہ آستان سعادت آشیان ولی نعمتیارینہ  
 تقدیم کلدستۂ عبودیتہ ابتدار و شب مذکورده :

بحق نور پاک فخر عالم  
 قبول ایله دعای یا الہی

مقام سلطنتده ایله قائم  
 کمال عافیتله پادشاهی

قطعه سنه تردیفاً بویله نیجه نیجه لیلای مسعوده نک مشاهده -  
 سیاه سایهٔ عاطفتوایه حضرت شهریاریده کامکار بیورملری  
 درود مسعدت نمودینی رفع بارگاه پروردکار ایتمش  
 اولدیغمک بیانیاه حق کتریده ابدال بیوریلہ کلن توجهات  
 معالی غایات بنده نواز یلرینک بقا وازدیادی تمنیاتنه  
 اجتناسار قیلندی. هر حالده



## — ۲۹ —

افندمن!

بر قاج سینه مقدم بلدیہ ریاستندن وقوع انفصال  
عالیئرینه مبنی ریاست مذکورہ نك ید ناہلہ کچمسی  
عاجزلریلہ عموم ارباب حمیتی دلریش ایتمشدی . چونکہ  
زمان ریاستلرنده الآن آرایش عیون شکران اولان نیجه  
آثار نافعہ وجودہ گلشدرکہ ہربری درایت کاملہ لرینہ دال  
برر برہان بی ہمالدر .

ہلہ کچن ہفتہ بزم فلان بك طرفدن آلدیغم التفاتنامہ دہ  
ینہ امر مهم ریاستک عہدہ کار آکاہیلرینہ احالہ قیلندیغی  
تبشیر اولنمغلہ حسب العبودیہ وظیفہ تبریکہ مسارعت  
وسایہ شاہانہ دہ بر وجہ دلخواہ عالی مملکتک احیاسنہ  
موفقیتلہ بین الاقران تعالی بیورملری دعاسیلہ تزیین  
لسان مصادقت ایلرم . باقی حسن توجه کریمانہ لرینہ شدت  
احتیاج .

— ۳۰ —

سماحتلو افندم حضر تتری  
 حق نا مستحق داعیانه مدہ بی دریغ بیوریلان توجہات  
 مستلزم المباحاتہ کر مکاریلرینک ادای وجیبہ تشکری ایچون  
 روز و شب دعای توافر عمر و اقبال سموحیلرینی ایصال  
 قبولخانہ جناب رب الارباب و وسائل جمیلہ دوشدکجہ  
 خاک پای مکارم احتوای سامیلرینہ برای تجدید انتساب  
 تقدیم عبودیتنامہ یہ شتاب ایتمکده اولدیغم کبی لیلہ مبارکہ  
 رغائبده دخی با کمال خلوص بال:

ولی نعمتک قدرین جهانده  
 ایدوب کوندن کونه برتر الہی

سرای عافیتده ایله دائم  
 بحق حضرت حیدر الہی

قطعه دعائیہ سنی رفع بارکاه خدای متعال ایلش اولدیغمک  
 عرض و بیاننہ اجتسار و ایفای رسم تبریکہ مسارعته



محتاجی بولندیغم حسن نظر محاسن اثر منعمانه لرینک  
کماکان دوام وازدیادی نیازینه ابتدار ایلرم. هر حالده

\*  
\* \*

— ۳۱ —

سماحتلو افندم حضرتلری

وسائل جمیله دوشدکجه خاک پای فیض احتوای  
جناب سموحیلرینه تقدیم عبودیتنامه ایله تجدید رابطه  
انتسابی وجیبه دن بیلادیکم جهتله سنه جدیده نك شرف  
حولنی فرصت عد ایدهرک تبریکنه محاسرت وانفاس  
معدوده حیاتی اثنیه دولترلرینه صرف ایتکلکی لوازم  
شکرکذاریدن بیلن داعیلری کبی برکمتری توجهات معالی  
غایات کرمکاریلرینک ابذالیله کامور بیورملری استرحامنه  
مشاربت و « جناب خالق الایام والشهور سایه معالی وایه  
حضرت پادشاهیده بویله نیجه سنین جدیدیه ادراک ایله  
مسرور بیورسون » دعای رقیق پیراسیله تزیین لسان  
مصادقت ایلرم.

\*  
\* \*

— ۳۶ —

### سماحتلو افندم حضرتلری

الطاف جهان مطاف شاهانه لریله هر بار بندکان  
 صداقت انتمای دلسیر و باخصوص التفات معالی غایات  
 خسروانه لریله داعیان استقامت پیرانی تسریر بیور مقدمه  
 اولان خلیفه برکزیده رب العالمین و نور دیده کافه  
 مسلمین شهریار عالی تبار من تاجدار محاسن کردار من افند من  
 حضرتلرینک ذات فضائل سمات سموحیلرینه بر قطعه  
 نشان عالی عثمانی احسان و بوضورتله ذاتاً محسود یار  
 واغیار اولان مهر اقبال دولترینی برقات دها رخشان  
 بیوردقلری واصل صماخ عاجزی اولدی، کوکلم نور  
 سرور ایله طولدی.

بو سرور نامحصور ایله زیور لسان خالص البیانم  
 اولان دعای ازدیاد عمر و اقبال ولی نعمتیلرینی تکرار  
 و خاک پای کمالات احتوای کرامیلرینه تقدیم تبریکنامه  
 کمتری به اجتناسار و حق نامستحق عاجزیده رایکان بیوریلان



توجهات مکارم آیات منعمانه لرینک بقا و تزیادی استرحامنه  
ابتداز ایلرم. هر حالده

\*  
\* \*

— ۳۳ —

سماحتلو افندم حضرتلری

دلالت بنده پروریلریله نیابتی عهدۀ داعیانهمه احسان  
بیوریلان فلان قضایه فی ۱۱ جمادی الآخره سنه ۳۰۸  
تاریخیله موصلت و امر سموحیلری وجه ایله قضای  
مذکور مفتیسی فلان افندی حضرتلرینک خاک پای  
فقیهانهرینه یوز سورهرک سلام عالیلرینی تبلیغه مسارعت  
ایلدم.

سایۀ فیضوایۀ سامیلرنده بویله برپیر روشن ضمیرک  
شرف پای بوسیله مشرف اولدیغمدن طولایی مباحثات  
ومرتب ذمت عبودیتیم اولان ادعیۀ خیریه لرینی هر بار رفع  
بارکاده قاضی الحاجات ایتمکده اولدیغمی خاک پای ولی نعمتیلرینه  
عرضه مشارت اولندی.

\*  
\* \*

— ۳۴ —

سماحتلو افندم حضر تتری

کچن هفته کی ترجمان حقیقته کیفسز لکترینه دائر  
اولان فقره بی کمال تأسف ایله او قویوب همان شفایاب  
اولملری ایچون دست نیازی رفع بارگاه مستعان ایلدم .  
صد هزار حمد و شکر اولسون که بو هفته کی ترجمان  
حقیقته: « سماحتلو . . . افندی حضر تتری کمالیله اعاده  
عافیت ایدوب مقام عالیلرینی تشریف بیوردقلری واصل  
صماخ ممنونیتیز اولمشدر. » مرده شوق آوری، مسرت  
بخش دل کمتری اولدی.

فیض بخش قلوب موحدین اولان: « جناب خداوند  
سموات وارضین پادشاه ملک خصلت شهنشاه معالی منقبت  
افندمز حضر تترینی شمس تابان پیرایه آسمان اولدجه  
تختگاه عثمانیده کمال سطوتله مکین بیورسون » درود  
مسعودینه ادعیه خیریه لرینی تردیف ایله تزیین لسان  
ایتمکده اولدینغمی عتبه سمو حیلرینه عرض ایلرم.



## افندم حضرتلری

۱۹ تموز تاریخی احساننامه کزی آلدیغم کوندن بری  
 جواب یازمق ایچون هر نه زمان المه قلم، کاغد آلدیمسه بر  
 مانع ظهور ایتدی، ترك تحریر عریضه یه مجبور اولدم.  
 مثلاً: یازی ماصه سنک باشنه کچوب ده المه قلم، کاغد آله رق  
 تحریر عبودیتنامه یه باشلا دیغم کبی کوه زه بر مسافر کلیر،  
 داعیکزی ساعتلرجه اشغال ایدر. صکره دفع اولوب  
 گیدرسه ده بنده کز ایچون آرتق یازی یازمق قابل اوله ماز.  
 ایشته بویله بر چوق مانع لر شمده یه قدر خاک پای  
 عالیکزه تقدیم نیمیقه یه حیولت ایتدی.

بونی قبول ایتمزسه کز مانع اوله رق: «هر نه زمان  
 احساننامه کزه جواب یازمق ایچون قلمه، کاغده صارلدمسه  
 ایستدیکم کبی عرض عبودیتدن عاجز قالدیغم جهتله بوناری  
 قالدیروب آتمغه مجبور اولدم.» دیمش اولسه م بیلم قبول  
 بیوررمیسکزه؟

زهی سعادت و اقبال اگر قبول افتد

اگر قبول بیورمازسه کز محکمه وجدانکزه دخالت  
ایله افسدمن ایچون کوکلمده صاقلامقده اولدیغم حرمت  
ومحبت مخصوصه یی سوزمک طوغری اولدیغنه - حق  
کترانه مده مبدول بیورمقده اولدیغکز حسن توجهه  
استناداً - ایکی شاهد عادل اوله رق اقامه ایدرم.  
بونلری ده استماعه تنزل بیورمازسه کز اعتراف قصور  
ایله عفوی خصوصنی استرحامه جرأت ایلرم. باقی

\*  
\* \*

— ۳۶ —

قضا من نأبی فلان افندی داعیلری اصحاب درایت  
واستقامتدن اولوب بورایه کلدیکی کوندن بری مصالح  
عبادی کونی کوننه رؤیت وبو صورتله استجلاب دعوات  
خیریة حضرت پادشاهییه بذل غیرت ایتیکده بولمغله  
حقننده ایدیلن شکایت حقیقته مستند اولیوب صرف  
غرض شخصیدن عبارت اولدیغکز عرض و بیانیله افندی  
موما الیهک پک آز قالمش اولان مدت نیابتنک تجدید  
و تمیدی خصوصنی خصائل ممدوحه جناب ولی التعمیلرینه



استناد ایله جمله تمنا ومسئول بندکانه مزك اسعافی بابنده  
خاك پای املبخشای شیخ الاسلامیلرینه وضع جبین استدعا  
ایلرز. هر حالده

— ۳۷ —

معروض داعی دیرینه لریدرکه

نیابت شرعیه سی عهده داعیانهمه تفویض بیورلمش  
اولان . . . ولایت جلیله سی اهالی معتبره سی طرفندن  
خاك پای عدالت احتوای جناب فتوایناهییلرینه تقدیم  
قیلنان مضبوطدن ولایت مشارالیه مفتیسی فلان افندینک  
احوال غیر مرضیه ده بولندینی آکلاشادینی بیانیله لازم  
کلن تدقیقات مکمله نك اجراسیله نتیجه سنک ازباری امر  
وفرمان بیورلمش اولدیغندن همان بوبابده تحقیقات عمیقیه  
گیربشادکده افندی موما الیهک حقیقه صفت علیه سنه  
یاقشمیه جق حرکات ناجایه اجتناسازی تبیین ایتدیکی  
وکندیسنندن هرکسی صوغوتمغله هیچ بروقت اشتکادن

خالی قانیمه جفی حس اولنمقده بولندیغی حضور معالی  
نشور شیخ الاسلامرینه عرض اولنور. هر حالده

\*  
\* \*

— ۳۸ —

معروض داعی دیرینه لریدرکه

بعض اهالی اغراض شخصیه لرینه خدمت ایدلمدیکندن  
طولانی حق کترانه مده پیدا ایتدکری عداوتاری ایجابجه  
بر درلو هضم ایددمیوب علیهمده تفوهات کونا کون  
اشاعه سیاه عاجز لرینی ترهیبه وبونکله ده قناعت ایلایوب  
نیک وبدی فرقه مقتدر اولمیان بر طاقم ساده دلانی:  
«نأتمز شویله در، بویله در» دیه آلداده رق بر عرض محضر  
ترتیبیه حضور معدلت نشور جناب مفتی الانامیلرینه  
تسریبه متجاسر اولمشاردر.

معلوم یار واغیار اولان مرحمت بنده پروریاری  
مقتضای منیفجه نادر اولمیان بوکی حالات وشکایاتک نزد  
دولتارنده هیچ بر حکمی اولیمه جفی بدیهیاتدن ایسه ده.



اخلال ایدمک ایستیلن ناموسمک وقایه سی بابنده شفقت  
عادلانلرینه التجایه مجبور اولدم. هر حالده

\*  
\* \*

— ۳۹ —

معروض داعی دیرینه لر بدرکه

نیابتی مودوع عهدء داعیانهم اولان . . . سنجاغنه  
کله لی اعصابه عارض اولان ضعف کوندن کونه تزايد  
ایتمکده اولدیغندن مصالح عبادی وقتیه رؤیته وجودم  
تحمل ایده میوب ایشارک تداخده قالمسینه باعث اولیورکه  
بوده اصحاب مصالحک صیرلانمسنی موجب اوله جنی  
طبیعیدر.

بویله بر شکایتیه میدان ویرانه مک ایسه اخص آمال  
کترانه اولدیغندن وعات مذکوره مجرد موقعک آب  
وهواسیله امتزاج ایدیله مه مسندن ایاری کلدیکی مربوطاً  
تقدیم قیلنان راپور مآلندن مستبان اوله جفندن آب وهواسنک  
جیادتی بلدی دو قنورلری طرفندن توصیه اوانان وانتنای

مدتنه بر بحق ماه قالمش بولسان دکرلی سنجاغی مرکز  
نیابتنه تحویل مأموریتیم و اولمدیغی حالدده استعفاای عبیدانه مک  
قبولیه چراغ بیورلمقلغم خصوصنی استرحام ایلرم. هر  
حالدده

\*  
\* \*

— ۵۰ —

### فضیلتلو اقدام حضرتلری

سنین سابقهیه نسبتله بوسنه الحمد الله تعالی قضامن  
داخلنده برکت ترابه فوق العاده رونما اولدیغی کبی هر  
گسکده کندی ایشیه اشتغال و زیور السنه اسلامیان  
اولان: «جناب خالق البرایا امیر المؤمنین نجبه سلاطین  
عدل آین خلیفه بی مدانی غازی عبد الحمید خان ثانی  
اقدامن حضرتلرینی الی آخر الزمان تحت عالی بخت  
عثمانیده فرمانفرما بیورسون» درود مسعودیه اصرار  
ایام ولیال ایتکده بولندقلرینک عرضنه ابتدار وسایه  
توفیقاتوایه حضرت پادشاهیده مصالح اهالی بر وجه  
دلخواه عالی رؤیت و بو صورتله استجلاب ادعیه خیریه



جناب ولی النعمیٰ به صرف قدرت ایدلمکده اولدیغنىك  
بیاننه اجتسار وحق داعیانهمده حسن توجه فاضلانهلرینك  
دوام وتزایدی رجاسیله ختم گفتار ایلرم .

\*  
\* \*

— ۴۱ —

معروض داعی دیرینه لریدرکه

جناب خداوند معین آرایش مسند مشیخت مددرس  
ارباب ضجرت اولان ذات شفقت سمات ولی النعمیلرینی  
سایه تعالیوایه حضرت پادشاهیده الی آخر الایام جاه  
جلیل فتواده کابین بیورسون .

کترلری بیک ایکی یوز سکسان سکر سنه سی اجرا  
اولنان رؤس امتحاننده برنجیلک شرفی احراز ایله من  
غیر حد مذاکره علومه مباشرت ومجرد اثر حسن نظر  
مشیختیناهیلری اوله رق کچن سنه اعطای اجازت ایدوب  
بین الاقران کسب امتیاز ایتمش اولدیغم حالده هنوز عائله  
عاجزانهمی ادارهیه کافی معاشه نائل اوله مدیغمندن وبو  
یوزدن گرفتار اولدیغم دیون کثیره یی تسویه ایدهمیوب

گوندن كونه تضاعف ایتكده اولان بوباركرانك آلتنده  
 ازلكده بولدیغمدن شو حال یأس اشتغال عبیدانه مه  
 نهایت ویرلك اوزره فتواخانه یه چراغ بیورلمقلغم خصوصنه  
 مساعدۀ جلیله عجزه پروریلرینك بی دریغ بیورلمسی بابنده  
 مرحمت مسلمۀ دولترلرینه التجایه مجبور اولدم. هر حالده

— ۴۲ —

اوقاف همایون نظارت جلیله سی جانب عالیسنه

دولتو اقدام حضرتلری

اهالیسندن اولدیغمز (اوروج غازی) محله سنده واقع  
 اصحاب خیراتدن مرحوم اسماعیل آغا جامع شریفی برخیلی  
 زماندن بری تعمیر ایدلمدیکنندن خرابه یوز طوتمش  
 واوزرنده کی طوغله لر فرسوده لشدیکی جهتله باران نزولنده  
 دروننه سیلان ایله مضر و شاتی چور و تمکده و هر طرفندن  
 تخته و دیرك پارچه لر یله سیوه لری دوکلمکده بولمخش اولدیغی



گی یا غمورلو کونارده و باخصوص موسم شتاده جامع  
شریف مذکورده ادای صلات قابل اولدیغندن اوقات  
خمسده جوامع بعیده به عزیمته مجبور اولوب بو بایده  
فوق العاده مشقت چکمهکده یز.

جامع شریف مذکور بر آز وقت دهها حال خرابیده  
بیراقیله حق اولورسه تعمیر غیر قابل بر درجه به کله جکی  
درکار و بویله بر مبعده شریفک محوی هیچ بر زمان تجویز  
بیورلیوب یکیدن انشاسی ایسه مبالغ کلیه به توقف ایده جکی  
بدیدار اولدیغندن احیای مبرات خصوصنده مبدولیت  
عنایات دیانت آیات شاهانه لری آن بان مشهود عیون شکران  
اولان شهریار معموریت پرور و تاجدار عاطفت کسرت  
افدمن حضرتلرینک اثر جلیل هایونلرینه اقتفاءً نیجه  
اما کن مقدسه نک ترمیمی اوغرنده صرف همت و بو وسیله  
ایله جانب معالی مناقب حضرت خلافتیناهی به ادعیه  
خیریه استجلابنه بذل قدرت بیوره کلدکلی هر روز  
ساحه آرای بروز اولان آثار موفقیت دثار دولتلر یله  
مدلل بولندیغندن مارین و عابرینک نظر تأسفنه چارپمقده  
اولان جامع شریف مذکورک حجره سیله برابر صورت

مکمل شده تعمیری خصوصاً هم جلیله نظارتیناهیاری  
بی دریغ بیوریلهرق ذاتاً اقدس وظائف عبودیتز اولان  
دعای ازدیاد عمر وشوکت امیر المؤمنینه بر قات دها  
مواظبته مجبور بیور لمقلغمز باینده خاک پای امپیرای  
آصفانه لرینه تقدیم استرحامنامهیه مجاسرت ایلرز. اول  
بابده



— ۴۳ —

خاک پای سائی نظارتیناهییلرینه

دولتو اقدام حضرتلری

زمان فیض اقتران شاهانه سی دور معارف دینلکه  
شایان اولان حامی ارباب علم ومعرفت پادشاه معالی  
منقبت ولی نعمت بی منت اقدام حضرتلرینک سایه  
ترقیوایه ملوکانه لرنده اتمام ترجمه سنه موفق اوله رق مربوطاً  
تقدیم ایلدیکم ( . . . ) ک ( . . . ) عنوانی آلتنده جزء جزء



طبع و نشر ايدلمسى بابنده مساعده جليله نظارت پناهيلرينك  
ارزان بيورلمسى نيازينه اجتساز ايلرم. هر حالده

\*  
\* \*

— ۴۴ —

دولتو افندم حضرتلرى

مربوطاً تقديم پيشگاه دولتلرى قيلنان (. . . )  
عنوانلى اثر عاجزينك طبع و نشرى خصوصنه مساعده  
جليله نظارت پناهيلرينك بى دريغ بيورلمسى بابنده امر  
و فرمان

\*  
\* \*

— ۴۵ —

معروض داعى ديرينه لريدركه

جناب قادر بچون ذات ولى النعميلرينى اكدار صوريه  
و مغزيه دن مصون و عمر دولت فتوا پناهيلرينى افزون  
بيورسون آمين.

قاین پدرم فلان افندینک وقوع وفاتنه مبنی عالمه  
 کترانه مک امر ادارد لرینه نظارت ایده جک بر کیمسه لری  
 قالمیوب بونلرک ترکه وسائر دیه دائر اولان امور و خصوصنی  
 تسویه ایتک اوزره استانبوله کلمکلم لازم کلدیکندن  
 اوچ آی قدر موما الیه مک یانلرنده بولنمقاغمه مساعد  
 حضرت شیخ الاسلامیلرینک رایکان بیورلمسی بابنده خاک  
 پای شفقت پیرای دولت لرینه وضع جبین ابتهال ایلرم.  
 هر حالده

\*  
\* \*

— ۴۶ —

دولتو افندم حضرتلری

مدعی عمومی معاونی فلان بک بنده لری معامله  
 در شتانه سیاه هر کسی کندیسنندن بیزار و محکمه یه وقتیه  
 کلوب کیتدیکنندن مصالح عبادی سکتهدار ایتکده اولدیغی  
 وافندی موما الیه بوحالردن واز کچمسی ایچون نصایح  
 لازمه اعطاسنده قصور ایدلمیوب کرات ایله اصلاح نفس  
 ایتسی توصیه اولنمش ایسه ده نصیحت قبول ایدر طاقمدن



اولمدیغی جهتله کیفیتک خاک پای معدلت پیرای نظارتینا هیلرینه  
عرضنه مبادرت قیلندی. هر حالده

\*  
\* \*

### — ۴۷ —

جناب خداوند جهان شهریار عدالت پرور تاجدار  
مرحمت کستر خلیفه بالحق ولی نعمت اشفق آرایش تخت  
عثمانی سوکیلی پادشاهمز غازی عبدالحمید خان ثانی افندمز  
حضر تلرینی ماتعاقب الملو ان کمال سلطنتله مقام مقدس  
خلافتده حکمران بیورسون آمین.

چاکر لری یکر می سنه دن بری در سعادت بدایت  
محکمه سی ایکنجی جزا دائرہ سی برنجی صنف ضبط کتابتنده  
بلا قصور ایفای حسن خدمته سعی موفور ایتمکده  
ایسه مده بر مقتضای طالع وارون امثال عاجزانه مه نسبتله  
یک دون بر مرتبه ده قالمش اولدیغمدن و بو حال مغدوریت  
اشتماله ایسه هر بار اشعه جهان افروزی برر صورتله  
عیون آرای کبار و صغار اولان مرحمت خلافتینا هیلری

راضی اولیه جنی بدیهی بولندیغندن یکانه امیدگاه بی پیار کان  
اولان شفقت معالی منقبت خسروانه لرینه صیغنه رق بو  
کره منحل اولان وقاعدۀ تسلسله بناء حق صریح کترانه م  
بولنان محکمه مذکوره باش کتابت خدمتک عهدۀ  
عبیدانه مه احسان بیورلمسی باینده ئدۀ سنیۀ ملوکانه لرینه  
مستمندانه دخالت وروز و شب ورد زبان عبودیتیم اولان:  
«جناب رب العالمین پادشاه عدالتند من ولی نعمت بی منت  
افند من حضر تلرینی الی آخر الایام سریر شوکت مصیر  
عثمانیدد خواه شاهانه لری اوزره کامبین بیورسون آمین»  
دعای واجب الاداسنه تردیفاً مسئؤل احقرانه مک  
اسعافیه دلشاد بیورلمقلغم استرحامنه محاسرت ایلرم.  
هر حالده

\*  
\* \*

— ۴۸ —

معروض داعی دیرینه لریدرکه  
حق کتریده دائماً ابذل بیوریلان وادای وجیهه  
تشکری درجه امکاندن بغایت عالی اولان الطاف علیه



سماحتینا هیلرینه ضمیمه احسان نیابتیه بکام بیورلدیغم  
 (... ) قضا سینه وصولدن بری مصالح عبادی دخواه  
 دولترینه توفیقاً فصل و حسم ایله استحصال خشنودی  
 اهالی به غیرت و استجلاب دعوات خیریه حضرت ولی  
 النعمیلرینه صرف مقدرت ایتمکده ایسه مده بورانک ثقلت  
 آب وهواسندن متولد امراض شدید عا جزلرینی تبدیل  
 آب وهوایه مجبور ایلدیکنندن واستانبوله عودتم ایسه  
 گرك نقداً و گرك بدنأً مستحیل درجه سنده بولندیغندن  
 حال پرملاله مرحمة لطافت آب وهواسی اطبای حاذقه  
 طرفلرندن توصیه اولان وبورایه (... ) ساعت مسافه ده  
 بولنان (... ) قضاسی نیابتنک احسانیه احیا و گرفتار  
 اولدیغم شو مضیق بلادن رها بیورلمقالغم تمناسنه اجترا  
 اولندی. هر حالده

\*  
\* \*

جناب آفریننده زمان و آسمان شهریار معصومیت پرور  
 تاجدار دیانتکستر آفتاب سپهر عثمانی سوکیلی پادشاهمز

غازی عبدالحمید خان ثانی اقدمز حضرتلرینی کلبانک  
صلات سامعه نواز ارباب طاعات اولدجقه مقام مقدس  
خلافتده کامران بیورسون آمین.

ایوانسرای جوارنده عتیق مصطفی پاشا محلهسنده  
اعظم اصحاب کرام فقاہت اتسامدن ابو ذرغفاری [۱]  
رضی عنه الباری حضرتلرینک تربہ شریفه سی مشرف  
خراب اولدیغندن و بویله بر مقام عالینک حال خرابیده  
قالسنه کعبہ قلوب موحدین اولان وجدان حیت بنیان  
خلافتیناهیلری قائل اولمیه جغی هر آن عیون آرای اهل  
ایمان اولان آثار خیریہ شاهانه لریله مدلل بولندیغندن  
تربہ شریفه مذکورہنک خزینہ خاصہ ملوکانه لرندن تعمیر  
خصوصنه مساعدہ جلیله شهنشاهیلری بی دریغ بیورلمسی  
نیازیله سده سنیہ خسروانه لرینه وضع جبین عبودیت  
ایلرزه هر حالده

\*  
\* \*

---

[۱] مشارالیه حضرتلری مدینہ منوره قربنده کاش (ربذه)  
نام قریه ده هجرتک اوتوز ایکنجی سالنده ارتحال بیورمشلردرم



— ۵۰ —

## معروض داعی دیرینه لریدرکه

ذره قدر استحقاقم اولمدیغی حالده مجرد حسن نظر  
فیض اثر ولی النعمیلر یله نیابتنده بولندیغم (... ) ده امور  
مأموره می حسن ایفایه بذل مقدرت و درود سعادت  
تمود حضرت پادشاهی یه تردیفاً اثنیه جناب مفتی الانامیلرینه  
صرف انفاس رقت ایلکده قصور ایتیمور سه مده بورانک  
وخامت هواسی صیره سیله بتون چا کر خانه خلقنی صیغه  
دینیلن علت تحملکدازه دوچار و داعی کمتلرینی ایسه  
فوق العاده بیزار ایتمکده اولدیغندن و مملکت طیبیلرینک  
معالجات عطاریه سندن ایسه هیچ بر منفعت کور یله مه مکده  
بولندیغندن مناسب بر محله نیابت عاجزانه مک تبدیلی  
خصوصی هر زمان مشهود دیده شکران اولان شفقت  
شیخ الاسلامیلرینه استناداً استرحام ایلرم. هر حالده

— ۵۱ —

معروض داعی دیرینه لریدر که

جناب رب الارباب سایه سما پایه حضرت پادشاهیده  
ذات مراحم سمات فتواینها لیرینی مقام دولترنده کمال  
اقبال ایله کامیاب بیورسون آمین.

داعی دیرینه لری فاتح جامع فیض لامعنده اون بش  
سنه دن بری مذاکره علوم آلیه و عالیله ایله اوقاتگذار  
اولوب بر مقتضای طالع وارون معاش عاجزانه م عائله  
احقرانه می اداره ایده جک مرتبه یه ایصال اید یله میوب  
یک دون قالمش اولدیغندن و بوحال ضرورت اشتماله  
ایسه آرایش السنه ثنا کویان اولان مرحمت معالی منقبت  
ولی النعمیلری بوجه ایله راضی اولمیه جفی هر زمان برر  
صورتله جاوه کر ساحه امکان اولان تعطفات بی غایات  
منعمانه لریله مدالی بولدیغندن فتواخانه یه قید و قبول  
بیور لمقاغم خصوصنی تنایه مبادرت ومسئول ناچیزانه مک  
اسعافی بابنده خاک پای شفقت پیرای جناب مشیختینا هیلرینه  
وضع جبین ابتهاله محاسرت ایلرم. هر حالده



## — ۵۶ —

معروض داعی دیرینه لریدر که

کمتر لری بر قاچ سنه مقدم اجرا بیوریلان رؤس  
امتحاننده برنجیلک شرفی احراز ایتمش اولوب فقه شریفه  
انتساب ایلک آرزوسنده بولندیغمدن واقدمزک بتون  
داعیانه وباخصوص عاجزلری کبی سایه دولترلنده  
کسب فیض ایتک داعیه سنده بولنان غیر توران بندکانه  
عاطفت معالی منقبت ولی النعمیلری مبذول اولدیغمدن  
فتواخانه یه قبول بیورلمقاغم خصوصنی کمال ابتهال ایله استدعا  
وهربار: «جناب رب عزت ذات محاسن صفات حضرت  
پادشاهی بی ماعاقب الملوان سایه انداز مقام خلافت  
بیورسون» زمزمه سنه تردیفاً ادعیه خیریّه فتواپناهیلریله  
نشوه دار اولان فؤاد اخلاص معتادمی مسئول عیدانه مک  
اسعافیله برقات دهها مسرور بیورملرینی تمنا ایلرم.  
هر حالده

— ۵۲ —

ولی نعمتم پدر اعززم افندم

امتحانده قازانوب قازانه مدیغمی بیله مدیکم جهته  
ایکی آیدن بری فوق العاده براضطراب ایچنده ایدم.  
هله دونکی کون علی الاصول باب فتوایه چاغریلوب  
شهادتنامه من اعطا بیورلدی.

داعیلری محض اثر دعای پدرانه لری اوله رق اعلائی  
مراتب عد اولنان ثالثه دن اخذ شهادتنامه یه موفق اولدیغمی  
تبشیر ایدرم.

بوراجه ایشارمی تسویه ایدر ایتمز هم خاک پای  
عالیرینه یوز سورمک همده بر آز سرور بال ایله وقت  
کچیرمک اوزره نزد سامی ولی نعمتیلربنه عزیمت ایتمک  
فکرنده بولنیورم.

هر حالده یکانه سبب فیضم اولان ادعیه خیریله لرینک  
کماکان حق کترانه مده تمادیسنی استدعا و بوسایه ده مراتب  
عالیه علیه یی احراز ایلمک لکمی جناب و اهب الا مال دن تمنا  
ایلرم . باقی



داخلیه نظارت جلیله سی جانب عالیسنه

دولتو اقدام حضر تری

قضا من قائم مقامی فلان افندی وظائف داعیانهمه  
مداخله ایتمکده اولدیغندن کندیسنه وصایای لازمه ویرملک  
اوزره لوا من متصرفی سعادتلو فلان بک بنده لرینه مراجعت  
اولندیسه ده بوندن بر ثمره حاصل اولیوب احوال مذکو -  
رهنک دوامی امور قضایی تشویش ایلکده بولندیغی جهتله  
افندی مومالیهک دائره وظیفه شناسی به ارجاعی بابنده  
مسلم اولان عدالت کار آگاهیلرینه دخالت واسترحام  
عاجزانهمک اسعافی خصوصنده بذل همت بیوریله جغندن  
امین اولدیغم ایچون شمدیدن عرض شکرانه مسارعت  
ایلرم. اول باده

\*  
\* \*

معروض داعی دیرینه لریدرکه

وظائف مأموره می حسن ایفایه چالیشیور سه مده

قائم مقام بك معاونت ایدہ جكنہ محكمہ نك حیثیتہ طوقنہ جق  
 درجہ لردہ مداخلہ یہ قیام ایتکدہ بولندیغندن مصالح عبادك  
 حسن جریانہ خلل طاری اولوب بونك بر آن اول اوکی  
 آنمسی خصوصی مرکز ناہی فضیلتلو فلان افندی  
 داعیلرندن استرحام اولنمش ایسہدہ بر نتیجہ حسنہ کوریلہ -  
 مدیکی جہتہ بوبابدہ خاک پای عدالت پیرای فتواپناہیلرینك  
 حمایت داعی نوازیلرینہ دخالتہ مجبور اولدم. لطفاً تصدیع  
 واقعہك عفویلہ مسئول کترانہك اسعافی تمیسنہ اجترا  
 ایلرم. ہر حالہ.

\*  
\* \*

— ۵۶ —

معروض داعی دیرینہ لریدرکہ

مقدمہ بورادہ وقوع بولان حریقہ محترق اولان  
 وسلف عاجزی زمانندہ انشاسنہ بدء اولنوب دە ہنوز  
 اتمام اوانہ میان محکمہ شرعیہ ہیتمندان اہالیدن طوپلانیلان  
 اعانہ ایلہ استکمال و بوکون قربانلر کسیلہرك رسم کشادی  
 اجرا ایلہ ہر بار السنہ آرای کبار وصغار اولان دعای



دوام عمرو دولت حضرت پادشاهی رفع بارگاه رب متعال  
 قیلندیغک عرض و بیاننه مٹا برت و حق کمتزیده بی دریغ  
 بیوریلان حسن نظر فیض اثر جناب ولی النعمیلرینک  
 یقاسی نیازینه مجاسرت ایلرم. هر حالده

\*  
\* \*

— ۵۷ —

فضیلتندم افندم

ذات ادیبانه لرندن آلمقده اولدیغم التفاتنامه لر داعیلری  
 ایچون برر درس بلاغت حکمنده بولنمغله بویابده نه قدر  
 تشکر ایتسه م آزدور.

بونلر ایله تنویر باصره استفاده ایتدکجه طبیعت  
 متشاعرانه م مبسط اولیور.

بینم سرای حکمتک فانوس نور افشانیدر  
 کاشانه علویتک آینه رخشانیدر

کبی بیتلر سویلیورم.

بوکره انمله پیرای کتری اولان احساننامه شاعرا-  
 نه لرنده کی: «چکن بازار ایرتسی کونی ولی افندی به  
 کیدلمشدی. موقعک لطافتی، چایرلرک غبطه بخش لاله زار  
 اولان طراوتی جمله مزی حیران ایتدی.» فقره سی  
 استانبولجه فصل ربیعک حلول ایتدیکنی مبشر اولمغله  
 بوراده مشتاق بهار اولان کوکلم:

بهار کلیه جکمی؟ بهار کلیه جکمی؟

دیه متحسرانه سویلنوب طورییور!  
 فقره مذکورده یی اوقورکن بهاره دائر برغزل تنظیمی  
 ایچون کوکلمده برهوس پیدا اولدی. بوغزلک چوقدن  
 بری متحسر دیدار لطافت دثاری اولدیغم کل وصفنده  
 بولمسنی ذهنده قرارلشدیردم. همان کرمنامه لرینک مطالعه-  
 سندن متحصل برصفای درون ایله قلی اله آلوب:

فرط رشکندن چمنزار صفاده لاله لر  
 داغدار اولمقده در ایتدکجه دقت کلله

ییتنی ده انشاد ایلدم.



بر غزل اولمق اوزره بر مطلع ایله بر قاچ بیت دها  
سویلمک لازم کلدی.

خاطر مه پک چوق مضمونلر توارد ایتدیسه ده بونلر،  
کله دائر اولیوب عاشقانه، فخورانه بر غزل تنظیمه الویرشلی  
خیالات شاعرانه دن عبارت ایدی.

بو باده خلی جابالادمسه ده مطلع شویله طورسون  
بویله بر بیت سویلمک بیله موفق اوله مدم که: « ایشته بر  
قطعه ربیعه» دیوب ایشک ایچندن چیقهیم.

جبر طبیعت ایدهرک بویله بر بیت دها سویلیه بیلسه مده  
لاله نك کل ایله هم موسم اولوب اولمدیغی ملاحظه سی بویته  
بر بیت علاوه ایدهرک قطعه حاله قویمقلغمه مانع اوله جقدی.  
حاصلی کله دائر بر غزل یازه مدم. فقط (بلبل) دن  
بحث ایده بیلکه خامه عاجزیده بر استعداد کوردیکم جهته  
بر وجه آتی نغمه پرداز اولمغه باشلادم:

### ﴿ غزل ﴾

مطهر بان دهر حیراندر صدای بلبله  
بر ترانه بکزه من اصلا نوای بلبله

نغمه سنطور وقانون وکان ونای وعود

اویسه ده یکدیگره اویماز هوای بلبله

اولسه هم آواز مرغان جهان اولماز جواب

عاشقانه بر ندای جانفزای بلبله

کلشن بزم بقادن دمبدم روح بلال

بارك الله خوان اولور حسن ادای بلبله

پر مسرت بانك دلسازیله ایام بهار

مطربان دهر حیراندر صدای بلبله

## §

فقیر اقسام شعر دن غزلی پک سورم. بوده فضولینک

دیوانی چو قجه مطالعه ایدیشمدن ایلری کلشدر ظن

ایدرم.

فضولی کبی بر شاعر کورده میورم. قوجه عاشقک

هریتی حسیات عالیله ایله متیج بر طبیعتک محصول فکری

اولدیغنه شهادت ایتکده در.

مثنویات ده خوشدر. عطایینک خمسه سنی - مرحوم



ایله هم مسلك اولدیغمدنی نهدن - (حسن و عشق) کی  
گوزل یازلمش بر اثر اولدیغی حالدیه پک بکنیرم.  
کچنلرده بورایه مفتی تعیین بیوریلان ذات عالم دیمکه  
من کل الوجوه سزا بر وجود فقاقت پیرا اولمغله مستفیضانه  
مجلس فاضلانهلرینه مواظبت ایلمکده اولدیغمی بوندن  
اولکی مکتوبمده عرض ایتشدم. کچن کون طاشلیجه لی  
یحی بکک خمسهنی ویروب مطالعه ایتکلکمی توصیه  
بیورمشلردی. کتاب مذکوری اختلاس وقت ایتدکجه  
نظر استفادهدن آیرمیورم.

ینه تکرار ایدرم که بو ذات عربی، فارسی، ترکی آثار  
منظومه و منشورهنک مزایاسنه واقف بر تحریر صاحب  
معارف اولدیغندن هر وجه ایله کندیسندن استفاضه  
اولنیور.

اکثریا ادبی، حکمی فقرات لطیفه ایله تنشیط قلوبه،  
تزیین اخلاقه خدمت ایدیور. مجلس حکیمانه لرنده بولنانلر  
حانجه مستفیض اولیورلر.

موما الیه - عفو قدر دانیلرینه استناداً - بوسفرکی  
مکتوب بلاغت اسلوب ادیبانه لرینی کوستردم. استفاده

جویانه او قودیلر. حتی عاجزلرینی: « سنی بویله بر احبابه  
مالك اولدیغکدن طولای تبریک ایدرم. » التفاتیه القشلا-  
دقدن صکره: « کوندره جکک جوابنامه ده او ذاته بندن ده  
سلام یاز! » تنبیهنده دخی بولندیلر.

معلوم عالیلری اولدیغی اوزره انفصالمه بر آی قالدی.  
بویله بر ذاتک مجلس عارفانه لرندن دور اولمغی **کوکلم**  
ایسته میور. شمدیدن تأسف ایتکه باشلادم. تأسفمی ذات  
عالیلری کی اخوان فضیلت عنوان ایله تشرف آرزوسی  
تعدیل ایدیور.

بورادن تباعد ایدنجه یه قدر بو مکتوبمک جوابسر  
بیراقلامسنی تمنی ایدرم. مسئولک اسعافی خصوصنده  
دریغ عاطفت بیورمیه جقلرندن امینم. باقی

\*  
\* \*

— ۵۸ —

فضیلتاً با !

فی ۱۱ شوال سنه ۳۰۹ تاریخی و دادنامه برادرانه لری  
هامه پیرای توقیر و مندرجات ادیبانه سنه برقات دها رونق



ویرن (بلبله) ردیفلی غزل ترانه پروریلری شرفبخش نظر  
تقدیر اولدی.

غزلک ایکنجی بیتنده کی آهنگ سامعه نواز ارباب  
طبیعتی:

پک مرقد صدر بویت دلشین

مصراعيله بی اختیار دمساز ایده جک نغمه لر دندر.  
مکتوب عاجزیده تنزه عالمنه دائر یازیلان فقره ذات  
عالیترینه بویله (یک آهنگ) بر غزل سویلتمکه باعث اولمش،  
محرری ایچون نه بیوک موفقیت.

غزل بویله یازلملی. بیتلری مأللاً یکدیگرینه مبین  
اولان غزللر افاده جهتیه منتظم اولسه ده (یک آهنگ)  
غزللر قدر قدر ارباب طبیعتک نظر تقدیرینی قازانه ماز.  
کله دائر بر غزل تنظیمی آرزو بیورلمش و:

فرط رشکندن چمنزار صفاده لاله لر  
داغدار اولمقده در ایتدکجه دقت کللره

بیتی ده انشاد اولنمش ایسه ده بونی اکمال ایچون لازم کلن

مضامین در خاطر ایدیله مدیکندن صرف نظر اولنوب  
(بلبله) ردیفلی غزل سویلنمش .

بوکا پک اینانه مم . ذوق شاعرانه لری غنالیبان خوش  
الحانی منتدار ایده جک صورتده نغمه پرداز اولمغی آرزو  
ایتدیکندن (بلبله) ردیفلی غزل دلنشین انشاد بیورلمش .  
بوده تنظیم اشعارده کی دقایقه وقوف عالیلرینی کوسترر .  
ذوق شاعرانه یه تابع اولمیه رق تنظیم اولنان شعرلر  
منتظم اولسه ده طبیعیلک شرفنی احراز ایده مز .

برده بیت مذکورک - بر بیت دهها ضمیمه - قطعه  
حالنه قونلمس نه مانع اوله رق ، لاله ناک کل ایله هم موسم  
اولمدیغی کوسترلمش .

فقط خیلی زماندن بری باغچه لرده (فلنک لاله سی)  
نامنده برنوع لاله کورلمکده درکه بوشکوفه رعنا کل ایله  
هم بزم چمنستان صفا اولیور .

بو حالده بیت مذکور کوزل بر مضمونی متضمن بولنمش  
اولور . کلدن بلبله عطف نظر رغبت بیوریلش ایسه پک  
شاعرانه واقع اولمشدر .

بویابده کی موفقیت شاعرانه لرینی تبریک ایدرم .



فقیرده (بلبله) یه بر نظیره سویلمکی آرزو ایتدم. فقط  
طبیعتم ارشادات ادیبانه لرینه مبنی (کللره) ردیفنده بر  
غزل انشادی طرفه میل ایتدیکندن شو غزلی سویلدم:

### ﴿ غزل ﴾

رنك بخش لطف اولوب فیاض قدرت کللره  
لؤلؤ شبنم ایله ویرمش لطافت کللره

اول نه خوش رنك لطافتدرکه اصحاب صفا  
منشرح اولمقددر ایتدیکجه دقت کللره

مظهر اولمش التفات حضرت پیغمبره  
منعطفدر دیده تقدیس امت کللره

کلستانه رونق دیکر ویرر هر غنچه سی  
دینسده شایسته در ازهار جنت کللره

افتخار ایلر وجودیله چمنزار بهار  
فیض رنکین طبیعقدر طراوت کللره

§

اقسام شعر دن غزل حقیقه رقص آوردر. جناب

فضولی مسلککنده تفرد ایدنلر دندر. انشاد غزلده مشار  
 الیه برکیمسه مقیس اوله ماز. لیلی ایله مجنونی ده خوشدر.  
 بوکی آثارک مطالعه سی وسعت قریحیه خدمت ایدر.  
 عطا یینک — مسلکداشکنر بولندیغی ایچون —  
 خمسهنی بکنیورمشکنر. اسلاف ادبای عثمانیه نک اک  
 ایلری کلنلرینک اکثری رجال علمیه دن بولندقلرینه هنوز  
 زیور ایادی اعتبار اولان آثار موجوده شهادت  
 ایتکده در.

حاصلی اوائلده ارباب قلمک اکثری طریق فیض رفیق  
 علمه منسوب ایمش. صکره لری بوصفده — آثار خامه سنه  
 یار و اغیار آفرین خوان ایده جک — اصحاب طبیعت  
 آزالمش.

فقط زمان فیض اقتران شاهانه لری غبطه بخشای  
 اعصار اولان پادشاه معارف اکتاه، شهنشاه دل آگاه  
 اقدمز حضر تلرینک روز جلوس سعادت افروز  
 هایونلرندن بری طریق علمیه منسوب بولنانلرک ایچنده  
 ینه ادیب بی نظیر اطلاقه سزا پک چوق ارباب شعر  
 وانشا کورلمکه باشلادی.



استانبولی تشریفکزی او قدر آرزو ایدیورم که  
 تعریف ایدهم. بو آرزومی مفتی افندی حضرتلرینک فم  
 دربار ادیبانه لرندن اخذ بیورمش اولدیغکز لالی معارفی  
 داعیکزدن دریغ بیورمیه جغکز امیدى تشدید ایتمکده دره.  
 افندی موما الیهه حق ناچیزانه مده غائبانه رایکان  
 بیوردقلری حسن توجیهک تشکرات لازمه سنی کمالیه  
 ایفادن عاجز اولدیغمی عرض ایله خاک پای فیض بخشای  
 فاضلانه لرینه طرف کترانه مدن بالوکاله وضع جبین اخلاص  
 بیورمکزی خاصه استرحام ایدرم.

\*  
\* \*

— ۵۹ —

عزیزم !

بزم فلان افندی ایله آره کز آچلمش، بو آچیلش ده  
 نفعینک :

آفت عین الکمال رشک کار ایتمز بکا  
 دفع زخم چشم خلاق معانیدر سوزم

بیته دأر ایدیلن مباحثه دن نشأت ایتمش .

سزك كې اخلاق حسنه ايله تزين ايدەرك نورستان  
ادبه نمونه امتثال اولمغه چالیشان رهروان معارفك يكد-  
يكريله مخاصمه قالمشلىر هېچ بروقت نظر تعيبدن  
قورتيله ماز .

هله مجرد تشحيد اذهان اچون وقوع بولمى لازم كلن  
برمباحثه نك مخاصمه منجر اولمى شايان تأسفدر .

آنك على العميا بيتك معناسزلغنه حكم ايتمى، سنك ده  
(عين الكمال)، (خلاق معانى) نه ديمك اولديغنى بيلمكسزين  
بيت محوٹ عنه معنى ويرمكه قالمشكه قاعدء افاده واستفا-  
دهيه موافق دكلدر .

مادامكه بحث مذكوره يكد يكر يكرنك رأينه راضى  
اولمديكر، اطوار متجلدانه ي ترك ايله ادبانك آراى مشكل  
براندازانه سنه مراجعت ايتمك لازم كليردى .

هر ايكينك ايسه حاشا بولزومى ادراك ايتميه جك  
قدر اعمال فكره غير مقتدر و بيلديكنى اوكر نمكدن چكنير  
جاهل متكبر اولمديغكر جهتله اختلاف مذكورك وقوع  
ودوامنه تعجب اتمه مك المدن كلز .

بوابده ديه جك برسوزم وارسه اوده بعدما طريق



انصافدن وجهاً من الوجوه انحراف ایتیوب هرکس ایله  
و باخصوص افندی موما ایله ایله حسن آمیز شده بولنمکزی  
عاجزانه توصیه دن عبارتدر .

آسایش دو کیتی تفسیر این دو حرفست  
با دوستان تطف با دشمنان مدارا

دقایق اشعاره واقف اولمق ایچون یالکز قواعد  
موضوعه سنی بلله مک کفایت ایتیوب ادبا ایله صحبت ایتک،  
محاضراته دائر آثار مدونه مطالعه ایتک ده لازم کلیر .  
بوسوزمه نظامینک :

ولد الزناست حاسد منم آنکه اختر من  
ولد الزناکش آمد چو ستاره یمانی

نشیده سی شاهد عادلدر .

بیت مجوٹ عنہی آکلامق ایچون : (عین الکمال)،  
(خلاق معانی) ترکیب لریله (کار)، (دفع) کله لرینک نصل  
معنارده استخدام اولندقلرینی بیلملی .

ایکی صکره کیلر اہمیتسز ایسہدہ ایکی اولکیلرک نہ  
دیمک اولدیغنی بیلک، ایشتمک ویا برکتاہدہ کورمکہ توقف  
ایدر، قاعدہ ایله آکلاشلماز.

(عین الکمال) اصابت عینہ دینور. سبی شویله  
روایت اولنیور:

« هذیل قبیلہ سندنہ (کمال) نامندہ مشئوم برحریف  
وارمش. مرقومک متحسرانہ نظر انداز اولدیغنی شی  
درحال هلاک اولورمش. بو ملابسہ ایله نظر اصابتہ  
(عین الکمال) دینلمش.»

بو تعبیر زبازد شعرای کمالات پیرادر. حتی لسان  
الغیب عنوانی آلمش اولان حافظ شیرازی:

فی جمال الکمال نلت منی  
صرف الله عنک عین کمال

بیتمندہ تعبیر مذکوری ایراد ایتمشدر.

(خلاق معانی) کمال اصفهانینک عنوانیدر. مشارالیه  
بو عنوان اشعار آبدارندہ مضامین رقیقہ نا گفته مند  
بولندیغنی ایچون ویرلمشدر.



قوت و نزاكت طبعنه دیوان کمال اطلاقنه شایسته  
اولان مجموعه اشعاری شهادت ایتمکده در.  
آرایش حافظه ارباب عشق اولان:

لاله را نازم که باداغ تومی روید زخاک  
خاک بر سر باد عشقی را که مادرزاد نیست

بیتی کمال اصفهانینک زاده طبع دقیقه دانیدر.  
(کار)، بوراده تأثیر معناسنه در. (دفع)، دافع مقامنده  
استعمال اولنمشدر. شمدی (دافع) مقامنده ولو مبالغه  
قصیده اولسون (دفع) دیمک تجویز ایدلمیور.  
بو صورتده بیت مجحوت عنه:

« حسدن نشأت ایدن اصابت عین آفتی بکا تأثیر  
ایتمز. زیرا سوزم خلاق معانی عنواتی آلمش اولان کمال  
اصفهانینک زحم چشمنی دافعدر. »  
دیمک اولور.

بو بیت استادانه صنایع شعریه ایله موشح بر فخریه  
لطیفه در. فقط:

باقی قالان بوقبه بر خوش صدا ایتمش  
مصراعی کبی بر حکم حکیمانه بی مشتمل دکلدر. باقی...

— ۶۵ —

عزیزم!

خواباتك بزم تانیسند زینب خانم نامنه مردانه بر  
قاج بیت کوردیککزی وابیات مذکوره دن:

آب حیات اولمچق قسمت ای کوکل  
بیك ییل کر کسه خضر ایله سیرسکندرایت

بیت حکیمانه سنده کی (اولمچق) کله سنی بکنم دیککزی درمیان  
ایده رک بوبابده کی مطالعات مخصوصه می طلب بیوریورسکزر.  
شو طلب، هر درلو فضائل و محاسنه جلوه گاه اولمقده  
بولنسان مرآت قلبکزرده بو عبد عاجز ایچون برحسن  
توجه بسلکده اولدیغکزی تبشیر ایتدیکی جهتله تقدیم  
کلدسته شکرانه مسارعت وکله مذکوره یه دائر شکسته  
وبسته عرض مطالعاته مبادرت ایلرم:

(قواعد عثمانیه) ده صیغ ربطیه عنوان عمومیه سی آلتنده  
بر طاقم صیغه لر کوریلورکه صیغ مذکوره بش نوعه آیر-  
یلوب باقینک:

صاراردی بکزی حسد دن بنمله یاری کوروب  
رقیب روسیه بر غریب رنک اولدی



بیتندہ کی (کوروب) کی کلمہ لرہ صیغہ عطفیہ، فائضینک :

عهد ایلدی اویدر مکہ پان کلچک عید  
یارب سن اومہپارہی ثابت قدم ایله

بیتندہ کی (کلچک) کی کلمہ لرہ صیغہ تعقیدیہ، نوعینک :

کیدک بویکجه ناز ولطافت لباسنی  
اوپدر طوینجه دامنکی خاک پالره

بیتندہ کی (طوینجه) کی کلمہ لرہ صیغہ انتہائیہ، احمدپاشانک :

کاروان دل و جان اولدی روان سن کیدہلی  
نه غریب اولشم ای مونس جان سن کیدہلی

مطلعندہ کی (کیدہلی) کی کلمہ لرہ صیغہ ابتدائیہ، شیخ۔  
الاسلام یحی افندینک :

دراز اولدجه افزون اولده دلہستہ لک یحی  
محصل قورتیلش یوق کاکل جانانہ قیدندن

مطلعندہ کی (اولدجه) کی کلمہ لرہ صیغہ توقیتیہ نامی  
ویرلمشدر .

کلمہ محوٹ عنہایہ دائر بر حکم ویرلمک ایچون صیغہ

تعقیبیه ایله صیغهٔ انتهایه دن بحث ایدمك اقتضا ایتدیکندن  
بروجه آتی ادارهٔ خامهیه متجاسر اولدم :

آثار اسلافده چو قجه کوریان (اولمچق، کلچك) کبی  
کله لر شمدی لسانه آلتیور. اوللری بو کبی کله لر مقبول  
ایمش، شمدی مهجوردر. بناءً علیه مشارالیهانک کلهٔ محوت  
عنهای استعمالنه برشی دینه مر. فقط معاصرین ارباب  
نظمك قدما سندن اولان اشرف پاشانک :

سینه چاك اولمچق خامه کبی ای اشرف  
کیمسه محرم اوله ماز چرخده اسرار مره

مقطعه ده (اولمچق) کله سنی قوللانمی - صیغهٔ مذکو -  
ره نك جواز استعمالنه سند اولمدق دن باشقه - مغایر  
بلاغت عد اولنور .

شمدی (اولمچق، اولمچق) موقعنده معلم ناجی افندی  
حضر تلرینک :

چشم عقل اولمینه پاك وبصیر  
کوزی تك کوزلك ایلز تنویر



نور جمال دن متلاشی اولنجه دل  
دوشسه زمينه چوققى تجلى زمانيدر

بيتلر نده كورلديكى اوزره (اولينجه، اولنجه) دينيور.  
اسلاف كرام بعضاً بوصورتى ده اختيار بيوررلر مش.  
ايشته شو بيتلر ده: (ايدىجك، دوشىجك، دوشورىجك)  
دينليوب (ايدنجه، دوشونجه، دوشورنجه) دينلش:

مرام ايدنجه مسيب بر آدمك كارين  
يد تشبثى جستجو ايدر اسباب  
(نابى)

§

اشك سحر دوكرسه م او شوخك يوزى كولر  
شاداب اولور دوشونجه كله شبنم صباح  
(حليمكراى)

§

دوشورنجه رخكه طره پرچينكى باد  
مضطرب موج كر هكيره دونر آب اوزره  
(جورى)

صيغه انتهاييه دخى نوعينك بيتنده كورلديكى وجه

ایله (طوینجه) صورتنده قوللانلیور، بوکا (یه دک، یه قدر)  
لفظلری الحاق اولنیور.

مثال:

نهر کورر سر غوره شراب اولنجه یه دک  
(غالب)

«... واقعا بواهوینجه ایسه ده خبر کیدوب قایق  
کلنجه یه قدر تکفور طاغنده برقچ کون دها مکشز ایجاب  
ایتمه مک ایچون همان مکتوبکز ورودینک فرداسی احمد  
ریسک قایغنه بینوب دکره چیققدق.»  
(عاکف پاشا)

(دک) لی صیغه انتهایه لر نظمه مخصوصدر. (قدر) لی  
صیغه انتهایه لرده وزن ایله پک ایتلاف ایدهمدکلری  
ایچون نثرده مستعملدر.

(اولنجه) کی کله لر (یه دک)، (یه قدر) لفظلری الحاق  
ایدلینجه صیغه انتهایه اوله رق قوللانلینی کی سامینک،  
نابینک:

ایتمز کنار مطلبه کوهر نثار موج  
تا اولینجه ذلت ایله خاکسار موج  
تی



تا وقتی کلمینجه امور ایلز ظهور  
دور ایلر آسیاب فلک نوبت اوستنه

بیتارنده کورلدیکی مثللی ادات انتها اولان (تا) نك  
ادخاليله ده بومعنا ده استعمالنه جواز ویرلمیور.  
استطرا د طریقله شونی ده بیان ایدلم که بزم صیغه  
تعقیبه دیدیکمز (اولنجه، بولنجه) کی کله لر بعضاً (اولدقده)،  
(بولدقده) معناسنده دخی قوللانیلور. مثال:


برکره طوقونسهك تلنه ساز درونك  
بیك درلو نواز شاه دوزلمز بوزولنجه  
(راغب پاشا)

(خاتمه)

کلمه مجروح عنایه دائر بر حکم ویرمک ایچون سوزی  
بو قدر اوزاتمغه مجبور اولدم. بوبابدکی تصدیعاتم اولدقجه  
مهم بر مسئله نك تحلیل ضمنتده سرد ایدلمش تفصیلات  
مفیده دن عبارت اولدینی ایچون منونیتکزی موجب  
اولمشدر ظننده بولنیورم. بو ظنم مقارن حقیقت ایسه  
نم ایچون نه بیوک موفقیتدر.

متقدمينك آثارنده چو قچه تصادف اولان (کلیچک)،  
 (کلامچک) کی کلمات، (کرکسه) تعیری مثلی لسانه وداع  
 ایلش الفاظدن بولندیغی جهته خوشه کیمیه جکی طبعیدر.  
 بناءً علیه زینب خانمک بیتنده کی (اولمچق) کله سنی خوش  
 کورمه مکز تعیب اولنه مازسه ده (کرکسه) تعیرینه  
 ایلشمه مکز مساحمه یه حمل اولنور.

مطالعہ سی ارباب استفادہ بی هر زمان مستفید ایتمکده  
 بولنان آثار برکزیده اسلافی آکلامق ایچون بوکی کلمات  
 و تعیراتک نصل معنالرده استعمال ایدلدیکنی اوکر نمک  
 لازمه دن اولدیغنی توصیه ایله ختم کلام ایلرم. باقی ...





# فهرس بدایع

۰۰	افاده مخصوصه
۵	مقام مشیخته - خاک پای شیخ الاسلامی به قصیده قدیمه داثر عریضه
۷	قصیده
۱۱	مقام مشیخته - سنه جدیده تبریکنامه سی
۱۲	» - ليله معراج »
۱۳	عرضحال - پایه تصحیحی ایچون
۱۵	» حقه بعض اسنادندن تحت محاکمه بالنسبه برت ایدوب اعاده نیابت ایچون عرضحال
۱۶	استرحامنامه - تمديد مدت ایچون
۱۷	» - مفتیلکدن طریق نیابته دخول ایچون
۱۸	» - تحصیل نیابت ایچون
۱۹	» - مفتیلکدن طریق نیابته دخول ایچون
۲۰	عریضه - محکمه شرعیه تعمیری ایچون
۳۱	استعلامه جواب
۲۲	» »
۲۲	عریضه - مجدداً یاپیلان محکمه شرعیه نک رسم کشادینه داثر
۲۴	استعفانامه
۲۵	استعلامه جواب
۲۶	استرحامنامه - تحویل نیابت ایچون
۲۷	» - بجایشه داثر
۲۸	شکایتنامه قدیم اوله جبقی اسبیدوب عرضکارک اسنادندن عبارت اولدین
۲۹	استرحامنامه - تمديد مدته داثر
۳۰	عریضه عرضکارک اسنادی تحقیق اولنمقزین غزل و النامه ایچون بر نیابت طرفندن

۳۱	مکتوب
۳۲	»
۳۲	»
۳۳	جوابنامه
۳۵	تغزیتنامه
۳۶	جوابنامه احباب ندن برینک برادرینک وفات حقنده
۳۷	مکتوب
۳۷	تبریکنامه - لیلہ رغائب ایچون
۳۹	» - مأموریت ایچون
۴۰	» - لیلہ رغائب ایچون
۴۱	» - سنہ جدیدہ ایچون
۴۲	» - نشان
۴۳	عریضہ محل مأموریتند واروب توصیہ اولان آدمک کور شوب محنون اولدیغنه دئیر افندی
۴۴	» ... اول کبضر لیکنی صکر کبجحت ایتدیکنی ایشندیکی افندی
۴۵	جوابنامه
۴۶	مضبوطه ایهای بلده طرفندن نائیک مدتک تمیدیکون
۴۷	استعلامه جواب
۴۸	شکایتنامه یہ قوللاؤیرلیا مسجود
۴۹	استرحامنامه - تحویل مأموریت ایچون
۵۰	عریضه
۵۱	عرضمال معیتند عجزندن فتواخانه کیرمک ایچون
۵۲	» مشرف ضرب اولان برجامع شریفک تعمیرکون اوقاق نظارتنه
۵۴	» تألیف ایتدیکنی شئی طبع ایتدیرمک ایچون معارف نظارتنه
۵۵	» اوج ماه اذن استحصایچون مشیخه عرضمال
۵۵	استرحامنامه - مآذونیت استحصالی ایچون
۵۶	شکایتنامه



- ۵۷ عرضحال - خاك پای شاهانه‌یه  
 ۵۸ استرحامنامه - تبدیل نیابت ایچون  
 ۵۹ عرضحال - خاك پای شاهانه‌یه  
 ۶۱ استرحامنامه - تبدیل نیابت ایچون  
 ۶۲ عرضحال  
 ۶۳ »  
 ۶۴ مکتوب  
 ۶۵ عدلیه نظارتیه - مدعی عمومی معاونندن شکایت  
 ۶۵ مقام مشیخته - قائم‌مقامدن شکایت  
 ۶۶ » » - یکیدن پاییلان محکمه شرعیه‌نك اتمامیه  
 رسم کشادینه دائر  
 ۶۷ مکتوب - برغزل ارساله دائر  
 ۶۹ غزل  
 ۷۲ مکتوب - غزل تنظیمه دائر بعض ملاحظاتی حاوی  
 ۷۵ غزل  
 ۷۷ مکتوب - نفعینك بریتنه دائر تدقیقاتی حاوی  
 ۸۲ مکتوب - بر مسئله لسانیه‌نك حلنه دایر






شیخ وصفی

---

# لوامع




«مکتب نواب» ده برسنه ظرفنده طلبه کرامه  
استکتاب ایدیلن تبریک و سائرہ یہ دائر بعض مسوداتی  
حاویدر .




برنجی جزء

---

مرکز توزیعی : مجموعه معلم اداره خانہ سی




معارف نظارت جلیلہ سنک رخصتیلہ طبع اولنمشدر



استانبول

(آرتین آصادوریان) شرکت مرتبہ مطبعہ سی — باب عالی جادہ سنده نومرو ۵۲

۱۳۰۷



(آ. آصادوریان) شرکت مرتبیه سی مطبعه و کتبخانه سی  
استانبول — باب عالی جاده سنده نومرو ۵۲





هر کون جهان عثمانیده برر صورتله جلوهر کر  
ساحه ظهور واون اوچنجی عصر هجری ایچون  
مدار افتخار نامحصور اولان بدایع معارف محضا  
خلیفه بی مدانی عبدالحمید خان ثانی افندمر  
حضرتلرینک همم متوالیه ترقی پرورانهلری آثار  
برکزیده سندن اولدیغی وارسته بیاندر، آفتاب عالم  
آراکی عیاندر .

بویله برشهریار حصافت شعار وتاجدار عدالت  
کردارک عصر معارف حصر خسروانه لرینه ادراک

ایتدیکمزدن طولانی حسیات شکر کذارانه مزك  
کمالیله درجه سنی تعیینده السنه ادبا هم حالت لادر،  
زیرا بو بر امر محالدر.

مع مافیه هر صنف بندکان ایفای وظیفه عبو -  
دیتده علی قدر الامکان قصور ایتماکه چالشدقلری  
کبی فقیرده کیجه کوندز دعای فیض اتمای  
امیر المؤمنین ایله دمساز اولورم، بروجه آتی نغمه -  
طراز اولورم:

منظره مده لمعه صبح سعادت برق اورر  
شش جهتدن پرتو فیاض قدرت برق اورر  
کائناته دیده امعانه ایله بر نظر  
متصل ذراتده فیض هویت برق اورر  
جنت آباد صفا اولمش کلستان جهان  
هر چیچکده بشقه بررنک طراوت برق اورر



بحرہ عکس ایتدکجہ زرتار شعاع آفتاب  
بربرین تعقیب ایدن موج لطافت برق اورر

حاصلی دارالسرور اولمش سرای کائنات  
هرکسک وجهنده آثار مسرت برق اورر

بن نصل شادا اولمهیم خندان کوروبده عالمی  
ازدیاد شوقدن چشمان امت برق اورر

قطب عالم اولدیغی کوندن بری عبد الحمید  
اعین امتده اشواق جلادت برق اورر

اول شهک ذاتیله رونق بولدی تخت سلطنت  
سایه شاهانه سنده شان ملت برق اورر

ملتجادر در که حشمتینا هی عالمه  
طاق دیواننده طغرای عدالت برق اورر

ظلمی محوایتدی جهانندن سطوت شاهانه سی  
پنجه عدلنده شمشیر شریعت برق اورر

طولدی رعد صیت احسانیه عالم سرتسر  
آسمان بارکاهنده ساحت برق اورر

موج اورر آفاق دولتدہ لوای شوکتی  
ہامہ سندنہ پرتو تاج خلافت برق اورر

منجلی محراب وجہندہ فیوضات خدا  
کعبہ قلبندہ مشکات ولایت برق اورر

رہنادر زمرہ اسلامہ رأی روشنی  
سایہ سندنہ شاہراہ استقامت برق اورر

جبرئیل عقل حیراندر علو فکرینہ  
چشم حقینندہ انوار جلالت برق اورر

خسروان دہر ایدر دربانغیلہ افتخار  
جہہ پاکندہ آثار نجابت برق اورر

ملتی اعلاہ کافیدر سمو ہمتی  
سینہ سندنہ جوہر کنج حمیت برق اورر

دہرہ اولدقہ ارادات کزینی منتشر  
سوبسو احکان قرآن آیت آیت برق اورر

شہہ سز عصرک نجی اللہیدر اول شہریار  
کشتی دولتدہ فانوس سلامت برق اورر



ایلدی عصر هایوننده خامه کسب فیض  
سوزلرمده پرتو حسن طبیعت برق اورر

نکته سنجان لؤ لؤ اندیشه مک حیرانیدر  
مجر اشعارمده امواج سلاست برق اورر

نور معنی عکس ایدوب آب روان طبعمه  
کلشن نظمده ازهار فصاحت برق اورر

مشعل فکرمله روشندر کوکل کاشانه سی  
بیت پرنورمده مرآت بلاغت برق اورر

صفوت افکارمه برهان دگلی سوزلرم  
باغ دلدہ سلسبیل شاعریت برق اورر

برغزل انشاد قیل ای شاعر روشن کهر  
غیری دلخواهکجه الهام طبیعت برق اورر

«طور دلدہ شهر جبریل حکمت برق اورر  
باق جهانہ نور جوال حقیقت برق اورر

جلوه کردر عارفه هر یرده دیدار خدا  
مسجد و بتخانه ده مصباح وحدت برق اورر

بر زمان رندان دهرک کوکلنه کیرمن نفاق  
بزم میدہ جام زرین محبت برق اورر

ایلمز اهل بصیرت مسلك حقن عدول  
هر جهتدن شعلہٗ نجم ہدایت برق اورر

شاعرک درحیتلہ مرصعدر دلی  
سینہ سنده کوهر فکر صداقت برق اورر»

پادشاهم شاد قیل لطفکله وصفی بندہ کی  
هر زمان کوکلندہ امید عنایت برق اورر

آفتاب طلعتک قیلسون منور عالمی  
تا کہ موجوداتده نور مشیت برق اورر


عرشہ چیقده دعای ازدیاد دولتک  
جانب حقن همان حکم اجابت برق اورر



— ❧ عرض شکران ❧ —

مکتب نواب کی اہمیتی فوق العادہ سی  
اولان بردار الکمالدہ انشا معلمی بولنقلغم عاجزہ  
لری ایچون بر شرفدرکہ بونک کوکلمدہ جلوہگر  
اولان حسیات مفتخرانہ سنی: «جناب احکم الحائ  
کین سایۂ تعالیٰ وایۂ شاہانہ دہ مقام معالیٰ فتوایہ  
رونق انداز اولان ذات محاسن صفاتی کمال اجلال  
ایلہ کامبین بیورسون» درود مسعودیلہ اعلا ایدرم.  
زیرا بو شرفہ سایۂ حضرت مشیختپناہیدہ  
مظہر اولدیغمدن روز و شب ادعیۂ خیریلہ لریلہ  
تزین لسان مصادقت وجیبۂ ذمت عبودیتدر:

روز و شب حکمتسرای عالمه  
لمعه پاش اولدقچه خورشید و قمر  
صدر عزتده خداوند جهان  
ایلسون مفتی الانامی کامور



— افادۀ مخصوصه —


بوسنه مکتب نوابده طلبه یه عاجزانه استکتاب  
ایتدیکم مسوداتک — هر نه قدر دکرلری یوقسه ده —  
مومالیه مدن بعضاری طبع و نشرینی التماس ایتدیلر.  
التماس واقع آرزوی کترانه مه ده موافق  
دوشدیکندن مسودات مذکورہ نك ساحه انتشاره  
وضعی خصوصنه دکر سزلیکاری مانع اوله مدی .  
بونلرک بعد الاصلاح طبع و نشری وارد خاطر  
اولدیسده ده هیچ بریسنه قلم طوقندیر میوب اولدقلری



کبی بیرا قدم. زیرا حین مطالعه ده دکر سزلکاری  
برقات دها توضیح ایدرسه بیرتوب آتمق لازم  
کله جاک!

بوکا ایسه بر درلو کوکلم راضی اوله میه جغندن  
همان الده ایدیلن مسوداتک {لوامع} نامی آلتنده  
طبع ونشرینه قرار ویردم. وما توفیقی الا بالله.

شیخ وصفی



## فضیلتو افندم حضرتلری

الطاف علیه حضرت ولی النعمی جمله جمیله سندن  
اوله رق عهده استیهاال فاضلانه لرینه مرکز نیابت شرعیه-  
سنک تفویض بیورلدیغی خبر مسرت آوری سامعه پیرای  
کمتری اولدقده الندن کلدیکی قدر شریعت غرایه خدمت  
ایتمکه چالیشانلرک ایکی عالمده حامیسی ینه شریعت غرا  
اوله جغی محقق بولندیغی ملاحظه ایله بر عارف معروفک  
آثار بر کزیده سندن اولان:

«هرکیم که او شرعه خدمت ایلر»

«دارینده کسب حرمت ایلر»

نشیده دیندارانه سنی زیور زبان اخلاص ایلدم.  
ذات فضائل سماتلرینک بین الافاضل مسلم اولان  
اهلیت نادره واستقامت فاخره لری ایلریده بویله نیجه قیمت  
شناسانه التفاتلره نائلیتله بتون بتون حائز مرتبه امتیاز  
واماتل یتنده بر قاچ قات دهها سرفراز اوله جقلرینی



تأمین ایتکده اولسی ایسه آریجه صفابخش درون  
اولمقده در .

همان جناب رب العالمین خلیفه روی زمین امیر-  
المؤمنین پادشاهمز افندمز حضرتلرینی پک چوق زمان  
تخت عالی بخت عثمانیده مکین وذات سامیلری کبی لیاقت  
کامله اصحابی سایه شاهانه لرنده دمام مظهر حسن نظر  
ولی النعمی ایدهرک کامبین بیورسون دعای واجب الای-  
داسنه تردیفاً ایفای رسم تبریکه جرأت و توجهات عالیہ-  
لرینک حق عاجزانہ مدہ بقا و تزیادینی استدعایہ مبادرت  
ایلرم .

\*

\* \*

— ۲ —

فضیلتلو افندم حضرتلری  
علوم عالیہ و آلیہ ایله تزیین ذات وصفات ایدن  
علمای ذی شانک و باخصوص احکام جلیله شرعیہ بی  
اجرایہ واسطه اولان نواب فضائل نشانک سایه شاهانه ده  
دائماً توجهات مخصوصه حضرت ولی النعمی به مظهریتله  
کامران اوله کلدکلرینه افندمز کبی کمالات علمیه لری مسلم

افاضل اولان بر ذات صاحب فضائله مرکز نیابت  
 شرعیه سنک احاله بیورلمسی بر برهاندز .  
 بو توجیه وجهک پیام مسرت اثری واصل کوش  
 کمتری اولور اولماز :

ایدنلر مسلکنده استقامت  
 اولورلر مظهر لطف عالی  
 ایدرلر دمبدم بین الامائل  
 جهانده فیض باریله تعالی

قطعه سنی زیور لسان صادق البیان ایلدم .  
 جناب آفریدکار آسمان وزمین نائب مناب فخر-  
 المرسلین پادشاهمز افندمز حضرتلرینی حشره قدر سریر-  
 آرای خلافت وبالجمله ارباب صداقت ولیاقتی الطاف جلیله  
 شهریاریلرینه نائلیتله وایه مند سعادت بیورسون دعای  
 واجب الاداسنه تردیفاً ایفای رسم تبریکه اجتناسار وحسن  
 نظر فاضلانلرینک حق داعیانهمده دوام و تزیادینی  
 استدعایه ابتدار ایلرم .



## — ۳ —

معروض داعی دیرینه لریدرکه  
الطاف مخصوصه حضرت مشیختپناهیاری جمله  
جليله سندن اوله رق امور شرعیه سنک فصل وحسمی  
عهده عاجزانه مه من غیر استحقاق تفویض بیوریلان  
فلان قضایه فی ۱۵ جمادی الاولی سنه ۳۰۷ تاریخیه  
واصل اولوب مصالح اهالی بی بر نهج شرع شریف  
رویته مباشرت و شهریار مراحم کردار، تاجدار والاتباع  
سوکیلی پادشاهمز افندمز حضرتلرینک استجلاب دعوات  
خیریه لرینه مبادرت ایتدیکمی خاک پای کمالات احتوای  
دولت لرینه عرضه مسارعت و بووسیله ایله داعی دیرینه لری  
ایچون ناقابل شکران بر نعمت بی امتنان اولان توجهات  
فیض غایات فتواپناهیارینک حق کمترا نه مدد حسن دوامنی  
استدعایه مجاسرت ایلرم.

\*

\* \*

## — ۴ —

معروض داعی دیرینه لریدرکه  
نیابت شرعیه سی مودوع عهده کمترا نه اولان فلان

قضایه فی ۲۲ جمادی الآخره سنه ۳۰۷ تاریخیه موصلت  
 ومستعیناً بالله مصالح عبادى شریعت غرایه توفیقاً فصل  
 وحسمه مباشرت ایتدیکمی خاک پای عدالت پیرای مفتی-  
 الانامیلرینه عرض و انبا وتوجهات فیض غایات حضرت  
 ولی النعمیلرینک حق نامستحق عاجزانهمده بقاوتزایدینی  
 الطاف مخصوصه بنده پروریلرینه اعتماداً استدعا ایلرم.  
 هر حالده امر وفرمان حضرت ولی الامرکدر.

\*  
\* \*

— ۵ —

معروض داعی دیرینه لریدرکه

صیت فضیلتی سامعه پیرای جهان اولان افندمر کبی  
 برنحریر بی اقرانک عهدۀ ایستیهاللرینه مشیخت اسلامیه نک  
 تودیعی خبری واصل کوش کتری اولنجه باب فتوایه  
 ذات نادر الصفات فاضلانہ لری کبی حلیۀ استقامتله ممتاز  
 بر وجود صداقت نمودک رونق بخش اولملری بالجمله  
 داعیان دولت کبی بوداعی دیرینه لرینک ده صورت فوق-  
 العاده ده مسروریتی موجب اولدی.  
 همان جناب رب العالمین امام المسلمین خلیفۀ عدالت



آیین پادشاهمز افندمز حضرتلرینی الی آخر الایام کمال  
عزتله تخت دولته مکین و سایهٔ مراحم وایهٔ شاهانه لرنده  
ذات ولی النعمیلرینی خدمات مبروره ابرازینه موفقیتله  
کامبین بیورسون دعای واجب الاداسنه تردیفاً ایفای  
فریضهٔ تبریکه مسارعت و بو وسیلهٔ جمیله ایلله حق عاجز-  
نهمده دائماً مبذول بیوره کلدکلی توجہات فیض آیات  
فتوایناهیملرینک بقا و تزیادینی استدعایه مبادرت ایلرم .

\*

\* \*

## — ۶ —

معروض داعی دیرینه لریدرکه

مشیخت اسلامیهنک الطاف جهان مطاف حضرت  
پادشاهیدن اوله رق عهدہ استیہالترینه تودیعی خبر مسرت  
پروری سامعه نواز احقری اولور اولماز :

ویردی شرف مشیخته بر ذات کیم بوکون  
ایلر فضیلتیله جهان خلقی افتخار

اول ذات بی نظیره ایدوب عرض اختصاص  
ای خامه قیل فریضهٔ تبریکه ابتدار

قطعه سیله عرض عبودیتہ ابتدار ایلدم .

شهریار مراحم پرور و تاجدار مکارم کستر پادشاهمنز  
 افندمنز حضرتلرینک دائماً ارباب اهلیت و صداقتی مراتب  
 عالییه اصعاد و عواطف مخصوصه خسروانه لریله دلشاد  
 بیورمقده اولدقلرینه هرکون برر صورتله عیون آرای  
 جهان اولان براهین جلیله دن بری ده افندمنز کبی کمالات  
 علمیه لری مسلم افاضل اولان برذات مستجمع الفضائلک  
 شرفبخش باب فتوی اولملریدر .

جناب رب الارباب پادشاه معالی نصاب شهنشاه عالی-  
 جناب افندمنز حضرتلرینی صباح حشره قدر کمال عمر  
 واجلال ایله سریر سلطنتده دائم و ذات مفتی الانامیلرینی  
 ابرازحسن خدمته موفقیتله مقام مشیخته قائم بیورسون  
 دعای مفروض الاداسنه تردیفاً حق کمترا نه مده حسن  
 نظر فیض اثر حضرت ولی النعمیلرینک ازدیادینی کمال  
 افتخار ایله استدعایه ابتدار ایلدم .

\*  
\* \*

— V —

معروض داعی دیرینه لریدرکه  
 ادراکیله مباهی بولندیغمز بو عصر جلیل معارفه



بحق رونق بخش اولوب اجراآت شاهانه لریله بتون  
 دنیایی عرض شکرانه مجبور ایدن آل عثمانك ممتازی  
 سوکیلی پادشاهمز عبدالحمیدخان غازی افندمز حضرتلری  
 امور معظمه حکومتی ید مؤید ملوکانه لرینه آلدق لری  
 کوندن بری دین و دولتک شانی اعلا و تبعه صادق لرینی  
 آب حیات احسان ایله اروا و ناقابل شکران عواطف  
 بی امتنان خسروانه لریله ارباب لیاقتک قدرینی دوبالا بیور-  
 مقدمه اولدق لری کبی بوکرده ده اهلیت باهره لری مسلم یار  
 واغیار واستقامت زاهره لری معلوم کبار و صغار اولان  
 افندمز کبی برذات معارف سہاتک عہدہ استیہال لرینه مسند  
 مشیخت اسلامیه نك احاله سیله عموم داعیان دولتی  
 مستغرق دریای مسرت بیورمشلردر .

ہمان جناب یزدان یچون قلوب زاکیه محمدیون نور  
 ایمان ایله مشحون اولدقچہ اوپادشاہ فاروقچاہی مقام معلا  
 خلافتدہ فرقانفرما وذات حضرت ولی النعمیلرینی دائماً  
 مسندمشیختدہ دیانت نما بیورسون درود مسعودینہ اردافاً  
 ایفای فریضہ تبریکہ مسارعت وحق عیدانہ مدہ حسن  
 نظر حضرت فتواپناہیلرینک بقاسنی استرحامہ مبادرت  
 ایلرم .

## — ۸ —

سماحتلو افندم حضر تتری

کوکله کی طرف سامیء سمو حیلرینه اختصاص تام — که  
مقارن اخلاص بردوامدر — آره صیره تجدید انتسابی  
ایجاب ایلمکده اولدیغندن کوزل کوزل وسیله لر بولدقچه  
وجائبدن بیلدیکم بو وظیفه نك ایفاسنه شتاب ایتمکدن کری  
طوره مدیغم کبی بو کرده دخی:

«غرة روزہ یی کوردم فلکک بامنده»

مضمونی اوزره رؤیت هلال رمضان ایله تنویر باصره  
ابتهاج ایتدیکمی متعاقب قلب شعله مزاج بر شوق دیکرله  
هم حالت سراج وهاج اولق جهتیه بو شهر شریف مسرت  
ردیفک حق عالیء سماحتپناهیلرنده قدر کیجه سی قدر متیمن  
وکوکب اقباللرینک پرتو عالمگیر شریعت غر ایله یومافیوما  
روشن اولسی دعاسنی خالصانه یاد وبووجه ایله فؤاد  
صفوت معتادی برقات دها شاد ایلدم .

حضرت خالق الایام والشهور سایه هایون جناب  
ملوکانه ده بویله نیجه مبارک کونلرک ادرا کیله افندمزی  
قرین سرور نامحصور بیورسون .



استانبولدن آلمقده اولدیغیم تبشیراته نظراً حلول عید  
 سعیددن مقدم منزلت عالیہ خداوندیبری برقات دهااعلا  
 بیوریلہ جفی کمال مسرتلہ آکلاشلہ مقده اولدیغندن آنجق  
 باب معالی مابلرینہ منسوبیتلہ مفتخر بولسان داعی  
 کمینہ لرینک اوتہ دن بری محفوظم اولان امید قوینک  
 بالطبع اعتلا ایتکده اولدیغنی شمذیلک خاتمہ کلام اولق  
 اوزره عرض و بیانہ جرأت ایلرم .

\*  
\* \*

## — ۹ —

معروض داعی دیرینہ لریدرکہ

مسند جلیل مشیختک الطاف مخصوصہ حضرت  
 پادشاهیدن اولہ رق افندمن کی جلائل فضائل ایله ممتاز  
 بر علامہ بی انبازک عہدہ استیہال لرینہ تودیع بیورلدیغنی  
 کمال فخر و مسار ایله استخبار اولندقدہ کو کلمہ لمعہ نثار  
 اولمغه باشلایان نور سرور داعی دیرینہ لرینی قطعہ آتیہ  
 ایله ادای فریضہ تبریکہ مجبور ایلدی :

مفتی الانام اولنجہ اول فضل یکانہ  
 کلدی جهانیانہ شوق جدید الحق

بو مصرعی اوقور لر بالجمله اهل دانش  
جاه جلیل فتوی ذاتیله بولدی رونق

نصل مجبور اولمیهیم که ذات نادر الصفات نحریرانه لری  
کبی شرف بخش مرتبه کمال اولان بر فاضل بی هالک مقام  
فتوایه سایه انداز اجلال اولملری عموم داعیان دولت  
ایچون مستلزم شکران عظیم بر لطف جلیل رب کریمدره  
همان جناب حکیم مطلق پادشاه اشفق خلیفه بالحق  
ولی نعمت بی منتمز افندمن حضرتلرینی مقام مقدس  
خلافتده کمال عافیت واجلال ایله دائم وذات ولی النعمیلرینی  
سایه فیض وایه ملوکانه لرنده آمال عالیه خسروانه لرینه  
موافق خدمات جلیلهیه موفقیتله شریعت غرای احمدیهیه  
خادم بیورسون دعای مفروض الاداسنه تردیفاً حق  
عبیدانه مده توجهات شرف غایات فتوایناهیلرینک دوام  
از دیادینی استرحام ایلرم .

\*

\* \*

— ۱۰ —

معروض داعی دیرینه لریدرکه  
دائماً مابه الافتخارم اولان حسن نظر فیض اثر



جناب ولی النعمیلرینک ادای شکرانیله تزیین لسان صادق-  
 البیان ایتکده اولدیغم کبی وسائل جمیله دوشدکجه ده عتبه  
 دولترینه عرض عبودیته شتایی و هر حالده تجدید انتسابی  
 بروظیفه مقدسه بیلدیکم جهتله هلال رمضان مصادف نظر  
 عبدنا توان اولور اولماز، شهریار مرحمت شعار وتاجدار  
 معدلت کردار افندمن حضرتلرینک دعای دوام سلطنت  
 خسروانه لرینه تردیفاً بقای عمر و اقبال فتواپناهیلری  
 نیازینی رفع بارگاه احدیت ایلدیکمک عرض و بیانی  
 تأیید رشته رقیته بر ذریعه حسنه اتخاذ ایدهرک تبریک  
 ماه صیام مفخرت انجامه اجتناسار و حق کمترا نه مده رایکان  
 بیوریلان الطاف مخصوصه دولترینک بقا و تزیادی  
 استرحامنه ابتدار ایلرم .

\*

\* \*

— ۱۱ —

معروض داعی دیرینه لریدرکه

آستان دولترینه عرض عبودیته وسیله جوی ایکن  
 انفلاق صباح عید عیون آرای اهل توحید اولنجه کمال  
 شوقدن مدوامی بولندیغم دعای دوام عمر و اقبال

مشيختپناهيلارنى آواز بلند ايله تکرار ايلدم .  
 نصل تکرار ايتيميم که هيچ بر دکر م يوق ايکن همت  
 جهان قيمت بنده پروريلريله غبطه بخشاي اماثل اولان  
 بر موقعه بولنيورم .

وظائف مقدسه دن اولان عرض عبوديته بويله  
 بر وسيله مسعوده نك مشرق آراي ظهور اولمسي  
 عاجزلريني مستغرق نور سرور ايلدي .

بناءً عليه مراسم شكر كذارينك اك كوزلرندن اولان  
 ايفاي فريضه رسم تبريكه مسارعت وجناب حقدن بويله  
 نجه نجه ايام مباركه يه ادراك بيورملري نيازينه مبادرت  
 ايتديكمك عرض وبيانيله خاك پای مكارم احتواي مفتي -  
 الاناميلرينه ناصيه ساي اخلاص اوله رقيكانه مدار افتخارم  
 اولان توجهات حضرت ولي النعميلرينك بقاسني استرحام  
 ايلرم .

\*

\* \*

— ۱۲ —

ولي نعمتم افندم !

امتحانلرمز رجب شريفك يكرمى بشنچي كوني



ختم بولدی . بوسنه امتحانده ایراد اولنان اسئلهیه موافق  
جوابلر ویرهرك صنفك برنجیسی اولدیغمی تبشیر ایدرم .  
بوايسه يالکز سعیمك ثمره سی اولمیوب دعای خیرکزك  
آثار جلیله سندن بولندیغنده ذره قدر شبهه ایتم .

ارباب سعی و غیرت هر زمان بین الاقران کسب فیض  
ورفعت ایدر . سعی و غیرته همت پدرانده منضم اولورسه  
بر موقع عالییه اعتلا اولنه جغی شبهه دن وارسته در .

ان شاء الله کله جك سنه خروج امتحاننده (ثالثه) یی  
قازانمق اوزره چالیشه جغم . دعا کز برکاتیهله موفقده  
اوله جغمی امید ایدیورم .

مساعده بیوررسه کز استانبولك رمضاتی کورمك  
اوزره بوسنه درسعادته قالمق آرزوسنده بولنیورم .  
بوکا جسارتم حق کمترا نه مده مبذول بیوره کلدی کز  
مساعده پدرانده کزه استناد مدندر .

هر حالده محتاجی بولندیغم حسن نظرکزك دوام  
تزیادینی استرحام ایلرم . باقی

## - ۱۳ -

سماحتلو افندم حضرتلری

افندمز کی انسانیت کلمه مقدسه سنده مندمج اولان  
 مزیات عالیله ايله ممتاز بر ذات بی انبازک حمایه سمو حیلرنده  
 بولندیغمدن طولای نه قدر افتخار ایتسم آزدر.  
 خاک پای جبهه پیرای منعمانه لرینه اولان انتساب  
 عیدانه مک آثار عالیله سندن متحصل اشواق خالصانه نک  
 استیلای فیض بخشاسی آلتده بولنان بر وجدان خالص-  
 البیان ايله هر بار ادعیه خیریه لرینی تکرار ایتمکده ایکن  
 صبح سعادت شو ال افق شادیدن عرض جمال ایدنجه  
 خاصه مقدسه صیام ايله پاک بر قلب تابناک ايله ذات کرم-  
 کستریلرینک تمادی عافیت و اقباللری دعاسنی همان رفع  
 بارگاه احدیت و بوضورتله تزین لسان عبودیت ایلدی کمی  
 حضور فیض نشور ولی نعمتیلرینه عرضه مسارعت و بونی  
 تأیید رشته رقیته بر ذریعه حسنه اتخاذ ایدهرک:

«عیدست دارد هر کسی عزم تماشای دکر»  
 «مارا نباشد غیر تو درد دل تمنای دکر»



منطوقنجه حق كمترا نه مده كي حسن توجه ساميلرينك  
بقاسي استرحامنه مبادرت ايلرم.

\*  
\* \*

## — ۱۴ —

معروض داعي دیرینه لریدرکه

باب دولتماب حضرت ولی النعمیلرینه اولان انتساب  
عیدانه مك مقتضیاتندن اوله رق آستان کرم کستریلرینه  
کمال اخلاص ایله عرض اختصاصه مسارعت و بو وسیله  
مستحسنه ایله مترتب ذمت عبودیتیم اولان وظیفه شکر-  
گذاریه مبادرت ایتک ایچون وسائل جمیله یه جار چشم  
ایله نکران ایکن شرف حلول سال جدید شوق بخش  
قلوب اهل توحید اولنجه:

کونلرک آیلر قدر افزون اولوب

آیلرک ییلر قدر اولسون فزون

بویله بیک سال نوه ادراک ایدوب

سور صفا دولته سن ای ذوقنون

قطعه سی پیرایش لسان داعیانهم اولدی.

همان مداومی بولندیغم دعای حضرت پادشاهی به تردیفاً  
ادعیه خیریه جناب فتواینهیلرینی تکرار ایله:

«آیاغك طوپراغن کر کوهر مقصود بیلمز سه»

«بو دریای حوادثه وجودم نابدید اولسون»

بیتی منظوقنجه خاکی پای جبهه پیرای مفتی الانامیلرینه  
عرض عبودیتله ایفای فریفه تبریکه اجتسار و :

«کاه کاهی کوشه چشمکله قیلماز سهك نظر»

«باقی بی چارهنك احوالی دیگر کون اولور»

بیتنی کویا اوله رق مدار افتخارم اولان حسن نظر فیض-  
اثر مشیختپناهیلرینك حق داعیانه مده مبذول بیورلمسی  
تمنیات مخصوصه سیله ختم کفتار ایلرم .

\*  
\* \*

— ۱۵ —

سماحتلو اقدام حضرتلری

من غیر حد نائی بولندیغم قضانك آب وهواسی غایت فنا  
اولغله کلدیکم کوندن بری خسته لکدن باش آله مدیغم کبی  
اهالیسنك ایلری کلنلری ده ایقاع فسادی کندیلرینه



اكنبجه اتخاذايده كلدكلرنندن بونلرك احوال غير مرضيه-  
لرندن متحصل اضطرابات وجدانيه خسته لکمی تشديد  
ايدیور .

مملکتک آب و هواسنه وجودم متحمل اولمش اولیدی  
بو یادکارلری سایه شریعت احمدیه ده اصلاحه چالیشیردم.  
نه چاره که وجودم متحمل دکل.

بناءً علیه استغفایه مجبور اولدم . استغفای داعیانهم  
مقام معلاى مشیختدن قبول بیوریلورسه متشکر اولوردم.  
بر لطف عاجز نوازانه اولمق وبورادن نقل ایدمک  
اوزره مناسب بر قضا نیابتی ایله قایریله حق اولورسه  
عبدکترلری عائله بندکانه مله برابر یکیدن احیا بیورلمش  
اولورز .

جناب خالق بی انباز سایه تعالی وایه مفتی الانامیده  
ذات سموحیلرینی کمال عمر و اقبال ایله بین الاماثل ممتاز  
بیورسون دعاسیله ختم کلام وحق عیدانه مده مبدول  
بیوریلان همم کرمکاریلرینه بر لاحقه فائقه اولمق اوزره  
مسئول داعیانهمک اسعافی خصوصنه صرف همت بیور-  
ملرینی استدعا ایله حسن توجه منعمانه لرینک دوام  
وتزایدینی استرحام ایلرم .

## — ۱۶ —

سماحتلو افندم حضرتلری

بو هفته پوسته سیله ورود ایدن طریق غزته سنک  
توجیهات قسمنده سینہ سموحیلری بر قطعه کومش  
امتیاز مدالیه سیله تزین بیورلمش اولدیغی فقره شوق -  
آوری مصادف نظر کتری اولنجه کال سرورمدن :

صدق ایله خدمت ایدنلر دولته بی اشتباه  
شهریارک التفاتیله اولورلر سرفراز

عمر و اقبالک فزون اولسون شه عالمپناه  
سینہ اخلاصکه طاقدی نشان امتیاز

قطعه سنی کویا اولدم .

افندمزک احسان پادشاه قدر دانه مظهریتلری عبد

عاجزلری کبی بتون داعیان دولتی شاد ایلدی .

همان جناب فیاض مطلق، خلیفه موفق، امیرالمؤمنین

ولی نعمت بی منتمز پادشاهمز افندمز حضرتلرینی دائماً

علو شان و اقباله قرین وذات سموحیلرینی سایه احسان -

وایه حضرت ملوکانه لرنده کامبین بیورسون دعای واجب -



الاداسنه اردافاً ایفای فریضه رسم تبریکه آغاز و حق  
کترانه مده تنزلاً رایکان بیوریلان التفات بنده نواز یلرینک  
بقا و ازدیادینی خال پای جبهه پیرای سامیلرندن کمال خلوص  
قلب ایله نیاز ایلرم.

\*  
\* \*

## — ۱۷ —

معروض داعی دیرینه لریدرکه

نیابتی عهده کترانه مه تفویض بیوریلان فلان قضایه  
کلدیکم کوندن بری دعوات مفروضه خیریه لرینی استجلا به  
غیرت ایتمکده ایسه مده عائله بندکانهم قضای مذکورک  
آب وهواسیله امتزاج ایده مدکلرندن کلبه عاجزانهم بر  
خسته خانه شکنی آلمشدرکه بی چاره لریک ذهنمی تشویش  
ایتمکده اولان بو حالی امور قضاده مغایر دلخواه عالی  
برحر کتده بولتمقلغمه سبب اولوردیه فوق العاده مضطرب  
اولیورم .

بو اضطراب عاجز لرینی زیاده سیله بی تاب ایتمکده  
اولدیغندن عائله بندکانهمک دوچار اولدقلری حال اسف  
اشتماله نهایت ویرلمسی و کتر لرینکده شو مضیق اضطرابدن

خلاص ایدملککم تبدیله مکانه وابسته بولندیغی جهته  
 فلان قضا تائی فلان افندی داعیلری مراجعت مستمدانه مه  
 موافقه بجایش قضایه راضی اولدیغندن افندی مومالیه  
 داعیلری ایله اجرای بجایشمنز خصوصنه مساعده  
 دولترینک ارزان بیورلمسنى مرحمت مسلمة جناب فتوا-  
 پناعیلرینه صیغنه رق استرحام و دائماً آرایش لسان داعیانهم  
 اولان دعای دوام عافیت واجلاللریله ختم کلام ایلرم .

\*  
\* \*

## — ۱۸ —

معروض داعی دیرینه لریدرکه

موکول عهده داعیانهم اولان امور قضایی حسن  
 تسویه صرف مقدرت و بوضورتله استجلاب دعوات  
 خیریله رینه وقف غیرت ایدهرک سایه سماپایه مفتی الانامیلرنده  
 شریعت مطهرده خدمتله اصرار وقت وساعت ایتکدهیم .  
 هاه صلوات مفروضه عقبنده مترتب ذمت عبودیم  
 اولان دعای تمادی عافیت واجلاللرینی زیور زبان اخلاص  
 وفرصت دوشوردکجه بووظیفه مقدسهیه تردیفاً خالکپای  
 ناصیه پیرای دولترینه عرض اختصاص ایدهکدیکم کبی



بوکرده مربوطاً تقدیم پیشگاه دقایق اکتناه فتوایناهیلی  
 قیلان ضبط ورقه‌سند کی دعوای فصل وحسمه صالح  
 کتب فقهیه ده بر نقل واضح بوله مدیغ جهتله حلندن عاجز  
 اولدیغ دعوای مباحوث عنهانک ایضاح بیورلمسی استرحامنی  
 تأیید انتسابه بروسیله اتخاذ ایدرک ملتجای کبار وصغار  
 اولان ذات فضائل سمات مشکل براندازانه لرینه مراجعت  
 وبوبابده کی استرحام کترانه مک اسعافی خصوصنی استدعایه  
 جراتله برابر حق داعیانه مده حسن توجه حضرت  
 ولی النعمیلرینک کماکان مبذول بیورلمسی تمیسنه مجاسرت  
 ایلرم . هر حالده امر وفرمان حضرت ولی الامر کدر .

\*

\* \*

— ۱۹۰ —

معروض داعی دیرینه لریدرکه

نیابتی عهدۀ کترانه مه تفویض بیوریلان فلان قضایه  
 کلدیکم کوندن بری سلف بندکانهم فلان افندی داعیلرینک  
 حرکات کاهلانه سی نتیجه سی اوله رق بیغیلوب قالمش اولان  
 ایشلرک حسن تسویه سنه غیرت وهر حالده مغایر دلخواه  
 عالی حرکات غیر مشروع دن مجانبته سایه عدالت وایه

مشيختپناهيلرنده استجلاب دعوات حضرت پادشاهي به  
صرف قدرت ايتكدهيم .

نائب عنوان محترمي آلتنده بولنانلرك موقعا هر درلو  
شوائب مادي و معنويه دن متجانب اولملري لازم كليركن  
سلف داعيانه م بو لزومي تقدير ايدمهديكي جهتله مصالح  
عبادي رؤيتده كاهلانه طاورانديغي شويله طورسون  
ايتام صندوقندن اختلاس ايلديكي يكرمي بيك غروش،  
جيب ارتكابنده قالمش اولديغندن مبلغ مذكورك افندي  
موما اليه دن استرداد ايدلمسي خصوصنه مساعدۀ اصابت -  
عاده مفتي الاناميلرينك ارزان بيورلمسني استرحام  
ويكانه باعث فيض و افتخارم اولان پرتو حسن نظر  
كرامت اثر ولى النعميلرينك هامة عاجزانمه تمادي انعطافني  
كمال افتقار ايله نياز ايدمرك روز و شب آرايش لسان  
داعيانه م اولان :

باب احسانك ايا مرجع كل  
ملتجاي ضعفادر الحق  
ياشا عالمده سعادتله ياشا  
عمر و اقبالكي افزون ايدمحق



قطعه سیاه ختم کلام ایلرم . هر حالده امر و فرمان حضرت  
من له الامر کدر .

\*  
\* \*

## — ۲۰ —

سماحتلو افندم حضرتلری

فی ۱۵ رجب سنه ۳۰۶ تاریخلی امرنامه سمو حیلری  
واصل دست عاجزانهم ومال عالیسی معلوم داعیانهم  
اولدی .

عاجزلرینک شمدییه قدر منهج استقامتدن سرمو  
انحراف ایتدیکم من غیر حد نیابتنده بولندیغم قضالر  
اهالی معتبره سی طرفلرندن حق نامستحق بندکانه مده  
مقام مشیخت عظمایه تقدیم قیلان حسن حال مضبطه لریله  
تأبدر .

اگرچه فلان افندی، فلان آغا ایله بیلرنده تگون  
ایتمکده اولان دعوانک سورنجمه ده بیرا قیلدیغنی باتلغراف  
خال پای عدالت پیرای حضرت ولی النعمییه بیلدیر مش  
ایسه ده سائر ایشلرده اولدیغنی کبی سلف داعیانهمک  
زمانندن منتقل دعوای مذکورده ده دخی ذره قدر تکاسل

اولمديغنه و افندیء موما اليهك بويله بر شكایتده بولمسی  
 مجرد ادعای واهیسنی قازانمق فکر فاسدیله نه یاپه جفنی  
 شاشیردیغندن ایلری کلدیکنه بتون اهالیء قضا شاهددر.  
 امرنامهء سامیلری پیرایش هامةء تکریم اولمازدن ایکی  
 کون اول دعوی مذکوره نظر تدقیقندن کچیریلوب  
 بر موجب شرع شریف فصل و حسم اولندیغنی عرضه  
 مبادرت و حسن نظر فیض اثر منعمانه لرینک بقاسنی  
 استدعایه جرأت ایلرم. هر حالده امر و فرمان افندمن  
 حضرتلرینکدر.

\*  
\* \*

## — ۲۱ —

معروض داعیء دیرینه لریدرکه  
 یازدهء خمول اولان بالجمله در ماندکانک و باخصوص  
 داعیء کمتلری کبی عجزهء بندکانک مرحمت عالم پسندانهلرندن  
 بشقه برالتجا کاهی اولمديغندن صیقیدر قجه خاکی پای عیون  
 آرای شیخ الاسلامیلرینه ناصیه سایی عبودیت اوله رق  
 عرض حاله شتابان وهمان احسان کونا کون دولترلرینه  
 مظهریتله کامران اوله کلدکلری مشهود باصرهء عالمیانددر.



بناءً علیه مستغرق اولدیغ دیون بی شمار، ذات ستوده-  
 صفات ولی النعمیلرینی تصدیقه اجبار ایتکله انقضاسنه  
 اوچ ماه قالمش اولان مدت نیابت ناچیزانه مک تمیدی  
 خصوصنه مساعده جلیله مشیختپناهیلرینک بی دریغ  
 بیورلمسنى کمال افتقار ایله استدعا وهر حالده تشکرندن  
 عاجز اولدیغ الطاف متوالیه فتوایناهیلرینه بر ضمیمه  
 مستحسنه اولق اوزره مسئول عاجزانه مک اسعاف  
 بیورلمسنى نخبه آمال داعیانهم اولان بقای انظار محاسن-  
 دثار کرمکاریلری نیازینه تردیفاً تمنا ایلرم . هر حالده  
 امر و فرمان حضرت ولی الامر کدر .

\*  
\* \*

— ۲۲ —

معروض داعی دیرینه لریدرکه  
 پایمال طالع وارون اولان بی چارکانه مرحمت مسلمه لری  
 مفتوح الباب برملجاً یکانه اولدیغی مسلم انام بر قضیه  
 مالا کلامدر .

هله خالک پای جبهه پیرای ولی النعمیلرینه اختصاصلری  
 و باخصوص داعی کمتلری کبی چراغ حاصلری اولان

بندكان صداقت نشانك باشلری صیقیلدجه دارالامان  
 دولترلرینه التجایه شتاب وهمان صحابت فتواپناهیلرینه  
 نائلیتله دفع اضطراب ایده کلدکلری معلوم شیخ وشابدره  
 بناء علیه صراف نابکاره اولان دیون بی شمار عبد  
 احقر لرینی هر صورته یزار وهر نه قدر ذات ستوده صفات  
 مشیختپناهیلرینی تصدیع ایتکی وجهاً من الوجوه جائز  
 کور مرسمده آستان سماحتلرینه عرض حاله اجبار  
 ایتکده اولدیغندن شیمه کریمه عجزه پروریلرینه صیغینه رق  
 انقضاسنه برقاچ ماه قالمش اولان مدت نیابت عاجزانه مک  
 تمیدی خصوصنی استدعايه مسارعت و حال ضجرت اشتهاله  
 مرحة مسئول داعیانهمک اسعافی استرحامنه مجاسرت  
 ایلرم. هر حالده امر وفرمان حضرت ولی الامر کدره.

\*  
\* \*

— ۲۳ —

معروض داعی دیرینه لریدرکه  
 کمالات باهره لری مغبوط یار و انیار اولان اصحاب  
 حصافت، حل اشکال ایچون ذات معالی سمات مشکل-  
 براندازانه لرینه مراجعتله مشکات فضیلتلرندن اقتباس



نور معرفت ایدہ کلدکاری خالدہ عاجز لری کبی وایکانک  
مشکلاتہ تصادف ایتدکجه آستان فتواپناهیلرینه استکناه  
مسئله ضمننده ناصیه سایی استرحام اوله جقلری طبعیدر.  
بناءً علیہ صورتی مربوطاً خاکی پای عدالت احتوای  
شیخ الاسلامیلرینه تقدیم قیلنان ضبط ورقه سنده کی  
دعوانک کتب فقهیه ده فصل وحسمنه یاردیم ایدر برنقل  
مناسب بوله مدیغم کبی مفتی افندی داعیلری ده دعوای  
مباحوث عنهاده مدعی علیہ حاجی اوغلی رمضان آغایه  
آچیقندن آچیغه طرفدارلق ایتکده اولدیغندن مقام  
معلائی مشیختدن بوبابده استفتایه مجبور اولدم.

دعوای مباحوث عنهانک حل بیورلمسی ایچون لازم  
کلنلره امر ویریلهرک جوابنک سرعت اشعاری خصوصنه  
مساعده جلیله مشیختپناهیلرینک رایکان بیورلمسی  
استرحامنه اجتسار وهر حالده مدار فیضم اولان انظار  
محاسن آثار حضرت ولی النعمیلرینک کماکان حق کترانه مده  
دوام ابذالی نیازینه ابتدار ایلرم. اول بابده امر وفرمان  
حضرت ولی الامر کدر.

## — ۲۴ —

معروض داعی دیرینه لریدرکه

باعث حسن توجه نحریرانه لری اوله جق بر مزیت  
و آستان فلک بنیان دولترینه خصوصیتیم یوق ایکن ایکی  
سنه دن زیاده کوشه مذلتده پامال خیت اولوب قالمش  
وهله زمان منکوبیتیمک ایام اخیره سنده بقال، قصاب  
دینلن انصافسزلرک هجوم ناموس شکنانه لریله بوکالمش  
اولدیغم مسموع عالی کرمکاریلری اولنجه عهده کترانه مه  
معدن قضاسی نیابتی احسان ایله گرفتار اولدیغم قید  
ضرورتدن آزاد و جوهر التفات عجزه پروریلریله دل  
غمدیده می مسرت آباد بیورملری ناقابل شکران برلطف  
فیض اقتراندر.

بناءً علیه اک برنجی وظیفهم باعث فیضم اولان بو  
لطف بی هال مشیختپناهیلرینی عمرم اولدجه اونو تمیوب  
مقام عبودیتده ثبات و بین الاقران تمیزمه بربرات سعادت  
عنوان اولان التفات کرامت غایات فتواپناهیلریله مباحات  
ایتمکدر.

جناب ذوالجلال ذات خجسته صفات شیخ الاسلام



میلرینی مقام مشیخته کمال عافیتله سایه انداز اجلال  
 بیورسون درود مسعودینه تردیفاً محل مأموریت کترانهم  
 اولان قضای مذکوره فی ۷ شعبان سنه ۳۰۶ تاریخیه  
 موصلت وبحول الله تعالی مصالح عبادی رؤیته مباشرت  
 ایلدیکمی خاکی پای فیض بخشای ولی النعمیلرینه عرض  
 و انبا و حق عیدانه مده تمادی انظار شفقت آثار بنده  
 نوازانه لرینی تمنا ایلرم.

\*

\* \*

## — ۲۶ —

معروض داعی دیرینه لریدرکه

خاکی پای افخمیلرینه وضع جبین عبودیت ایتدیکم  
 کوندن بری ذات خجسته صفات ولی النعمیلرندن کور  
 دیکم الطاف فیض اتصاف فتواینهیلرینک تشکرات  
 لازمه سنی احسن وجوه ایلله ادادن عجزم بدیداردر، فقط  
 لسانم روز و شب ادعیه خیریه لر یله سبحه شماردر.

افندمن کی افتخار افاضل بر وجود ذی فضائلک  
 سایه تعالی وایه مفتی الانامیلرنده بولنمق پک بیوک دولتدر،  
 چونکه باعث فیض و رفعتدر.

مسلم یار و اغیار اولان مرحمت دولتری بی چارکان  
ایچون نامتاهیدر، حمایه مشیختپناهیلرنده بولمقاه دل  
و جانم مباهیدر.

باب دولتمآب شیخ الاسلامیلری هر حالده جای  
پناهیدر، یکانه امیدکاهیدر.

بناءً علیه دوچار اولدیغم حال ضجرت اشتماله مرحمة  
انقضاسنه ایکی بحق ماه قالمش اولان مدت نیابت کترانه مک  
تمدیدى خصوصى استدعايه مسارعت ومسئول عاجزانه مک  
اسعاف بیورلمسنى استرحام ايله مدار مباحاتم اولان  
توجهات مراحم غایات بنده پروریلرینک حق عیدانه مده  
بقا و ازدیادی نیازینه مبادرت ایلرم .

\*  
\* \*

— ۲۶ —

معروض داعی دیرینه لریدرکه

مقام مشیخت، ذات محاسن صفات نحریرانه لريله  
شرفیاب اوله لی بنده دیرینه لری کبی بتون خدمه شریعت  
سایه تعالی وایه مفتی الانامیلرنده اقتدارلری نسبتنده



کسب فیض و رفعت و دائماً الطاف ولی النعمیلرینه مظهریتله  
مسروراً اصرار وقت و ساعت ایتکده درلر .

کبار و صغار بونک حق تشکرینی لایقیله ادا دن عاجز  
اولوب فقط حضرت حکیم یچون اقدمزی الی آخره  
الایام مسند فتواده کمال عافیتله صلابتمون بیورسون  
دعاسنه مواظبتله دمکدار و عاجز لری دخی پیرایه لسانم  
اولان :

حضرت مفتی الانامی حشره دک

ایله یارب صدر دولته مکین

ذاتی اکداردن حفظ ایلوب

قل کمال عافیتله کامبین

قطعه سیله سبحه شمار لیل و نهار ایکن جناب دولتماب  
شیخ الاسلامیلرینک کیفسزلک لری خبر تاسف اثری  
واصل صماخ احقری اولنجه دوچار آلام وهمان اعاده  
عافیتلری ایچون درگاه قاضی الحاجاته دست کشای استرحام  
اولدم .

هله برقاج کوندن صکره کمالیه اعاده عافیت والتفات  
مخصوص پادشاهی به نائلیتله برقات دها کسب علو حیثیت

بیوردقلری مژدهٔ مسرت کستری ابتهاج بخش دل کمتری  
اولمغله سجدهٔ شکرانه وضع جبین و فرط شو قمدن  
اجرای شهر آیین ایلدم .

جناب پروردکار آفتاب شریعت محمدیه مفارق امتده  
شعشعه بار اولدجه وجود پرسود دولتیرینی اسقام صوریه  
و مغنویه دن مصون وسینه بی کینه لیرینی انوار نور سرور  
ایله مشحون بیورسون درودینی تکرار و :

« ای از تو بلند قدر کاشانهٔ ما »

« آباد بدولت تو ویرانهٔ ما »

« از سایهٔ دولت کنون می خواهم »

« هم سایهٔ آسمان شود خانهٔ ما »

ترانه سیه حق عیدانه مده انعطاف انظار فیض مدار  
کر مکاریلرینک ازدیاد ابدالی نیازینه اجتسار ایلرم .

\*

\*\*

— ۲۷ —

سماحتلو افندم حضر تلی

روز و شب مترتب ذمت عبودیتیم اولان دعای دوام



وازدیاد عمر و اقبال لرینی ادا ایله مفتخر و تجدید انتساب  
ایچون چوقدن بری بر ذریعه حسنه ظهورینه کمال تهالکله  
منتظر اولدیغم حالدده جلائل عواطف حضرت پادشاهیدن  
اوله رق عهده استیصال نحریرانه لرینه روم ایلی پایه سی  
احسان بیورلدیغی پیام نشاط آوری انبساط بخش صماخ  
کمتری اولنجه کاشانه قلم انوار ابتهاج ایله طولدی، فرط  
شوقدن :

خامه م ایده من مرتبه فضلکی تقدیر  
محسود افاضلسین ایا فخر کمالات  
فضلك یتشیر قدریکی اعلایه جهانده  
هر رتبه ایدر ذات شریفکله مباحات

قطعه سی زیور لسانم اولدی .

یقینده حسرة العلما اولان مقام معلا ی فتوایه سایه  
انداز شرف اولدقلرینی کوردرکینه بویله تأیید رشته  
عبودیتیه موفق اولمقلغمی جناب فیاض مطلقدن تمنی ایله :

«بی لطف تو من قرار نتوانم کرد»  
«احسان ترا شمار نتوانم کرد»

«گر برتن من زبان شود هر مویی»  
 «يك شكر تو از هزار نتوانم كرد»

رباعی منطوق بجهادای تشکر نندن عاجز اولدیغم و هر حالده  
 محتاجی بولندیغم حسن نظر فیض اثر سمو حیلرینک حق  
 کمترانه مده بقا و تزایدنی شیمه کریمه بنده پروریلرینه  
 استناداً نیاز ایلرم، خامه داعیانهمی :

«بارگاه نه قباب آسمان طور دقچه طور»

مصراعيله دمساز ایلرم .



— ۲۸ —

افندمن !

فی ۱۱ ذی الحجه سنه ۳۰۷ تاریخلی و دادنامه برادران  
 نه کز انمله پیرای عاجزانهم اولنججه سوينجمدن :

التفاتك خاطر ناشادمی شاد ایلدی

مصراعنی اوقویه رق رقصان اولمغه باشلادم .  
 بورایه کلدیکمک بشنجی کونی التفاتنامه مخصوصکزه



دسترس اولمقلغم نه درجه لرده مسروریتی موجب اولدیغنی  
 لایقیله تصویر اتمک اقتدار خامه مک قات قات فوقنده دره  
 بونی رسمی بر التفاتنامه دیه تلقی ایتیوب حقمده  
 دائما اظهار بیورمقده اولدیغکز محبت خالصانه ک احکام  
 جلیله سندن منبعث بربرات اخوت اولق اوزره قبول  
 ایدرک حرز جان ایلیه حکمده ذره قدر شبهه بیورمیه  
 جغکزی بیلدیکم ایچون بو بایده ایراد براهینه حاجت  
 کوره مم .

سزدن مجبول اولدیغکز خصائل برکزیده انسانیتکارانه  
 جمله جمیله سندن اوله رق کورمکده اولدیغم التفات دلنوازانه  
 بنده کزی هر بار عرض شکرانه مجبور اتمکده اولدیغی  
 حالده بو بایده واقع اولان قصوره مسامحه ایله نظر  
 بیورلدیغنی کوردکجه بختیارلغمک درجه سنی تقدیر  
 ایده میورم .

بوورقه جوابیه می شوائب اغراضدن پاک بروجدان  
 تابناک محصولی اولق اوزره قبول بیورمکزی رجا  
 و بزم فلان افندییه سلامیزی تبلیغه تنزل بیورمکزی  
 نیاز ایله :

« از ماسلام وازتو تغافل زحد گذشت »  
 « کوی تغافلست جواب سلام ما »

دیدیر مامسنی افندیء مومالیهدن تمنا ایلرم. باقی اخوت .

\*  
\* \*

— ۲۹ —

سماحتلو افندم حضرتلری

جهانی اجرا آت مستحسنه لر یله حیرتده بیراقان شهریار  
 دیندار تاجدار معالی کردار افندمن حضرتلری فلان  
 افدینک وقوع وفاتنه مبنی منحل اولان فتوی امینلکی  
 مسند منیفنک بین الافاضل جلائل فضائل ایله ممتاز  
 بر فقیه بی انبازه احالہ سی لزومنی تقدیر ایله جناب فقاہت  
 مآب سمو حیلری کبی آفتاب اشتہار بر نحریر حکم  
 مشوارک عہدہ استیہالترینہ امانت مشارالہایی تفویض  
 بیوردقلری خبر مسرت کستری سامعه نواز کتری اولور  
 اولماز ، کوکلمده مثال سراج وهاج لمعان ایتکه باشلایان  
 انوار ابتہاج کوزلرمہ انعکاس ایله پرتو افشان اولدی .



نصل اولسون که بو توجیه و جیه امیر المؤمنین خلیفه  
روی زمین ولی نعمت بی امتنا من پادشاه ذی شان من  
افند من حضرت لرینک شریعت غرایه اولان حرمت  
مخصوصه شاهانه لرینک درجات عالیه سنی تعیین ایتک ایچون  
برهان جلیدر .

زیرا افند من کبی فضیلت باهره لری:

«نسب اضاء عموده فی رفعة»

«کالبدر فیہ ترفع و ضیاء»

«و شمائل شهد العداة بفضلهما»

«والفضل ماشهدت به الاعداء»

قطعه سی منطوقه منجه مسلم یار و اغیار و استقامت زاهره لری:

معلوم پادشاه جهان استقامتک

مصر اعنجه مدرکه پیرای اولو الابصار اولان بر ذات  
خجسته صفاتک فتوی امیندکی کبی ال ک مهم بر وظیفه  
مقدسه نک عهده عرفانپناهیلرینه تودیعی مسلمانلرجه  
موجب شکران عظیم اولمشدر .

همان جناب منزل القرآن شریعت احمدیه حرمتیه  
 افندمزی الی آخر الایام کمال عافیت و اجلال ایلله سریر  
 آرای شان بیورسون درود مسعودینه تردیفاً من غیر  
 حد ایفای رسم تبریکه ابتدار و خاک پای بنده پیرای  
 نحریرانه لرینه اولان اختصاص داعیانهمه استناداً حق  
 عاجزانهمده حسن انظار فیوضات مدار کرمکاریلرینک  
 بقا و ازدیادی استرحامنه اجتسار ایلرم.

\*

\* \*

— ۳۰ —

سماحتلو افندم حضرتلری

روز و شب ولی نعمتک دعای افزایش عمر و اقباله  
 مداومت و فرصت دوشوردجه تأیید رابطه خصوصیت  
 مسارعت قاعده دیرینه عبودیت اقتضای عالیشان اولمغه  
 هر بار آرایش لسان افتخارم ادعیه خیریه لرینی تکرار ایلله  
 برابر احکام رشته رقت ایچون بروسيله جمیله یه مهالکانه  
 انتظار ایتمکده ایدم.

امام الحرمین سید الکونین افندم حضرتلرینک



شب ولادت سنیله‌ری مشرق آرای جهان و کعبه و جداننده  
 مصابیح اخلاص اشعه فشان اولدیغنی کورنجه سجده  
 شکرانه وضع جبین نیاز و جناب قاضی الحاجاتدن  
 افندمری الی یوم القیام صحن سرای عافیتده کمال اجلال  
 ایله مستدام بیورملری درود مسعودینه آغاز ایلدیلمی  
 حضور فیض نشور ادیبانه‌لرینه عرض و انبا و ایفای  
 فریضه تبریکه اجترایدوب حق عاجزانهمده کماکان  
 توجهات جهان درجات سمو حیلرینک رایکان بیورلمسی  
 استرحامی باینده تمیق رقیمه عبودیته ابتدار قیلندی .

\*

\* \*

— ۳۱ —

ای باد صبا یوف سکا اسماع ایده مزسه‌ک  
 فریادمی اول یار قدیمه بو سفرده

برادر عزیزم افندم

مکاتبه آیین حکمت قرینی بین الصغار و الکبار مرعی-  
 الاجرا بر قاعده محبت مدار اولدیغنی بیلدیگیزی بیلدیکم  
 جهتله بورایه کله‌لی اوچ مکتوب کوندردیکم حالد هنوز

بر جوابنامه ادیبانه کزی آله مامیشم فوق العاده محزونیتمی  
موجب اولدی .

شمدی به قدر بر التفاتنامه کزه دسترس اوله میشمی  
ذات عالیکنزك قاعده مباحوث عنهایه حاشا عدم رعایتکزه  
دکل، داعیکنزه بیله مدیکم بر شیدن طولانی کوجنمش  
اولدیغکزه حمل ایتدیکم جهتله متأثر اولدم.

عجبا قصورم عفو اولنماز بر قباحتמידرکه حقوق  
قدیمیه رعایه اولسون بر جوابنامه ارسالنه تنزل بیورلمیور؟  
عفو اولنمیه جق کستا خلقده بولندیغمی در خاطر ایده.  
میورم. قلبمده پک قیمتدار بیلدیکم حرمت مخصوصه.  
کزدن بشقه بر شی اولمدیغی جهتله هر نه قصور ایتدمسه  
لطفاً عفو بیورمکزی خاصهً تمنی ایدرم.

عفو ایله معامله شعائر انسانیتک اک مقبوللرندن بو.  
لندیغنه بونجه آثار مقبوله شهادت ایتکده اولدیغندن،  
ذاتکزی ایسه بویله بر صفت ممدوحه بی حائر بولندیغکزدن  
حقمده روا کوردیککز معامله بی جزای کافی عد ایله بو  
فریادنامه مقابله لطفکارانده بولنمکزی حمیت برادرانه.  
کزدن بکلرم. باقی . . .



## — ۳۲ —

معروض داعی دیرینه لریدرکه  
 سلف عاجزی خلاف رضای آلهی و مغایر دلخواه  
 پادشاهی حرکت هر حالده موجب ندامت اوله جغنی دو-  
 شونمیه رنک اموال ایتامدن . . . غروش اختلاس ایتدیکی  
 صندوق حساباتی حین تدقیقده بیدار اولدیغندن  
 و نخبه افکار رحیمانه لری حقوق ایتامک محافظه سینه  
 مصروف اولدیغی آشکار بولندیغندن مبلغ مذکورک  
 افندی مومالیهدن استردادیله بو طرفه ارسالنی لازم  
 کلنلره فرمان و بو اختلاس ایله امر تعیشلری سکتهدار  
 اولان ایتامک آبادی قلوب منکسره سی خصوصنه مسا-  
 عدۀ جلیله مشیختپناهیلرینک رایکان بیورلمسی باینده  
 امر و فرمان حضرت ولی الامر کدر.

\*

\* \*

## — ۳۳ —

معروض داعی دیرینه لریدرکه  
 فلان قضا نیابتندن انفصالم ایکی بحق سنه اولوب هر

نه قدر آلتی آی مقدم فلان قضا نیابتی حسب الاصول  
تکلیف اولندیسهده فامیلیام جاریه لری اووقت اسیرفراش  
بولمغله قضای مذکوری قبولدن استنکاف ایتکه مجبور  
اولدم .

مؤخرأ بی چاره اعاده صحت ایتدیکندن بعض قضائر  
نیابتنه طالب اولدمسهده اولجه بو قضائر بشقه لرینه وعد  
اولنوب داعی کترلرینه هواسی وخامتله مشهور اولان  
فلان قضا تکلیف ایدلدی.

هنوز کسب عافیت ایتش بر بی چاره بی اورایه آلوب  
کوتورمک موافق عقل وحکمت اولهمیه جغندن و بوراده  
بر کیمسه اولمدیغی جهتله مزبورده بی بیراقوب کیتمکده  
اویهمیه جغندن مذکور قضایی قبول ایدهمیه جکی بالیان  
کرفتار اولدیغم حال پرملاله مرحمة مناسب بر قضا نیابتی  
احسانیه احیا بیورلمقلغمی تمنا ایتدمسهده مسئؤل عاجز  
نهمک اسعافی خصوصنه هر نه دن ایسه سلف فتواپناهیلری  
مساعدده بیورمدیلر.

عبد احقر لری کبی بر فلک زده یه عطف نظر مروت  
وایدیلن استرحاماته حواله سمع مرحمت بیورلمدیغی  
کورنجه سحاب ادبار آلتنده قالمش اولان آفتاب طالعک



بر کون اولوبده بو ظلمت نحوستدن قورتيله رق برج  
سعادتن عرض دیدار ایده جگنی بیلدیکم جهتله او روز  
مسعدت افروزه انتظاردن بشقه چاره م قالمیوب مهاجمات  
بلاییه چارناچار کوس کر مکه قرار ویردم.

بو حال ایله وادیء ضجرتده مایوسانه تکاپو و دوشمش  
اولدیغم بو کریوهء فلاکتدن قورتلمنک طریقنی جست و جو  
ایتمکده ایکن هله افندمن کبی عجزه پرور بر ذات فضائل-  
کسترك مقام معلاى مشیختی تشریفلری پامال ضرورت  
اولان کوکله امیدبخش سعادت اولدیغندن چاره ساز  
بی چارکان اولان مرحمت مسلمة ولی النعمیلرینه صیغینه رق  
حالمه مناسب بر قضا نیابتیه قاییرم قلمم خصوصنه مساعدۀ  
حکمت عاده جناب شیخ الاسلامیلرینک ارزان بیورلمسنى  
کمال افتقار ایله استدعا و مسئؤل عاجزانهمک اسعافی باینده  
دریغ عاطفت بیورلما مسنى تمنا ایلرم. هر حالده امر و فرمان  
حضرت ولی الامر کدر.

\*

\* \*

— ۳۴ —

دولتو افندم حضرتلری  
حصافت آصفانهلری تسلیم کرده عقلا و لیاقت ادیب-

نهلری زبازرد فضلا اولان ذات ستوده صفات دولتلری  
کبی بر وزیر فلاتون تدبیرک عهده استیماللرینه از میر  
ولایتی والیلکی تفویض بیورلدیغی کمال شوق ایله استخبار  
ومرکز ولایتی تشریفلری استبشار اولندی .

بویله بر موقع مهمده جهان مدنیتی تنویر ایتمکده  
اولان ترقیات حاضر دنک اسباب حصوله من کل الوجوه  
آشنا جناب دولتمآب حکیمانهلری کبی بروالیء معارف  
پیرانک بولمهلری دین و دولتجه فوائد عظیمه یی موجب  
اولمغله اهالیء ولایت تشریف دولتلیله نه قدر اظهار  
مسرت ایتسه لر بحادر .

ذات حکمت سمات داورا کرملرینک ولایت مشار-  
الیهایه شرفبخش اجلال اولملرینی مستلزم شکران بر نعمت  
بی امتنان عدایله ایفای رسم تبریکه اجترأ وداعیء کمتلرینی  
تنزلاً بنده لکه قبول ایله کامیاب بیورملرینی تمنا و سایه  
ترقی وایه شاهانه ده خدمات جلیله یه موفقیتلری دعای  
واجب الاداسنی رفع بارگاه کبریا ایلرم .



## — ۳۵ —

معروض داعی دیرینه لریدرکه  
مقارن فضیلت اولان صداقت هر حالده موجب فیض  
ورفعتدر. بوقضیه بی اثباته دائر برچوق ادله وارد خاطر  
ایسه ده الک شعشعه لی برهانی افندمزک سینئه پر سکینه لرینه  
تعلیق بیورلدیغی کمال افتخار ایله استخبار اولنان امتیاز  
نشان ذی شانیدر.

مالکزر بر پادشاه مرحمت پیرایه کیم  
ذکر وفکری ازدیان شان ملتدر همان  
داعیان دولتی لطفیه شاد ایلر بتون  
مقصدی شرع شریفه حسن خدمتدر همان

قطعه سنک ماصدقی اولان شهریار حمید الخصال ، تاجدار  
بی همال افندمز حضرتلرینک ذات حکمت سمات مشیختپنا  
هیلری کبی باعث افتخار اکابر بروجود صداقت مائری  
توجهات عالم پسندانلرینه مظهر بیورملری بتون خدمه  
شریعت ایچون موجب شکر بی پایان بر نعمت سعادت  
اقتراندر .

جناب واهب الآمال ذات خجسته صفات مفتی۔  
 الانامیلرینی صباح حشره قدر مسند مشیخته سایه انداز  
 اجلال و پادشاه قدردان و شهنشاه معدلت عنوان افندمن  
 حضرت تلرینک بویله شانلی شانلی الطاف جلیله ملوکانه لرینه  
 مظهریتله مسرور البال بیورسون دعاسیله تزین لسان  
 اخلاص و ایفای فریضه رسم تبریک وسیله سیله تجدید  
 رابطه اختصاص اتمکه موفق اولدیغمدن طولای اعلان  
 افتخار و باعث فیضم اولان بقای توجهات جهان درجات  
 ولی النعمیلری استرحامنه اجتسار ایلمرم .

\*

\* \*

— ۳۶ —

سماحتلو افندم حضرت تلری .

التفات خاطر نوازانه لری پیرایه قلوب بندکان و بین۔  
 الاقران افتخاره شایان اولمغله بوکره مفتی افندی داعیلرینه  
 ارسال بیوریلان لطفنامه سموحیلرنده کمتلرینی یاد و سلام  
 مسرت پیام منعمانه لريله دل ویرانمی آباد بیورملری  
 شکرانی غیر قابل بر لطف بی معادلدر .  
 عاجزلری کبی بر بی چاره بی فراموش ایتیوب آره



صیره تعطفات کریمانهلریله مسرور وتوجهات رحیمانهلریله  
 رهین فیض نامحصور بیورملری ذات فضائل سمات ادیبا-  
 نهلرینک نه درجهلرده عجزه پرور بروجود مرحمت کستر  
 اولدقلرینی کوسترکه بو حال مدار افتخار ارباب کمال  
 اولان جناب فضیلتما ب حکیمانهلرینک مجبول اولدقلری  
 اخلاق حمیده واطوار پسندیده لرندن بریسیدر .

سمای مفکره مده پرتوانداز اولان بارقه حس شکر -  
 کذاریری حقیله تصویر اقتدار خامه مک فوقنده اولدیغی  
 آزاده تحریر بولنمغله بوبابده کی قصورمه نظر بیورلما ماسنی  
 افندمزا شیمه کریمه عفو پروریلرینه استناداً تمنا وورد  
 زبانم اولان بقا وتزاید عافیت واقباللری دعاسنی تکرار  
 ایله تمادی حسن نظر فیض اثر مشفقانه لری استرحامنه  
 اجترا ایلرم .

\*

\* \*

— ۳۷ —

سماحتلو افندم حضرتلری

ذات رحیمانهلری کبی برنحریر فضیلت سمیرک عهدہ  
 استیبال سامیلرینه مجلس ایتم ریاست جلیله سنک توجیه

بیورلدیغی مژده انبساط بخشای واصل صباخ احقری  
و بو مژده نك سهای سامعه ده برق انداز اولان لمعات  
سرور افزای منور دل کتری اولدی.

بتون داعیان دولت افندمزکی ذوات فضائل سهاك  
التفات مخصوص پادشاه فاروقجاهه مظهر اولدقلرینی کور-  
دکجه سرتاپا مستغرق دریای مسرت اولوب روز و شب  
درود مسعدت نمود حضرت امیر المؤمنینه جان و دلدن  
وقف انفاس حیات و بویله بر عصر معدلت حصره ادراک  
ایتدکلرندن ناشی جهانیا نه قارشی عرض مباحات ایله  
وظیفه شکر گذاری بی ایفا اتمکه چالیشیورلر.

جناب خداوند بی زوال سایه عدالت سرمایه  
تاجداریده الی آخر الایام ذات ریاستپناهیلرینی صدر-  
آرای اقبال بیورسون دعای فیض پیراسنه تردیفاً ایفای  
وجیه رسم تهنیه ابتدار و اوته دن بری حق نامستحق  
داعیانه مده ابدا ل بیوریلان انظار محاسن دثار منعمانه لرینك  
ازدیادی استرحامنه اجتسار اولندی.



## — ۳۸ —

سماحتلو افندم حضر تلی  
 بوکره لمصلحة (عثمانجق) ی تشریف بیورمش اولان  
 فلان بک بنده لريله ارسالنه تنزل بیوریلان سلام سامیلرینی  
 آلدیغم کبی حس عبودیتله ممزوج بر سرور خالصانه  
 برق خاطف کبی آفاق دله لمعانه باشلادی .  
 کوکلی استیلا ایدن لمعات شادی کمال شوق ايله  
 مصراع آتی بی انشاده بادی اولدی :

« این خانه از سلام تودار السلام شد »

حق عیدانه مده دائما مبذول بیوریلان توجهات  
 عالی جنابانه بین الاماثل تمیزمه بر نشانه اولوب بونک  
 تشکرینی کمالیه ادادن عجزم بدیدار اولدیغی مستغنی بیان  
 وذات کریمانه لرینک ایسه کمتلری کبی بی وایه لرك وظیفه  
 عبودیتده کی قصورلرینه مسامحه کارانه نظر وافضال فیض-  
 اشتمال منعمانه لرینه مظهر بیورمقده اولدقلری مشهود  
 باصره جهانیا ندر .

مترتب عهده عاجزانهم اولان جناب واهب العطايا

سایه عالیترینی فرق داعیانندن جدا بیورمسون دعاسنی  
رفع قبولگاه مستعان ایتکده اولدیغمی وحسن توجه  
سموخیلرنده پک کوزل یاشامقده بولندیغمی خاکیای  
معالی پیرای مشفقانهلرینه عرض و بیان ایلرم .

\*  
\* \*

### — ۳۹ —

دولتو ایهتلو افندم حضرتلری  
خصافت موشکافانهلری تبعه شاهانهلرینک استکمال  
سعادتیه متوغل و همت مشکل براندازانهلری ممالک  
ملوکانهلرینک استحصال اسباب سلامتیه مشغول  
اولان شهریار عمر کردار، تاجدار اسکندر اقتدار  
افندمن حضرتلری عواطف جلیله خسروانهلری  
جمله جمیله سندن اوله رق عهده دولترلرینه ادرنه ولایتی  
کبی اهمیت فوق العاده سی بدیدار اولان بر موقع نزاکت  
مدارک والیلکنی احسان و جناب دولتمآب اصیلانهلرینک  
مرکز ولایتی تشریف ایله حل و عقد اموره وقف نظر  
امعان بیوردقلری مژده شوق آوری سامعه پیرای کمتری  
اولدی.



ذات حکمت سمات بی مدانیلری کبی واقف دقایق  
کتاب مدنیت و عارف حقایق امور مملکت اولان برداور  
ترقی پرورک چیره دستی حکیمانه لرینه ولایت مشارالیهانک  
تودییی مستلزم محمدت بر نعمتدر.

جناب حمیت نصاب خداوند اگر میلری کبی بنده  
پروراکله مشتهر بر وزیر معالی ماثرك چوقدن بری  
خاک پای نظره پیرای آصفانه لرینه عرض عبودیت ایچون  
بر ذریعه حسنیه منتظر ایکن او یله بر وسیله آرزوی  
داعیانهم وجه ایله ظهور و کوملی مستغرق دریای سرور  
ایتدیکندن ایفای فریضه تبریکه شتاب و هر حالده مو-  
فقیات ولایت پناهیلریله ازدیاد عمر و اجلاللری دعاسنی  
رفع بارگاه رب الارباب ایلیهرك حضور فیض نشور  
دولت لرینه تقدیم عریضه به ابتدار و محتاجی بولندیغم انظار  
محاسن آثار کرم کستریلرینک بی دریغ بیورلمسی نیازینه  
اجتسار قیلندی.

\*

\* \*

— ۴۰ —

فضیلتلو افندم

بورایه کله لی اوچ مکتوبکزی آلدیغم حالده ایشلرك

کثرتدن خالی بروقت بولوبده شمدییه قدر برمکتوب  
 یازهمیشمدن طولایی مؤاخذات محقانهیه هدف ایدملکلکم  
 لازم کلیرکن بوسفرکی لطفنامه کزده دخی التفات دلنوازانه  
 ایله تطیب خاطر عاجزییه سوق خامه بلاغت بیورشکر  
 مجرد مجبول اولدیغکز شیمه اخوت پروری اقتضای  
 عالیسندندر.

ثنا کاریکزار شمدییه قدر برمکتوب یازهمیشمدن دکل  
 عذر مباحوث عنه، اعدار مشروعهیه مستند اولسه بیله  
 مؤاخذات برادرانه کزدن قورتلیمقلغم ایچون اخوت نقطه  
 نظرنبه احتجاجه صالح برسند قوی عد اولنه ماز .  
 سرد ایده حکم عذرلر حق داعیانه مده حسن توجهکزه  
 مظهر اولدیغم کوندن بری مبذول بیورده کلدیگکز التفات  
 عالیجنابانه قارشی پک اهمیتسز قاله جغی جهتله اعتراف  
 قصورندن بشقه چارهم قالمیوب هر نه دیمش اولسه م قانون  
 حقوق پرورییه تطابق ایده میه جکی آشکار و شفقت دینلن  
 خاصه لطیفه نك بی چاره لر حقنده پرتوبار اولان احکام منجیه  
 سندن مخلصکزارده استفادیه قالدیشه جغم بدیدار بولندیغندن  
 شیمه مشفقانه کزه التجا وبو بایده کی قصورلر مک عفونی  
 رجا ایله بر طاقم بی مغزانک مصاحبه لرندن یزار اولان



کوکلی التفاتنامه لر ارسالیله مسرور بیورمکزی خاصه  
تمنا ایلرم. باقی اخوت.

\*  
\* \*

## — ٤١ —

مکرمتلو افندی

حق داعیانه مده ابراز بیورمقده اولدیغکز اخوت  
خالصانه یه اغتراراً ذات عالیکزدن برشی رجاسنده بولنه جنم.  
بورجامی منفعت مادیه و مغنویه کزه ذره قدر خلل کلامک  
شرطیه قبول بیورمکزی تمنی ایدرم.

رجا ایده حکم شی ایسه یول مصارفی طرف  
عاجزانه مدن تسویه اولنقی اوزره بولندیغمز قضالرك  
بجایشنی تکلیفدن عبارتدر. تکلیف مذکوره مجبوریم  
بولندیغم قضانک هواسی فنا اولماقوله برابر برآز سرد  
اولسندن تولد ایتشددر.

بویله سردجه هوالی بریرده بولنمغه وجودم متحمل  
اولمش اولیدی مملکتک انتظامنده، اهالیسنک اخلاق حمیده  
ایله متصف بولنمسنه نظراً مقام مشیخته استرحامنامه لر  
تقدیمیه استحصال تمدید مدته چاره جو اولورددم.

بولنديغم قضانك هواسي فنا، اهاليسي مفسدتما اولمش  
 اوليدي اولسه مده خاك پايكزه بويله برتكليفده بولنمازدم .  
 بوسوزمي اثبات ايچون ايراد براهينه لزوم كورميه -  
 جككزي بيليرم .

تكليف عاجزي يه موافقت ايدوب ايتيه جككزي  
 ايلك پوسته ايله ارسالنه همت بيوره جغكز جوابنامه كردن  
 استخبار ايدو جكمي اميد ايدرم . باقي اخوت

\*

\* \*

## — ٤٢ —

فضيلتو افندم حضرتلري

نيايتي عهدء فاضلانهلرينه تفويض بيوريلان فلان  
 ولايتي تشریف بيوردقلري خبر مسرت آوري بو هفته  
 پوسته سيله وارد اولان ولايت غزته سنده مصادف نظر  
 كمتری اولدی .

ذات كريمانه لري كي نادر الوجود برنخرير صلابت نمودك  
 مركز نيابتنه شرفبخش كمال اولملري اهالي ولايتجه پك  
 قيمتدار بر نعمت مفخرت مداردر .



هله داعیلری کبی آثار بر کزیده فقیهانہ لرندن پک  
 چوق استفاضہ ایدن بر عاجزک استبشار قدوم عالیلریله  
 مستغرق دریای سرور اوله جفی نزد والالرنده بدیدارد.  
 ایفای رسم تبریکی وسیله اتخاذ ایدهرک خاک پای  
 فضیلت پیرای بی مدانیلرینه عرض عبودیتہ اجتسار و نظم  
 آتی ایله حق استادانه لرنده کی حسیات تلمیذانه می اظهار  
 ایلرم :

ای فاضل بی همال ملت  
 ذاتک ایله فخر ایدر فضیلت

اسرار علومه آشناسین  
 ارباب کماله پیشواسین

بالجمله فحوله چار ناچار  
 رجحانکی عالم ایلر اقرار

سرلوحه خیل عارفانسین  
 بر ذات شریف نکته دانسین

ذاتک کبی کلدی یکانه  
 بر اهل کرم بو خاکدانه

سن مظهر فیض شرع حقسین  
 هر درلو مداحیه احقسین  
 طوردقچه جهان جناب مولی  
 اجلالکی ایلسون دو بالا

\*  
 \* \*

### — ۴۳ —

معروض داعی دیرینه لریدرکه

محکمه باش کاتبی اولان یادکار بورا ارباب فسادیه  
 هم افکار اولدیغندن کلن نائبلری تهدیدات کونا کون ایله  
 حرکات ناجاسنه عطف نظر مساحیه مجبور وبوصورتله  
 شریعت نامنه تدویر دولاب تزویره صرف مقصور  
 ایددکالدیکی بعض اصحاب حمیت طرفلرندن استخبار  
 وشرندن امین اولیوب متیقظانه حرکت ایتکلکم اخطار  
 اولمغله بریاندن موما الیهک خط حرکتی وقف انظار  
 دقت، بریاندن ده بوبابده قناعت کامله حاصل اولمق اینچون  
 تحقیقات لازمه اجراسنه بذل مقدرت ایتکلدن کری  
 طورمدم .



بو باده کی نتیجه تحقیقات داعیانہ می مشہودات متبصرانہم  
تأیید ایلدیکندن دفعات ایلہ کندیسنه مغایر رضای الہی  
و مخالف دلخواہ پادشاهی حرکت دارینده موجب ندامت  
اولہ جغنی لسان مناسب ایلہ در میان و بو حال ایلہ محکمہ دہ  
بقاسنک قطعاً او یہ میہ جغنی خالصانہ بیان ایتدمسہ دہ  
مو مالہ اصلاً متنبہ اولیوب فرصت بولدقہ حرکات  
واقعہ سنده دوام و کترلرینی یلکن آلتہ آلمق ایچون  
ہمپاریلہ سعی تام ایلپور .

یارواغیارہ قارشى بویلہ بر کیمسہنک محکمہ شرعیہ دہ  
بولمسی جائز اولہ میہ جغنی بدیہی بولندیغندن مو مالہ  
ایشدن ال چکدیرلمسی خصوصنہ مساعدہ جلیاہ  
فتواپناہیلرینک ارزان بیورلمسی بانبندہ امر و فرمان  
حضرت ولی الامر کدر .

\*

\* \*

— ۴۴ —

فضیلتلو افندم حضر تلی

ذات عالیلی کی بر نخریر حکمت سمیرک قونیہ

نیابتنه شرفبخش کمال اولملری داعیلری کبی خاندان  
معالی عنوان فاضلانهلرینه منسوبیتله مفتخر بالجمله بندکان  
صداقت مائثری سرمست جام سرور و مرکز ولایتی  
تشریفلرینک کوکلمده حاصل ایتدیکی شوق بی همال کمال  
خلوص بال ایله :

ای سریر آرای علم و معرفت  
فخر ایدر ذاتکله ارباب کمال

پایه اقبالکی کوندن کونه  
ایلسون برتر جناب ذوالجلال

قطعه سنی انشاده مجبور ایلدی .

بویله وسائل مسرت نشور ساحه پیرای ظهور  
اولدجه خالک پای سامیلرینه عرض اخلاص آیین بهین  
اختصاص مقتضیاتندن اولمغله مرکز ولایتی تشریفلرینی  
تبریکه مسارعت وحق عیدانه مده هیچ برزمان دریغ  
بیورلمیان انظار فیض مدار کریمانه لرینک دوام ازدیاد  
ابدالنی استرحام ایله تجدید رابطه انتسابه مجاسرت  
ایلرم .



## — ۴۵ —

معروض داعی دیرینه لریدرکه

نیابتی مودوع عهده عاجزانهم اولان قضانک  
محکمه سی اوطورلماز درجده مشرف خراب اولدیغندن  
بر مجلسده دنیا و آخرتده یکانه باعث سلامت وسعادتمز اولان  
شریعت غرای احمدیه منسوب بر محکم یار و اغیاره  
قارشی بویله بر حال اسف اشتمالده بولنمسنه هیچ بر صاحب  
وجدان راضی اولیه جغنی لسان مناسب ایله بیان  
ایتمشدم .

محضاً افندمزا حسن توجهات فیض غایات ولی النعمیلری  
ثمره باهره سی اوله رق بوسوزم حیتمندان اهالی یه لزومندن  
زیاده تاثیر ایتمش اولدیغندن اعطای اعانه خصوصنده  
مسابقیه قالدیشهرق بذل مقدور وقائم مقام قضا فلان بك  
بنده لری ده معاونات لازمه ده سعی موفور ایتمکله اسکی  
محکمه کلیاً هدم اولنوب مفتی افندی داعیلریله اهالی  
معتبردن فلان اوغلی فلان و فلان اوغلی فلان آغالرک تحت  
نظارتنده اوله رق یکیدن بر محکمه انشاسنه مباشرت وسایه  
عدالت وایه حضرت پادشاهیده رهین حسن ختام اولوب

کچن بازار ايرتسی کونی رسم کشادی اجرا اولنهرق  
 مستعیناً بالله تعالی محکمہ مذکورده فصل وحسم  
 اموره مبادرت اولندیغنی خاک پای ناصیه پیرای مفتی-  
 الانامیلرینه عرض وانبا و سرمایہ مباحاتم اولان انظار  
 محاسن دثار فتواپناهیلرینک حق عیدانه مده دوام ازدیاد  
 ابدالی خصوصنی تمنا ایلرم .

\*

## — ۴۶ —

افندمن !

استانبولدن مفارقتک سکننجی کونی بورایه واصل  
 اوله بیلدم . یوللرده چکدیکم مشقتی بورانک صوک بهاری  
 اونوتدیردی .

مملکت پک کوزل، لطافت موقعیه سنه حیران اولدم .  
 یاریم ساعت مسافه ده کوزل بر مسیره وارکه لطافت-  
 ناشناسلقه اتهام اتمیه جککزی بیلشم اولسهم استانبولک  
 سعد آبادینه مرحجدر دیر ایدم .

بو ترجیحیم، ترجیح بلا مرحج دکلدیر . سبب  
 رجحاتی سویلرسم سزده مسیره مذکوره استانبولک



سعد آبادینه مرحج اولدیغنی تسلیمده تردد ایتمز سکز .  
 سعد آبادك لطافتنه دیه جك یوقسه ده لطافتی یالکز  
 فصل ربیعہ مخصوص اولوب سائر زمانلرده طراوتدن  
 عاری اولدیغنی شویله طورسون فصل مذکوردهده  
 اوکوزلم موقعی محیط اولان چییلاق طاغلرک منظره سی  
 کوزه پک فنا صورتده چارپار .

اما اونزهتگاه عالینک شو صوک بهارده کوریلن  
 طراوتنه نظراً ایلك بهارده «کلشن لطافت» اطلاقنه  
 شایان برروضه جنت نشان اوله جغنده شبهه یوقدر .

هله اطراف اربعه سنی محیط اولان جبال زمردین،  
 برقات دها منظره روح پرورینی تزین ایده جکنندن  
 اونزهتگاه عالینک تماشاسی ارباب طبیعتی جذبه دار شوق  
 ایدر .

پیشگاهنده بولنان وادی یه طوغری شاعرانه تمدید  
 نظر اولنورسه حضرت معلمک :

«آقیور نور، کوردیکم دره دن»

«آب واشجاری برق برق اولمش»

زیر وبالاسی نوره غرق اولمش  
وادی ایمن اولسون کورینن

قطعه سنک ماصدقی اولدیغنده اشتباه ایدلمز .

کچن کون اورایه او یغون برق اچ احباب ایله کیدلمش  
ایدی . اولطیف محکم منظره سنه طویه مدم .

شاعر دکلسمده مطالعه اشعاری پک سورم . حافظه می  
اسلافک شاعرانه ، عاشقانه ، حکیمانه آثار یله ترینه  
چالیشیرم . تنظیم اشعاردن عاجز اولدیغم حالده موقعک  
لطافتی کو کلمده بر انبساط تام پیدا ایتدیکندن قطعه  
آتیہی بالبداهه انشاد ایلدم :

نظره پیرادر بو جای دلکشا  
سیر ایدک آثار قدرت برق اورر  
جذبہ دار ایلر کوکل اربانی  
سرتسر نور لطافت برق اورر

اهالیسی بر آز وحشی کی کورینیورسده مسافر-  
پرور لکری سزاوار تقدیردر .



بوراده پك كوزل وقت كچيريور سه مده محاضراته  
دائر يانمده كتاب اولمديغندن كيجهلري بر آز جانم صيقيليور.  
بوجان صيقينديسني كيجه مصاحبهلري بر آز تعديل  
ايدسيور .

مفتي افندي اهل دل بر پير روشن ضمير اولديغندن  
مصاحبه سندن مستفيد اوليورم. حاصلی هر جهته بورادن  
خشنودم عزيزم . باقي اخوت.

\*

\* \*

## — ۴۷ —

سماحتلو اقدام خضر تلي

في ۱۷ شوال ۳۰۷ تاريخي التفاتنامه سموحيلري  
هامه پيراي كمترى اولدى، خدا بيلير كو كلم نور سرور  
ايله طولدى .

حق عاجزانهمده مبذول بيوريلان توجهات بنده .  
پرورانهموجب مباحثات جاودانه در، بين الامثال تميزمه  
بر نشانه در .

عاجزلري ايچون الطاف منعمانه لرينك بيكده برينك

حق تشکری لایقیه ادا محالدر، زیرا بوبابده عبدکمتلری  
هم حالت لالدر.

ترجمان وجدانم اولان :

افتخار ایلر کمالکله کمالات جهان  
بیك یاشا عالمده ای علامه عالی تبار  
قلبی اکداردن محفوظ ایدوب کوندن کونه  
قدریکی قیلسون دوبالا حضرت پروردگار

قطعه سی زیور لسان شکرانمدر، روز و شب ورد زبانمدر.  
آستان سعادتلری بنده لری کبی بی وایکانه دار-  
الاماندر، برملجا بی امتناندر.

خال پای سامیلرینه انتسابم یکانه مدار افتخارمدر،  
هرحاله سبب فیض و اعتبارمدر.

جناب خداوند بی زوال، ذات خجسته صفات  
فاضلانہ لری خاندان عالیریلہ سایه شریعت غراده صدر-  
آرای عافیت و اقبال بیورسون دعای مسعودینه تردیفاً  
عقبه علیالرینه عرض شکرانه اخلاص تام ایله ابتدار ایلرم،  
بو وسیله ایله تأیید رشته عبودیتہ موفقیتمدن طولایی  
افتخار ایلرم.



## — ۴۸ —

مفروض داعی دیرینه لریدرکه

در دولت مدار فتوایناهی لرینه ناصیه سالی عبودیت  
اولدیغم کوندن بری حق کمترا نه مده رایگان بی-وریلان  
توجهات بنده نوازانه نك حق تشکرینی ایفادن عاجز  
ایسه مده دعای دوام عمر واجلال لرینه مداومتله تزیین  
لسان صداقت ایتمکدن بر آن خالی اولمدیغم کبی وسائل جمیله  
دوشد کجده تجدید انتسابه مسارعتی آداب دیرینه رقتدن  
بیلدیکم جهته نور صباح عید اضحی نظره پیرای صفا  
اولنجه الله اکبر آوازده سنه تردیفاً جناب جاعل النور،  
افندمزی مقام مشیخته بویله نیجه نیجه اعیاد مبارکویه  
ادراک ایله مسرور بیورسون دعای مفروض الاداسنی  
صدبار کمال خلوص قلب ایله تکرار ایلدیکم عرض  
وبیاننه مبادرت و خاک پای مکارم احتوای حضرت  
ولی النعمیلرینه یوز سورمک ایچون بو ورقپاره بی توکیل  
ایله محتاجی بولندیغم حسن توجه دولترینک دوام  
وازدیادی استرحامنه محاسرت ایلزم.

## — ۴۹ —

معروض داعی دیرینه لریدرکه

بورایه کلدیکم کوندن بری مفتی افندی داعیلرینک  
 حرکات واقعہ سی مغایر شرع شریف اولدیغندن افندیء۔  
 موما الیہ مفتی نام محترمی آلتده بولسان ذواتک نمونہ  
 امثال اوله جق صورتده تزیین ذات وصفات ایتیوب ده  
 حرکات غیر مشروعه ده بولنملری یار واغیاره قارشى  
 پک چرکین اوله جغنی درمیان ودارینده موجب مسئولیت  
 اوله جق احوال غیر مرضیه دن توقی ایلمسنى خالصانه  
 بیان ایتدمسده او پیر حریصه اصلا کارکر اولیوب بر  
 قاج غروش درجیب ایتک سوداسیله مراجعت ایدنلره  
 متناقض المال فتوالر ویردرک مسلك ناهموارنده معتوهانه  
 رفتار وبو حال ناجاسیله حیتمندان اهالی بی پک متأسف  
 ایتدیکی شویله طورسون شریعت غرایه سنک انداز طعن  
 اولق ایچون سررشته آرایان بر طاقم سفهایه مدار قیل  
 وقال اوله رق محکمه بی مشکلات جانکدازانه یه دوچار  
 ایتکده بولندیغندن بونک بر چاره سنه باقیلمسی ایچون  
 خاک پای عدالت احتوای فتواینها لرینه مراجعت وحق



عیدانه مدہ متوالی الظہور اولان التفات فیض غایات  
ولی النعمیلرینک دوام و تزییدی استرحامنه مسارعت  
اولندی . ہر حالہ امر و فرمان حضرت ولی الامر کدرہ .

\*  
\* \*

— ۵۰ —

دولتو افندم حضرتلری

فکر معالی پروانہ سی باعث اعتلای ملت و رأی  
رزین خسروانہ سی بادی ارتقای دولت اولان شہریار  
صلابت موفور ، تاجدار مرحمت نشور ولی نعمت  
بی منتمز پادشاہمز افندمز حضرتلری روز جلوس  
معدلت افروز ہایونلرندن بری ارباب فضل واستقامتی  
عواطف مالانہایہ ملوکانہ لریلہ مسرور ومعظمت امور  
سلطنت سنیہ بی اہلنہ تودیع ایلہ تبعہ صادقہ شاہانہ لرینی  
عرض شکرانہ مجبور ایدہ کلدکلی ہر بار مشہود باصرہ  
اولو الابصار اولوب بوکرده اہمیت فوق العادہ سی  
درکار اولان . . . نظارت جلیلہ سی کی بر مقام عدالت  
مداری ذات بی مدانیلری مثلی واقف حکمت حکومت

بر دستور ارسطو منزلتک عهده آصفانه لرینه احاله ایله  
کار آشنایان جهانی منتدار بیور مشلردر.  
همان جناب احکم الحاکمین سایه سطوت وایه  
شاهانه ده ذات حصافت سمات دولترینی هر خصوصه  
توفیقات صمدانیه سنه قرین بیورسون دعای فیض انتماسنه  
تردیفاً ایفای رسم تهنیه مشابرت و مجبول اولدقلری  
خصالت ممدوحه بنده پروریلرینه استناداً الطاف مخصوصه  
داور اکرمیلرینک استدعای ابدالی بابنده تقدیم عریضه  
عاجزیه مبادرت اولندی.

\*  
\* \*

— ۵۱ —

افدمنز !

بورایه کلهلی سلف عاجزانهمک زمانندن منتقل بر  
طاقم پروزی ایشلرک تسویه سیله مشغل اولوب نفس  
آلفه و قلم اولمدیغندن ذات عالیارینه شمیدی به قدر ایکی  
سطرلق بر مکتوب یازمدیغم جهتله فوق العاده محجوبم.  
بو گونه قدر بر مکتوب ارسال ایدمدیکمدن ناشی  
وفاسنراقله اتهام بیورلما مقلمی نیاز و بوبابده کی قصورمک



عفو بیوریله جغنی بیلدیکم جهتله خامه کترانه می :

«الغدر عند کرام الناس مقبول»

مصر اعیله دمساز ایلم .

هله الحمد لله اوپروزلو ایشلر تسویه اولندی . داعیکز  
بوکونکی ایش یارینه قالیرسه زیاده سیله مضطرب اولورم .  
ایشلرمی ممکن اولدیغی قدر تداخلده بیراقیوب یولنه  
قویملی یم .

ایشلرمی بیتیرمدکجه بشقه برشیئه باقم . وظیفه هرشیدن  
مقدمدر . ایشم اولمدیغی زمانلر معشوقه وجدانم اولان  
کتب محاضره یی بیله نظر مطالعه یه آلم . فقط کتب فقهیه یی  
اختلاس وقت ایتدکجه الدن بیراقیق ایسته نم . طریق  
قضاده بولنانلر ایچون کتب فقهیه یی نظر مطالعه دن دور  
طوتمامق وجائب امور دندر . بعضلری مکتبدن چیقار  
چیقماز بردها کتب مذکوره یی نظر مطالعه یه آلمورلر .  
بونلر هیچ بر زمان تفیض ایده میوب هر وقت متضرر  
اولورلر .

استانبول عالی نصل ؟ بوراده قیش فوق العاده حکمنی  
اجرا ایدیور . کیجه لری نه ایله وقت کچیریلیور ؟ فلان

افندی ایله برلشیلیورمی؟ او مبارکده بولندیغی مجلسلرده  
 کیمسه یه سوز سویلتمک ایسته مز. دائما شعر دن دم اورره  
 واقعا شعره دائر مباحثه تنشيط قلوبه باعث اولورسه ده  
 مومالیه ده طادینی قاچیرر .

پوسته زمانی تقرب ایتماش اولیدی سوزی :

« الطناب در مکالمه دوست خوشترست »

مصراعنجه بر آز دها اوزاده جقدم .

مکتوبکم جوابسنز بیراقلمامسنی تمنی ایدرم . باقی

اخوت .

\*  
\* \*

— ۵۲ —

فضیلتمندم افندم

باعث مباهاتم اولان فی ۱۷ رجب سنه ۳۰۶ تاریخلی

مکتوب عالیلرینی آلدیغم کبی مکتبده کچیردیکمز زمانلری

تخطر ایله او قدر مسرور اولدم که :

« کچمش زمان اولورکه خیالی جهان دکر »



مصراع برجسته‌سنى صدار لسان شوق ايله تکرار  
ایلدیم .

اوان تحصیل هروجه ايله شایسته تجیل اولدیغندن  
اوزمانلری یاد ایلدکجه کوکلمده اويله بر نور انبساط  
جلوه کر اولورکه بونک بر لمعه‌سی مانند آفتاب عالم آرا  
ظلام محنتده قالمش اولان غم‌یده‌لری مستغرق انوار  
صفا ایدر .

اونه سعادتلی کونلردی که ذات خلقت سمات سامیلری  
کبی حقوقی جهان دکر شرکای فضائل پیرا ايله حاکم  
عنوان محترمنی آلمق ایچون تکمل ایتکه سعی ایدیوردق!  
او سعادتلی کونلرده کچیردیکمز دقیقه‌لر کتاب  
مفکره‌مده برر صحیفه مقدسه تشکیل ایتشد که هر نه‌زمان  
مراجعت ایدر سه‌م مطالعه‌سندن ایتدیکم استفاده کوکلی  
علائق دنیویه‌دن آزاده ایلدیکندن فوق‌العاده گرفتار  
آلام اولدیغم دملر یکانه التجا کاهم او صحائف شوق افزا  
اولور .

مکتب عالنه دائر نه‌قدر سوز سویلسم او قدر شوقم  
تزايد ایدر . زیرا او عالمده ذات فضائل پروریلری کبی

ارباب وفانك حسن توجهلريني قازاندم . بو ايسه نجه  
پك بيوك سعادتدر .

اخوانك حسن توجهلريني قازانماش اوليدم شمدى  
بويله دنوازانه التفاتلره مظهر اولور ميدم ؟

بو بابتده كي حسياتي لايقيله افاده دن عاجز اولديغيم  
جهتله سوزى شمدى كي بولنديغيم عالمه انتقال ايتديرمكه  
مجبور اولدم .

بوراده مصاحبه سنه تنزل اولنه جق بر اهل دل  
بولنه مديغى كي تنزه ايديله جك بر محل ده اولمديغندن  
كوكللى اكلندر مك ايچون كتب ادبيه دن كوزل بر نر هتكام  
عالى بوله ميورم . بو صورت داعيلر نجه عين نعمت اولديغندن  
تنزه زمانلريني كتب ادبيه مطالعه سيله كچيريورم .

هله ذات اديبانه لرى كي اخوان صداقت نشاندن  
آره صيره آلمقده اولديغيم التفاتنامه لر كوكله بر شوق  
جديد بخش ايتمكه اولديغندن بو بابتده كي حسيات  
شكر گزارانه مك درجه سنى تعييندن عاجزم .

اخوانك بنم كى بر عاجزى اونو تيموبده بويله  
التفاتنامه لر ارسال بيورملرى موجب افتخار و باخصوص  
چناب فضيلتماب كريمانه لرى كي اك سوديكم بر ذاتدن



آله جغم برات اخوت نزد کترانه مده پک قیمتدار اولدیغنه  
دائر ایراد دلائله حاجت مس ایتمز ظن ایدرم .  
تحسر عالیری :

«هردم دعایی می کنم برخاک می مالم جبین»  
«بادوستانم جمع کن یا جامع المتفرقین»

یبتنی دائما یاد ایتدیریور !  
بین الاخلا آیین بهین مکاتبه مرعی الاجرا اولدقجه  
لطفنامه لرینه مظهر اوله جغمندن امینم . باقی اخوت .

\*

\* \*

— ۵۳ —

فضیلتلو افندم حضر تلری

بو ککره دلالت بنده پروریلری ثمره باهره سی  
اوله رق احسان اولنان رتبه نك تبریکی ضمانده تسطیر  
بیوریلان التفاتنامه عالیری هامه پیرای تکریم و خدا بیلیر  
جهانه مالک اولشم کبی موجب شادی عظیم اولدی .  
حق کترانه مده ابداال بیوریلان التفات کرمکاریلری  
دل ویرانمی آباد ورشک آور اماثل اوله جق صورته  
عاجز لرینی اسعاد ایلدی .

داعیلری کبی عجزه نك سرمایه سی ده عجز اوله جفندن  
وظیفه شکر گذاریده کوریلن قصورمك شیمه ممدوحه  
رحیمانه لرینه استناداً عفوی تمناسنه مجاسرت و دوام تزايد  
حسن انظار فیض دثار فاضلانله لری استرحامنه مبادرت  
اولندی.

\*  
\* \*

— ۵۴ —

سماحتلو اقدام حضرتلری

بو کوره عهدۀ فاضلانله لرینه احسان بیوریلان  
استانبول پایه سی سلم اقبالک بالاسنه ارتقا بیوره جقلرینه  
بر مقدمه باهره اولوب سایه آسمان پایۀ شاهانه ده مراتب  
عالیه قدمزن اجلال اولملرینی جناب واهب الآمالدن  
استدعا و باعث فیضم اولان توجهات ولی نعمتیلرینک  
بقاسنی تمنا ایتکده بولندیغمی حضور کمالات نشور ساه  
میلرینه ایفای رسم تبریک ضمننده عرض و انبا ایلرم.

\*  
\* \*



## — ۵۵ —

حین وداعده پی در پی مکتوب ارسال بیوریله جغی  
 وعد اولمش ایدی. استانبولدن مفارقت بیوریله لی اوچ  
 آی اولدیغی حالد هوز بر احساننامه لرینه دسترس اوچ-  
 له مدم. وعد عالیپرینک خلافتنه اوله رق التفاتنامه ادیبانه-  
 لرینه عدم مظهریم فوق العاده موجب محزونیم اولدی.  
 اگر صوب والالرینه شمیدی به قدر بر مکتوب  
 کوندره میشمه مقابله عاطفتنامه ارسالنده اهل بیوریلیور  
 ایسه بو حرکت مجبول اولدقلری علوجناب ایله متناسب  
 دکلدر.

بویله قصورلره — بر عذر مشروعه مستند اولسه  
 بیله — بر مقتضای اخوت عطف نظر مرحمت بیو-  
 رملیدر. مقابله بالمثل قاعده سنه استناداً حق قازانیلسه  
 بیله اخذ ثاره قالقشاملیدر:

«در عفو لذت نیست که در انتقام نیست»

حال بوکه مخلصپرینک خاکی پای عالیپرینه شمیدی به  
 قدر بر مکتوب ارسال ایده میشم قید سزلقدن متولد بر

حرکت اخوت ناشناسانه نتیجه سی اولیوب کیف سزلکدن  
ایلری کلدیکی جهته مقابله بالمثل قاعده سی بو باده کی  
مؤاخذات عاجزانه مه سپر اوله ماز.

فلان افندی یه ارسال بیورلمقده اولان مکتوبلر  
خبر عافیتلرینی مبشر اولمغه حسب الاخوه بادی انبساطم  
اولیورسدهده بونلرده نام کترانه مه بر سلام بولمادیغندن  
— نه یالان سویلیهیم — پک مکدر اولیورم.

مادامکه وعد عالیری وجه ایله احساننامه ارسالنه  
تنزل اولمخور، باری افندی مومالیه کوندریلن مکتوبلرده  
بر سلام ایله تطیب خاطر عاجزی یه تنزل بیورلسون.  
بوندهده :

«درکنار نامه اغیار یادم کرده»

«تابدانم بعدازین قدر فرامشکاریت»

ملاحظه سی وارد خاطر اولور، فقط محب قدیملری  
هر حالده نام کترانه می یاد بیورمکزی ترجیح ایدرم :

«پیغام آشنا نفس روح پرورست»

باقی التفات عالیرینه شدت انتظار.



## — ۵۶ —

دولتو افندم حضرتلری

عهدۀ استیہال آصفانہ لرینہ . . . نظارت جلیله سنک  
تودیعی خبری واصل سمع کتری اولوب ذات حکمت-  
سمات دستور اکرمیلری کبی بر وجود استقامت نمودک  
نظارت مشارالیهایه رونق طراز معدلت اولملری قانون  
شناسان دولتی شاد و داعیلری مثلی حکام شریعتی  
مسرور الفؤاد ایلدی.

جناب حاکم مطلق ذات دولترلرینی سایه خلافتوایه  
شاهانده طغرای آسمان زیور مفارق جهانیان اولدقجه  
اجرای احکام معدلته موفق بیورسون درود مسعودینه  
اردافاً ادای فریضه تهنیته ابتدار و بو وسیله ایله ابذال  
تعطفات بنده پروریلری استدعاسنه اجتسار اولندی.

\*

\* \*

## — ۵۷ —

معروض داعی دیرینه لریدرکه

یورایه وصولی متعاقب مزاج عاجزانهمه طاری

اولان علت بش ماهدن بری امتداد ایدوب بو کونلر دده کسب  
 شدت ایتکده اولدیغندن تبدیل هوا ایتکلکم بلدییه طبیی  
 طرفندن توصیه اولمغله جیادت آب و هواسی رشک آور  
 فردوس برین اولان مرکز ولایتده ایکی اوچ آی قدر  
 بولمقلمغه مساعدۀ جلیله جناب فتواپناهیلرینک بی دریغ  
 بیورلمسی باینده خالک پای مرحمت پیرای ولی النعمیلرینه  
 ناصیه سایی عبودیت اولورم . هر حالده امر و فرمان حضرت  
 ولی الامر کدر .

\*  
\* \*

## — ۵۸ —

سماحتلو افندم حضرتلری

مفتی افندی داعیلرینه بو هفته کلن عاطفتنامه  
 سموحیلرنده عاجزلرینه ده التفاته تنزل بیورلمش . بونک  
 قلب عیدانه مه بخش ایتدیکی انوار انبساط کمتلرینی  
 مست ساغر نشاط ایلدی .

افندمزدن کورمکده اولدیغم حسن توجیهک تشکرات  
 لازمه سنی احسن وجوه ایله ادادن عجزم بدیدار اولمغله  
 بوبابده واقع اولان قصورلرمک عفونی استدعایه زبازد



کبار و صغار اولان خصال حمیده حکیمانه لرینه استناداً  
جرأتیاب اولورم .

کیجه کوندوز :

ایلسون اول فاضلی الله تایوم القیام  
خاندانیله سرای عافیتده برقرار  
کلشن اقبالی قیلسون دمام فیضیاب  
ایتمسون بروجه ایله پامال قهر روزکار

قطعه سیاه ترین لسان عبودیت ایتمکده اولدیغمی حضور  
لامع النور منعمانه لرینه عرضه مثابت و :

« شربنا و اهرقنا علی الارض جرعة »  
« فللارض من کأس الکرام نصیب »

بیتی مصداقنجه دائماً الطاف کریمانه لرینه مظهر بیوریله جغمی  
بیلدیکم ایچون کمال خلوص بال ایله اعلان افتخاره مجاسرت  
ایلرم .

## — ۵۹ —

سعادتلو افندم حضرتلری

ذات ادیبانه لرینک . . . متصرفلغنه سایه بخش اقبال  
اولدقلرینی ایشیدر ایشتمز افندمز کبی اهلیت جهان-  
پسندانلری رشک آور اصحاب درایت و صداقت حکیمانه لری  
زبا نزد ارباب استقامت اولان برمتصرف صاحب معارفک  
قدوم عالیلرینی استسعاد وظائف شکر گذاریدن اولمغله ایفای  
رسم تبریکه ابتدار و هر خصوصده موفقیات سعادتلری  
نیازینی رفع بارگاه پروردگار و بووسیه ایله خالک پای  
سامیلرینه انتساب شرفه موفق اولدیغمدن طولانی  
عرض افتخار ایلرم .

\*

\* \*

## — ۶۰ —

افندمز !

ذات ستوده صفات کریمانه لرندن آلمقده اولدیغم التفاتنا-  
مه لری جوابسز بیر اقیوب تقدیم عریضه یه مسارعت فریضه  
ذمت اخوت اولدیغی حالده زیور دست ابجالم اولان



۱۷ جمادی الآخره سنه ۳۰۷ تاریخلی مکتوب بلاغت-  
اسلوب ادیبانه لرینه در حال جوابنامه ارسال ایده-  
مدیکمدن طولای عاجز لرینی نه قدر سرزنش بیورسه لر  
بوابده کی حقلرینی تسلیمه مجبورم .

شمدی یه قدر تقدیم عریضه یه مسارعت اولنه مدیغنی  
قیدسزلغمه ویردرک داعیلرینی احبای صادققلری عدادندن  
اخراج بیورمیه جقلری درکار و مجبول اولدقلری علوجنابه  
نظراً بوکی قصورلرک نزد مکارم وفد رحیمانه لرنده قطعاً  
اهمیتی اوله میه جغنی بدیدار اولوب کماکان حق کمترا نه مده  
التفات برادرانه لرینک رایکان بیوریله جغندن امینم . باقی  
اخوت .

\*

\* \*

— ۶۱ —

فضیلتلو افندم حضرتلری

محضاً توجهات جناب ولی النعمی اثر برکزیده سی  
اوله رق بوکره دردنجی رتبه دن احسان بیوریلان نشان  
عثمانی یی تبریک ضمنتده ارسال اولنان لطفنامه کریمانه لر

واصل دست کمتری و مفاد عالیهی آرایش حافظه احقری  
اولدی .

کو کلمده ذات عالیترینه اولان محبت بی ریا مظهر  
التفات مخصوصلری اولدجه برقاقات ده ایدیه جکی  
آشکار و بوبابده کی حسیات شکر کذارانه ک تصویر ی خصوص-  
صنده عجزم بدیدار اولوب هر حالده منتدار حسن توجهلری  
بولندیغمی عرضه مبادرت و ایفای وظیفه عبودیتده اولان  
قصورمک عفوی نیازینه مشابرت ایلرم .

\*

\* \*

— ۶۲ —

### فضیلتو افندم

حسن توجه فاضلانهرینه مظهریت هر حالده موجب  
رفعت اولدیغی وارسته ظنون بر قضیه یداهت نمون اولغله  
بو کره انمله پیرای عاجزی اولان احساننامه کریمانه لرینی  
باعث مفخرت بر برات سعادت بیلدیکم ایچون بین-  
الاقران اعلان افتخار و نام فضیلت اتسام عالیترینی روز  
و شب تذکار ایتیمکده اولدیغمی حضور سامیلرینه عرض  
و انبا و تمادی التفات تعالی پرورانه لرینی استدعا ایلرم .

\*

\* \*



## — ۶۳ —

جناب فياض مطلق، خليفه بالحق، امير المؤمنين،  
 حامى دين مبین ولى نعمت بى امتنانمز پادشاه معالى-  
 عنوانمز افندمىز حضرتلرينى كمال عافيت و اجلال ايله  
 سرير سلطنتده مكين و سايه تعالى و ايه خلافتنپناهيلرنده  
 اصدقاي داعيان دولتى كامبين بيورسون. آمين.

بالجمله اسلاميانك آستان خلافت بنیان خسروانه لرندن  
 بشقه پناهى و باخصوص يازده خمول اولان بى چاركانك  
 خاكپاي عيون آراى ملوكانه لرندن غيرى التجا كاهى اولمده  
 يغندن جد امجد شهر ياريلىرى جنت مكان سلطان سليم  
 خان حضرتلرينك جامع نورلامعنده امامت خدمتيله  
 اوقاتكذار و پدر كرامت اثر تاجداريلىرى فردوس آشيان  
 عبدالمجيد خان حضرتلرينك تربيه شريفه سنده سبيحه شمار  
 اذكار اولان داعى كمترلى شمدى يه قدر بر كلبه جك  
 تدارك ايدمىوب كرا بوجاقلرنده وقت كچيرمكده  
 اولديغمدن و بوكا ايسه مرحمت مسلمة شاهانه لرى قائل  
 اولميه جنى كالشمس فى وسط النهار بديدار بولنديغندن  
 كمال افتقار ايله شفقت عالم پسندانلرينه صيغينه رق ...

جوارنده . . . محله سنده . . . زقاقنده محلول اولان  
ایکی اوطه بی مشتمل . . . نومرولو خانه بی عبدعاجزلرینه  
احسان ایله کرفتار اولدیغم مضیق اضطرار بدن رها بیورلمقلغم  
باننده امر و فرمان شوکتلو مرحمتلو پادشاهمز افندمز  
حضر تلینکدر [۱].

\*  
\* \*

— ۶۴ —

بوامت معظمه یه وجود شاهانه لری محض لطف باری  
اولان خلیفه عدالت آیین، ظل ظلیل رب العالمین،  
پادشاه شفقت عنوانمز، شهنشاه بی امتنانمز افندمز  
حضر تلی تحت عالی بخت عثمانی یه رونق طراز معدلت  
وامور سلطنت سنیه بی ید مؤید خسروانه لرینه آلوب  
جهانی حیرتده بیراقان حصافت دیندارانه لرله شان  
اسلامیتی اعلایه بذل مقدرت بیوردقلری کوندن بری  
هرزمان بر صورتله بتون افرادملتی مستغرق نعم بی حساب  
وباخصوص کافه داعیان دولتی زلال احسانیه سیراب  
ایده رک یاری سرفروبرده شکران، اغیاری علویتنه حیران  
بیوره کلدکلری مشهود باصره عالمیاندر .

[۱] بومسوده مکتبه استکتاب ایدیلن مسوداتدن دکلدر .



الطاف جهان مطاف شاهانه لرینک بیکده برینک  
کمالیه حق تشکرینی ادادن :

«بی لطف تو من قرار نتوانم کرد»

«احسان ترا شمار نتوانم کرد»

«کر برتن من زبان شود دهر مویی»

«یک شکر تو از هزار نتوانم کرد»

منطوقنجه لسان ملت هم حالت لال و بویله بر شهریار  
مکارم کردار و تاجدار اسکندر وقارک سایه مرحمت  
وایه ملوکانه لرنده بولندقلرندن ناشی بختیارلقلرینک  
درجه سنی تعیین اتمک امر محالدر .

منتدار لطف بی شماری اولدیغمز او سلطان جم  
حشم، مدرسه نشین داعیلرینی هر زمان دلسیر نعم  
بیوردقلری کی بو کرده حیره نشینی بولندیغمز . . . .  
مدرسه سینه . . . . . بک بنده لرینی اعزام ایله قربانلر  
کسیله رک هر بررلرمزه مقدار مناسب عطیه احسان و قلوب  
کترانه مزی آب حیات التفات ایله ریان بیورمش اولدقلرندن  
صلوات مفروضه عقبنده مداومی بولندیغمز دعای  
واجب الادای شاهانه لرینی تکرار ایدوب بولطف جلیک

ادای شکران علنیسنه مبادرت وبوصورتلهده ایفای  
وظیفه عبودیتهموفق اولدیغمز دن طولایی عرض مفخرت  
ایلرز .

همان جناب ارحم الراحمین، امیر المؤمنین، حامی دین  
مبین ولی نعمت بی منتمز سوکیلی پادشاهمز افندمز  
حضر تلرینی مقام مقدس خلافتده دلخواه شاهانه لری  
وجه ایله کامبین بیورسون. آمین.

\*  
\* \*

— ۶۵ —

جناب احکم الحاکمین روز جلوس سعادت افروز  
همایونلریله برابر جهانی مظهر لطف وعدالت وجهانیانی  
مستغرق انوار علم ومعرفت بیوران آفتاب سپهر عثمانی  
ولی نعمت بی منتمز (عبدالحمید) خان ثانی افندمز  
حضر تلرینک کعبه قلوب موحدین اولان قلب حکمت-  
پرورلرینی دائماً نور سروره قرین بیورسون آمین .  
پادشاه دیانت پرور، شهنشاه عدالت کستر افندمز  
حضر تلرینک اخص آمال شهریاریلری دولتک ازدیاد  
اجلالی اولدیغنه یار وایغاری حیرتده یراقان اجراآت



حسنه لری شاهد صادق وعین عنایات تاجداریلری مملکتک  
حصول سعادت حاله معطوف بولندیغنی ترقی معارف  
خصوصنده کی هم مستحسنه لری ناطقدر .

سایه فیض وایه خسروانه لرنده هر صنف بندکان  
مسالك منجیه معارفده احراز شان ایتکده اولدقلری  
کی مکتب نواب طلبه سنکده بو بایده کسب امتیازه سعی  
وغیرت ایدرک هر وجه ایله ابراز لیاقت ایلیمکده بولندقلرینه  
سنین سائرده نسبة بوسنه مکتب مذکور دن چیقان  
افندیلرک حین امتحانده ابراز ایتدکلی اهلیت بر صورت  
واضحده دلالت ایدر .

شهریار حقایق رهین، امیر المؤمنین افندمن  
حضر تلرینک حسن اجرای احکام شرعیه خصوصنه  
مصروف بیوریلان همم جلیله خلافتپناهیلری جمله نک  
بالافتخار قرین تصدیقی اولمق ومکتب مذکور دن نشأت  
ایدن افندیلر شرع شریفک باشلیجه وسائط اجرای  
احکامندن بولنمق جهتیله بوسنه چیقان افندیلر پک مهم  
اولان بودار التحصیلک اهمیتنی پادشاهمز افندمنک مقصد  
همایون حضرت ملوکانه لرینه موافق بر صورتده تقدیر  
ایله کرک شرع مبینه وکرک آنک حامی مقدسی بولنان

حضرت امام المسلمینہ کرچکدن خدمت ایدہ بیلیمک اوزره  
 وقتلرینی قطعاً بوش کچیرمیوب علوم شرعیہ تحصیلنه  
 چالشمش لر و سنین متقدمه ده ینه بو مکتبدن چیقمش  
 اولان افندیلره فائق اولدقلرینی بو ککره اجرا قیلنان  
 امتحانلرده موقع ثبوته ایصال ایتکه موفق اولمشلردر .  
 کچن سنه لرده چیقان افندیلرک بر خیلیسی ادنای مراتب  
 عد اولنان (خامسه) نی احرازایله قناعت ایتمش اولدقلری  
 حالده بو سنه چیقانلرک ایچنده (رابعه) دن آشاغی قالان  
 بولنامسی دخی بومدعایی اثبات ایچون بر دلیل قوی عد  
 اولنسه بحادر .

همان جناب موفق الامور پادشاهمز افندمز  
 حضرتلرینی کمال شوکت وعافیتله دائماً اعلای شان شریعته  
 وبالجمله بندکان صداقت نشانلرینی رضای معالی پیرای  
 شهنشاهیارینه توافق ایدہ جک صورتده ایفای خدمته  
 موفق بیورسون. آمین :


« آمین آمین لا ارضی بواحدة »

« حتی اضعیف الیها الف آمینا »



# مِلَّتَنَامِی

صاحب و ناشری  
تفیض کتبخانه سی صاحبی  
یار سنج



معارف نظارت جلیله س:ک فی ۱۴ مارت سنه ۱۳۱۶  
تاریخی و ۲۸ نومرو لو رخصتنامه سیله طبع اولمشدر.



استانبول

(آرتین آصادوربان) شرکت مرتبیه مطبعه سی - باب عالی  
جاده سنده نومرو ۵۲

۱۳۱۶






## افادۀ مخصوصه

سایۀ فیوضات وایۀ حضرت مہر فتنالہ پیرہ <sup>معلموزانہ</sup>  
نواب طلبہ کرامہ عاجزانہ استکتاب ایتہ بکم رسمی، غیر  
رسمی بعضہ تحریر اندہ متشکل اولادہ شومجلد نیک (منشآت  
شیخ وصفی) نامی التقرہ طبع ونشری منصوصہ مجاہد  
اولدم.

ہوگا ہر آنم طلبہ مودا البرہمہ انڈی تعلیم کنابندہ  
استکتاب طریقہ وجودہ کثیرہ و: [لوامع - برامع  
- سواطع - مطالع] عنواندری آلتقرہ طبع ونشر  
ایتدہ و اولدیفہم مجامیع منشآتک - دکر لاندہ یک  
قات زیادہ - مظهر رغبت اویشہرہ ہوندر کبی (منشآت  
شیخ وصفی) نیکدہ آراہہ ابادی استفادہ اولدہ ہفتی  
مأمول امیریورم، توفیق اللہ ہندہ



## قصیده

آرایش مقام معلاى قوی و مردمک عیون اصحاب  
نهی دولتو ساحتو جمال الدین اقدی حضرتلارینک  
ستایشنی مشتملدر:

ای ولی النعم ای زینت جاه فتوا  
ای کریم الشیم ای عارف اسرار خدا

سنسک اول ناطقه پرداز بلاغت آیین  
که اولور ذات شریفکه مباحی ادبا

ادیامی یالکز فخر ایدیور ذاتنکه  
اوقیور فضلکه شاباس گروه حکما

ابن سینا شرف صحبتکه ایرسه ایدی  
اولوب عرفانکه عاشق دیر ایدی بونه دها



کلدی مسند فتوايه سنك کي حکيم  
بونی انکار ایدن واری علیہ الفتوی

لوحش الله نه در سنده کی بو فکر سلیم  
حسن تدبیریکه دلبسته در ارباب نها

مستفید اولمده در رأی رزینکدن هپ  
علما و عرفا و فقها و کلا

مشرق مهر ادبدر دل پاکک بی شک  
برق اورر جبهه پاککده سنك نور هدا

پائی طینتکه نور جمالك شاهد  
شفقت و مکرمتک طوغریسی تقدیسه سزا

خالق هر دوسرا سعیکی مشکور ایتسون  
ایلدک شانی هر وجه ایله شرعک اعلا

همتگاه ایدیلوب باب مشیخت تنظیم  
اولدی باشند باشه رشك آور عرش اعلا

بر شهك منتخبيسك كه عدالتده آنك

هم ركابی اوله ماز نوشروان و دارا

ملكك اعمارينه صرف ایتده نقد وقتن  
یاشاسون حشره قدر اول شه دولت آرا

نه شرف كه او شهك مفتی الانامی اولدك

غبطه ایلر بوكا بالجمله فحول علما

جوهر ذاتکی حقیله کیم ایلر تقدیر  
در اوصافکی ممکن دکل ایتك احصا

اولسه ده نفی فخار بنور قرآن

ایده من مدحت اجلالکی حقیله ادا



کیم ایش نفیٰ فخر آنک وصفنده  
بن دخی عاجزم ای کلاک فصاحت پیرا

هم عزائم اوله ماز کیمسه بلاغته نیم  
تحت حکمده در اقلیم سخن سرتاپا

شیوه نظامه دلداده در ارباب سخن  
یازه یمده کوریکز بر غزل مستثنا

۱ حشره دک عاشق بی چاره که ایتسه کده جفا  
بی وقادر دیه مم بن سکا ای حور لقا

قورتلش وارمی بکا زلف کره کیر کدن  
جیش عشق ایتدی سراسر دل و عقلی یغما

عشوه کر لکده، ملاحظده بو کون تکیسک تک  
سکا خوبان جهان ایچره بولماز همتا

ناز نینلر بیله حیران جمال کدر هپ  
بن نصل ایتیم عشقکه دنیای فدا

عاشق صادقکم جان و جناتم سنسک  
دولت لطفک ایله بن قولکی قیل احیا |

§

یوجه در پایه اوصافی ولی النعمک  
چونکه ادراک ایده من فکر معالی پیا

رسم تبریکی ایچون ماه صیامک وصفی  
خاک درگاهنه صدق ایله اولوب ناصیه سا

باشلا دعواتنه اول ذات معلا جاهک

رمضان حرمتنه ایلر اجابت مولا

ایله حضرت الله مقامنده مکین

ایلدیجه بوجهان ایچره کونش نشر ضیا



کورمیه روی کدورت بنشاط رمضان  
خاندانیله سوره حشره قدر ذوق و صفا

ایده رک ادعیه سن ورد زبان اخلاص  
سایه سنده اوله لم بژده غریفی نعمما [۱]




---

[۱] بو قصیده ده [فتوی - نهی - اعلی - هدی - مستثنی -  
مولی] کله لری قافیه ره رعایه [فتوا - نهی - اعلی - هدا -  
مستثنا - مولا] صورتنده یازلمشدره

## معروض داعی دیرینه لریدر

سایه معدلتوایه خلافتینا هیلرنده کامران اولدیغمز  
 شهریار مراحم کردار و تاجدار معالی آثار افندمز  
 حضرتلرینک اوردنک معالی عثمانییه پیرایه بخش اولدقلری  
 روز فیروزده بعد صلاة الظهر تبرکاً محکمه شرعیه ده  
 ولادتنامه حضرت پیغمبری تلاوت وزوار کرامه شربتار  
 طاغیدیلوب ختام ولادتنامه ده مفتی افندی طرفندن دوام  
 عمر واجلال جناب پادشاهی بی متظمن بر دعای بیلغ  
 قرائت و بو دعانک هر فقره سی صدای بلند آمین ایله  
 آقشلا نه رق ایفای و جیه عبودیت ایدلدی .

بو یوم مسعودک اقشامی دخی محکمه نک در و دیواری  
 کونا کون قنادیل ثریا مثل ایله طونادیلوب امثالنه قات  
 قات فائق و شان بندکی به لایق بر صورتده اجرای شهر  
 آیین قیلندی .

بو وجه ایله ادای و جیه شکرانه موفقیت محضا  
 حسن توجهات فیض آیات جناب مفتی الانامیارینک اثری



اولدیغنده قطعا اشتباه اولمامغله خصوص مذکورک متشکرانه  
عرضنه شتابان وبو وسیله جمیله ایله ده انظار محاسن نثار  
ولی النعمیلرینک بقاسنی نیاز مقصدیله میدان قرطاسده  
عاجزانه خامه ران اولدم. هر حالده.

— ۲ —

برادر!

مکتبمزک امتحاننه آغستوسک . . . کونی مباشرت  
ایدلای.

بو سنه ایراد ایدیلان سؤالار، سنه سابقه یه نسبتله پک  
کوچ اولدیغندن بر خیلیسنه جواب ویره مدم. دکل ثالله  
رابعه یی بیله طوته بیله جکمی مأمول ایتیورم. خامسه یی  
یاقله جفمه انشا واملایله حسن خطدن آله جفم نقطه لر  
امیدبخش اولیور.

علی الاصول مقام معلا ی مشیختدن ویریله جک اولان  
شهادتنامه یی آلدیغم کبی اوطرفه کله جکم. پک صیقلدم، بر آز  
استراحت ایده ییم.

مفتی اقدی حضرتلرینک مبارک الارندن اوپر وبالجمله

احبابی اصدقایه عرض تحیات ایدرم . اقدی مومالیهك  
عاجز لرینی اوصاف عالیله ایله توصیف بیورملری خاطر  
کترانه مه فقره آتییه بی کتیردی :

[ کویلونك برینی دوکرلر . بی چاره ارباب قلمدن  
برینه مراجعت ایدره بر عرضحال یازدیروب محکمه یه کیدره .  
عرضحال محکمه ده اوقنور . زوالینك کوکلنه پك طوقونور .  
هان هونکور هونکور آغلامغه باشلا یوب دیرکه : باق بکا  
نه لر اولمش ده خبرم یوق . ]

امتحانده ثالثه بی احراز ایده جك درجه ده ابراز  
لیاقت ایده مین اوصاف مذکوریه بی نصل حائز اوله بیلیر ؟

//////

— ۳ —

حضرت !

بوسفرکی مکتوبکز پك برجسته ، حرز جان ایدلمکه  
شایسته . چونکه بونده زنجیرله اصولنه رعایت ایدلمه مش ،  
طریق اصطلاح پردازی یه کیدلمه مش . هر جمله سی ذوق  
سلیمه مالک اولدیغکزی کوستریبور . تکلفات منشیانه دن  
آزاده اولان آثاره هر طبیعت منجذب اولور . هیچ بر



طبیعت بو قدر که مصطلح یازلمش آئاردن منتقبض اولسون،  
شیوهٔ لسانه موافق، گفتار ساد کیدن ده کسب انبساط ایتسون.  
مع مافیه سوزلرمزی بتون بتون عربی، فارسی کلمات  
وترکیباندن تجرید ایتمه کلز. لزوم کورلدجه بونلرده  
استعمال ایدملی. صرف ترجیه ایله افکار عالیه دکل،  
مباحث عادیه بیله یوریدیلهمز. لسانمزی عربی، فارسی  
کلمات وترکیباندن تجرید ایتمه قالقشانلر درست یازی  
یازمق مزیتندن عاری بولنان طغره فروشلردر. بونلرک  
شو فکری وهلهٔ اولاده خوش کورینور. فقط بر آز  
تأمل اولنورسه موافق حکمت اولمدینی آ کلاشیلیویرر.  
پارمق حسابی اوزره سویلدیککز نشیده یی بکندم.  
بو زمینده بر نشیده ده بنده کز سویلدم. بیلمم مظهر  
تقدیریکز اولورمی؟ شونی ده بیلملی که بویولده کی نشیده لر  
هیچ بر زمان محور معلومه اوزره تنظیم ایدیلن اشعار ایله  
قیاس ایدیلهمز. آنده کی آهنگ، لطافت باشقه در.

برکوبونک فریاد عاشقانه سی :

فرقتکه قان آقیدر کوزلرم

کوزل کوزلوم سی هر دم اوزلرم

یالان دکل اینان اولسون سوزلرم  
کوزل کوزلوم سنی هر دم اوزلرم

§

بر کور شده عاشق اولدم سکا بن  
سنسک بنی بویله مجبور ایلین  
صورارمیسک عاشقکی عجب سن  
کوزل کوزلوم سنی هر دم اوزلرم

§

باق ایرماغه حزین حزین آقیور  
اورمانده کی قوشلر نه خوش شاقیور  
لکن بنی آریلغک یاقیور  
کوزل کوزلوم سنی هر دم اوزلرم

~~~~~

— § —

سعادتلو اقدام حضرتلری

بورایه وصولی متعاقب ارسال بیوریلان احساننامه  
گرامیلاری شرف بخش هامة افتخار اولدی . بونده دل  
عاجزی بی تسمیرر خصوصنده پک چوق دراری التذات



ایزال بیورلمقله برابر استانبولدن مفارقت ایدرایکن خاک پای  
 عالیله وداع ایتدیکمندن طولای بیان تأسف بیوریلیوره  
 خاطر عیدانه مه تنزل بیوردقلرندن طولای نه قدر  
 تشکر وافتخار ایتسه هم آردر . التفاتنامه سامیله یینک  
 نوالیسیله قریر العین بیورلمقلغمی رجا و عرض عبودیت  
 خصوصنده کوریه جک قصورلرمک دامن عفو ایله ستر  
 بیورلمسنى تمنا ایدرم.

خاک پای فیض احتوای منعمانه لرینه یوز سورمکسزین  
 مفارقت ایتدیکمندن طولای مؤاخذه یه مستحق اولدیغمی  
 اعتراف ایله برابر :

هرکز المی چو فرقت جانان نیست  
 دردی بتر از واقعه هجران نیست  
 کر ترک وداع کرده ام معذورم  
 توجان منی وداع جان آسان نیست

رباعیسنی نظر ادیبانه لرینه عرض ایده رک ختم مقال ایلرم.  
 هر حالده

— ۵ —

خاك پای عیون آرای حضرت مشیختپناهی به

معروض داعی دیرینه لریدرکه

توجهات مکارم غایات ولی التعمیلرینک ظل ظلیل  
آلنده مستریح البال اوله رق ، اصرار ایام ایتمکده اولدیغم  
وارسته بیاندره بونک بحق و حبیبه تشکرینی ادادن عجز می  
اعتراف ایله مادام الملوان سایه فیضوایه حضرت خلافتینا  
هیده ذات خجسته صفات جناب شیخ الاسلامیلرینک  
کمال عافیت و اقبال ایله کامران اولملری دعای مفروض  
الاداسنی ورد زبان ایتدیکم کبی وسیله جمیله دوشدکجه ده  
تحکیم رشته اختصاصه مسارعنی آیین بهین عبودیت بیلدیکم  
ایچون مشرق آرای جهان اولان شب معراج باهرالابتهاجی  
نعم الذریعه عد ایدهرک عاجزانه تبریکنه جرات و اولیله  
مبارکه نک قلوب صافیة محمد یونده اویاندردینی افکار  
اعتلا جویانه نک شوقیله :

ایله یارب بھو معراج

شیخ الاسلامی مقامنده مکین



دائماً ابد فرین شادی

ایچم اول زانت شریفی غمگین

قطعه سنی انشاد و باعث سعادت اولان نظر کیا اثر  
فتواینا هیلرینک دوام و تزییدینه اعتماد ایدهرک احتیاسات  
شکر گذارانهمک عرضه مبادرت قیلندی. اول بابیده امر  
و فرمان حضرت ولی الامر کدر

— ۶ —

فضیلت مندم افندم حضرتلری

آثار برکزیده ادبیانه لرندن اولوب صورت نفیسه ده  
طبع ایتدیر یلهرک بر نسخه می ده لطفاً داعیلرینه اهدا  
وارسال بیوریلان اثر عالیلری واصل دست احترام اولدی.  
بونک ادبیات عالمنجه دستور بلاغت دینلمکه مزرا  
بر اثر بی همتا اولدیغنی تصدیق ایتهمک مزایا شناسان  
ادبک اللرندن گلر.

بو هدیه قیمتدارک وجیبه تشکرینی بحق ادا  
عجز می اعترافه مسارعت و قصورمک عفو یله حق

تلعیدانه مدہ بی دریغ بیوریله کلمکده اولان حسن نظر  
فیض اثر نحریرانه لرینک دوام و تزیادینی استدعا یه مبادرت  
ایلدیم.

— ۷ —

معروض داعی دیرینه لریدر

مقام معلای فتوایه سایه بخش اقبال اولدقلری کوندن  
بری ارباب درایت و استقامتی الطاف عالم پسندانه لرپله  
تسریر بیوروب پادشاه کرامت شعار و شهنشاه عدالت  
کردار اقدمز حضرتلریته جلب دعوات فیض غایات  
ایتمکده اولدقلری نظر شکران ایله کورلمکده وداعی  
کمتزلرینک هیچ بر دکریم یوقسه ده یکریمی سنه در طریق  
نیابته بولنه رق حمداً ثم حمداً رضای عالی یه مغایر بر  
حرکتیم کورلمیوب دعای واجب الادای دین و دولته  
مواظبتله امرار اوقات ایلمکده اولایمندن احوال ضرور  
رت اشتغال داعیانهمه مرحة و دعوات صداقت آیات  
جناب مشیختیناهیلرینک الاخیارلرندن بولندیغمه حرمة  
عهده عاجزانهمه بر مولویت احسانیه الویه مناسبه



بر یسنک نیانته تعیین بیور لمقلغم خصوصنه فرمان بیور لمسنی  
 حبل متین مروت بیلدیکم دامن حضرت ولی النعمیلارینه  
 صار یله رق استرحام ایلرم. اول بایده.



باعث افتخارم برادر و فاشعارم افندم حضرت تلی  
 التفاتنامه کریمانه لری نظره پیرای ابتهاج اولمازدن اول  
 کوکله — منشای نامعلوم — بر غم مستولی اولمش ایدی.  
 دفعی ایچون — هر زمان یکانه مدار انبساطم اولان —  
 کتب ادبیهیه مراجعت ایلدم. نه حضرت مولاناك :

بایار بکازار شرم رهکزی

بر کل نظری فکرم از بی خبری

دلدار یحه گفت که شرمت بار

رضاسار من اینجا ونودر کل نگری

رباعیسی ، نهده معلمک :

صبح اولدی مرهامی صبر هم ساقی

آج شبی محتاج فتو هم ساقی

آنکه با رامت اولدی دنیاده عرام  
 رحم ابله کتیر راحمی و رحم ساقی

ترانه سی باعث انبساط درون اولدی . فقط حسن  
 نظرفیض اثر ادیبانه لرینی مبشر اولان لطفنامه دلنوازانه لری  
 واصل دست تعظیم اولور اولماز کوکلم انوار سرور ابله  
 طولدی .

حق عیدانه مده بی دریغ بیوریلان لالی التفاتک ایفای  
 وحیه تشکری خصوصنده کی قصور مک عفونی دیلر و محتاجی  
 بولندیغم توجهات مراحم پرورانه لریله کامکار بیورلمق لغمی  
 خاک پای کمالات پیرای عارفانه لرینه وضع جبین اخلاص  
 ایدهرک استرحام ایدرم .

— ۴ —

قارداشم !

استانبولدن مفارقتک اوچنچی کونی محل مأموریمه  
 واصل اولدم .

بورانک هواسی ، دیدکلری قدر سرد دکل . هله صوی  
 طاشدانه معادل . پک کوزل برمسیره سی وار . بومسیره نک



اورته سندن کوچك بر ایرماق جریان ایدیور . ایرماغك  
کنارینه بر صورت منتظمه ده دیکلمش اولان سکود  
آغاچلرینك منظره سی او قدر نظر رباکه توصیفی ایچون  
بر تعبیر مناسب بولنه ماز . بوجلو و گاه بهاری قوچاقلامش  
اولان جبال زمردین ، تماشاکرانی مست حیرت ایده جك  
درجه ده دلش سیندر . سطح چنده نازك ، نازك خرامان  
اولان ابکار ازهارك افواه لطیفه سندن بوسه چین اوله رق  
وزان اولان نسیم سحر ، دماغ اهل ذوقی معطر ایدیور .  
بولندیغم خانه دن آهسته روشاه یکر می دقیقه ده  
واریله بیلن بوجای فرحفرایی صباح ، اقشام زیارت  
ایدیورم . هر زیارتمده سنی دوشونورم . کلسه ده بوجاه گاه  
طبیعتده حسن عقل آشوب ربیعی برابرجه تماشایتهك  
اولمازمی دیورم .

اعلی اولور . اولیه حق نه وار ؟ هایدی برادر کلیور !  
بو هفته منتظر اوله ییمی ؟

— ۹۵ —

معروض داعی دیرینه لریدرکه

کچنده والی پاشا حضر تلرینه شرفواردا اولان احساننامه

فتواینساهییلرنده طرف عاجزی یه غاڭد اوله رق تسطیر  
بیوریلان عبارات التفات آیات توقیرییه فرط افتخار  
ومسارینی بی شمار ایله کوریلهرک ادعیه مفروضه حضرت  
ولی النعمیلری شوق جدید ایله تلاوت قیلنمشدر.

ولی نعمت افندمزک بو وجه ایله فوق العاده ورثه  
لیاقت کترانه مدن قات قات زیاده اولمق اوزره نائل اوله  
کلدیکم عنایات وتوجهات جلیله بی منتانه لری کندمه اولان  
حسن ظنمی کر چکدن تزیدایلمکده دره بر صورت دائمه ده  
معیت خدمت عالیّه شیختیناهییلرنده بولنقدن عبارت اولان  
امل مخصوص داعیانهمه قاوشمغه وسیله اولمق ایچون سایه  
احسانوایه خداوند اعظمیلرنده آز زمان ایچنده بیوجک  
خدمتله نائل اولانلره التحاق ایله کندمی دهها زیاده  
خدمت والار تبیت جناب شیخ الاسلامیلرنده بولنه بیله جک  
بر موقعده کوره جکمه کوکلك ایمان شهود مرتبه سند  
ایمانمقده اولدیغنسک عرض و بیانیله رخسودکی خاک پای  
مرحمتیناهییلرندن اکتساب شرفنه شمذیلک اشبو عریضه  
جغمی توکیل و آزردّه فرقت حضرت ولی نعمت اولمق کی  
برختسزلغک صدمات دمادمنی هنوز چکمکده اولان قلب  
امید وارمی دهها پک آز برمدت ایچون دسترن دامن صبر  
جمیل ایلرم. هر حالده



— ۱۱ —

## معروض چاکر شاگر الاحسانلریدر

هر پوسته تحریرات علیه کرمکاریلریله قریر العین  
 اولدیغیم حالده کچن پوسته بوشرفین محروم بیراقلدیغیم جهتله  
 فوق العاده مراقبی موجب اولمش ایدی . هله بو پوسته  
 ایله وارد اولان احساننامه سامیلری هامه پیرای تکریم  
 و کچن هفته مکتوب ارسال ایدیله میشی باشقه بر سببه مبنی  
 اولمیوب پوسته کون چفتلکده بولندقلرندن ایلری کلدیکی  
 معرض اعتذارده بیان بیورلایغندن مایوس اولان کوکم  
 مستغرق انوار ، سرور اولدی .

پوسته کونلرینه کمال تهالکله منتظر اولان بر غربت  
 زده نك احساننامه عالیلریله شرفیاب اوله مامسی شکایتیه  
 برحق قازاندرمه بیه بوندن طولانی مؤاخذه یه ده لایق  
 کورلیه جکنی بیلدیکم ایچون تقدیم شکوانامه یه جرات  
 ایلمش ایدم .

محبول اولدقلری خصلت ممدوحه بیکس نوازیلری  
 مقتضاسنجه بوبابده کی شکایتمک حقلی اولدیغی تسلیم بیورلایغی

کبی بعدما ارسال مکاتیبده قصور ایدلییه جکی صورت  
مخصوصهده درمیان اولنیور .

شو لطف عالیرندن طولایی عرض شکران بی شمار  
و حق عیدانه مده بی دریغ بیورلمقده اولان حسن توجه  
حقوق پروریلرینک دوام و توافری نیازی تکرار ایلرم .

\*\*\*\*\*

— ۱۶ —

معروض عیدانه مدر

عرفه کونی مقدم عیدی تبشیراً ایلک آتیلان طوب  
ایله برابر موزعدن آلمش اولدیغ احساننامه و فاشعاریلرینک  
مطالعہ سیله تنویر دیدۀ مسرت ایلدم .

مسرتم ، بایرام کونی الثفات جانان ایله دلشاد اولان  
عاشق حبران دیدہ یہ رشک بخش اوله جق بر مرتبه بی  
بولدی .

بر آندہ مژده قدوم عید ایله شرفیاب ، بقای حسن  
توجه عالیبرخی استبشار ایله کامیین اولمق سعادتته مظهر یتک  
شکرانه سی اوله رق همان :



لطف ابدوب ایلدی آبادینه  
 قلب دیرانی همدای ذوالطهر  
 رابطمدر کرمی بنده منه  
 نعل ایفا ابدوبهم شکرینی بیه

قطعه سیله تزین لسان عبودیت ایتدم .

شو ایکی نوید صفا بخشانک کوکلده اویاندرمش  
 اولدیغی احتیاسات شکر گذارانہ ایلہ ذات ستوده صفات  
 ادیبانه لرینک بویله نیجه نیجه اعیاد مبارکه یه ادراک ایلہ  
 قریر العین اولملرینی جناب واجب الآمالدن نیاز ایتدیکمک  
 عرضنه متجاسر اولدم .

////////////////

— ۱۳ —

او غلم !

فی ۳۰ رمضان سنه ۱۳۱۶ تاریخلی مکتوبک بایرامک  
 اوچنچی کونی واصل دست احترام اولدی . کندک گلش  
 قدر سوندیم . رمضانده کوندوزلری طاعت ، کیجه لری  
 مطالعه ایلہ مشغول اولدیغکه پک زیاده ممنون اولدم .

بناءً علیه هر آن آرایش لسانم اولان: [جناب یزدان ایکی جهاننده کامران بیورسون] دعاسنی کمال خلوص بال ایله تکرار بتکرار رفع بارگاه پروردگار ایلدم.

اوان تحصیلده باشقه شیرله اشتغال ایدن استقبالی محو ایتیش اولور! ذکاوتکه منضم اولان غیرتک تضییع اوقاته هیچ بروجه ایله میدان ویرمیه جگنی بیلدیکم ایچون بو بایده تطویل کلامه لزوم کورمیورم. دنیا ده اک بیوک نعمت کسب کمال ایدهرک بنی نوعنه قلماً خدمت ایتمکدر. ایستدیکک کتابیری تدارک ایدوب کله جک پوسته ایله یوللارم. سن همان چالش! بن لازم کلن معاونتده شمدی یه قدر قصور ایتدیکم کی بوندن بویله ده قصور ایتیه جگمی وعد ایدرم.

[نازله دن برقاج کون راحتسز اولدمسده شمدی الحمدلله کمالیه تشفی بولدم.] عبارده سنده کی «تشی» یی غالباً دوشونمندن یازمشسک.

لسانم زده «تشی»، «شفا بولمق» معناسنده استعمال ایدلمز، «حقنده غیظی اولان کیمسه دن انتقام آلقه یورده کی صوغومق» معناسنده قوللانیلیر. [شیوه لسانده کی تصحیفاتم معذور کوریله] عبارده سی ده بوزوق، چونکه



[خطاء تغیر ایتمک، ایدلمک] معناسنه کلن « تصحیف » ک  
استعمالی یازی به مخصوص صدر.

یازیلرینی ساده لشدورمکه غیرت ایت ، لغت پردازاغه  
قالقشمه .

— ۱۴ —

استاد فضیلت مندم اقدام حضر تلری

اخیراً حضور فیض نشور فاضلانہ لرینہ تقدیمہ متجاسر  
اولدیم عریضہ تلمیذانہ مه جواباً ارسالہ عنایت بیوریلان  
فی سنہ تاریخلی التفاتنامہ تحریرانہ لری واصل دست  
تکریم اولدی .

هر سطری مقصد اقصای عاجزانہ م اولان توجهات  
معالی آیات استادانہ لرینک بقاسنی مبشر اولمغله افتخار  
ومسرتمک درجه سنی تعریفدن پیشگاه مدرکده جلوہ کر  
اولان توصیفات نفی پسندانہ بی پک قاصر کوردیکمدن  
تقدیرینی عرفان عالی مشکل براندازانہ لرینہ حواله به مجبور  
اولدم .

ادای وجیه تشکرده کوریله جک قصورلرمک عفو

بیورلمسی رجا ایدر و دست کرامت پیوست عالیلرینی  
کمال تعظیم ایله اوپرم.

— ۱۵ —

سماحتلو اقدام حضرتلری

ذره نك آفتاب عالمتابه اولان نسبتی قییلندن اوله رق  
داعی بیوایه لرینك ذات معالی صفات نحریرانه لرینه اولان  
مناسبت کترانه م آره صیره خاك پای ناصیه پیرای سمو حیلرینی  
تصدیعه جرات بخش اولدیفی کبی بو کره ده شرف حلولیه  
قلوب محمدیونی مستغرق انوار شادمانی ایدن لیله مبارکه  
ولادت احمدیه بی ذریعه جمیله عد ایده رك عاجزانه ایفای  
فریضه رسم تبریکنه مسارعیت ایلدم.  
آیین بهین رقیتمده درکار اولان قصورمك عفو یله  
دائمی اللعان اولان توجهات مکارم غایات جناب عرفا  
نپناهیلرینك حق ناچیزانه مده بی دریغ بیورلمسی بابنده  
آستان دولترلرینه وضع جبین استرحام ایلرم. هر حالده  
امر و اراده ولی نعمت بی منت اقدامز کدره.



— ۱۶ —

فضیلتلو اقدام حضرتلری

تبریک مأموریت عاجزی بی مشتمل فی ۲۲ ایلول  
 سنه ۳۰۹ تاریخلی لطفنامه عالیلری شرفبخشای مقام  
 تکریم اولدی. بونده منظور دیده مباحات اولان عبارات  
 لطفیه حق عیدانه مده کی تمایلات قلبیه توجهکارانه لرینک  
 درجات سامیه سنی مبشر بولمغله مجرد شعار مروت  
 وانسانیت کر مکاریلری حکم واقتضاسی اوله رق ابراز  
 بیوریلان آثار حسن توجه مکارم پروریلرینه متقابلاً  
 عرض شکرانه مسارعت وتوجهات معالی آیات کریمانه  
 لرینک حق عاجزانه مده دوام و تزییدی آمال صیحیحه  
 مخلصانه مدن اولمغله بو آرزویه نائلیمه دال اوله جق مائر  
 لطف و مکرمت عالیلرینی بعدما دخی مشاهده ایله قریر  
 العین اوله جفمی قویاً امید ایتکده بولندیغمک بیسانه  
 محاسرت ایلرم.

.....

— ۱۷ —

نظرگاه ولی نعمتلرینه.

هر آن خاک پای فاضلانہ لرینه قارشى ایفاسنه بورجلو

اولدیغم وظائف شکر کذاریده کی قصورلر مک عفو بیو-  
ریله جغنه امین ایسه مده وجدانک مؤاخذه سندن بر درلو  
کریبان عجز می قور تاره دیورم. بوکا بر چاره دوشونیورم،  
او چاره بی ده ینه مرحمت مساعه کر مکار یلرنده بولیورم.  
لطف ایدیلوب ده قصورلر مک عفو بیورلدیغنه دائر  
برالتفاتنامه تسطیر بیوریلورسه شو اضطراب وجدانیدن  
قور تیله جغم. بو باده دریغ عنایت بیورلیه جغنی بیلدیکم  
ایچون بویله بر عفونامه یه چار جشم ایله منتظر اولدیغمک  
عرضنه متجاسر اولدم.

— ۱۸ —

سعادتلو اقدام حضر تلی

طبع عالی فضائل پروریلری کی ساده و شیوه  
کلفتدن آزاده فی ۲۲ تشرین ثانی سنه ۳۱۲ تاریخلی  
احساننامه و فاشعاریلری مقام آرای اعزاز اولدی. بونک  
مطالعہ سندن اگرچه فوق التعریف بر صورتده کسب  
مسرت و افتخار ایدلدی اما الم مفارقتک حاصل ایتمش  
اولدیغی تأثرات قلبیه ینه تازهلندی، مدار تسلی ایسه



جناب حقك طرفینی قلباً ایتدیکی کی مکاناً دخی حسن  
توحیده مقتدر بولمسیدر .

فلان اقدی حضر تلرینه تحیات علیه حقوق پروریلری  
در حال تبلیغ قیلندی . نه قدر ممنون اولدیغنی تعریف  
اقتضا ایتمز . شو قدر که او اثنای نشاطده محبتدن اوردیغنی  
دملر حقیقه پک صمیمی ایدی . عریضه مک نهایتی توجهات  
مفخرت آیات کرامیلرینک تمنای بقا و ازدیادی اولمق  
طبیعی اولدیغندن شوراجقده ختم کلامی موافق کوردم .  
اول باده لطف و فرمان اقدمز کدر .

.....

— ۱۹ —

## مضمر کالات شور فاضله لرینه

فضیلتلو اقدم حضر تلری

ینه بر التفاتنامه والالریله قریر العین اولدم . بونده ده  
حق داعیانه مده ابذال بیوریلان توجهات ، من کل الوجوه  
سزاوار مباحثادر .

خاک پای فیض احتوای عالیلرینه بو باده کی حسیات  
شکر گذارانهمی بحق بسط و تمهید ایدر جک اولسام

اوزایوب کیده جکندن تصدیعی موجب اولور قورقوسيله  
طی طومار گفتاره مجبور اولدم .

هر حالده برات سعادت دینلمکه شایان اولان بویه  
احساننامه لرایله تسمیرم خصوصی عروت عجزه نوازیلرینه  
وابسته در .

— ۳۰ —

فضیلتو افندم حضر تلی

محل مأموریت فاضلانہ لرینہ موصلت والالری  
مبشر احساننامه سامیلری فی ۱۲ جمادی الآخرہ سنہ  
۳۱۲ تاریخیلہ اتمہ پیرای داعیانہم اولدی .

لیل ونهار امور مأمورہ منعمانہ لرندہ موفق اولملری  
دعای بی ریاسنی رفع اجابتکاه جناب پروردکار ایدہ رک  
وظیفہ عبودیتی ایفایہ چالیشیورم .

دائماً انظار شفقت مدار عالیلرینک حق عیدانہ مدہ  
بقا وابدالنی مجبول اولدقلری خصالت ممدوحہ کرمک  
ریلرینہ اعتماداً رجا و بویه احساننامه لرسالیلہ مسرور  
بیورملقلغم خصوصنی خاک پای استادانہ لرینہ وضع جبین  
ایدہ رک استدعا ایلرم .



— ۲۹ —

سماحتلو افندم حضر قلی

تأثیر کربت غربت ایله آزرده اولان دل ناتوانمه  
تسلی بخش اولق اوزره :

نا امیر اوله امانه ای دل یامال فراق

لطفه مظهر ایدر بر کوه اولور که مهاناه

بیتمی انشاد ایتمکده ایکن هر سطری حسن توجه عالیلری  
مبشر اولان احساننامه سموحیلری واصل دست اعزاز  
اولدی .

حق داعیانهمده کوسستمش اولدقلری حسن نظر  
محاسن اثر کرامیلرینک لازمه تشکرینی ادا ده کی عجزم نزد  
مراحم وفد کرم کستریلرنده سوز کوتورر مواددن اولمدینی  
و ذات خجسته صفات عاطفت پروریلرینک خصلت ممدوحه  
عجزه نوازیلری ایسه آرایش السنه ستایش بولندینی جهته  
آیین بهین شکر گذاریده اولان قصور لر مک عفو بیورلمسیچون  
مرحمت والالرینه دخالت مشابرت ویکانه مدار فیض  
ومباهاتم اولان نور التفات مکارم غایات منعمانه لرینک

فرق عیدانه مدن دور بیورلامسی خصوصنی استرحام  
معرضنده خاک پای شفقت پیرای سامیلرینه وضع جین  
ضراعت ایلرم .

~~~~~

— ۲۲ —

بورایه ، استانبولدن حرکتک اون بشنجی کوئی  
واصل اولدق . اثنای راهده هیچ برصیقندی چکلمدی .  
ایکی طرفی کستانه ، چنار آغاجلریله آراسته اولان یولمزک  
لطافتنی بیان ایتک ایچون بکقوز چایرینی ایکی یه آیران  
توقات کوشکی جاده سندن فرقی اولدیغنی سویلمک کافیدر .  
مملکتک موقعی یک کوزل . هواسی ، صوینی ده لطیف .  
اهالیسی خوش مشرب ، متدین ، چالشقان آدمیر . اکری  
ایشدن خوشلانمیلر ، تنبلکی هیچ سومیورلر ، فقرا  
پرورلکله رینه ده دیه جک یوق . اشراف مملکتک اکچو غنک  
قوناغنده مسافر هیچ اکسک اولیور . ارباب کاله ده  
فوق العاده محبتلری اولدیغندن هر زمان مجلسلرنده  
اصحاب دانش و عرفاندن بر ایکی ذات بولنیور ، مباحث  
عالیه و لطیفه بسط و تمهید اولنیور . حاصلی بورادن  
هرجهتله ممنونم . حسرتکزدن باشقه برکدرم یوق . خیر  
دعا کزی دیلر ، التفاتنامه کزی کمال اشتیاق ايله بکلرم .

~~~~~



## — ۲۳ —

عطو فتلو افندم حضر تتری،

انفلاق صباح عیدی متعاقب خانه داعیانهمی برنجی  
اوله رق تشریفه تنزل بیوران برادر عالیاری دست احترامه  
— نام عاجزانه مه تسطیر بیوریلان — احساننامه سامیلرینی  
صوندی .

نور سرور عیدی قات قات تزیدایله کوکلی کعبه الاشواق  
ایدن او نامه سعادت کمال تعظیم ایله اوپوب باشمه قویدم.  
هر کله سی بر مرده التفاتی مبین اولان او برات عنایتی  
او قور او قوماز:

ای نوبه بار قیلرک کوکلی

مبارکده برنو نور سرور

مخالقه محمد فراوانه ایلرم

بهرانه ایتمز او برده غم سرور

قطعه سنی انشاد و آرایش لسانم اولان دعای ازدیاد عمر  
وسعادت کرامیلرینی رفع بارگاه جناب رب عباد ایتدیکمک  
عرضیله ایفای وجیه رسم تبریک عیده مبادرت وحق

نا مستحق عیدانه مدد دائمی اللهم ان اولان حسن توجه  
لطف شماریلرینک توافری نیازینه مسارعت ایلرم. اول بابده  
لطف و کرم ذات ستوده شیم اقدمز کدر.

— ۲۴ —

## حضور عالی برادر اکر میلرینه

برادر فضیلت مندم اقدم

ثالثه دن شهادت نامه اخذینه موفق اولدیغیزی مبشر اولان  
فی ۱۵ شباط سنه ۳۱۶ تاریخلی مکتوب وفا اسلوبکزی کمال افتخار  
ایله آلام. ذات عالیگزکی تحصیل کمالی کندینه پیشه ایدن  
ارباب ذکاوتک بین الاقران کسب تمیز ایده جکی آشکار  
اولدیغندن امتحانده برنجیلکی الله ایده جک کز دن امین  
ایدم. معلوم اولان اخلاق حسنه و جر بزه نطقیه کز سایه سنده  
عهد کفایت کزه تفویض بیوریه جق مأموریتلری حسن  
ایفا ایده رک خوشنودی عمومی بی قازنه جغکزه شبهه ایتم.  
خورشید اقبال کزک یقینده او جکیر عالم سعادت اولدیغنی  
کور رک مسرور الفؤاد اولمقلغم خصوصنی جناب واجب  
الآمالدن نیاز ایتمکده اولدیغمک بیانیه ختم کفتار ایلرم.



— ۲۵ —

حضور عالی عرفانپناهیلرینه

سعادتمندم معالی پرور اقدام

داعیلرینه بر نسخه نفیسه سی اهدا وارسال بیوریلان  
 فلان عنوانلی تألیف عالیلری واصل دست تعظیم اولدی.  
 همان استفاده جویانه مطالعه سنه قویولدم، مندرجاتی هرجهتله  
 موافق بلاغت و حکمت بولدم. بوبابده کی موفقیت ادبیانه  
 لرینی غبطه پرورانه تبریکه مسارعت و ذوق مطالعه دن  
 متحصل اخلاص تام ایله فیضکونک مزداد اولمسی جناب  
 خداوند سخن آفریندن نیاز ایلدیکمک عرضنه مبادرت  
 ایلرم. اول بابده

.....

— ۲۶ —

خاک پای مرحمت پیرای حضرت مشیحتیناهییه

معروض داعی دیرینه لریدرکه

کمتلری اوتوز سنه دن بری طریق نیابنده پویان  
 اولوب راه قویم استقامتدن ذره قدر انحراف ایتمدیکم

واستجلاب دعوات خیر آیات حضرت خلافت‌نصاهی به  
 بذل مقدور ایله وظیفه عیودیتده ثابت قدم بولندیغم نزد  
 عالی جناب شیخ الاسلامیلرنده سوز کوتورر مواددن  
 اولمیدیغنی و ذات کمالاتسمات تحریر اعظمیلرینک ارباب  
 استقامت و صداقته الطاف جلیله دولترلی مبدول اولوب  
 آستان فیض بنیان فتواپناهیلرینه انتساب ایله مبااهی بولنان  
 احقرلری کبی بی و ایکاندن دریغ عنایت بیورلیسه جغنی  
 بیلیدیکم ایچون استقامت و صداقتمه و قدم عیودیتده حرمة  
 حائز اولدیغم مولویتک مخرجه تحویلله کامیاب اولمقلغم  
 خصوصنه عنایت جلیله ولی النعمیلرینک سزاوار بیورلمسنی  
 استرحامه جرات ایلدم. هر حالده امر و فرمان حضرت ولی  
 الامر افندمز کدر.

— ۲۷ —

عزیزم !

الله « خواجکان » عنوانیله یاد اولنان اکابر عرفای  
 امتک بر خیلی قطعات و رباعیاتنی حاوی بر مجموعه کجدی ..  
 بو مجموعه دکل ، برکنجینه. ایچنده اولان دراری حکمت  
 یکن قیمتدار. از جمله خواجه عزیز انک:



نفس مرغ مقید در درونت  
نگر دارم که خوسه مرغیست و مساز  
ز پاسبانم مکمل نماند  
که توانی گرفتن بهر پرواز

قطعه سی تزیین گوش هوشه سزاوار . احمد جامی نامه  
مقید اولان:

که نك وجود غم فزاینده کنی  
که از روی هیات یابنده کنی  
آینه عمده خراهی زرقه فزونی  
وزرقه هم کردی که در آینه کنی

رباعی سه ده يك برجسته، آلتونله یازلمغه شایسته . او  
قطعه بی، شور باعی بی مجموعه دن بورایه انتخاب طریقله نقل  
ایتمدم، نمونه اوله رق یازیویردم . مقصدم ایسه مجموعه نك  
حاوی اولدیغی قطعات و رباعیات ، خرد فرسا اشعار  
عارفانه دن اولمسیدیغی کوستر مکه برابر بوتلری ترجمه  
ایتمکلم ایچون خالک پای عالیگزدن رخصت طلب ایلمکدر .  
واقعا بو بر کستا خلقدرد ، فقط بوکا جرأت ایدیشم

حق درویشانهمده هر بار لمعه نثار اولان حسن توجه  
عارفانه کوزه کمال استناد میدند. باقی: همت.

— ۲۸ —

سعادتلو اقدام حضر تلی

فی ۲۳ رمضان سنه ۳۱۴ تاریخیه مورخ التفاتنامه  
ادیبانه لری اتفلاق صبح عید ایله برابر کلبه فقیرانه می  
پر نور و دل عیدانه می سرمست سرور ایلدی. داعیلری  
ایچون بوبر بختیار لقدر که درجه سنی تقدیر ایتمکدن دکل  
خامه کتری:

بن اومیر مجلس نظم که بزم معرفت

سوز شعر و رشوه خامه مد بولدی اب و نایب

دعوا سنک بحق اری اولان نفی ده اولسه عاجز در.  
بناء علیه بوبابده کی احتیاسات شکر کذارانه مک  
بسط و تحمیدندن صرف نظره حق داعیانهمده حسن  
توجه عرفانیناهیلرینک کما کان دوامنی رجا و تقدیمه متجاسر  
اولدینم کلدسته تبریکک تنزیلاً قبول بیورلمسنی استمدعا  
ایلرم. هر حالده لطف و کرم اقدام کدر



— ۲۹ —

## حضور عالی داور اگر میلرینه

افندمن !

حسن توجهك بر دليل علمي اوله رق فلان افندی  
ایله اهدا بیوریلان و حقیقه اوروپا کاری دینلمک شایسته  
بولنان یازی قلمی واصل دست اجمال اولدی . بونک  
کوکلمده حاصل ایتدیکی احتیاسات شکر کذارنه بی بیان  
ایچون همان او خامه مشکین رقمه صاریله رق :

ای کلاک فروشتری سرور منامی  
نبی ایچونه اویاره نغم ترجمانم اول  
آیین محمدنه اولوب همزبانم بیا  
فیصه جناب منو ایلد نایب بنامم اول

قطعه سنی یازدم . هر حالده توجهك محتاجی اولان  
عبد عاجزك و حییه تشکرده کی قصورینی عفو بیورمکزی  
مسلم اولان شیعه کریمه حقوق پروریکزدن کمال اطمینان  
وچدان ایله بکلام .

— ۳۰ —

سعادتلو اقدام حضرتلری

هر بار اذکار جمیله کرامیلریله دمگذار اولان داعیلری  
وسائل حسنه دوشدجه تقدیم عریضه ایله تحکیم رابطه  
بندکی به شتایان اولمغی وظیفه اخلاص مندی مقتضیاتندن  
بیلا یکم جهتله افق آرای سعادت وبتون قلوب موحدینه  
نور بخش کرامت اولان هلال شهر رمضان مفخرت  
نشان ایله تنویر دیده دل و جان ایدر ایتمز:

بارك الله ای مه غرای شهر مفخرت

طردی انوار کله بالجمله قلوب مؤمنین

بافصوصی اشرك بنی مستغرق دریای شوق

ارمدی دل محسور مهر آسمانه چارمین

دیهرك تبریکنه ایشدار و امثال کثیره سنه ادراک ایله  
قریر العین اولملری خصوصنی جناب کردکاردن نیاز  
ایتمش اولدیغمک عرض و بیاننه تردیفاً حرز جان اولان لآلی  
التفات سامیلرینک آبدالیله وایه مند شرف اولمقلغم رجاسنه  
اجتسار ایلدم. باقی لطف و کرم جناب معالی شیم اقدامز کدره.



— ۳۹ —

## مقام معالی مشیخت عظمایه

معروض داعی دیرینه لریدرکه

مکتب نوابك انتظامی حقننده کی حسن توجه کار  
 آکاهیلرینک درجه سی پک عالی اولدیغنه مکتب مذکورک  
 بوسفرکی تعمیر و توسیعی خصوصنده کوریلن هم والای  
 جناب مفتی الانامیلری شاهد عادلر . بو بایده مدیون  
 بولندیغمز وجیهه تشکری بحق ایفاده کی عجزمز بر کمال  
 اولدیغنی اعتراف ایله برابر نزد معالی وفد عدالت پرو-  
 دیرلنده انتظامی مطلوب اولان بر مکتبک تأخر امتحانیله  
 طلبه قوللارینک کرفتار یأس و قنور اولملرینی تجویز  
 بیورمیه جقلرینی بیلادیکمز ایچون امتحانلر مرکز همان  
 اجرایی خصوصنه مساعدۀ جلیله فتواپناهیلرینک ارزان  
 بیورلمسی استرحامی معرضنده خاک پای امل پیرای ولی  
 النعمیلرینه وضع جبین ابتهاله اجتناسار ایلدک . هر حالده  
 امر و فرمان حضرت ولی الامر کدر

— ۳۲ —

قرداشم !

بخی:

په‌نه مېږمړی مېږم ېنم یار صاعديغم [۱]

فریادینه نچون مجبور ایدیورسک . آیین بهین اخوتک  
پرستشکارلرندن اولمغه مېاهی بولنان وجدانک پامال  
غربت اولان بر بی چاره یی آیلرجه اونوتمغه نصل راضی  
اولیور .

بخی اونوده جفنه بردرلو حکم ایتک ایستمیورم، فقط:

« هر کیمی سورمه ناز ایتی به » [۲]

دیمکندن ده کندیمی آله میورم . بو قدر ناز الویرر، بعدما  
محزون اولان کوکلی حرز جان اولمغه شایسته بولنان  
التفاتنامه لر ایله مسرور ایت. باقی اخوت.

\*\*\*\*\*

— ۳۳ —

معروض عبد عاجزلریدر

خالکبای عالیلرندن کمال افتخار ایله آلمقده اولدیغم

(۱) حلیم کرای (۲) خضر آغا زاده سعید پک



التفاتنامه لرك لازمه تشكرينى بحق ايفادن عاجز اولديغى  
اعتراف ايله برابر كوكلمده بير اقدىنى انوار مسرت لسان  
صادق البيانى مشرق لمعات محمدت ايتكمده بواندىغى  
مفتخرانه عرض ايدرم.

هيچ بر كون مرور ايتمز كه ذات خجسته صفات  
ادبىانه لر ينك من القديم حقمده كوسترمكده اولدقلىرى  
آثار باهره اخوتى متدارانه ياد ايتمش اولميهيم.

مع مافيه تقديم عريضه ده كي قيد سز لغمه سزاوار عفو  
اوله حق كستاخلق لردن اولمىوب هر درلو سرزنشه حق  
عالىلىرى بولنديغى حاليده شو قيد سز لغمه مسامحه كارانه نظر  
بيورلديغى وكوندن كونه توجهات مكارم غايان كراميلرينك  
تزايد ايتكمده اولديغى ديده شكران ايله كورلمكده در.

بناء عليه بو عريضه مى متوالياً آرايش هامة تكريم  
اولمقده اولان لطفنامه ساميلرينه قارشى يازلمش برضراعتنامه  
اولمق اوزره قبول بيوروب دائماً مظهر عاطفت والالىرى  
اولمق لغم خصوصى تمنى به جرأت ايلدم. هر حالده لطف  
ومروت خاك پاى معالى منقبت افندمز كدر.

— ۳۴ —

سماحتلو افندم حضر تلی

خاک پای فیض احتوای عرفانپناهیلرینه انتساب ایله  
 مباهی بولسان داعی دیرینه لری تأیید رابطه اختصاص  
 ایچون وسائل جمیله تحریرسندن بر آن خالی قالمیوب بر ذریعه  
 بدیعه به دسترس اولنجه همان برای تحکیم بنیان رقیه، تقدیم  
 نیازنامه عبودیته مثابرت ایتمکده اولدیغم نزد مکارم وفد  
 سمو حیلرنده بدیدارد.

بتون جهانک و باخصوص عالم عرفانک مابه الشرفی  
 اولان لیله رغائب عمیمه المواهبک حلولنی سرمایه سعادت  
 بیلدیکم حسن نظر کیمیا اثر کر مکاریلرینک حق کترانه مده  
 کماکان دوامنی تمنایه و ایضای و جائب رقیته کوریلان  
 قصورلر مک عفویله دلیر عنایت بیورملرینی رجایه وسیله  
 حسنه عد ایدهرک عاجزانه ادای رسم تبریکنه مسارعت  
 وبویله نیجه نیجه لیالی مبارکده ادراک ایله کامکار والی یوم  
 القیام صدر صفای عافیتده کمال اقبال ایله برقرارا و مللری  
 درود مسعودینی ایصال بارگاه جناب پروردکار ایتمش  
 اولدیغمک عرضنه مبادرت ایلرم. هر حالده امر و اراده  
 افندمن حضر تلیرینکدر.



— ۳۵ —

معروض مملوگانه مدر.

تصدیقی موجب اولور دیه صیق صیق تقدیم عریضه یه  
 جسارت ایده میورم. تأیید رشته عبودیت ایچون و سائل  
 جمیله یه مترقب اولیورم. بر ذریعه حسنه یه دسترس اولنجه  
 تقدیم عبودیتنامه دن کندمی آله میورم. بوکره عید سعید  
 فطرک شرف حلولنی نعم الوسیله عد ایده رک ایفای رسم  
 تبریکنه مسارعتله حق نامستحق عاجزانه مده بی دریغ  
 بیورلمقده اولان توجهات محاسن غایان کرم شعاریلرینک  
 بقاسی نیازینه ابتدار و شب و روز دوام عمر و اقبال  
 منعمانه لرینک دعاسیله تزیین لسان رقیق ایتمکده اولدیغمک  
 غرضنه اجتناسار ایلدم.

— ۳۶ —

ولی نعمتم افندم حضر تلی

خاک پای سعادت احتوای والد اکر میلرندن کورمکده  
 اولدیغم لطفه قارشی کوکلمده جلوه کر اولان انوار احتیاسات  
 متدارانه نک و سائل جمیله دوشدجه عرضنی و حبیبه  
 بنوتدن بیلدیکم جهتله بتون ایالی مبارکده الی الابد غبطه

بخش اولان شب ولادت معالی منقبت حضرت فخر  
المرسلینک شرف حلولنی نعم الذریعه عد ایدہرک ایفای  
رسم تبریکنه مسارعت وحق عاجزانہمدہ بی دریغ بیوریله  
کلن حسن نظر مراحم اثر منعمانہلرینک دوام وازدیادی  
خصوصنی دست کرامت پیوست رحمانہلرینی کمال حرمتله  
تقییل ایدہرک نیازہ مبادرت ایدرم.

— ۳۷ —

سعادتمآب افندمن حضرتلری

اولاً عرض اخلاصده کی تقصیراتکم و آره صیره  
وقوع بولمقدہ اولان تصدیعاتکم عفونی — شیمه حقوق  
پروریلرینه استناداً کمال شرمساری ایله — رجاء ثانیاً  
پوسته خانہ عامره مأمورلرندن فلان افندی بندهلری  
حقننده اولجه استرحام ایتمش اولدیغم لطف و حمایت  
کرمکاریلرینک بو کونلرده ساحه آرای ظهور اولسنی  
کورمککمکی استدعا ایلرم.

مسئول عیدانہمک همان اسعاف بیوریله جغنه ایمانم  
بر کمال اولوب انوار محبت و فاشعاریلرله مستغرق بولنان  
قلب اخلاصمنده ذره قدر شبهه کیدیکی ایچون شمیدن



تقدیم تحفه شکرانه مسارعت و یکانه مدار افتخارم اولان  
حسن توجه عالیترینک دوام و تزیادی تمیسنه مبادرت ایلرم  
هر حالده امر و اراده افندمز حضر تلیزینکدر.

— ۳۸ —

سعادتلو افندم حضر تلیز

بوکره آقحصار قضاسی نیابتنه تعین بیوریلان  
اونیهلی فلان اقدی داعیلری ارباب فضیلت و استقامتدن  
اولوب ثنا کارلرینه ده مناسبت کامله سی بولندیغندن حقنده  
ابدال بیوریله حق حرمت اقدی موما الیه قدر دل  
مستمندانه می ده لبریز مسرت ایده جکنی عرضه اجتناسار  
و حلولیله بتون قلوب اهل ایمانی مستغرق انوار شادمانی  
ایدن شب ولادت باهر السعادة حضرت رسالتپناهینک  
تبریکله امسال کثیره سنه ادراک بیورملری نیازینی اول  
لیله مبارکده اعلائی عرش اعلی ایلدیکمک بیاننه تردیفاً  
عاجزلرنجه پک قیمتدار اولان حسن انظار فیض مدار  
وفاشعاریلرینک دوام و توافریله کامکار بیورلمقسلیم  
خصوصنی تمنییه ابستدار قیلندی. هر حالده اراده افندم  
حضر تلیزینکدر.

— ۳۹ —

سعادتلو اقدام حضرتلری

لطفنامه سامیلری زینت بخش دست ثناوری و مزایای  
عالیه سی حافظه پیرای کمتری اولدی. حق داعیانه مده ابدال  
بیوریلان توجهات کر مکاریلرینک و جیبۀ تشکرینی کمالیله  
ادادن عجز می اعتراف ایله بو بایده کی قصور لر مک عفو  
بیورلمسی رجاسنه مبادرت و انوار حیات بخشاسیله قلوب  
صافیۀ محمدیونی رشک آور مهر جهانتاب ایدن لیله ولادت  
حضرت پیغمبرینک ایفای رسم تبریکنه مسارعت ایلرم.  
هر حالده امر و اراده اقدام حضرتلرینکدر.

////////////////

— ۴۰ —

اقدامز !

خیلی زماندن بری لطفنامه ادیبانه لریله قریرالین  
اولق شرفنه مظهر اوله مدم. بو، کثرت مشاغلدن ایلری  
کلوب عرض اختصاصده کی قصورم ایله برابر تصدیعات  
متوالیۀ داعیانه مدن نشات ایتدیکنه وجدانم شهادت



ایتمکده در. بناءً علیه حق عاجزانه مده رایگان بیوریلان  
 حسن توجه فاضلانہ لرینک بقاسندن امینم. باعث مباحاتم  
 اولان احساننامہ کرامیلر یله تنویر چشم شکران ایتمکلمکم  
 خصوصنه عنایت وقصور لر مک عفوی باینده ابدال عاطفت  
 بیورملرینی رجا و سلطان سلیم ثانینک : [ یوز کدن زلفی  
 سور کشف حجاب ایت . جمالك مهر و ماهن بی سحاب  
 ایت ] مطلع علی غزل عاشقانه سنه یازدیغم نظیره آتیه نک  
 تصحیحی تمنا ایدرم. هر حالده امر و اراده اقدمز کدر:

داروب بر آستانه انتساب ایت

ماله افوار عرفانه اکتساب ایت

میتقار دلمره قیود ماسوالی

انا الحق سرینی کشفه کتاب ایت

مکرمک ابیسوره مهر جهرانتاب

کوزللمر ایچره برمه انتحاب ایت

مکروب یمانه سرشاری عشقی

کوکل معصومه سن مست و ضراب ایت

نه وار سه دلمه کشف ایت یاره وصفی  
بوزک سور یانه ترک هجواب ایت

~~~~~

— ۴۱ —

رکاب قمر تاب حضرت مهر فتیناهی

جناب خداوند بیچون یکانه سرمایه سعادت اولان  
سایه مرحمتوایه حضرت خلافتیناهیله فرقی عبودیت مزدن  
بر آن دورایتمیوب کعبه الاشفاق اولان قلب پاک ملوکانه لری  
انوار سرور ايله مشحون بیورسون آمین .

مسلم عالم اولان شفقت معالی منقبت جناب شهریاریلری  
بتون جهانه شامل و باخصوص ظل ظلیل تاجداریلرنده  
بولمغله مفتخر بالجمله تبعه و بندگان سلطنت سنیه لری  
اسعاده کافل اولوب کبار و صفار دعوات خیر آیات  
شاهانه لریله تزیین لسان عبودیت ایتکده اولدقلری کی  
قوللری دخی طریق فیض رفیق رقیته قصور ایتمه مک  
بذل مقدرت ايله هر بار دعای واجب الادای ولی نعمت  
اعظمیلرینی رفع بارگاه پروردکار ایدهرک دمکذار اولمقدمه



ایسه مده ضیق معیشت، عبدا صدقلرینی پایمال خیول ضرورت  
ایلمکده اولدیغندن ملتجای بی چارکان اولان آستان  
مرحمت بنیان جهان بنایلرینه کمال ابتهال ایله دخالت و حال  
کترانه مه مناسب بر مأموریته تعیین اولنه رق احیا بیورلمقلغم  
خصوصنی استرحامه مشابرت قیلندی.

— ۴۲ —

معروض چا کرانه مدر

محل مأموریت والالرینه — کمال عافیت وسعادتله —  
واصل اولدقلرینه دائر پدر عالی کهر ولی نعمتیلرینه  
وارد اولان مواصلتنامه سامیلرندن حاصل ایتدیکم مسرت  
جانخشانیك درجه سنی بحق تعریف ایده شم. یکانه سرمایه  
افتخارم خاکی پای مکارم احتوای فضائل پروریلرینه اولان  
انتساب عیدانه م اولدیغنی شرح و بیانه حاجت اولمامغله  
انفاس حیاتییه می دوام و ازدیاد عمر و اقبال کریمانه لری  
دعای بی ریاسنه صرف ایلمکده بولندیغمک عرضنه مبادرت  
و توجهات فیض غایات کرامیلرینک بقا و توافری نیازینه  
مسارعت قیلندی. اول باده

— ۴۳ —

معروض داعیانہ مدر

برات سعادت اطلاقه سزا اولان التفات نامہ ادیبانہ لری  
 حلول نوروز ایله برابر و اصل دست اعزاز اولدی.  
 طرز تحریر نده کی نزاہتی بیاندن زبان ناطقہ قاصر و لطائف  
 فحوا یسنی بحق ادرا کدن قوہ عاقله عاجز در:

نه کلکمه يافتم جهان به خسته فیضی

که با جهانم جو شیر و شکر آمیخت

خوشاغلی که از روی ایبه رطب ضامت

خوشاغلی که از روی ایبه نحر ریخت

خامه عاجزینک بونامه بلاغت علامه یه قارشی حرکت

محالی اولدیغندن زیور لسان اخلاص اولان دعای

فیض، اتمای فاضلانہ لرینی بو وسیله ایله ده تکرار ایتمش

اولدیغمنک عرضنه مبادرت و حق مستمندانه مده آرایش

ساحه عاطفت اولان حسن توجه کرم پروریلرینک

ایذالی خصوصنی رجایه مسارعیت ایله طی طومار گفتاره

مجبور اولدم.



— ع ع —

معروض داعی صدق پرور لیدر

کوکلارک بر برینه اولان انجذاب و ارتباطی درجه قصوای  
کماله ایرشمش اولدیغندن و بویله بر محبت کامله نك رسمی  
سوزلرله تجدید و تأییده احتیاجی اولمیه جفی بدیهی  
بولندیغندن یالکز آ کا نائلیتله مفتخر اولدیغمی عرض ایله  
اکتفا ایلم .

عید اضحادن برایکی کون اول ولی نعمت افندمزك حق  
عالیله رنده پك کوزل بر رؤیای صادقه کورمش و بونك  
عینیه ظهورینی جناب حقندن تمنی ایتمکده بولنش ایدم .  
بو کونلرده ایسه مششار الیه افندمز حضرتلرینك بالجمله  
ارباب فضلی مسرور ایده جك صورتده مقام صدارته  
شربخش اولق اوزره بولندقلرینی استبشار ایلم . بو خبر  
سعادت اثرک عاجزلرنجه نه مرتبه باعث شوق و شادی  
اولدیغنی او مسرتك قلب عالیکزده کی عیننی کورمکله پك  
قولای تقدیر و موازنه بیوره جککزدن امین اولدیغجهتله  
اطناب کلامه لزوم کورمم . ان شاء الله مقام صدارتک اوپله  
بر شرف عظیمه جلوه کاه اولدیغنی کوره رک بالجمله داعیان

دولتلیله برابر عید اکبر ایدرز . اقدمزك مقام صدارته  
 شرف وقوعنده اول باول طرف عیدانه مدن دخی دامن  
 معالی پیرامن دولتلینك تقیلنه وعافیت وجود عالمسودلری  
 تبشیراتنك صوب عاجزی به سرعت ایصالنه بذل همتاه  
 برادرلك، قیو یولداشلق وظیفه سنك حسن اجرایی شمیدیلك  
 واقع اوله جق استرحاماتك اك برنجیسیدر . هر حالده  
 لطف و اراده برادرم اقدم حصر تلینكدر .

— ۴۵ —

جناب خداوند جهان تقدست ذاته عن الشیبه والنقصان  
 پادشاه مراحم کستر و شهنشاہ مکارم پرور آب اشق وارحم  
 ولی نعمت اقدس واعظم اقدمز حضرتلرینی مادام القمران  
 سریر شوکت مصیر ملوکانه لرنده کمال عافیت واجلال ایله  
 کامران بیورسون آمین .

افراد عائله داعیانهم ایله روز شب ادعیه توافر عمر  
 و اقبال حضرت ظل الہیلرینه مواظبتی باعث سعادت دارین  
 بیلن عبدکترلری فی ۱۷ شوال سنه ۱۲۸۱ تاریخنده طریق  
 نیابتہ دخالت و شمعی به قدر وظائف داعیانهمی دلخواه



عالی وجه ایله حسن ایفایه صرف مقدرت ایلیمش اولدیغم  
 حالدده بر مولویت احسانیه امثال عیدانه م مثللی هنوز  
 بکام بیورلیمش اولدیغمه واختیار و بی اقتدار اولان ابوین  
 وعائله می اعاشه مجبوریتنده بولمغله برابر ضرورتیم شفقت  
 معالی منقبت عجزه پروریلرینی جلب ایده جک درجه ده  
 اشد بولندیغنه واحقرلری کبی کمال صداقت واستقامتله  
 ایفای حسن خدمته بذل وجود ایدن بر داعی صادق  
 دوام ضرورتی نزد مراحم وفد جناب خلافتیناهیلرنده  
 تجویز ایدلمیه جکی مسلم یارواغیار اولدیغنه استناد ابر مولویت  
 احسانیه چراغ بیورلمقلغم خصوصنی دارالامان بی چارکان  
 اولان آستان کرامت بنیان ملکداریلرینه وضع جیین  
 عبودیت ایده رک استرحام ایلرم . هر حالده امر وفرمان  
 وعنایت بی پایان شوکتلو قدرتلو شهریار عالمیناه وتاجدار  
 مرحمت اکتناه افندمن حضرتلرینکدر .

— ۴۶ —

معروض داعی دیرینه لریدر

کترلری سایه فیضوایه شهریاریده معلمخانه نوایدن

با شهادتنامه خروج ایدوب فلان و فلان و فلان قضالری  
نیابتلرنده شرع شریفه و قانون منیفه توفیق حرکتله  
خشنودی عمومی قازانمش اولدیغمه ید عاجزانه مده کی  
حسن حال مضبطه لری شهادت ایتمکده اولدیغندن و برسنه  
مقدم قونیہ ولایت جلیله سندن خدمات حسنه مه مکافات  
بر لطف مخصوص ایله تلطیف بیورلمقلم خاکی پای مکارم  
احتوای جناب فتوایناهی لرندن استرحام قیلنمش ایسه ده  
هنوز بر ثمره سی کوریه مدیکندن و حال بوکه دلخواه عالی  
اوزره حرکت ایدوب ادعیه خیریه حضرت خلافتیناهی به  
بذل مقدرت ایلینلرک تسریری خصوص سنده هم علیه  
ولی النعمیلری رایکان بولندیغندن بر قطعه استانبول رؤسی  
احسانیه چراغ بیورلمقلمی استرحامه متجاسر اولدم .  
هر حالده امر و فرمان حضرت ولی الامر کدر

— ۴۷ —

ولی نعمتم افندم حضرتلری

امتحانلریمز ایلولک اون سکزنجی کونی ختام بولوب

تالنه دن شهادتنامه اخذینه موفق اولدیغمی تبشیر ایدرم .



خروج امتحانی سائر امتحانلره بکزه میور . یکر می  
کشی یه تفوق ایدوب نالشی قازانق ایجه بر معرفت  
اولدیغنی اثباته حاجت یوقدر ظن ایدرم .

شریکلرمک اکثریسی تدریس ایله مشغول ارباب  
فضل و ذکادن اولدیغنی و بونلرک الندن نالشی قورتارمق  
پک مشکل بولندیغنی حالدده بونعمته نائلیم ظاهرأ ، شریکلرم  
کی کتابته بی قیدانه باقمیوب سمند خامه بی میدان وسیع  
قرطاسده خیلی یوره رق ایجه بر مهارت کسب ایدیشمدن ،  
باطناده دعوات فیض غایات پدرانلرینک هدف اجابته مقرون  
بولنشندن ایلری کلش اولدیغنده شبهه یوقدر .

کله جک جمعه کونی حرکت ایدم جک اولان اداره  
مخصوصه نک . . . واپوریه او طرفه کله جکمی عرض ایدر  
و کال تعظیم ایله مبارک اللریکزدن اوپرم .

.....

— ۴۸ —

افندمن !

هر سطر می مبشر اخوت اولان احساننامه و فاشعاریلری  
آرایش هامة اجمال اولدی ، خیلی زماندن بری یازده آلام  
حسرت اولان کوکلم انوار مسرتله طولدی .

بو بایده عهده ناچیزانه مه ترتب ایدن لازمه تشکری  
 کمالیه ایفا ایدمه جکمدن قصور مک عفوینی کمال خلوص بال  
 ایله دیلرم ، مع مافیه حق عاجزانه مده لمعه نثار اولان  
 حسن توجه عرفانپناهیلرینک ازدیادینی مجبول اولدقلری  
 خصلت نخبیه کریمانه لرینه استناداً تمنی ایلرم . باقی کاشانه  
 عافیت واقبالده برقرار اول قارداشم .

.....

— ۴۹ —

خاک پای سامی حضرت مشیختپناهی یه

معروض بنده دیرینه لریدرکه

خاک پای ناصیه پیرای جناب ولی النعمیلرینه اولان قدم  
 عبودیتیم اقتضاسیجه آره صیره تصدیعه متجاسر اولدیغیم  
 کی بوکرده کچن سنه معلمخانه نوایدن چیقوب هنوز  
 عهده سنه بر قضانیاتی احسان بیورلماش اولان فلان افندی  
 داعیلری بنده کمینه لرینه متعلق اولدیغی و کندیسسی افتد مرک  
 حسن توجه دولترینی جلبه مقتدر اصحاب درایت  
 واستقامتدن بولندیغی جهته فلان قضا نیایتنک لطفاً



افندی موما الیه داعیلرینه عنایت بیورلمسی خصوصنی  
استرحامه اجترا و بو وسیله ایله حق چا کرانه مده هر بار  
ساحه آرای افتخار اولان حسن نظر فیض اثر حضرت  
مشیختینا هیلرینک بقا و تزدینی استدعا ایلرم . هر حالده  
امر و فرمان ولی نعمت، معالی منقبت افندمن حضرت تلرینکدره .

////////////////////

— ۵۵ —

عزیزم !

حلبه وصولکزی مبشر اولان مکتوبکزی متعاقب  
بر مکتوبکز دهـا وارد اولدی ، بیت دلم مانند حجله گاه  
انوار شادمانی ایله طولدی .

بونده حلبک آب و هوا سیله امتزاج ایدوب کمال استراحتله  
وقت کچیرمکده اولدیغکزی یازیور ، بنم سزه هنوز بر مکتوب  
کوندردیمکدن طولاییده شکایت ایدیورسکز .

حلبدن خوشلانوب کمال عافیتله اصرار اوقات ایتمکده  
اولدیغکزه ممنون اولدم ، مکتوب کوندردمک دیه ایدیلن  
شکایتی بر آز یولسز بولدم .

حلبه موصلتکزی مشعر اولان مکتوبکزک جوابی

تشرین ثانینک سکزنجی جمعه ایرتسی کونی پوستهیه  
ویرلدیکندن هنوز دست عالیکزه واصل اوله مامشدر ظن  
ایدرم، مع مافییه بو بایده کی قصورمک کمال صفوت قلب ایله  
عفوینی دیلرم .

مکتوبکزک یکدیگرینی تعقیباً تواردی فوق العاده  
موجب منتداری اولیور، مباهاتم ایسه صوک درجه بی  
بولیور. پدر و برادر عرض تحیات ایدرلر، مخدوم بنده.  
لریکزده مبارک اللریکزدن اوپرلر.

### — ۵۹ —

معروض داعی دیرینه لریدر.

مقام معلاى مشیخت اسلامیه یه شرفیخش اقبال  
اولدقلری کوندن بری بالجمله داعیان حقنده ابذل بیوریله  
کلن عواطف جلیله ولی النعمیلرندن کمتلری ده بهره دار  
اولوب بونک فریضه تشکری بحق ایفادن عاجز ایسه مده  
دعوات خیر آیات حضرت فتواپناهیلریله تزیین لسان  
مصادقت ایتمکدن خدا علیم بر آن خالی قالمیورم.  
آستان سعادت بنیان دولترینه وضع جین عبودیت



ایله مفتخر بولنان عبداحقرلری حقنده عنایات جناب  
 مشیختپناهیلرینک دریغ بیورلماسی و عاجزلری کبی بی  
 وایکانک قصورلرینه باقلمامسی آره صیره تصدیعه جسارت  
 ویردیکندن کچن سنه حضور هایون درس شریفی مخاطبلغنه  
 قید و قبولم خصوصی استرحام ایدلمش و حسب الایجاب  
 خصوص مذکور بو سنه یه تعلیق بیورلمش اولدیغندن  
 هر نه قدر کستاخلق ایسه ده مهم امورایله مشغول بولنان  
 خاطر دولترلندن شو لطف موعودک حیقمش اولق  
 قورقوسیه بو ورقبارء عیدانه مک خاک پای امل پیرای  
 حضرت ولی النعمیلرینه تقدیمه متجاسر اولدم. هر حاله  
 لطف و عروت حضرت ولی نعمت اقدام کدره.

— ۵۲ —

فضیلتو اقدام حضرتلری

انامل آرای تکریم اولان فی ۲۸ تشرین ثانی سنه  
 ۳۱۳ تاریخلی احساننامه و فاعلامه لری مال لطف اشتهالندن  
 استدال و استبشار اولندیغی اوزره عاجزلری مهجور  
 خاطر فضیلت بیورلماش اولدیغمی تبشیره راجرای رسم

تسعیده مصروف بیوریلان همم علیہ حقیقت شعاریلرینه  
 تشکرات فائقه عرضیلہ برابر بقاسنده شہم اولیان توجہات  
 فیض آیات کریمانہ لری آثار جمیلہ سنی بعدما دخی کورمک  
 آرزوسنده بولندیغمی آوردہ زبان مخالصت و شمدیلک  
 بوقدرلہ ختم رسالہ محبت ایلرم. ہر حالہ لطف واحسان  
 اقدام حضر تلرینکدر.

— ۵۳ —

عطو قتلو اقدام حضر تلری

مودوع فطرت عالیہ لری اولان کفایت مغبوطہ مسلمہ لری  
 مقتضیات طبعیہ سندن اولدیغی و بناءً علیہ منتظر بولندیغی وجہ  
 ایلہ بوکرہ رتبہ بالا اسباب نادرہ عز و شرف خصافتیناھیلرینہ  
 انضمام ایلہ کسب فخر واعتلا ایلدیکی مع الافتخار استخبار  
 واستبشار قیلندیغندن تبریک وسیلہ جمیلہ سیلہ مشہود چشم  
 مباهات اولہ حق مآثر لطفیہ سنی سرمایہ تأمین استقبال  
 بیلدیکم محاسن توجہات فیض آور رافتکستریلرینک حق  
 عاجزانہ مدد استمرار و ازدیادی تمنیات معتادہ سنی توافر  
 حسن اقبال عاطفت شعاریلری دعای واجب الاداسنہ  
 تردیف ایلہ ختم کلام ایلرم. اول بایدہ



— ۵۴ —

حضرت !

هر بار آرایش آسمان افتخار اولان نیز حسن توجه  
عالیرینک پارلاق بر دلیل جدیدی اولان التفاتنامه کرم  
شعاریلری هامة پیرای تکریم اولدی .

آیین بهین رقیتمه اولان قصورلر مه عطف نظر مسامحه  
ایله حق داعیانهمده التفات فیض آیات عرفانیه ایلرینی  
ابذل خصوصنده کی عاطفت عالیجنابانه لرینه قارشی :

« ائیم معترفه مرحمت مروتدر »

دیمکدن باشقه بر سوز بوله میوب دار الامان مرحمتلرینه  
کمال ابتهال ایله دخالتیه مجبور اولدم . هر حالده لطف  
ومروت افتدمن کدر .

.....

— ۵۵ —

معروض داعی دیرینه لریدر

مدار افتخار داعیانهم اولان انظار مکارم دثار حضرت  
مفتی الانامیلرینک هیچ بروجه ایله پذیرای انخطاط اولمیه حق

درجه ده بولندیغنی ربع عصر دن زیاده زماندن بری  
 کورمکده اولدیغ الطاف جهان مطاف ولی النعمیلرندن  
 استدلال و تیقن ایتمش اولدیغمه واکرچه بوکره عدلیه  
 نظارت جلیله سنک تنسیبی اوزره قونیه ولایتی استیناف  
 محکمه سی ریاستی عهدۀ عاجزانه مه تودیغ بیورلمش ایسه ده  
 بوصورت دامن عاطفت پیرامن فتواپناهیلرینه پیوسته لکله  
 مباهی بولنان دست عبودیتی فک ایده میسه جکی بدیهی  
 بولندیغنه مبنی شیمه توجّه شعاری جناب شیخ الاسامیلرندن  
 همیشه حصه مند مفخرت بیوریه جفمدن امین بولندیغنی  
 عرض و بیانہ جرأت ایلرم .

— ۵۶ —

سماحتلو اقدام حضرتلری

فضیلت مسامحه فوق العاده لرینک بر اثر نوبی اولمق اوزره  
 مجلس تدقیقات شرعیه نک ریاست علیہ کفایتمندانه لریله  
 مشرف اولدیغی غزته لرده منظور عین ممنونیت و افتخار  
 اولمش و نام عالی کالات پروریلرینک ستون توجیهاتده اسم  
 عاجزانه مله زانو بزانو کورلمسی ایسه درجه عالی سنی تذکاره



حاجت اولیان هوانست دیرینه یکجهتانه مزی برقات دها  
 تأیید واعلان ایدر یولده پک کوزل بر تصادف بولمش  
 اولسیله تقدیم تبریکی ذریعه جمیله اتخاذا ایدرک استدعای  
 بقاسی طرزنده اداره کلامه احتیاج کورمدیکم توجهات  
 قویه کر مشعاریلرینک دائماً مفتخر و منتداری بولندیغمک  
 عرض و بیانیله غلبه شوق تلاقی بی تعدیل و ترقی اقبال  
 برادر اکر میلی دعاای خالصانه سیله عریضه مخصوصه  
 اخلاصمندانه می تکمیل ایلرم. اول بابده

.....

### — ۵۷ —

ساحتلو افندم حضر تلی

محکمه تمیز ریاست جلیله سی خاک پای عدالت پیرای  
 فاضلانیه لریله کسب شرف ایلدیکی استخبار ایدلدیکندن  
 بحسب العبودیه ادای وحیه رسم تبریکه عاجزانه مبادرت  
 و حصول حسن موفقیت منعمانه لرینک دعاسنی رفع بارگاه  
 احدیت ایتمش اولدیغمک عرض و بیانیله تردیفاً حق  
 داعیانیه مده کی توجهات عرفانیه لرینک دوام و تزییدی  
 استدعاسنه مبادرت قیلندی. هر حالده

.....

— ۵۸ —

سعادتمندم افندم حضر تتری

شرفبخش دست تعظیم اولان احساننامه ادیبانه لرنده  
 ابذال بیوریلان درر توجہات کرم پروریلر یله بیت دلمده  
 فروزان اولان انوار احتیاسات مسرورانہ بی بحق تصویر،  
 نیکارش خامه اعجاز کارانه لرینه بتون بدایع پرستانی خیران  
 ایدن بلغانک بیلہ اقتداری فوقدہ اولوب داعیلری کبی  
 ساحه قرطاسی تسوید ایتمکدن باشقه بر معرفتی اولمیان  
 بی وایکانک ایسه بویابده کی عجزی آزاده کلفت تحریر در.  
 هر حالده یکانہ باعث مباحاتم اولان تحریرات مسعدت  
 آیات عرفانپناهی لرینک توالیسیله شرفیاب اولمقلغم خصوصی  
 اخص آمال ثناوری و آیین شکر گذاریده اولان قصورمه  
 باقلمیوب شو عریضه جفمک قبول بیوریلہ جفی مسلم یار واغیا  
 اولان خصال حمیده کرم کستریلری مقتضیاتندن بولندیغی  
 معلوم کتریدر .

— ۵۹ —

سماحتلو افندم حضر تتری

خاک پای مکارم احتوای منعمیلرینه اولان حرمت داعیانهم



افندمزدن کورمش اولدیغم احسان بی پایان کی کنجایش پذیر  
 دائرهٔ تعبیر اوله میه جفی معلوم اولدیغندن تطویل کلامه  
 حاجت کورملیوب یالکنز دعای دیوممت عافیت واقبال  
 سموحیلرینه مواظبت اوزره بولندیغکم عرض و بیانیه  
 اکتفا قیلندی .

— ۶۰ —

فضیلتو اقدام حضرتلری

فلان افندی داعیلریله ارسال بیوریلان « تلخیص  
 علم حقوق » عنوانلی اثر جلیل، آرایش دست تجیل اولدی.  
 مندرجات فضیلت آیتی حقنده تقدیر کونه برشی یازمقلغم  
 خدمت کات قات فوقنده اولمغله بو بابده اجالهٔ خامه دن  
 صرف نظر فقط حق عاجزانه مده دوام حسن توجه  
 فاضلانهرینک دلیل علنیسی اولان بو احسان بی عدیه  
 قارشی لازمهٔ تشکری بحق ادادن عجزمی اعتراف ایله  
 دعای ازدیاد عمر واقبال نحریرانه لرینه مواظبت اوزره  
 بولمقده اولدیغمی عرض ایدرم . هر حالده

— ۶۱ —

معروض داعی دیرینه لریدر

جناب خداوند بی زوال ذات مکارم آیات ولی النعمیلرینی  
 الطاف جهان مطاف حضرت شهریار اعظمی به مظهریتله  
 الی یوم القیام مسرور البال بیورسون آمین  
 مقام مشیخت علیایه سایه بخش اقبال اولدقلری  
 کوندن بری آستان مرحمت بنیان دولترینه مراجعت ایدن  
 ارباب حاجاتک تسریر قلوب منکسرهلری ایچون صرف  
 تقدینہ التفات بیوریله کلدیکنی بیلدیکم ایچون اوز سنه مقدم  
 همت معالی منقبت کرم کستریلریله . . . راده سنه گلش اولان  
 رؤس عاجزانه مک برقاچ راده ترفیعیه بر مقدار معاش احسان  
 بیورلمسی استرحامی معرضنده خاک پای امل پیرای حضرت  
 فتواپناهیلرینه خط دستمله محرر اولان بو عرض حال  
 کترانه می تقدیمه متجاسر اولدم . قاطبه احوالده امر و فرمان  
 ولطف بی پایان ولی نعمت اقدامز حضر تلرینکدر .

— ۶۲ —

حضور عالی کرم کترلرینه رفع سلام وکال محبت



اعلام ایدلد کدن صکره حقسایق دیندن . مواجید اهل  
کشف و یقیندن بر قاج نکته نك عرضه اجتماسارا یلدم .  
بونلر ، اهل علم و عمله معرفت بخشا وریا و حیلله کارانه  
دهشت فرما اولمغله برابر جمله سی ده مقبول اولوالالباب  
و موافق حدیث و کتابدر .

اگرچه هنوز شیرازه بند کمال اولمدیغندن عقلت  
کمالاً شرفیاب نصاب استفاده اولمی بعیدایسه ده طرف  
ذی شرف کمالات پروریلرینه بر نمونه جك اولمق اوزره  
تقدیمی مناسب کوردیم .

نزد عالی فاضلانلرنده آرایش موقع قبول اوله جق  
اولورسه کنجینه خاطره بی کشاده قیله یم .

صحیفه ایامده ارباب دین و دولتك ناملری باقی اولدجه  
هامه دوستانده ظل ظلیل احسانلری ممدود اولسون . [\*]

— ۶۳ —

مکاتب رشديه مدیریت بهیه سنه

داعیلرینه دکرمدن بيك قات زیاده اهمیت ویریلهرک

[\*] منشآت جامیدن مترجمدر .

ذکور و انات مکتب رشدیله دارالمعلمانده اوقونان فارسی  
درسلرینه دائر اولان مطالعات عاجزانه مک عرض و اشعاری  
امر بیورلمش اولمغله بر وجه آتی شکسته و بسته تذبیرینه  
متجاسر اولدم :

مکتبلرده - ظن عاجزانه مه کوره - فارسی تدریسندن  
مقصد اصلی ، کتب ادبیه سی لایقوله آکلایه حق و آکلایه  
ده حق قدر ملکه حاصل اتمک دکل لسان عذب الیسان  
عثمانیده مستعمل کلمات و تعبیرات فارسیه و قوف پیدا  
ایتمکله برابر بر آز عبارده اوقویه بیلیمکدر .

بناء علیه مکتبلرده فارسینک قواعدینه دائر اوقونه حق  
بر کتابده هر قاعده اوزون اوزادی به بسط و تمهید اولنمیوب  
ترجه کجلملی و یالکز لسانمزده مستعمل اولان قواعد  
وضوابط تفصیلات لازمه سیله بولنمیدر .

الده اولان قواعد کتابلری ایسه بر طاقم رطب و یابس  
تفصیلاتی حاوی بولنمغله بونلری تدریس اضاعه اوقات  
دیمک اوله جغندن هم درسجه عبارده اوقومغه یاردمی اولور ،  
هم ده لسان عثمانیده قوللانیلان بالجمله ضوابط فارسیه یی  
اوکره در ، درجه درجه کتابلر ترتیب اولنه رقی او کتابلرک  
تدریسی لازمه دندر .



شونئی ده عرض ایدیم که عبارتیه آالشق ایچون  
قواعدکده او قدر اهمیتی یوقدر . اصل بو خصوصه خدمت  
ایده جک شی منظوم ، منشور بر چوق عبارتیه او قومقدر .  
حکمی ، اخلاقی پارچه لری حاوی بر قاچ قرائت کتابی  
ترتیب ایددرک بو کتابلری یوزندن او قودوب مناسب  
پارچه لری ازی بر لملی و مشتمل اولدقلری لغتلردن لسان  
عثمانیده مستعمل اولانلرک معناری ایضاحات لازمه سیله  
بللیدرملی .

عرض ایتدیکم کتابلرک تألیف و ترتیبی بر خیلی وقته  
محتاج اولدیغندن بو سنه یه مخصوص اولمق اوزره رشدییه  
ایکنجی سنه شاگردانیله اناث رشدییه مکتبی طالباتنه  
هفته ده بر دفعه « مختصر اصول فارسی » ایله ایکی اوج  
درسده بر یدی سکز سطرلی تجاوز اتمه مک اوزره منظوم  
اولسون ، منشور اولسون مناسب بر عبارتیه یازدیروب  
اوقوتملی و عبارتیه مذ کوره شاگردان و طالبات طرفندن  
بر دفتره کوزلجه قید ایدملی .

رشدییه اوچنچی سنه شاگردانیله اناث رشدییه مکتبی  
آلتنجی سنه طالباتنه کتاب مذکور مختصراً تکرار  
ایتدیله رک کستاندن بر خیلی پارچه اوقوتملی و اوقونان

پارچه لردن مناسب مقدارينك معناسنى بالمتملى .  
 دارالمعلمات برنجى سنه سنده ايسه مكملأ «اصول فارسى»  
 ايكنجى سنه سنده ايسه كتاب مذكور مختصراً تكرار  
 ايتديريلهرك زبده كلستاندن مقدار مناسب محلى تدريس  
 ايدمللى .

اوچنجى سنه سنده ايسه زبده كلستاندن ايكنجى سنه ده  
 اوقونان محلك مكملأ تكراريله منظوم ، منشور مناسب  
 پارچه لر يازديريلهرق بونلردن بعضيلرى ترجمه ايتديريلوب  
 بعضيلرى از برلتديرمللى . هر حالده امر و اراده افندمز كدر .

فى ۱ حزينان سنه ۳۱۲

— ۶۴ —

مكاتب رشديه مديريت عليه سنه

عزتلو افندم

كچن سنه اولدينى كچي بو سنه ده امتحان عموميه لسان  
 عثمانى ممیزی تعيين بيورلمش اولديغمدن اخطارينى وظيفه  
 ذمت بيلديكم مشاهدات ومطالبات عاجزانه مك شكسته  
 وبسته بروجه زير تذييرينه مسارعت ايلدم :



مکاتب رشديه ده لسان عثمانی به دائر تدریس قیلان  
 دوسلر مطلوب عالی وجه ایله دکلدر . هله تحریراً افاده  
 مرام خصوصی مفقود کیدر . برنجی ، ایکنجی سنه  
 شاگردانک املالری ده شایان تقدیر بر درجه ده کور یله مدی .  
 رشديه برنجی سنه یه یالکیز ترکیه نك - بین الادبا  
 معتبر اولان - قواعدینی حاوی بر کتاب اوقوتدرملی ،  
 بو کتابده هر قاعده ختامنده متعدد ویکدیگر نندن اوزونجه  
 تمرینلر بولندرملی .

رشديه ایکنجی سنه یه ده بو کتابک حاوی اولدینی  
 مسائل ایله برابر لسان عثمانیده مستعمل قواعد وادوات  
 عربیه و فارسیه بی مشتمل بر کتاب تدریس قیلنملی ، بو کتابده ده  
 کذلک هر قاعده نك ختامنده متعدد ویکدیگر نندن اوزون  
 تمرینات اولملی .

رشديه اوچنجی سنه ده دخی لسان عثمانیده مستعمل  
 تراکیب ناقصه و تامة ایله اصول تحلیلی متضمن بر کتاب  
 اوقوتملی ، بو کتابده دخی تمرین اوله رق هر بحثک ختامی  
 مفصلجه مقالات مفیده ایله تزین ایدملی .

کتب مذکوریه - شاگردانک ذهنلری تشویش  
 ایدلمه مک ایچون - صیغ وادوات مهجوره ایله بونلره دائر  
 قواعد درج ایدلمه ملی .

کتابته الشفق ایچونده راساً اوفاق اوفاق فقره لر قلمه  
 آلدرملی . بو صورت ( تذکره ، عرضحال ، مکتوب )  
 مسوده سی یازدیروب از بر لتمکدن دها فائده لیدرظن ایدرم .  
 یالکیز رشديه اوچنجی سنه شاگردانه بویله فقره لر  
 قلمه آلدرمقوله برابر بش ، اون دانه ده غایت بسیط  
 ( تذکره ، عرضحال ، مکتوب ) مسوده لری ارانه سیله  
 القاب رسمیه یی کوزلجه بلتملی .

شو اوچ کتابده کی تمرینات ایله بونلره قیاساً معلمین  
 طرفندن یازدیریله جق امثله نك حاوی اولدیغی لغات و تعیراتك  
 معنالی قاموس و برهانه مراجعتله دکل ترکیجه ده حائز  
 اولدقلری معانی به نظراً تفسیر ایدملی .

شاگردانك لغت بللمسی ایچونده بوندن کوزل  
 صورت اوله ماز .

مطالبات مسروده نك هر نه قدر دگری یوقسه ده  
 اساسی وفائده لی بر اصولك وضع رحله تدریس اولسنه  
 سبب اولور ملاحظه سیله شو ورقبارهی نظرگاه دقیقه  
 داینلرینه تقدیمه متجاسر اولدم . هر حالده امر و اراده  
 اقدمز کدر .  
 فی ۲۲ تموز سنه ۱۳۱۱



— ۶۵ —

خاك پای سعادت احتوای سامیلرینه

سعادتلو اقدام حضر تتری

چوقدن بری بر احساننامه والالرینی آله مدم .  
 ذات خجسته صفات کریمانه لرینک پک چوق التفات مکارم غایات  
 منعمانه لرینی کورمش بنده حلقه بکوش سامیلری اولدیفمدن  
 هر وقت حسن نظر فیض اثر کرامیلرینه مظهر بیورمق لغمی تمی  
 ایدرم . تشریف ایدن لیلۀ مبارکۀ ولادت محمدیه نک ایفای  
 رسم تبریکنه مسارعت و بویله نیجه نیجه لیالی مبارکۀیه ادراک  
 ایلملری دعاسنی او شب مقدسده ایصال بارگاه حضرت  
 پروردگار ایلدیکمک عرضنه مبادرت قیلندی .

////////////////

— ۶۶ —

داعی لطف شرمنده لریدر

فرماننامه عالی حضرت ولی نعمت اعظمیلری سایه بخش  
 فرق عبودیت و مفخرت اولمغله دعای فرونی عافیت

ودولتلى حوصله تعریفه صیغمز بر مسرت وشکران آمیز  
ایله رفع قبولخانه جناب پروردگار قیلندی .  
عبودیت خالصه فوق العاده لرندن غیرى النده سرمایه  
افتخار دینیه جک بر شی بولنمیان داعی خالصلرینک اغر  
مقاصد عیدانهم اوتهدن برى خدمت میمنت آیت فتوا  
پناهیلرینه وقف وجود ایتک قضیه سی اولدیغنی عرض ایله  
توجهات مفخرت آیات مروت پروریلرینک بقا وازدیادی  
خصوصنی کمال ابتهال ایله استرحام ایلرم . هر حالده

— ۶۷ —

معروض داعی دیرینه لریدر

استجلاب دعوات خیر آیات حضرت قنواپناهیلرینی  
موجب اوله جق صورتده امور عبادک فصل وحسمه بذل  
مقدرت ایتمکه برابر وسیله جمیله دوشدکجه عرض عبودیت  
مسارعت ایلیمکده اولدیغم کبی بوکردهده حلول ایدن سال  
فرخنده فال جدیدک ایفای رسم تبریکنی نعم الذریعه عد  
ایده رک تحکیم بنیان رقیته متجاسر اولدم .  
هر آن جناب آفریننده اعصاره سایه آسانپایه حضرت



خلافتینا هیده ذات کریم الصفات جناب ولی النعمیلرینی مقام  
معلائی مشیختده الی قیام الساعه برقرار و بویله نیجه نیجه  
سنه لره ادراک ایله کامکار بیورسون درود مسعودینی رفع  
کنکرة آسمان ایتمکده اولدیغیمک بیاننه اردافاً محتاجی  
بولندیغم حسن نظر فیض اثر عاطفت کستریلرینک ابدالی  
خصوصی خاصه استرحام ایلرم . اول بایده و هر حالده  
امرو فرمان حضرت ولی الامر اقدمز کدر .

— ۶۸ —

شوکتیاب مرحمت نصاب اقدمز حضرتلرینک  
سایه سعادت سرمایه خلافتینا هیلرنده مکتب نوابدن  
شهادتنامه اخذینه موفق اولوب تحت القلعه محکمه شرعیه سی  
نیابتنه تعیین اولندیغمدن اولاد و عیال عیدانه مله کیجه  
کوندوز دعای دوام عمر و عافیت جهان قیمت خسروانه لرینی  
رفع بارگاه جناب رب عزت و وظیفه مودوعه داعیانهمی  
دلخواه عالی اوزره ایضا ایدهرک استجواب دعوات  
خیریت آیات شهریاریلرینه صرف مقدرت ایتمکده اولدیغیمک  
عرضیله مقبری کرپی ، قایم پاشا نایلری کی قولارینکده

تحت القلعه نیابتده صورت دائمه ده بولمقلغم خصوصنه مساعده  
 جلیله ولی نعمت اعظمیلری سزاوار بیوریلهرق یکیدن  
 چراغ واحیا بیورلمقلغمی خاک پای شفقت احتوای تاجدا  
 ریلرینه وضع جبین عبودیت ایدهرک استرحام ایلرم .  
 اول باده وقاطبه احوالده امر وفرمان ولطف واحسان  
 شوکتلو قدرتلو ولی نعمت بی متمیز وپادشاه معالی منقبت  
 افندمن حضر تلرینکدر .

=====

— ۶۹ —

سماحتلو افندم حضر تلری

دلالت علیه عاطفت کستریلرینی جلب ایدهرک هیچ  
 بر دکریم اولمدیغی حالده . . . پایه رفیغه نائلیم هم سامیه  
 حقوق پروریلری جمله جمیله سندن اولدیغنده قطعا شهیم  
 اولمدیغندن خاک پای جبهه پیرای سمو حیلرینه تقدیم کلدسته  
 شکرانه متجاسر اولدم .

هر حالده مدار فیض وسعادت اولان حسن نظر فیض  
 اثر کرامیلرینک حق ناحیزانه مدد دوام وازدیادی تمنی  
 مخصوصیله تزايد عمر وعافیت جناب ولی نعمتیلری دعای



واجب الاداسنی رفع بارگاه احدیت ایتمکده اولادینمک عرض  
وبیاننه مشارت قیلندی .

\*\*\*\*\*

— ۷۰ —

معروض داعی شاکر الاحسانلریدر

حسن توجه سمو حیلرینه مظهریت، داعیلری ایچون  
ناقابل شکران بر نعمتدر . وسائل جمیله دوشدجه بونعمتک  
ازدیادینی تمنی به جسارتیاب اولدیغم کبی لیلۀ مبارکۀ ولادت  
احمدیهنک شرف حلولنی نعم الذریعه عدایدۀ انظار  
محاسن دنار کرمکاریلرینک حق عاجزانهمده بقا و تزیادی  
استدعاسنه محاسرت وجناب رب العالمین آرایش تخت عثمانی  
غازی عبدالحمید خان بی مدانی اقدمن حضر تلرینی مقام  
مقدس خلافتده مکن وذات کالات سمات فاضلانہ لری کبی  
لیاقت کامله اصحابنی سایۀ سعادت سرمایۀ ملوکانه لرندۀ نائل  
التفات ولی النعمی ایدۀ رک کامین بیورسون درود مسعودینه  
اردافاً لیلۀ مذکورہنک ایفای رسم تبریکنه مسارعت ایلرم .

\*\*\*\*\*

— ۷۱ —

سعادتلو اقدم حضر تلری

فلان یرده او یله بر غائله لی بر زمانده که کندمده آثار

بختیاریدن بر شی آراسه م یالکز شرف صحبت ادیبانه لرینه  
 نائلیتمی بولورو آنکه متسلی اولور ایدم. مقتضای جهان دیدکی  
 واصلت علیه لری اولق اوزره کوسترمش اولدقلری حسن  
 رفاقت کوکلی کر چکدن جذب ایتمش بولندیغندن یاد جمیل  
 شریف، همیشه قلب واساعله الیف اولدیغی حلاله بوکره  
 انامل آرای تکریم اولان فی ۱۹ تشرین ثانی سنه ۳۱۱  
 تاریخی تبریکنامه کریمانه لری مال لطف اشتهالندن دخی  
 استدلال اولندیغی وجه ایله مهجور خاطر سامیلری  
 بیورلماش اولدیغی تبشیره واجرای رسم تسعیده مصروف  
 بیوریلان هم علیه حقیقت شعاریلرینه تشکرات فائقه  
 عرضنه مسارعت و بقاسنده شههم اولمیان توجهات فیض آیات  
 داور اکر میلرینک آثار جمیله سنی بعدما دخی کورمک  
 آرزوسنده بولندیغی آورده زبان مخالصت ایلم .

— ۷۲ —

معروض داعی دیرینه لریدرکه

خالکبای عدالت احتوای حضرت فتوایناهی لرینه فلانک  
 تشویقات غرضکارانه سیله اهالی طرفندن ارسال و تقدیم  
 قیلندیغی خبر آلدیغ شکایتنامه نك حق عیدانه مده جایگیر



اولان حسن توجه بنده پروریلرینه هیچ بر تأثیری اولمیه جغنه  
ایمانم بر کمال بولمقله برابر هر بار آرایش لسان عبودیم  
اولان دعای دوام عمر و اقبال جناب ولی النعمیلرینی کمال  
اخلاص ایله ترتیل و مبارک دامن شیخ الاسلامیلرینی  
تعظیبات لایقه ایله تقییل ایدهرک مرحمت معالی منقبت جناب  
مشیختیناهیلرینه دخالتیه مجبور اولدم . هرلده

— ۷۳ —

معروض داعی دیرینه لریدرکه

کمتلری دعای دوام عمر و اقبال ولی النعمیلرینه  
دمکذار اولوب شمدییه قدر خاک پای مکارم احتوای  
بنده پروریلرینی تصدیع ایتمکی هیچ بر زمان تجویز  
ایتمدیکمدن ومدت نیابت عاجزانهم او کمزده کی کانون اولک  
برنجی کونی منقضى اوله جفی و بورانک یوللرینک انتظا -  
مسزلنی ایله برابر قیشنک شدتی معلوم اولوب ختام مدتده  
چولق چوجق ایله عودت مشکلات عظیمه و مصارف کلیه بی  
انتاج ایده جکی و قابل تحمل اولمیان شو حاله مسلم اولان  
شفقت معالی منقبت حضرت شیخ الاسلامیلری هیچ بر  
وجه ایله راضی اولمیه جفی بدیهی بولند یغندن آلتی آیدها تعدید

مدته مساعده ايله دلسير عنايت بيور لمقلغم خصوصى استرحامه  
متجاسر اولدم. هر حالده امر و فرمان حضرت من له الامر كدر.

— ۷۴ —

سعادتلو افندم حضرتلری

مکتوبکزی آلام. همان اوراق قلمنه مراجعت ایتدم.  
استدعا نامه کز کیش، مجلس انتخابده حوال بیورلمش.  
مکتوبجی افندی حضرتلرینه ایسی آکلا تدم. تأسف ایتدیلم.  
بجایشکزی ایچون بذل همت ایده جکلیرنی وعد بیور دیلم.  
اعضادن فلان وفلان افندیلری ده کوردم. بونلرده برنجی  
شق قرار کیر اولمسنه چالیشه جقلم. بوایش دلخواه کز  
وجه ايله حصول پذیر اوله جق کبی کورینیور.

ایشک بر وفق مرام چهره کشا اولسی ایچون صرف  
مقدورت ایده جکمی پک ای بیلیرسکزی، بو بایده تأمینات  
ابرازینه حاجت مس ایتمز ظن ایدرم. ان شاء الله یقینده  
کوزل کوزل مرده لر تبلیغنه موفق اولورم. آخص آمالم  
حسن توجهکزی بقا و تزیایدیر.

— ۷۵ —

معروض داعی دیرینه لریدر

حین وداعده دکر مک قات قات فوقنده اوله ورق ابدال



بیوریلان التفات دلو ازانه نك نشو و سیله متاعب سفریه بی  
طویقمسزین محل مأموریت داعیانهم اولام . . . قضاسنه  
مواصلت ایلدم .

یکانه مدار افتخارم اولان حسن توجه جناب  
مشیختپناهیاری فرق سرمده سایه پاش اولدجه مودوع عهد  
کترانه اولان اموری حسن تسویه به موفق اوله جیم بدیهیدر .  
بو سعادتک وجیه تشکری ادا خصوصنده قطعاً  
تجویز تراخی اتمیه جکمک عرضنه ابتدا وحق عاجزانه مده  
رایکان بیوریلان حسن نظر فیض اثر ولی النعمیلرینک  
دوام وازدیادی دامن مکارم افشان حضرت فتواپناهیاری  
کمال تعظیم ایله تقیل ایدرک تمنا ایدرم . اول بابده امر وفرن  
حضرت من له الامر کدر .

— ۷۶ —

معروض چا کرلریدر

بوکره کمال مسرتله آلمش اولدیغم لطفنامه لرنده کچن  
هفته مخدوم عالیلرینک ختان جمعیتی اجرا بیورلدیغی تبشیر  
اولنیور وجمعیتده داعیلرینک بولنامقلمغمدن باشقه نقصانکز  
اولمدیغی بر لسان تأسقله بیان بیوریلور .  
اولاً وجیه ذمت اولان ایفای رسم بهین تبریکه

مسارعت ودها بوکي پک چوق جمعيتلر اجراسنه موفق  
 اوله رق بتون خاندان عاليه مسرور اولملري دعاسني رفع  
 بارگاه جناب ميسر الامور ايتديکمک عرضنه مبادرت ايلرم .  
 ثانياً بوسور پر سرورده بولنه مديغمه تأسف ايتدم  
 ديش اولسه يالان سويله مش اولورم . فقط تأسفمی . . .  
 او غلمزک وایمه جمعيتنده بولنه رق تلافی مافات ایتمکلکم  
 امیدی مسرته قلب ایلدی .

شمدی او آن فیروزه انتظار ایتمکده یم . [کل آت قریب]  
 فحواسنجه اوزمان مسعوده ادرالکایله قریرالین اولماغمده  
 بعید دکلدر . باقی اخوت .

— ۷۷ —

فضیلتلو افندم حضرتلری

هیچ برقیعتی اولمدينی حالد محصار تو انظار قبض مدار  
 نحریرانه لریله شرفیاب اولق اوزره حضور کلمات نشور  
 معارف پروریلرینه تقدیمه متجاسر اولدیغم (....) عنوانلی  
 اثر ناجیزانه مک لطفاً قبول بیورلمستی رجا و بو وسیله ایله  
 باعث افتخارم اولان حسن توجه عرفانپناهیلرینک دوام  
 و تزییدینی تمنا ایدرم .



— ۷۸ —

معروض داعی دیرینه لریدر

یکانه مدار افتخارم اولان انظار مکارم دثار بنده -  
 پرورانہ لرینک دل داعیانہ مه بخش ایلدیکی نور سرورک  
 شوقیله هر بار دوام عمر و اقبال حضرت ولی النعمیلری  
 درود مسعودینی رفع بارگاه جناب پروردگار ایلورم .  
 وسائل جمیله دوشدکجه آستان دولترینه بو خصوصک  
 عرضنی وجیبه دن بیلدیکم ایچون حلول ایدن سال جدیدی  
 نعم الذریعه عد ایدهرک عاجزانه ایفای رسم تبریکنه  
 مبادرت و حق نامستحق کترانه مده دائماً لمعه پاش اولان  
 توجہات مشیختینا هیلرینک بقا و توافری نیازینه مسارعت  
 ایلدم . اول بایده

— ۷۹ —

فضیلتما ب افندمر

خاندان معالی عنوان وفاشعاریلرینه اولان قدم  
 عبودیتیه حرمة حق داعیانہ مده حسن توجہلری مبذول  
 اولدیغنه و بی چارکانه هیچ بر زمان لطف و معاونت منعمانه  
 لرینی دریغ یورمدقلرینه کوکنهرک باشم صیقلدجه تصدیقه  
 متجاسر اولیورم .

تصدیعاتكم عفویله توجہات مكارم آیات منعمانہ لریك  
بقا و تزیادنی کمال ابتہال ایله رجا و مناسب کورلدیکی صورتده  
مقام معلاى مشیختپناھیدن مدت نیابتك برسنه دھا  
تمدیدى خصوصك استدعا پیورلمسنى متدارانہ تمنا ایلرم.  
هر حالده لطف و کرم ، معالی همم افندمز کدر .

— ۸۵ —

فضیلتمندم افندم حضر تلی

خاك پای عالیکنزه حرمت ایتك بزم ایچون وجیبه دندر.  
چونكه بزه اولان خصوصیتكز بك صمیمی ، بك قدیمدر.  
بونكله افتخار ایدرز. خدمتکزده بولنمق بزم ایچون باعث شرفدر.  
اخص آملر حسن توجہکزی قازانمق ، خیر دعا کنزه مظهر  
اولمقدر. امر نامه کزی آلیر آلاز مدت نیابتکزك برسنه دھا  
تمدیدى خصوصنى شیخ الاسلام افندی حضر تارندن رجا یتدم.  
فضیلتکزدن ، استقامتکزدن اوزون اوزادی یه بحث ایدهرک  
مشو ملک اسعاف اولنه جغنی وعد پیوردیلر . هیچ بر زمان  
خاطر فاضلانہ کزدن چیقارلما مقلغم خصوصنى خاصه  
تمنی ایدر و مبارک الیریکزی کمال تکریم ایله اوپرم .



— ۸۹ —

معروض داعی دیرینه لریدر

هر آن قلبمده درخشان اولان پرتو احساسات متدارانه  
 مقتضیاتندن اوله رق سزاوار اغتنام بر ذریعه حسنه  
 ظهورنده عرض عبودیت مسارعتی اک بیوک وظیفه  
 بیلدیکمدن جهانک یکانه مبدأ سعادت اولان لیله مبارکه  
 ولادت احمدیه نک حلولی نعم الوسیله عدا ایدهرک ایفای  
 رسم تبریکنه مبادرت وحق کترانه مده دائمی اللمعان اولان  
 توجهات فیض آیات حضرت ولی التعمیلرینک ادای تشکری  
 خصوصنده کی قصورلر مک عفو یله مدار فیض و مباحاتم  
 اولان التفات جهان درجات جناب مفتی الانامیلرینک بقا  
 و تزیادی نیازی بابنده تقدیم عریضه یه جرأت ایلدم .  
 هر حالده امر و فرمان حضرت ولی الامر اقدمز کدر .

— ۷۲ —

فضیلتلو اقدم حضرتلری

حق نامستحق داعیانهمده ابدال بیور یله کلن توجهات  
 معالی غایات کریمانه لرینک دوام و تزیادینی مشعر و محل  
 مأموریت فاضلانهمدینه کمال عافیتله مواصلت علیه لرینی  
 مبشر اولان لطفنامه سامیلری واصل دست تعظیم اولدی .

حاوی اولدینی عبارات التفاتیہ نك هر کلمه سندن لمعه پاش  
اولان پرتو و داد، خانه قلبی مسرت آباد ایلدیکندن عرض  
تشکره مهابرت و بویله لطفنامه لر ارسالیله نوازش خاطر  
عاجزی به تنزل بیورملرینی شیمه کریمه و فاشعار یلرینه  
استناداً استرحامه مبادرت قیلندی . هر حالده لطف  
و مروت اقدمز کدر.

— ۸۳ —

معروض داعی دیرینه لریدر.

کترلری خاک پای ناصیه پیرای فتوا پناهیلرینه قدم  
عبودیتله مفتخر و بویله بر نعمت جلیله به مظهریتمدن  
طولایی کیجه کوندوز متشکر اولوب شمدی به قدر ذات  
خجسته صفات شیخ الاسلامرینی هیچ بر صورتله تعجیز  
ایلمک کستا خلغنده بولندیغم حالده طریق نیابته یکر می  
سنه دن بری پویان اولوب استجلاب دعوات خیر آیات  
حضرت امیر المؤمنینه بذل مقدرت ایده رک صاج ،  
صقال آغر تمش اولدیغمه مکافاة عهدۀ عاجزانه به بر مولویت  
احسان بیورلمسی خصوصنی دعوات دین و دولته مبذول  
اولان عاطفت معالی منقبت مشیختپناهیلرینه استناداً  
استرحام ایله تصدیقه متجاسر اولدم. اول بابده



— ۸۴ —

سماحتلو افندم حضرتلری

سینه معالی دقینه سمو حیلرینه مقارنت ایله برقات  
دها پرتو افشان اولان نشان دی شانک وحیه رسم تبریکتی  
حاوی تقدیم خاک پای عالیلری قیلنان عریضه داعیانهمه  
جواباً ارسال یوریلان لطفنامه عرفانهایلری آرایش  
عامه تعظیم اولدی. محتوی اولدییی حمل التفاتیهی بر  
برات مباحات عد ایدم رک دل عاجزی انوار سرور ایله  
طولدی.

حق ناجیزانه مده رشک آور امثال اولان توجهات  
فیض غایات منعمانه لرینک فریضه تشکرینی بحق ادا  
رزان محمدت قاصر در. فقط داعیلری کی عاجزلرک ایله  
قصور لرینه باقلمیوب دائماً مظهر عفو و التفات یوریلله جفی  
کون کی ظاهر در. بناء علیه استدعای عفوه مشارف ایدرم.  
دائماً مظهر التفات یوریللمی کمال خلوص بال ایله دیلرم.

— ۸۵ —

معروض داعی دیرینه لریدرکه

حق عاجزانه مده ساحه آرای بروز اولان الطاف  
مخصوصه جناب مشیختنهایلرینک کالیله ادای وحیه

تشکر نیدن عجز می اعتراف ایله برابر روز و شب آرایش  
 لسان محمد تم اولان دعای واجب الادای حضرت امیر  
 المؤمنین تر دیناً افزایش عمر و اقبال ولی النعمیلری درود  
 مسعودی رفع بارگاه احدیت ایتمکده اولدیغمک عرضنه  
 مسارعت و خصلت ممدوحه داعی نواز یلرینه استناداً یقینده  
 آجیله حق اولان دکرلی نیابتنک عهدۀ عبیدانهن تفویضیه  
 برقات دهها متدار عاطفت کر مکار یلری بیور لمقلغم  
 خصوصنی استدعایه مجاسرت ایلدم. اول بابده امر و فرمان  
 حضرت ولی الامر اقدامز کدر.

— ۸۶ —

ولی نعمت معالی منقبت اقدامز حضرتلری

در علیه دن مفارقت داعیانۀ مک اون برنجی بازار کونی  
 اقسام اوزری ساعت اون پر راده لرنده دعوات خیریۀ  
 منعمانه لریله قونییه واصل اولدم. ایرتسی کونی والی پاشا  
 حضرتلرینک خاک پای سعادت احتوای آصفانه لرینه وضع  
 جین مخالصت و مأموریتیه متعلق امرنامه یی تقدیم ایله  
 وظیفۀ عاجزانه می حسن ایفایه مباشرت ایلدم. والی پاشا  
 حضرتلرینک حق کترانه مده کوندن کونه حسن توجه



داور اکرمیلری آرتمقده اولدینی و بو ایسه محضاً درود  
مسعود ولی نعمتیلری ایجاباتندن بولندینی جهته افتد مزه  
اولان منتدار لغمک درجه سی تضاعف ایتمکده در. اعتراف  
عجزدن باشقه سرماییه سی اولیان بر بی چارمک آیین  
بهین بنو تده کی قصورینه باقلمیه جفی درکار اولدیغندن  
بو بایده تطویل کلامدن صرف نظره عائله جه فرق  
افتخار مزدن سایه سعادت سرماییه کر مپوریلرینک دور  
اولامسی تضرعاتی هر بار رفع بارگاه جناب کردکار ایتمکده  
بولندیغمک عرض و بیانیله ختم کفتار ایلم.

— ۸۷ —

فضیلت مندم برادر اعزم اقدام حضرتلری  
بورایه کله لی ایکی ماهی مرور ایتدیکی حالده هنوز  
بر التفات نامه کزه مظهر اوله مدیغمدن طولانی پک محزون  
اولیورم.

ذات والای برادر اکرمیلرینک کمتلرینی بویله نظر  
التفاتدن دور بیور شلرینه بر سبب بوله مدیغم ایچون محزونیتکم  
درجه سی کوندن کونه تزايد ایدیور.

اگر مهجور التفات اوله جق بر قصورم وار ایسه  
مسلم اولان شفقت حقوق پروریلرینه صیغنه رق عفونی

تمنا وهر حالده برات سعادت بیلدیکم لطفنامه عرفانها یاریله  
دل محزونمک تسریری خصوصنه مسارعته عنایت بیورلمسینی  
استدعا ایلرم.

.....

— ۸۸ —

حضرت!

استانبولدن مفارقت داعیانهمک بشتجی کونی بورایه  
واصل اولدم . مملکت کوزل . صوینی استانبولک اپی  
صولریله قیاس قبول ایتمزسه ده قرق چشمه ایله معادل  
طوتیله بیلیر . هواسی ده ضرر سز . مفتی افندی دیدیککز کی  
حرمته شایان بر ذات . قائم مقام بکک ده اصل اولدیغی  
ناصیه سندن آ کلاشیلور . میرمومالییه اولان امانتی ویردم .  
فوق العاده ممنون اولدیلم .

بونیا تمک ده غائله سزجه ختامه ایصال ایدیله بیله جکنی  
شو ایکی ذاتک — آ کلاشیمده خطا ایتمیورسم — خلوقه  
مستقیم اولملرندن استدلال ایلورم . درد فراق کزدن  
باشقه بر کدرم یوقدر . بوده حسن توجه کزک دوامنی  
مبشر لطفنامه لر ایله تعدیله عنایت بیوریلورسه متداریکز  
اولورم .

.....



— ۸۹ —

فضیلتو افندم حضر تلی

فی ۲۲ تموز سنه ۳۱۳ تاریخی احساننامه فاضلانہ لری  
 ہامہ پیرای تکریم اولدی. حق عاجزانہ مدہ ابراز بیوریلان  
 حسن توجہک لازمہ تشکری بحق ادا دن عاجز اولدیغمی  
 اعتراف ایله دائماً مظهر التفات عالیلری اولمقلغم خصوصتی  
 نیاز ایلرم.

اثر خامہ استادانہ لری اولان و بر نسخہ مطبوعہ سی  
 طرف داعیانہ مه ارسال بیوریلان کتاب فوائد نصابی  
 بر آن نظر مطالعہ دن بیراقیورم. بونددہ سائر آثار  
 بر کزیدہ لرندہ کوریلن حسن انسجام بر صورت اعجاز  
 کارانہ ده انظار استفادہ یه عرض اندام ایدیور.

جناب فیاض مطلق، ذات معالی سمات فضائل پروریلرینی  
 بویله برچوق آثار مفیدہ تألیفنه موفق بیورسون.

~~~~~

— ۹۰ —

فضیلتمندم افندم.

پورایہ کلدیکم کوندن بری انبساط پشای دل و جان

اوله جق آچیق بر هوا کورده مدم . سها دائمی صورتده  
بولوتلو . هله مصاحبه سندن لذت آنه جق بر کیسه بولنه .  
مامسی انسانی بتون بتون صیقیور .

برکت ویرسون فلان پاشانک آثار خیره سندن اولان  
کتبخانه یه . تعطیل کونلرینی ، تنفس زمانلرینی او خزینه  
نوادرده کچیریورم . بوده اولسه اوایی حال کلال آور  
ایله چیلدرمق ایشدن بیله دکل .

اهالی ، [بورانک ایلك بهاری رشك آور فردوس برین  
اوله جق صورتده لطیفدر] دییورلر . موسم صیفکده ایلك  
بهاردن فرقه سرجه اولدیغنی درمیان اییدیورلر .

ایلك بهاری شو صوک بهاری کبی ملالت بخش  
اولسه ده کتبخانه نک ، او خزینه نوادرک خاطری ایچون  
اکال مدته چالیشه جغم .





شیخ وصفی

# سواطع



رسمی ، ادبی برطاقم مسودات ایلہ بعض مقالات  
و اشعاری حاویدر

معارف نظارت جدید سنک رضعتید طبع اولنمشر

استانبول

( عالم ) مطبعہ سی — اجداحسان و شرکائی

۱۳۱۱



صاحب و ناشری : شمس کتابخانہ سی







بوندن اول « لوامع » ، « بدایع » عنوانلری  
آلتنده ساحه مطبوعانه وضع ایدیان مجله جکارمک  
اوچنچیسى اولق اوزره بو کرده (سواطع)  
نامنى ویردیکم شواثرى طبع و نشره جراتیاب  
اولیورم. (سواطع) لوامع ، بدایع کبی یالکز  
مکتب نوابده استکتاب ایتدیکم مسوداتی  
حاوی دکلدرد . بوساثر بعض آثار ناچیزانه می ده  
محتویدر .

ذکر سزالکنی یلدیکم بو اثری - شرفلندر مک

اوزره - ورد زبانم اولان قصیده آتیه ایله توشیحی  
مناسب کوردم . و ما توفیقی الا بالله .

شیخ وصفی

﴿ قصیده ﴾

ز انکطه منک ای مه غرای مهر ففت  
فخر اتمده در رتبه علیای مهر ففت

نامکده منک صبح و مسا طاق ظفرده  
مهرشانه اولیور بر تو طغرای مهر ففت

هام کرده در خشنده در اکلیل نجابت  
نایسته ملک تخت مهری مهر ففت

چهره کرده فروزانه اولانه انوار ابد دائم  
بر شمشیر در طور تجوی مهر ففت



اولمقدمه عیانہ سایہ دست کرمکده

معنای منیر به پیمضای معرفت

ارصافکی تزیین ابد انوار معالی

عالی لعمرك ایلدی اعلائی معرفت

عثمانیلمک ایتیمکده در شانی تعالی

سایه کلاه شرفیاب اولدی های معرفت

محور نجوم اولسه سزا مهر فلککده

یارلاق کور بنور زهره زهرای معرفت

هر عصره مرجع طویله اور عصر حمیدی

اول عصر کزیندر شرف افزای معرفت

بر بادشهرک بنده فرمانبری بن کیم

آرامه زانید سجایای معرفت

اول بادشهرک مهر وجودیه پیرانه

رشدک آور اولور طارم مینای معرفت

اول یادشرك مصحف رو بنده همیشه  
برق آورنده در آیت کبرای خدافت

اول یادشرك روز جلاوسیده برابر  
ابتدی طعنه نور مسمای خدافت

شاهانه جبرانه ایچره نظیری بولنور می  
بردانه در اول کوکبه پیرای خدافت

شاهانه اوقور افطاریه قانونه عدالت  
میرانه اولور اطواریه معنای خدافت

هپ همت شاهانه سی آیه مصروف  
فاروق کبی قیلحمه ابرای خدافت

عنوانه ملوکانه سیدر محبی دولت  
یکطر یاشاسونه ایلدی امیای خدافت


وصفنده قلم هر نه قدر ایلده اطرا  
شایسته در اول معذات آرای خدافت



ایفای دعا ابد لغمانه صدق ابد و صفی  
محکم دکل امضای مزایای معرفت

آراییه کلزار جبرانه اولسونه الهی  
نامشده قدر کلیمه رعناای معرفت





— ۱ —

جناب رب متعال شهریار حمید الخصال تاجدار دریا  
نوال افندمن حضرتلارینک ظل ظلیل معـدات دلیل  
جهانبانیلرنده ذات محاسن صفات مشیختیناهیلرینی مقام  
معـلای فتواده موافق رضای عالی خدمات جایله ابرازیله  
الی آخر الایام موفقیت آرای اقبال بیورسون آمین .  
آره صیره نأید رابطه انتساب ایچون آثار خامه  
مستمندانهم اولان مجله جکاردن تقدمه ناجیزانه اولمق  
اوزره نظرگاه دقایق اکتناه جناب مفتی الانامیلرینه  
عرضه جرأت ایتدیکم کی بوکرده « . . . » عنوانی  
آلتده نشرینه اجتناسار ایلدیکم اثرک تقدیمی وسیله سیله  
خاک پای فیض احتوای ولی النعمیلرینه یوز سورمک



شرف عالمها سنده مظهر اولد یغمدن طولانی نه قدر افتخار  
ایتسم آذر .

مجبور بیوردقلری خصلت بنده نواز یلری ایجابجه  
امثالی مثالی دکر سزاکلری بدیهی اولان اثر مذکورده  
عطف نظره تنزل ایله داعی اصدقلرینی اولکیلردن بیک  
قات زیاده مظهر التفات بیوردقلرینه مقابل لازم کان  
تشکر فریضه سنی حقیله ایفادن لسان و قلمم عاجز اولمقله  
برابر بوبابده :

سخن بر کنج بی پایان اسرار آهیدر  
که طبع نکته داندراو کنجک شمدی کنججوری  
بیتمک قائل اولان نفی ده اولسه اعتراف عجز ایله چکنه  
جهان بلاغت شاهد عادلر .

مع مافیه بر مقتضای آیین بهین عبودیت عاجزانه  
عرض شکرانه مبادرت و حق درویشانه مده ابدال  
بیورلمقده اولان حسن توجهه استیاداً بوبابده کی  
قصور مک عفو بیورلمسنی استرحامه مسارعت ایلمرم .

— ۲ —

عزیزم !

ینه برالتفاتنامه کی آلام .

« نامه کز جان رسد منشور اقبال منست »

دیه رک کمال شوق ایله مطالعه سنه طالدم ،

کو کیده ذوق مطالعه دن متحصل او یله بر نور سرور

برق اورمغه باش-لادی که شمیدی به قدر بویله بر ذوق

وجدانی به مالک اولدم دیسه م یالان سویلمه مش اولورم .

بویابده کی مسرت می اطراف یله تص-ویره قالدشمش

اولسیدم — مبالغه اولمسون اما — قوجه بر کتاب

وجوده کلیدی .

بونی کوزمه کس دیروبده بویله بر مسرتنامه یازیدم

عجبا حقیقه افاده مافی الباله موفق اولورمیدم ، نه کزر !

وجدانیات روح کیدر ، بعض اوصافی تفهیم

وتحریر اولنه بیاسده حقیقتی تقریر و تصویره کلز .

طرز افاده سنه حیران اولدیغم آثار خامه کک تقلیدینه

اوز نیور سه مده بر درلو موفق اوله میورم . بویابده سکا

— حسد دفل اما — غبطه ایدیورم .



بویله ساده یازلمش مکتوبلر : « جناب فضیلت‌مآب  
 کر مکسترلرینه ، خاک پای فیض بخشای حقوق پروریلرینه ،  
 کبی تعبیرات خاییده ایله — سوزده — آراسته بولنان  
 عریضه لردن بنجه بیک قات دکرلیدر .  
 کلفت منشیانه دن آزاده ، شیوه لسانه موافق اولمقله  
 برابر یک ساده یازلمش هر درلو آثار ، اغلاقات ویسیایه  
 ایله — گویا — تزین ایدیلوب ده عربجه می ، عجمجه می  
 ترکیجه می نه اولدینی بیلمه مین محرراندن البته قیمت دار  
 اولوب هیچ بروقت التفات نظر عمومیدن دوشمز .  
 ترکی کی قدماک آثاری — آنتیقه قیلاندن  
 اوله رق کتابخانه لرده بواندیر یایرسده — الله قبرینی  
 پر نور ایتسون مرحوم معلم حاجی افندی کی ارباب قلمک زاده  
 طبع ادیبانه لری مثالی دائمیور ایادی استفاده اوله ماز .  
 قدما بر جمله وجیزه ایله تسطیری ممکن اولان  
 و بلکه نظم طبیعی بویله اولسنی مقتضی بولنان بر کلامی  
 بر طاقم عربی ، فارسی لغات و تتابع اضافات ایله  
 اوزاده رق قوجه بر فقره حاله فراغ ایتکی معرفت  
 عد ایدرلر مش ،

بویله فقره لردن اولدقجه او قویوب یازانلر ، امثالنی

تنظیمه مقتدر اولانلر بیه قولایجه معنی استخراج  
ایده منزل .

ترکجه ، عربجه دن عجمجه دن استعاره اولنان  
ترکیبات و کلمات سایه سنده مضامین دقیقه نی افاده یه صالح  
بر لسان ناز کدر . بویه اولدیغنه ایادی اعتبارده بولنان  
آثار جیده جیده شهادت ایدوب طور یور .  
« حضرت شیخ اکبرک :

تأمل سطور الکائنات فانها  
من الملاء الاعلی الیک رسائل

بیتی کبی یک جوق جواهر حکمییه بی جامع بولنان  
خزائن ادبیات عربیه دن ابوالعلاء المعرینک حین وفاتنده  
کتابه سنک مزاری اولمق اوزره سویلیدیکی :

هذا جناح ابی غا  
ی وما جنیت علی احد

بیتی مثالی آثاری التقاطه قالمشوق تنزل دکلیدر ؟  
یوللو بر توبیخ برادرانده بولندقدن صکره معری  
نامنه اسکی بر مجموعه ده کوردیکم :



زعم الجہول ومن يقول بقوله  
ان المعاصي من قضاء الخالق

ان كان حقاً ما تقول فلم ترى  
حد الزناء وقطع كف السارق

قطعه سنه دائر اولان استيضاحاته كوزل كوزل  
جوابلر ويريلوب يوسف افندی نامنده بر فاضل عثمانی  
طرفندن :

حكم الآله اذا نظرت عجيبة  
دقت عن الفهم الذكي الحاذق

لايسأل المختال عن فعل له  
قد جاء ذاك على لسان الصادق

قطعه سياه مقابله اولندي في درميان ايدلمشدرکه بوبابده کی  
منتدار لغمک در جه سنی تعیین ایدهم . بناءً عايه تشکر لور  
عرض ایدرم .

بوقطعه بی اوقورکن خاطر مه جناب « خاقانی » نک  
حلیه شریفه سنده کی :

کشمش آتمشدر آنی ایتمه جدل  
تیغ لایسئل عما یفعل

بیتی خطور ایتدی . بوندن استفاده ایدمرك معریه  
بر جواب صواب اولمق اوزره :

وار ایکن الده دلیل قطعی  
« تیغ لایسئل عما یفعل »

عقلا بریزه کلسه بوله ماز  
حکمت خالقه تعریضه محل

قطعه سنی سویلدم .

قطعه کوزجه اولدی . سنك ده تقدیریکی قازانیرسه  
لوحه یاپلمغه شایسته اولدیغنده شهرهم قالماز .  
یوسف افندی نامنه اولان قطعه نك اوچنجی  
مصر اعنك :

لایسئل المختار عن فعل له

صورتنده اولسی لازم کله حکمی وارد خاطر اولیور .  
بویله اولسنی بزم فلان افندی ده تصویب ایدیور .



اطناب درمکالمه دوست خوشترست

مؤداسنه بناء سوزی تطویلہ اجتسار ایتدم .  
تصدیعدن حذر ایتیمدم بو قدرله اکتفا ایتیموب سلسله  
کلامی دها اوزادردم . بناء عایه باعث افتخارم اولان  
حسن توجهک بقا وازدیادی تناسیه طی طومار  
کفتار ایتیمکه مجبور اولدم .

..

— ۴ —

سعادتلو افندم حضرتلری

اصدقای بندکان سلطنت سنیه لرینه هر بار عواطف  
جلیه شهریاریلری لمعه نثار اولان پادشاه دریا نوال  
شه نشاه حمیدالحصال افندمن حضرتلرینک حق احق  
کریمانه لرنده آن بآن تجلی ایتیمکه اولان آثار توجهات  
جهان درجات خسروانیه بر لاحقه فائقه اولمق اوزره  
بوکره قریحه الهام صبیحه جناب خلافتیناهیدن اوله رق  
— محظوظیت سنیه نی موجب اولان استقامت ولباقت  
ذاتیه لرینه مبنی — سینه صداقت دینه لری اوچنچی

رتبه دن بر قطعه نشان عالی عثمانی احسانیه تزین  
 بیورل دینی ترجمان حقیقت غزته سنك . . . نومرولو  
 نسخه سنده کمال مسرت و مفخرتله مطالعه اولمش و بو  
 کبی دها نیجه الطاف مخصوصه شاهانهیه مظهر اولملری  
 دعای اجابت اتماسی رفع بارگاه احدیت قیلمش اولدیغنك  
 عرض و بیانیله حسب الاختصاص ایفای فریضه رسم  
 تبریکه مبادرت و حسن نظر فیض اثر نجیبانه لرینك حق  
 داعیانهمده دوامی نیازینه مثابت ایلرم .

— ۴ —

فضیلت مندم افندم

مأموریتك بروسهیه تحویل ایدلمسندن برقاج جهتله  
 ممنون اولدم . اسباب ممنونیت مندن بریسی و بلائیکه برنجیسی  
 آره صیره استانبوله کلهرك بالخاصه خاک پای ادیبانه لرینه  
 یوز سوره بیلمك کبی بر آرزونك تیسر حصولیدر .  
 بوشهر غرانك شوصوك بهارنده کوردیکم لطافت  
 نشوه بخشاشی فصل ربیعنده کی طراوت روح افزاسنی



هېشېر اولمغله فصل مذ كورده تشريفه رغبت بيوريلاه جق  
اولورسه مستلزم مئونيت اوله جغندن امينم . باقى شدت  
انتظار .

\*

\*\*

— ۵ —

او غلم !

كليم همدانينك :

شب هم از كسب كمال آسوده در بستر نيم  
مى دهد درس خموشى صورت ديها مرا

بيت حكيمانه سى طالب علم ايچون اكتساب كمالدن  
آزاده قاله جق بر زمان اوله ميه جغنى كوسترييور .

كائناتده بر لوحه تصور اولنه ماز كه عبرت بخش  
اولوالالباب اولسون . فقط سنك كې مبتديلر ايچون  
تعليمى وجيهه دن اولان مقدمات فنونى تحصيله بتون  
بتون حصر اوقات ايتميوبده بعضاً اشعار مطالعه سيلاه  
اشتغال ايتك قطعا تجوين اولنور مواددن دكلدر .

شمدي بك او قدر فارسى يى ده ايلرى يه كوتورمكه

قالقشمه ، عربی به چالش ! بونده استخراج دینیلان  
مالکیه مالک اولدقدن صکره فارسی ده اوکو !

فارسی به کمالیه اختصاص ایچون بر چوق دیوان

او قومق ، اصطلاح بالله مک لازمیدن ایسه ده کلاستانی

شویله بر آ کلامق ایچون بر آز قواعد اوکر نمک

کفایت ایدر . بو کتاب ایسه حکایات لطیفه فی حاوی

برکنجینه حکمت اولدیغندن مطالعه سندن متلذذ اولیه جق

بر انسان تصور ایدهم . بویله بر کتابک تدرسی —

باعث انبساط درون اولیه جق — صرف ، نحو ، منطق

ایله قسماً اولسون اشتغاله مانع اوله جفی درکاردر .

ارباب مطالعه ایچون نظر استفاده به آلمیه جق بر

کتاب اوله ماز . بونلر « اصلی ، کرم » مثالرندن ده

مستفید اولورلر .

سن ارباب مطالعه دن اولاق مزیتلی قازانده نه

اوکورسه ک اوکو ! بویله بر مزیت ایله تحلی اتمک ایستر

ایسه ک وصایای مذکوریه توفیق حرکت ایت اوغلم .



— ۶ —

افندمن !

يکديکريڻي تعقيب ايتمکنده اولان احساننامه لريکڙ  
کربت غربتي اونوتدیرمقدمه اولدینی جهتله نصل عرض  
تشکر ایدہ جکمی بیله میورم .

ادای و جییه رسم شکران خصوصندہ کی قصورمک  
عفو یله یامال هجران اولان کولگی بیله احساننامه لر  
ارسال ایدہ رک مسرت آباد بیورمکزی نیاز ایدرم .  
باقی

\*  
..

— ۷ —

عطوفتلو افندم حضرتلری

طرف مستجمع الشرف حضرت پادشاهیدن عہدہ  
عاجزانہ ما احسان بیوریلان پایہ نک تبریکتی حاوی  
التفاتنامہ عالیری ، حق داعیانہ مدہ بی دریغ بیورلمقدمہ  
اولان حسن توجہک دوامنی مبشر اولمغله :

ایلرم دنیاہ قارشى افتخار  
بختیارم بختیارم بختیار

دیمکدن کندی آله مدم .

هر کله سی برلعه حکمت اولان تبریکنامه سامیلرینه  
قارشی ادای وظیفه شکر گذاریده اولان عجز می اعترافه  
مسارعت و برات سعادت بیلدیکم حسن توجه گرامیلرینه  
دائما مظهر اولمقلغم دعاسنی رفع بارگاه خداوند بی انباز  
ایتمکده اولدیغمک عرض و بیاننه محاسرت ایلرم .

.\*  
\*\*

— ۸ —

کله تعظیم اوله رق قوللانا مقده اولان « حضرت ،  
جناب ، الفاظ عربیه سنک صورت استعمالنه دائر برقاج  
سوز سویلمک آرزو ایدیورم .

الفاظ مذکوریه دائر — بر حکم و یرمک حدم  
دکلسه ده — الله قبرنی پر نور ایتسون معلم ناجی افندی  
میر حومک لغت کتابنده مصادف نظر تلمیذانه اولان  
ایضاحات و جیزه بی مأخذ ایدینه رک بوبابده کی مطالعات  
عاجزانه مک بسط و تمهیدینه متجاسر اولدم :



[ حضرت ، جناب ]

﴿ حضرت ﴾

حضرت — فی الاصل قرب و پیشگاه معناسنه در .  
 بو مناسبتله کلمه تعظیم اوله رق استعمال اولوب — یرینه  
 کوره — کلمات و ترکیباته ادخال و الحاق ایدیایر :

— حضرت خدا .

— حضرت فخر الانبیا .

— حضرت حیدر کراره .

امثله مذ کوره اصله نظراً « خدانک حضوری ،  
 فخر الانبیانک حضوری ، حیدر کرارک حضوری ،  
 دیمک اولور .

کلمات و ترکیباته « حضرتی ، صورتنده الحاقی جائز  
 دکدر .

مثلاً « حق حضرتی ، بی افصح البیان حضرتی ،  
 امام حسین حضرتی » دینلمه ملی .

قدمانک آثارنده بعضاً بو صورتده کوریلور سهده  
 شمدی استعمال اولنمور . « حضرت حق ، حضرت  
 بی افصح البیان، حضرت امام حسین ، دیمک وار ایکن

صورت اولایی هیچ بر ذوق سام صاحبی قبول ایتمز .  
 کلمه مذکورہ ذوی العقولہ مخصوص دکلدر .  
 « حضرت محمد ، حضرت مولانا ، دینداریکی کی » حضرت  
 قرآن ، حضرت مشوی « ده دینیلیر .

### ﴿ استطراد ﴾

[ حضرت عبدالقادر ] کی ترکیبہ ادات ندا اولان  
 « یا » ادخال ایدیلہ جک اولورسه « حضرت » ک تاسی  
 اصلہ ارجاع اولنوب طویار لاق یازیلہ رق منصوب او قونمق  
 لازم کلیرسه ده بو مثالی اسامیء ارباب یقین ایلہ تزین  
 ایدیان لوحه لرده « یا حضرة عبدالقادر » صورتندہ  
 یازلیوب غلط اولہ رق اضافت فارسیه ایلہ « یا حضرت  
 عبدالقادر » شکلندہ کوریلیر . ]

« انتہی »

عربجه جمی اولان « حضرات » ذوی العقولدن  
 اولان « امامین » مثالی تشبیه لری ایلہ « اصحاب » پیران  
 مفسرین ، افندیلر ، کی جموعه « حضراتی » صورتندہ  
 الحاق اولنور :



— امامین حضراتی

— اصحاب کزین حضراتی

— پیران کرام حضراتی .

— مفسرین عظام حضراتی .

— افندیلر حضراتی .

ترجہ جمعی اولان « حضر تار » ده بعض ترکیبات ایله  
« پاشا، افندی، کبی عنوانلر » « حضر تاری » صورتندہ  
لاحق اولور :

— امام المسلمین حضر تاری

— صدر اعظم حضر تاری

— پاشا حضر تاری

— افندی حضر تاری

« حضرت » کلمہ سی بر بیوک ذاتدن کنایہ اوله رق  
استعمال اولندیغی کبی ذات معنا سنده دخی قوللانیلیر .  
بر بیوک ذاتدن کنایہ اوله رق قوللانیلدیغنه مثال :

حضرت بو طبیعت یکانه

ر شک آور خیل شاعر اندر

اشعار کزین دلش کارک

آرایش عالم بیاند

ذات معناسنه اوله رق قوللانلديغنه مثال :

کوکله زخم کنه وارکه التيام ایتمز  
مکر اوله مقارن دواي حضرتکه

« اشرف پاشا »

حضرت مولاناك :

دل نکه داريد اي بي حاصلان  
در حضور حضرت صاحب دلان

ييتنده کورلديکي اوزره فارسيدنه « حضرت » ك  
« حضور » ايله جمعی تجويز اولوب بونی اسلاف ترکجهده  
دخی خوش کورمشارسهده شمدی مساع ویرلیو .  
« حضور حضرت شیخ الاسلامی به » کی عبارتله یاکاش  
عد اولنیور .

﴿ جناب ﴾

جناب — فی الاصل سرای و خاه حولیسی، چوره سی،  
بنادن خالی اولان یرلری معناسنه در . بو مناسبتله کلمه



تعظیم اولہرق قولانیلوب — یرینہ کورہ — کلمات  
وترکیاتہ ادخال اولنور :

اشتیاقم آرتار اکسلمز جناب دلبرہ  
کلمسون نقصان جهانده آب وتاب دلبرہ

## §

جناب شہریار بی عدیلک  
اولہ کوندن کونہ اجاللی برتر  
ایدوب ترفہنہ ہمت عبادک  
معین اولسون آکا اللہ پیمبر

« حضرتی » کی « جناب » کدہ کلمات وترکیاتہ  
الحاقی تجویز اولنماز .

مثلاً بعضاً آثار اسلافدہ « جناب علی ، جناب امام  
الحرمین ، جناب حافظ شیرازی » مقامندہ « علی جنابی ،  
امام الحرمین جنابی ، حافظ شیرازی جنابی » دینلدیکی  
کوریلایورسہدہ شمدی بوصورتی صورت اولایہ ترجیح  
ایلیہ جک ذوق سایم صاحبی بولنماز .

جمعی اولان « جنابلر » بعض کلمات و ترکیباته  
 « جنابلری » صورتندہ الحاق قیلنیر :

— بطریق جنابلری .

— سفیر درایت سمیر جنابلری

« جناب » کلمه سی ، « حیثیت و شرف » معناسنده کلیر :

شاعرم هر کوردیکم دلداری ایتم انتخاب  
 سودیکم اولسون دیرم کوکلم کی عالیجناب

بویتده کی « جناب » کلمه سی ، « حیثیت و شرف »  
 معناسنه اولمقله برابر اصلده ارجاع اولنه بیلیر .  
 « جناب » ك « حضرت » ایله جمعی جائز دکلدر .  
 نایینك :

جناب حضرت سلطان مصطفی خان کیم

مصر اعنده کی « جناب » و یا « حضرت » دن بری  
 زائد اولدیغی کی برانشا مجموعہ سنده کوریلن :  
 « جناب رب منان تعالی شانہ عن العجز و النقصان  
 حضرت تلری . . . »

عبارہ سنده کی « حضرت تلری » ده حشو قیلندندر .



پرینه کوره « جناب » دن « حضرت » اقوی  
 عد اولنور . بونلردن هانکیسی لسانه دها آهنگلی  
 کلیرسه اواختیار ایدیلیر .

\*\*\*

— ۹ —

### ﴿ قصیده ﴾

کله رک حجرده بر دایر پا کیزه شیم  
 ایلدی کوکلی بر مژده نوله خرّم

دیدای شاعر سلطان سلاطین جهان  
 بویله بر روز مسرتده طورلماز ابکم

اوکرامتلو شهنشاه معالی هممک  
 کلادی اورنک معالیه شرف و یردیک دم

سنده قیل رسم عبودیتی صدق ایله ادا  
 عرض شکرانه شتاب ایایور افراد امم

بکا همراه اولوب کلاک بلاغت پرور  
ایلدم بنده بووادی به همان وضع قدم

دیدم ای کوکلی پرشوق ایدن نازنده  
مطلع مهر سعادتدر او شاه اعظم

اولیه بر ایلدی تنظیم که باغ وطنی  
رشک ایدر طرح دلاراسنه کلزار ارم

بحر الطافنه عالمده بولنماز پایان  
غبطه ایلردر احساننه روح حاتم

فکر دراکنه حیرتده گروه عقلا  
حکم وفرماننه دلداده نظام عالم

قیلمده آب معارفله جهانی اروا  
دهرک آسایشنه ایتمده ابدال هم

صاحب مرحمت وشاه معالی فکرت  
حافظ سلطنت وخسرو فاروق حشم

قاب شاهانه سی الهامکه ربانی  
قوة مدرکه سی مشرق انوار حکم



مسلك حكمتى هادىء ملوك دوران  
مقصد اقدسى هروجه ايله ترفيه اتم

طينت پاكي محاسنه ايدلمش تخمير  
نصفت و مرحمت و سطوت و حكمتده علم

ياشا اي سايه يزدان عدالت عنوان  
كورمدى شمدى يه دك مثلكي چرخ طارم

استناد ايله رك حبل متين شرعه  
كرم حق ايله هرايشده اولور سين ملهم

عين حكمتدر ارادات كزينك بي شك  
سنين اسرار فيوضات خدايه محرم

فيض مدحكه سنك بر غزل انشاد ايديم  
نغمه خامه مه حيرتده قاله اهل قلم

« كوكلم آلدی ينه ناچار بنم بر كلفم  
رخ پرتابنه خيران نصل اولماز آدم

دیدنی احسنت کورنجه آنی پیر رندان  
بر زمان کورمدی بر بویله کوزل مجلس جم

اولدیرر شیوه گفتاری سخن سنجانی  
وجهی وار زلف سمنبوسنه ایتسه مده قسم

وارمیدر آنده کی انوار لطافت بونده  
دردنداننه تشبیه اولنماز شبنم

یوجه در قامت موزونی بحق طوبی  
صافدر غیب سیمینی بحق زمزم

پای بوسيله شرفیاب اوله بیلسه م وصفی  
اوزمان بن دخی کو کلجه اولوردم خرم «

طوغریسی ایایه من وصفی حقیله بیان  
نه قدر نادره کو اولسه بویولده خامه م

ایتمه تطویل سخن باشلا دعایه غیری  
بودر آیین صداقتده همان امر اهم



اوشه معدلت آرای حمید الشیمک  
دستگیری اوله هر حالده بی اکرم

طولسون انوار مسرتله سرای قلبی  
قونمسون دامن پاکیزه سنه کرد الم

حشره دک مرکز دولتده حکمران اولسون  
کورمسون سایه عدلنده جهان رنج ستم

— ۹۵ —

سعادتلو اقدام حضرتلری  
منظهر اولدیغم التفات معالی آیات حضرت شهریاریدن  
طولانی ارسالنه تنزل بیوریلان تبریکنامه عالیلری  
هامه پیرای عاجزی اولدی . کوکلم — بر پرتو کبوترینی  
هزاران دل غم آکینی پرشوق ایده جک — لمعات سرور  
ایله طولدی .

هر کلمه سی برر نشانه اخلا پروری اولان احساننامه  
سامیلرینه قارشى بحق ابراز وظیفه شکراندن خامه

داعیانہم ہم حالت لالدر . بو بایده کی قصور مک عفویله  
حق ناجیزانہ مدہ ابدال بیور لمقدہ اولان حسن توجہک  
دوام و تزیادی تمنای دل عجز اشمالدر .

..

— ۱۱ —

مجلس ارامل و ایتم علمیه

سماحتلو افندم حضر تلی

داعیارینک مخصصات علمیه میبانشده شهری . . .  
غروش معاشم اولوب بو کره شهرزاده باشنده . . . محله سنده  
بورمه لی مسجد زقاقنده . . . نومرولو خانہ بی اشترا  
ایده حکمدن عاجزلرینه امثال مثالی کفالت قویہ معتبره  
ایله ارامل و ایتم علمیه صندوقندن . . . غروشک  
اجرای ادانہ سی خصوصنه مساعدہ عالیہ جناب ریاستینا .  
ھیارینک بی دریغ بیورلمسنی نیاز ایلرم . اول بایده امر  
واراده افندم حضر تلینکدر .

\*

\* :



— ۱۲ —

دولتو عطاو قتلو افندم حضر تلی  
 کوکلده اوتهدن بری سلاک جلیل عسکری به دخالت  
 آرزوسی جلوهر کر اولمغله وعقائده قدر درس کورمش  
 مدرسه نشین طلبه دن اولدیغم مربوط علم و خبردن  
 مستبان بولمغله یقینده آچیله جق اولان طابور اماملی  
 امتحاننه قید و قبولم ایله مسرور بیورلمقاغم خصوصنه  
 مساعدت جلیله جناب سر عسکر یلرینک سزاوار بیورلمسنی  
 استرحام ایلرم .

\*  
\*

— ۱۳ —

﴿ نطق ﴾

افندیلر !

علم و کمال برهای ذی بالدرکه کیمک باشنه پرتوانداز  
 سعادت اولورسه مادام الحیاة محافل آرای شان و بعد  
 الممات نامی زیور السنه جهانیان اولور .

جناب فیاض بی امتنان « بیان بیلمین ایله مساوی  
اولور می ؟ » مال شریفنده کی آیت جلیله ایله شرف  
علمی بیان بیوریور . بویله بر شرفدن حصه مند اولمق  
ایچون صرف نقدینه غیرت ، « علو الهمة من الايمان »  
حدیث منیفی مقتضاسنیجه لازمه حمیدر .

« اطابوا العلم من المهد الى اللحد » فرمان نبویسی  
تحصیلدن هیچ بر کیسه نك هیچ بروقت آزاده اوله میه .  
جغنی کوستریور . بر کیسه ایستر اغنیادن اولسون ،  
ایستر فقرادن بولانسون اولادینی تحصیل معارفه سوق  
ایتمکه بورجلودر .

شمعی الحمد لله هر یرده مکمل مکتبلر کشاد اولنیور .  
اکتساب کمال ایچون شورایه بورایه کیتمه لزوم قالمدی .  
اولاری دکل سنجاقلرده ولایتلرده بیله مکمل دینیه بیله جک  
بر مکتب ابتدائی بولنیوردی . شمدی ایسه وجود  
پرسود هایونلری مات نجیبه عثمانیه ایچون محض سعادت  
اولان پادشاه عدالتمند من خلیفه بی مدانی غازی عبدالحمید  
خان ثانی افند من حضر تلمینک سایه تعالیوایه خلافتینا .  
هیلرنده دکل ولایتلرده قضالرده بیله مکمل مکتبلر  
کشاد اولنهرق نشر انوار معارف ایدلمکده در .



از جمله رسم کشادنده بولمق شرفنه مظهر اولدیغمز  
بومکتب فیض مکسب — که بری رشیدی، دیگری  
ابتدائی اوله رق داتریندن متشککدر. — بوسوزمه  
ایکی شاهد عادل اوله رق عرض وجود ایدیور.

ذکات دینلن نور فضیلت دنیانک یالکیز بر  
جهتته چهره کشای کرامت اولیوب هر گوشه سنده  
پرتوانداز لطافت اوله رق اونور میندن اصحاب قابلیت  
اصیبی قدر اقتباس اشعه فطنت ایده کلدیکی مشهود دیده  
امعان و بوحوالینک یتشددیردیکی اولاد وطنده چشم  
افتخار ایله کوریان استعداد فوق العاده ایسه رشک آور  
جهاندر.

شمدی یه قدر پک چوق استعداد مکتبسزلک سببیه  
کسب انبساط ایده میهرک هدر اولوب کیدیوردی.  
شمدی ایسه مکتبسزلک بلیه سی برطرف اولدی. ایشته  
بو بر نعمت عظامدر. بونک شکرینی ادا ایتک ایچون  
همان اولاد لر منی مکتبه قید و ادخاله مبادرت و بو بایده  
لزومی کوریان فدا کارلقدن چکنمییوب سائرلره نمونه  
حسن امثال اولمغه غیرت ایلمکلا کمز لازم کلیر.

اهالیده شولزومی درک ایتیه جک برکیهسه کوريله-  
 مدیکی جهتله نه قدر مباحات ایدلسه آزدر .  
 ان شاء الله بومکتب فیض مکسب ، سلطنت عثمانیه نك  
 رونق و اعتلاسنه خدمت ایدهرک نامی الی الابد آرایش  
 السنه احترام اوله جق ذوات عالیهنك منشأ ابتدائیسی  
 اوماق شرفنی هیچ بروقت غائب ایتمز .  
 همان جناب یزدان شهریار مصراحم کردار تاجدار  
 معالی آثار رونق طراز سریر عثمانی غازی عبدالحمید  
 خان بی مدانی افندمن حضر تلرینی الی آخر الدوران  
 مقام مقدس خلافتده حکمران و ممالک شاهانه لرینی سایه  
 فیضوایه ملوکانه لرنده کوندن کونه آبادان بیورسون  
 آمین .

— ۹۵ —

فضیلتلو افندمن حضر تلری

ارباب استحقاقک تلطیفی خصوصی اخص آمال  
 شهریاریلری اولان پادشاه قدردان و شهنشاه معدلت  
 عنوان افندمن حضر تلری قریحه الهام صبیحه جناب



تاجدار یلرندن عهدۀ فاضلانہ لرینہ استانبول پایہ سی  
احسان بیوردقلری پیام مسرت اتسامی بندہ لرینی  
مستغرق دریای اشواق ایتمش اولدیغنه مشرق انوار  
فضائل اولان وجدان معالی بذیان نحریرانہ لرینی اشہاد  
ایلرم .

ذات مکارم سمات عالیترینہ اولان اختصاص تلمیذانہم  
اقتضاسنجہ ہمیشہ درکامہ معلائی قاضی الحاجاتدن کوندن  
کونہ اعتلایاب سلم اقبال اولملرینی نیاز ایتیکده اولدیغمک  
بیانہ خامہ ران و آیین بہین رسم تبریکہ شتابان اولدم .  
ہر حالده حق عاجزیدہ ابدال بیوریلان حسن توجہک  
بقا وازدیادی تمنی اولنور افندمن حضر تلری .

.\*  
.\*

— ۱۵ —

جناب رب عزت خلیفہ معالی منقبت پادشاہ دریانوال  
شہنشاہ حمید الخصال افندمن حضر تلرینی الی یوم  
القرار سریر شوکت مصیر ملوکانہ لرنده کامکار  
بیورسون آمین .

حق نامستحق کمترانه مزده ابدال بیوریله کلن  
 تعطفات مکارم آیات خلافتینا هیلرینک بحق ایفای  
 فریضة تشکرندن عجز می اعتراف ایله برابر هر آن :  
 « جناب خداوند معین نورپاک فخر المرسلین حرمتنه یکانه  
 حامی مقدسمز ولی نعمت بی منت افندمن حضر تلرینی  
 الی آخر الدوران اورنک معالی خلافتده حکمران  
 وسایه سماپایه شاهانه لرینی سرابتها جمزدن بر زمان  
 دور ایتیموب عواطف عالمشمول شهریاریلرله شادمان  
 بیورسون آمین »

درود مسعودینی عائله جه رفع بارگاه مستعان ایتیمکه  
 اولدیغمزک حسب العبودیه عرضنه مبادرت و .....  
 قوللارینک وفاتیله منحل اولوب هنوز بر کیمسه  
 احسان بیورلماش اولان ..... وقفنک تولیتی بند  
 اصدقلرینه عنایت بیوریله جق اولورسه ظل ظلیل  
 محاسن دلیل شهنشاهی لرنده برقات دها کسب رفاه ایدیله  
 جکندن آستان فلک بنیان جهان بنیایرینه وضع جبین  
 استرحامه مجاسرت قیامدی . قاطبه احوالده امر و فرمان  
 شوکتلو مرحمتلو عنایتلو ولی نعمت بی منتمز ولی نعمت  
 عالمیان افندمن حضر تلرینکدر .



— ۱۶ —

او غلم!

فی ۱۴ نیسان سنه ۳۰۹ تاریخنی مکتوبکز نظرہ پیرای  
عاجزی اولدی .

بوندن اولکی مکتوبکزی جوابسز پیراقیشمدن  
طولای عفویگزی رجا ایدرم .

برادر بک افندیك شمدی یه قدر بر احساننامه ارسالنه  
تنزل بیور میشنه قارشى سزك بویله ایکی مکتوب وفا سلاوب ایله  
دل درویشانه می تسریره خامه ران مسارعت اولیشکز  
سزاوار شکراندر .

توجه نامه لریکزك آره سنی کسمه مکزى و بنم بو بایده  
واقع اوله جق قصورلر مه باقمامکزى نیاز ایلرم .  
مکتوبلریکز تحصیل معارفه سعی ایتکده اولدیغکزى  
مبشر اولمغله ممنون اولدم . چالش ان شاء الله برادیب  
کامل اولور سین .

مکتوبلریکز دن شعره هوس ایتدیكك آ کلاشیلیور .  
بو بایده کی توصیه لر مک برنجیسی شودر :

معلم ناجی افندی مرحومك آتشپاره سنی ،  
 شراره سنی ، فروزانی ، ذات النطاقینی نظر مطالعه دن  
 آیرمامله برابر آثار نشریه سنی ده تقلیده اوزن ، ناظم  
 اولمقدن زیاده نثر اولمغه غیرت ایت .

\*  
 \*\*

— ۹۷ —

جناب خداوند ارحم شهریار مکارم شیم تاجدار  
 صدیق همم افندی من حضرتلرینی مقام مقدس خلافتده  
 توافر عمر واجلال ایله مکرم بیورسون آمین .  
 قدمای داعیان سلطنت سنیه لرندن زوجم خواجه  
 فلان افندی بوندن اوج کون مقدم وفات ایدوب  
 جاریه لرینی کرا بو جاقلرنده بیراقمش اولدیغندن و آستان  
 مرحمت بنیان حضرت خلافتیناهیلرندن باشقه برالتجاگاهی  
 اولمیان برعاجزه نك احوال سفالت اشتهانه شفقت مسلمة  
 ولی نعمت اعظمیلری هیچ بر وجه ایله رضا کوسترمیه جکی  
 بدیهی بولندیغندن برخانه ایله مقدار کافی معاش احسان  
 بیوریله رق پامال ضرورت و ماتم اولان دل بی چاره مک



مسرت آباد بیورسی خصوصی کمال ابتہال ایله استرحام  
ایدرم .

\*

\*\*

— ۱۸ —

نظارکاه معالی اکیتناه آصف اکرمیلرینه

معروض داعیء کمینہ لریدر

و جود بہبود جناب ملوکانہ لری دولت ابد مدت  
عالیہ محض خیر اولان ولی نعمت بی منتمز امیر المؤمنین  
خليفة رسول امین آرایش تخت عالی بخت عثمانی غازی  
عبدالحمید خان بی مدانی افندمن حضرتلرینه و سائل  
جمیلہ دوشدکجه بتون اصدقای سلطنت برر صورتله  
عرض اخلاصہ مسارعت ایتدکاری مثالی کترلری دخی  
لیل ونهار پیرایۃ السنۃ صغار و کبار اولان درود مسعود  
حضرت خلافتیناہی ایله دمکذار اولدیغم کی حاوی تقرب  
ایدن روز جلوس سعادت افروز شاهانہ بی اعلان عبودیت  
ایچون اک پارلاق بر ذریعۃ حسنہ بیلدیکم جهتله قصیدۃ  
مافوفہ بی عاجزانہ تنظیمہ جسارتیاب اولدم .

بونك خاك پای فیض بخشای حضرت شهریار اعظمه  
 رفع و تقدیمی خصوصنی پادشاه معالی کردار و شهنشاه  
 مکارم شعار اقدمن حضر تلرینه شام سحر فؤاد صداقت  
 بنیاد آصفانه لرنده جلوہ کراولان دعوات خیریت آیات قضیه  
 معتماہاسنہ استناداً نیاز ایلرم. هر حالده امر و فرمان  
 حضرت ولی الامر کدر .

\*  
 \*\*

— ۹۹ —

سماحتلو اقدم حضر تلری

کفایت بلند رتبت فاضلانہ لرینک پارلاق برائری  
 و پرتونشاری نیر اقبال کریمانہ لرینک بر مقدمہ مسعدت  
 کستری اولمق اوزره بوکره فتوا امانت حلیله سنک ذات  
 عالی کمالانہ یاریلہ تشرف ایتدیکی سامعه پیرای فخر  
 و مسرت اولمش اولمغله توافر شان و جلال تلری ادعیه  
 خالصه سنه تردیفاً لوازم صداقتدن بولندیغی وجه ایله  
 عرض تهنیت و بوکوزل وسیله ایله حق داعیانہ مددہ مجزوم  
 البقا اولان توجهات دیرینه حقوق پروریلرینک آثار



جليله از دین کور مکله مفتخر بیور یله جغم خصوصه کی  
امنیت اخلاصه مندانه مک ابرازینه جرأت ایلرم .

\*

\* \*

— ۴۰ —

ادبیاتدن بحث ایتمک و هفته ده ویا اون بش کونده بر کره  
حیقارلق اوزره . . . نامیه ادبی بر رساله نشری امتیازی  
استدعاسنده بولنان دولت علیه تبعه سندن . . . افندی  
ارباب ناموسدن اولدیغی مثالی اوتوز یاشنی ده تکمیل  
ایتمش و جزا قانوننامه هایونینک تعیین ایتدیکی جنایت  
و جنحه لردن طولانی علینه حکم ترتب ایلمه مش اولدیغی  
وکافه حقوق شخصیه سنه تماماً و بالفعل مالک بولندیغی  
تصدیقاً اشبو شهادتنامه من تقدیم قیلندی .

\*

\* \*

— ۴۱ —

معروض داعی دیرینه لریدر  
من غیر لیاقه نایی بولندیغم . . . . . سنجاغنک مفتیدی

... افندی داعیلری مداخلات ناجاسیله امور  
بلدهنی تشویش ایتکده اولدیغی بامضبطه خاك پای  
عدالت احتوای جناب مشیختیناهیلرینه بیلدیرلمش  
اولمغله بونک مقارن حقیقت اولوب اولمدیغنک اشعارینی  
آمر ۴۹ نومرولو وفی ۲۷ تشرین اول سنه ۳۰۹  
تاریخی امر نامه عالی حضرت مفتی الانامیلری هامة  
پیرای تکریم اولدی .

داعی اصدقلری بورایه کله لی ایکی یحق آی اولوب  
شمدی به قدر مفتی افندیگک مغایر دلخواه عالی بر حرکتی  
مشهود و مسموع عاجزانهم اولدی ایسه ده بوبابده  
قناعت کامله حاصل اولمق اوزره تحقیقات عمیقیه  
کیریشلده افندی مومالیه اوتهدن بری وظیفه شناس  
بر ذات صلاح استیناس اولدیغی و حقننده ایدیلن اسنادات  
صرف غرض شخصیدن نشأت ایتدیگی آکلاشلشمش  
اولمغله جواباً عرض واشعار کیفیته ثابرت قیلندی .  
اول بابده امر و فرمان حضرت من له الامر کدر .



— ۶۶ —

عزیزم !

ینه بر التفاتنامه کزی آلم . بولندیگزی یرده  
 تیاترو ، خیال کی اکلنجه محملری اولدیغندن کیجه لری  
 فنا حالدہ صیقل مقده اولدیگزی والیکزه « . . . »  
 نامنده بر رومان کچمش ایسه ده — ادیبانه ترجمه  
 ایدیله مه مش اولدیغندن — بوندن ده کسب انبساط  
 ایدمه دیگکزی بر اسان شاعرانه ایله بسط و بیان  
 ایتدکن صکره حق کتریده حسن توجه برادرانه کزی  
 مبشر کلمات عالیہ ابدال و کیجه لری نصل وقت کچیر مکده  
 اولدیغم سؤال بیوریلیور .

داعیکز تعطیل کیجه لری اکلنجه لی کتابلر مطالعه سنه  
 حصر ایدرم . بونک فوائد مهمه بی مستلزم اوله جنی  
 بدیهیدر . ایام تحصیلیه ده طبیعی الحصول اولان صدای  
 دفع ایتک ایچون ایالیء تعطیلیه ده اکلنجه لی کتابلره  
 مراجعتدن کوزل بر چاره تصور ایدمه میورم . تیاترویه ،  
 خیاله کیتک ویا او یون ایله مشغول اولق انبساط قلوبه  
 یاردیم ایدر کی کورینور سه ده تحصیله یکی باشلامشیلر

ایچون مادی و معنوی بر چوق ضرری استلزام ایدرکه  
بونلرک تلافیسی قابل اوله ماز .

اکلنجه لی کتابلر دیدیکم طرز تحریری کوزل  
اولمقله برابر اطناب نابجادن عاری اولان رومانلر ایله  
نویر افکاره ، تشحید اذهانه خدمت ایدن دیوانلر دره  
بنده کز رومانلردن زیاده دیوانلردن . ملذذ اولدیغم  
جهتله اکثریا دواوین عربیه و فارسیه ، بعضاده مجامیع  
اشعار ترکیه مطالعه سیله وقت کچیریم .

بونلرده اوله کوزل سوزلره تصادف اولنورکه  
السان از برله مکسزین کچه مز . هیج عاقل اولان دستور  
حکمت دینلرکه شایسته بر سوز کوررده آنکله تزیین  
حافظه ایتک فرصتنی فوت ایدرمی ؟

کچن آقشام « دیوان انوری » نی نظر مطالعه یه  
آلشدم . « سکا بر کیمیا اوکرده ایم که اکسیر و صناعتده  
موجود دکلدر . یوری اختیار قناعت ایله که عالمده  
قناعتدن ای کیمیا اولماز . » مالنده اولان :

کیمیا بی کنم ترا تعلیم  
کاندر اکسیر و در صناعت نیست



رو قناعت کزین که در عالم  
 کیمیا بی به از قناعت نیست

قطعه سی مصادف دیده ام عام اولدی .

قناعت — قسمته رضادر . قانع او کیمسه در که  
 مألوف اولدیغی شیر بولندیغی برلرده . مضطرب اولمیوب  
 تمکین اوزره بولنور . « العبد حران ان قنع والحر عبد  
 ان قنع »

کیمیا — لغةً ذکا ايله ممزوج حيله معناسنه در .  
 بومناسه بته بر طاقم بی مغزانی آلدادوب یاره لرینی آلق  
 ایچون قوریلان دولاب احتیاله اطلاق اولنمش . [۱]

جناب انوری معادن خسیسه نی زر خالص یایمق  
 فکر اخامنده بولنوب ده آووجنده کی یاره نی استهلاک ايله  
 صفر الید قالان ویابونلره پیرو اولمق استعدادنده بولنان  
 کیمسه لره خطاباً مذکور قطعه بی سویلنمش .

بویله بر قطعه بی از بر له مه مک ارباب استفاده ایچون

[۱] بوراده کی « کیمیا » دن مقصد مکاتب عالیده تدریس

اولنقه اولان فن صناعی دکلدر .

جائز اولورمی؟ بوکی آثار حکیمانه ایله هم تزیین حافظه  
ایتملی، همده مقتدر برخطاطه یازدیروب لوحه لاتملی.

— استطراد —

[ شوراده بوراده برطاقم لوحه لر کوریلورکه غایت  
کوزل یازلمش، آلتون ایله یاپلامشدر. بونلردن یابر  
آیت کریمینی ویابر حدیث شریفی محتوی بولسان  
لوحه لره دیه جک یوق.

فقط ایچ-لرنده صورت مکلفهده یاپدیرلمش برطاقم  
لوحه لره تصادف اولنورکه غایت آغر روبه لر کینمش  
عج-وزمه لرکی هیچ بر زمان انظاراستحسانی جاب  
ایده من. نظرلرینه مصادف اولان ارباب تمیز یازانک  
امکنه، یازدیرانک پاره سنه آجیر.

خطاطلرمن هر نه دن طولایی اولورسه اولسون  
بویله بی معنی اولان شیلری یازمیوبده هیچ بروقت  
حکمدن دوشمیه جک « بیتلر، قطعه لر، رباعیلر، جمله »  
یازسه لرفنامی اولور؟»



انورينك بوقطعه سى «كلستان» ده كور و بده اونو تمش

اولديغى :

ای قناعت توانکرم کردان  
که و رای تو هیچ نعمت نیست  
کنج صبر اختیار لقمانست  
هر کرا صبر نیست حکمت نیست

قطعه سنى در خاطر ايتدیردى .

« ای قناعت ! بنی ز نیکینار زمره سینه الحاق ایت .  
زیرا سنك مافوقیکده هیچ بر نعمت یوقدر . کنج صبر  
لقمانك اختیار ایتدیكى بر مقام عالیدر . صبرى اولمیان  
کیمسه حکمتده مالک اوله ماز . »

مألنده بولنان قطعه ده خوش دگلی ؟

انورى اغراقیاته منهمك اولديغندن طولانی مدخول  
ایسه ده دیوانی تتبع ایدیلنجه قطعه مذکوره کی مضامین  
حکیمانه یی حاوی بر چوق اشعار عالیده مصادف دیدۀ  
استفاده اولور .

بز انورينك اغراقیاتنه بر نظر وقوفجویانه عطف

ایدوب لوحه حافظهیه حک ایدلمکه سزاوار بولسان  
اشعار حکیمانه سنی بوله رق استفادهیه چالشملی یز .

مشار الیهک هاجیانه اشعارینک ده خوش اولدیغنه :  
« افندی ! اوزوناغک بر مرتبهیه واصل اولمش که  
اهل سماواتدن قولانگه صدا ایریشیر . اکر بویک کی  
عمرک ده اوزون اولایدی ملک الموت اولوردی ده سن  
دیری قالیردک . »

مألنده بولسان قطعه آتیه سی شهادت ایدر :

ای خواجه درازیت رسید ست بجایی  
کز اهل سماوات بکوشت برسد صوت  
کر عمر تو چون قد تو بودی بدرازی  
توزنده بماندی و بمردی ملک الموت

— خاتمه —

بعضی اشعار فارسیه بی هیچه صایار لر . فقط حقیقت  
حال او یله دکلدر . آثار مذکورده انورینک قطعه سی  
کی نیجه پارچه لر واردر .



حاصلی — ارباب مطالعه ایچون — آثار بلغای  
عجمی نظر استفاده دن دور طوتمغه گلز .

بونلرده — وجد آور قلوب — اوپله کوزل  
پارچه لره تصادف اولنور که نظر امعاندن کچیرمه مک  
هیچ روجه ایله جائز اوله ماز .

باقسه آفرانسزلر بزم نظر مطالعه یه آلامقده  
اولدیغمز « شهنامه » نی ترجمه ایتشار . بز بونلرک نیچون  
بیکانه سی اوله لم !

شهنامه ده دستور ادب و حکمت اولمغه شایسته نیجه  
مصارع و ابیات واردر . هله اوپله تصویرات لطیفه  
کوریلور که بونلره نگاه انداز دقت اولانلر ایچون حیران  
قالماق قابل دکلدر .

— ۲۳ —

معروض داعیلردر

... بك بنده لرندن آلدیغم بر التفاننامه ده بالمناصبه  
مجلس فیضا فیض دولترلرند نام عاجزانه مک یاد قیلندیغی

ومیر موما الیهـک فقیرہ اولان قرابتی آکلاشلمسی  
اوزرینه سلام مخصوص سامیلریله ده دل درویشانه مک  
تصبر برینه تنزل بیورلدیغی تبشیر ایدلمش اولدیغندن  
هان :

ای سخن پرور پاکیزه شیم  
قونمسون دامنکه کرد الم

التفاتک بنی مسرور ایتدی  
دل ویرانمی معمور ایتدی

ترانه سیله ایفای وظیفه شکر کذاریه مبادرت ایتدم .  
بویابده کی حسیات منتدارانهم بویله ایکی بیت ایله  
دکل ، ایکی یوز بیت ایله ده تصویر ایدیلهماز .  
بناء علیه قصور مک عفو یله حسن توجه گرامیلرینک  
بقاوازدیادی نیازینه محاسرت ایلرم افندمن حضر تلری .

..

— ۶۶ —

میرم !

فی ۱ حریران سنه ۳۰۹ تاریخلی مکتوبکزی آلدیم .



سـالنامـه ده کـدی . سـوینـدم . هـیچ سـزدن مـکتوب  
آلـیده سـوینـمه مک قابل اولورمی؟ هله... حضرتلرینک  
حق درویشانهمده کی حسن توجه والتفاتلرینی تبشیر  
ایتدیککزدن طولایی نه قدر تشکر ایتسهه آزدرد.

بکا، برادره کوندردیکک مکتوبلرک جوابی آله.  
مدیغندن بونلرک واصل اولوب اولمادیغی سؤال بیوریایوره.  
برادری بیلمم، فقط بکاشمیدی به قدر بو مکتوب بکدن  
باشقه بر مکتوبک کدی.

(...) بک او غلمز بکا ایکی مکتوب کوندردی.  
فوق العاده ممنون اولدم. الله فیضنی مرزاد ایتسون.  
برنجیسنه جواب یازمه مدم اما ایکنجیسنه یازدم. بیلمم  
واصل اولدی می؟ باقی

\*

فضیلتلو افندم

درجه توجّهات علیه فاضلانلرینی معرف لطفنامه

سامیلری ذاتاً منتدار التفات والا درجاتلری بولنان  
 قلب اخلاصمندمی برقات دها وایه دار افتخار ابلدی .  
 شو موفقیتمدن جداً متشکر و مفتخر اولدیغمی  
 کتم ایتمه مک قاعده صداقتشعاری به اوفق دوشر اعتقادنده  
 بولندیغمدن تقدیم رقیمه شکر کذارى به متجاسر اولدم .  
 هر حاله لطف و فرمان افندمکدر .

\*

\*\*

— ۲۶ —

جناب رب العالمین حامی شرع مبین خلیفه رسول  
 امین پادشاهمز افندمز حضر تلرینی الی یوم الدین مقام  
 خلافتده کامبین بیورسون آمین .

داعی اصدق لری سایه معالی وایه حضرت خلافتینا -  
 هیارنده علی الاصول تدریس ایله معلومات لازمه متنوعه  
 استحصال واون سکز سنه فاتح جامع فیض لامعنده  
 تدریس علوم آلیه و عالیله اشتغال ایدم رک کچن سنه  
 حلقه تعلیم عاجزانه مده بولنان طلبه قوللرینه اعطای  
 اجازه موفقی اولدم .



بوموفقیّت عاجز لرنجہ موجب مفخرت ایسہ دہ  
 رمضان مغفرت نشانده حضور کمالات نشور ملوکانہ لرنده  
 تدریس اولنان درس شریفک مخاطبینی عدادینہ دخالتہ  
 مشرف اولمق اخص مطالب داعیانہم اولمغلہ وکترلری  
 کبی خدمتہ علمک تلطیفی خصوصی آمال کرامت اشتمال  
 شہریاریلری جملہء جمیلہ سندن بولمغلہ مخاطبین موما الہمدن  
 خواجہ ... افندینک وقوع وفاتہ مبنی منحل اولان  
 مخاطبلغک عہدہء داعیانہمہ احسانیلہ شرفیاب بیورلمقلغم  
 امنیہ سیلہ خاک پای مکارم احتوای جناب جہانبانیلرینہ  
 وضع جبین استرحام ایلرم . اول بابدہ وقاطبہ احوالہ  
 امر وفرمان نخبہ سلاطین آل عثمان پادشاہ مرحمتمندمن  
 شوکتماہ افندمر حضر تلرینکدر .

\*

جناب خداوندی زوال تاجدار حمید الخصال شہریار  
 دریا نوال پادشاہ معارف پرور و شہنشاہ محاسن کسـتر

افندمن حضر تلری نی الی آخر الایام واللیال تحت عالی  
 بخت عثمانیده شرف آرای کمال بیورسور آمین .  
 کوله لری سایه معارفوایه شاهانه لرنده . . . مکتب  
 رشیدیسنه بالدوام بوسنه شهادتنامه اخذینه موفق اوله ورق  
 حلیه علم و کمال ایله تزیین ایتک اوزره مکتب سلطانی  
 طلبه سی سلیکنه داخل اولمق آرزو سنده بولنیورسه مده  
 پدرم قولاری عجزه اصنافدن اولوب مکتب مذ کوره  
 دخالت ایچون لازم کلان اجرت سنویه یی ویرمه مکته مقتدر  
 اولدیغی کی حواج ضروریه یتیه یی بیله تدار کدن عاجز  
 اولدیغندن و کتر لری کی تکمل ایتک اشتیاقنده اولان  
 بی وایکانه الطاف جهان مطاف ملوکانه لری مبدول  
 اولدیغی هر کون دیده شکران ایله کور ملکده بولندیغندن  
 مکتب مذ کوره بلا اجرة قید و قبول ایله دلشاد بیورلمقلغم  
 خصوصنه فرمان مراحم عنوان شهنشا هیلرینک سزاوار  
 بیورلمسی بابنده سده سنیه حضرت خلافتینا هیلرینه  
 وضع جبین نیاز ایلرم. اول بابده امر و فرمان واحسان  
 فراوان ولی نعمت عالمیان پادشاه بی امتنان افندمن  
 حضر تلرینکدر .



— ۲۸ —

او غلم !

بوسفر کی مکتوب بکده ایشلرک کثرتندن شکایت  
ایدیورسین . شو شکایتدن بوگونلرده نظر مطالعهدن  
آرمامقده اولدیغکی سویلدیگک حافظ دیواننده :

براحتی نرسید آنکه زحمتی نکشید

• مصراعنه عطف دیدۀ امعان ایتدیگک آکلاشیلیور .  
بوکی آثار برکزیده ی مطالعه ایله یالکیز کوکل  
اکلندر مهملی ، ایچلرندن جوامع الکلم اطلاقنه سزاوار  
اولان مصارع و ابیات عالیہ ی انتخاب ایدہ زک از برلیوب  
بونلر ایله تزین افکاره چالشملی .  
دها طوغریسی بوکی آثار برکزیده ی — کل  
ومله دائر اولان ابیاتندن قطع نظر — یابر نکتۀ عارفانه یی  
ویابر حکم حکیمانه یی محتوی بولان مصارع و ابیاتیلہ تنویر  
دیدۀ استفادہ ایتک ایچون اوقوملی .

دیوان حافظ تتبع ایدیله جک اولسه :

چراغ مصطفوی باشرار بولهبیست

مصراعی کی نیجه مصارع عارفانهیه و :

تکیه بر جای بزرگان نتوان زد بکزاف  
مکر اسباب بزرگی همه آماده کنی

بیتی کی بر چوق ابیات حکیمانهیه تصادف اولنور ،  
مرحوم معلم ناجی افندینک :

اویله دلسوزانه تقریر ایت که سوز سینه می  
چاک چاک اولمق نه در بیلمز کریبان قالمسون

بیت عاشقانه سنی حاوی اولان غزل بی بدینک مقطعی  
بولنان :

بر مرقص نغمه ایجاد ایت که ناجی وجد ایله  
عالم امکانده رقصان اولمق بر جان قالمسون

بیته دائر ویره حکم حکم بر آز جانکی صیقه جقدر ،  
مباحثلریکک « وجد ایله » تعبیرینه دائر درمیان  
ایتدکاری فکرلری بکنمیوب اوراده سوز آکلار بر



کیمسه بوله مدیغک ایچون منزویانه یاشامغه مجبور  
اولدیغکی وبو صورت بتون بتون جازکی صیقمقده  
بولندیغکی بیان ایدهرک ایشلرک کثرتندن طولانی  
ایتدیگک شکاتی برقات دها اعظامه چالیشیورسین .

واقعا منزویانه یاشامقدن لذت آلیانلر ایچون اویغون  
برقاچ احباب بوله مامق عذاب الیمدر . فقط « وجدایله »  
تعبیرینک مصراعیندن هر برینه صرفی ممکندر دین افندی  
کیرانجان بر آدم اولمیوب ایجه سوزدن سازدن آ کلار  
طاقمدن بولندیغی افاده واقعه کدن آ کلاشلدیغی جهته  
« کوریشه جک بر آدم بوله میورم ، منزویانه یاشامغه  
مجبور اولیورم . » دیمه کی پک ناجا کوردوم .

بویخنده سنده داخل اولدیغک حالد مو مالیه  
افندیدن ماعدا مباحثلرک کافه سی خودسرانه حرکت  
ایتمش اولدقلرندن حقیقتدن کرکی کبی تباعد ایدلمش .  
هر نهیه دائر اولورسه اولسون بختده اظهار حقیقت  
آرزوسنی برطرف ایدوبده مجرد مباحثنه غلبه ایتک  
سوداسنه دوشن کیمسه — علامه ده اولسه — مغلوبیتدن  
باشقه برشی قازانه ماز .

مباحثلر کدن مومالیه افیدیدن ماعداسی تعبیر  
مذکورک مصراع ثانی به هیچ تعلقی اولدیغنی ادعا  
ایتمشله ، سببده بو تعبیر ، مصراع اولک قیدی اولمیوب  
مصراع ثانی به مرهوندر دیه دعوی ایلمشسین .

« وجد ایله » تعبیری مرهانیکی طرفه قید اعتبار  
ایدلسه معنایه خالی کلامیکی حالده بونک مصراع اوله  
تعلقی یوقدر ، مصراع ثانی به مرهوندر . یاخود  
مصراع ثانی به تعلقی یوقدر ، مصراع اوله مربوطدر  
دییه حکم ایتک موافق معناشناسی دکلدر .

بیت مذکوردهکی « وجد ایله » تعبیری هم مصراع  
اوله ، همده مصراع ثانی به قید اوله بیلیر .

احتمال اوله نظراً بیت : « ناجی ! وجد ایله بر  
مرقص نغمه ایجاد ایت که عالم امکانده رقصان اولدق  
برجان قالمسون » ، احتمال ثانی به نظراً : « ناجی ! برمرقص  
نغمه ایجاد ایت که عالم امکانده وجد ایله رقصان اولدق  
برجان قالمسون . » مألنده اولور .

تعبیر مذکورک کرک برنجی مصراعه ، کرک  
ایکنجی مصراع ، قید اوله بیامسی صنایع شعریه دن



معدود اولوب بو صنعتده « سحر حلال » عنوانی  
 ویرلشدیر . معنایه خلل کلدکن صکره احتمالیندن  
 برینک قوتلی بولنسی صنعت مذکورہ نک حکمنی احما  
 ایدہ من .

بو صنعه اشعار فارسیده چو قچه تصادف ایدیلیر .  
 از جمله حضرت حافظک :

بنال بلبل اکر بامنت سریار یست  
 که مادو عاشق زاریم و کارما زار یست

مطالعی غزل عاشقانه سنده کی :

باستان تومشکل توان رسید آری  
 عروج بر فلک سروری بد شواریست

بیتی ذکر اولنان صنعتی حاویدر .

« خاتمه »

بویابده کی مطالعه می قبولده تردد ایتیجه جک کدن  
 امینم . سن « اوچسده کچیدر . » دین طاقدن  
 دکسین دگلی ؟

— ۶۱ —

« حافظ »

فغان کین لولیان شوخ و شیرین کار شهر آشوب  
چنان بردند صبر از دل که ترکان خوان یغمارا

— ترجمه —

« بوش-وخ و شیرینکار و شهر آشوب اولان قاره  
کوزلورک الن-دن الامان ! یغما ایتمه لایق نعمتی  
حیدودلر نصل یغما ایدر لر سه بونلرده کونلدن صبری  
اوله آلدیلر . »

\*  
\* \*

ز عشق ناتمام ما جمال یار مستغنیست  
بآب و ربك و خال و خط چه حاجت روی زیبارا

— ترجمه —

« بزم ناقص اولان عشقمزدن جانان مستغنیدر .  
کوزل یوز ایچون مشاطه نك تزیناته حاجت یوقدر . »

\*  
\* \*

من از آن حسن روز افزون که یوسف داشت دانستم  
که عشق از پرده عصمت برون آرد زلیخارا

— ترجمه —

« یوسفك كوندن كونه مترقی اولان حسنهندن »



بیایم که زلیخانی عشق پرده عصمتدن البته طیشاری  
حیقار . .

غزل گفتی در سفتی بیا و خوش بخوان حافظ  
که بر نظم تو افشاند فلک عقد ثریارا

— ترجمه —

« حافظ ! غزل سویلداک : اینجو دلدک . کل ! کوزل  
کوزل اوقوکه سنک نظمکه فلک ، اینجو دیزیسی کی  
اولان اولکری ساچسون . . »

— ۳۵ —

« ابو اسحاق »

به پیشم چون خراسانی کر آری صحن بفرارا  
ببوی قلیه اش بخشم سمرقند و بخارارا

— ترجمه —

« بفراخان خراسانی کی بورک طباغنی حضورمه  
کتیرسهک آنک قلیه سنک ( قیمه ) قوقوسنه سمرقند  
و بخارایی باغشلارم . . »

برنج زرد و صابونی اگر داری غنیمت دان  
کنار آب رکن آباد و کلکشت مصلارا

— ترجمه —

« زرده ك حلواك وار ایسه رکن آباد ایرمغنی ،  
کلکشت مصلایی غنیمت بیل . »

\*

\*\*

جمال برء بریان و حسن دنبه کشکک

چنان بردند صبر از دل که ترکان خوان یغمارا

— ترجمه —

« قوزی بریانك جمالی ، کشککک اورتیسنده کی  
تویروغك حسنی یغما ایتمکه دکرلی نعمتی حیدودلر نصل  
یغما ایدرلرسه کوکلدن صبری اویله آلدیلر . »

\*

\*\*

چه آرای بیمشك وزعفران رخسار پالوده

بآب ورنك وخال وخط چه حاجت روی زیبارا

— ترجمه —

« پالوده نی مسك وزعفران ایله نهیه تزین ایدیور-  
سین ! کوزل یوز ایچون مشاطه نك تزیناتنه حاجت  
یوقدر . »

\*

\*\*



مپرس از حکمت سختو وراز سربمهر او  
که کس نکشود و نکشاید بحکمت این معمارا

— ترجمه —

« مومبارك ، و آنك سرت سربسته سنك حكمتندن  
صورمه . زیرا علم حكمتله بومعمای كیمسه كشف ایتدی  
وایده مزده . »

من از آن بوی روح افزا که کیمیا داشت دانستم  
که زود از پرده پرهیز بیرون آرد دل مارا

— ترجمه —

« شیردان طوله سنده کی روح افزا قوقودن بیلدم که  
کوکلیزی قوری پرهیز سوداسندن واز کچیر . »

بگو بسحاق وصف خوشه انکور مثقالی  
که بر شعر تو افشاند فلک عقد ثریارا

— ترجمه —

« بسحاق ! اوزم صالقمنك وصفی برپارچه سویله که  
سنك شعریکه فلک اینجو دیزسی کی اولان اولکری  
صاچسون . »

— ۳۱ —

« ناریخ »

بحق بیت معمور خدا دار السرور اولسون  
فؤاد حکمت آبادی کی کاشانه مدحت

یازلسون زر قلمله طاقنه وصفی بوتاریخم  
نه رعنا قصر نوطرح اولدی ساحلیخانه مدحت

۱۳۱۰

\*

\*\*

— ۳۲ —

﴿ صیغه عطفیه ﴾

صیغه عطفیه — مصدر لر دن — منفی اولسون  
مثبت اولسون — ادات مصدر حذف ایدلدکن صکره  
قالان ماده نك آخرینه متحرک ایسه « یوب » ، سا کن  
ایسه حرکه لهرک « و ب » علاوه قیلان کلمه دینور .



برر مثال :

چالشمیوب اوطور انلرده ذل و یاسه باقك  
 اوطور میوب چالیشانلرده عز و شانی کورك  
 « معلم ناجی »

§

( کذران ) ایلوب زمان خزان  
 ینه عالمده نوبهار اولمش  
 ظلمت شب کچوب نهار اولمش  
 باشلامش ختدهیه زمین و زمان

اکرم بك

بوصیغه کلامه حسن و یرمك ایچون استعمال اولنوب  
 بر فقردهه ایکی-دن زیاده سی خوش کورلمز . حتی لزوم  
 کورلمدکجه بر فقردهه بردن زیاده صیغه عطفیه بولندر .  
 ماملیدر .

الله قبرینی پر نور ایتسون مرحوم معلم ناجی افندیئک :

« امضایه نقطه قونماق نیچون ؟ »

دیه باشلایان مقاله مفیده سنده کی :

« امضاسنك صوك حرفى چكوب اوزاغفه مساعد  
اوليانلر » بزم امضا ياقيش-يقلې دوشميور « ديه تأسف  
ايدرده مثلا اسمنك آخريزه تصادف ايدن « م » حرفته  
جيبندن بر قويروق طاقوب بوقويروغى يوقارى يه  
طوغرى چكر اوزادر . »

فقيره سى ايكي صيغه عطفيه يى حاوى اولمقله برابر بونلر  
يك طبيعى ايراد ايدلكارندن كلامه حسن ويرمشلردره  
بوفقره ده كي صيغه عطفيه لر مربوط بولندقلرى  
كله لر شكلنه قونلسه يعنى « چكوب - طاقوب »  
دينلميو بده « چكمكه - طاقار » دينلمش اولسه ايدى  
نظم طبيعى يه موافق اولمازدى .

بر طاقم فقراندن تشكىل ايدن مقاله لرده بيله بو  
صيغه نك چوقچه بولنمى فنا حالده كوزه چارپيور .  
اسلاف بوبابده اسراف ايتمشلر . مثلا نركسينك :

در زمين بوسىء عبوديت

سرلوحه لى اوفه جق بر مقاله سنده اوندن زياده صيغه  
عطفيه كوريلور .



آثار عالیله‌ری معاصرینه برر معلم ادب اولان  
اجله ادبا بوصیفه‌نی پک آز استعمال ایتشاردر .

مشار الیهمدن برینک « محبت » عنوانلی بنده  
مطولنده اوچ ، دیکرینک بر جوابنامه اطولنده درت  
صیغه عطفیه تصادف اولنورکه بولنده پک طبیعی  
اوله رق قوللانمشاردر .

\*\*\*

صیغه عطفیه ، یا افعال بسیطه و مرکبه‌دن ویا اسم  
فاعل ، اسم مفعول ، مصدر ، حال ترکیبی ایله صله ،  
ربط صیغه‌لرندن برینه مربوط بولنور :

۱ — افعال بسیطه و مرکبه‌دن برینه مربوط  
بولنورسه اوفعل هانکی زمانه دلالت ایدرسه بونده  
دخی اوزمان اعتبار اولنور .

برایکی مثال :

« حکیمه ، مالک اولدیغی حکمت باشقه‌سنده کندی  
علمنه فائق علم اولدیغی کوس‌تر . بنساء علیه فوقنده

بولتان دانشه قارشى اظهار تواضع ايدر . جاهل ايسه  
 كندىسنى منتهى قياس ايتديكندن سائقه جهالتله موقع  
 اعتباردن دوشوب هر كسك منفورى اولور . «  
 » معلم ناجى «

## §

« بر وزير طرف شاهنشاه كردون سريردن  
 رخصتيافته كال استقلال و احسانديده توجه و اقبال  
 اولدقدن صكره واجبدركه مقتضاي خير انديشي  
 ونيكخواهي پادشاهيده سرمو تقصير و مسامحي روي  
 كورميوب لزومي تقديرنده سلامت وجود پادشاه همچون  
 كندى نفسى فدادن كردن پيچ تعالى و عناد اولميه . «  
 » تركسى «

اخطار — دائما فعل مثبت اولورسه صيغه  
 عطفيه نكده مثبت ، فعل منفي اولورسه صيغه عطفيه نكده  
 منفي اولمى اقتضا ايتمز . بعضاً فعل مثبت اولورده  
 صيغه عطفيه منفي ، فعل منفي اولورده صيغه عطفيه  
 مثبت اوله بيلير .

برايكى مثال :

« اسد الغابه ده ابو عامر كنيه سنده مذكور اولانلر



میاننده بری حضرت ابو موسی، الاشعرینک عمی و دیگری  
برادری اولمق اوزره ایکی ابو عامر الاشعری کوسترلمشدره  
ایکنجینک یالکیز مع عشیره اسلامی ذکر اوانوب  
تاریخ وفاتی کوسترلمشدر . «

« ذهنی افندی »

## §

شوق کیمه طور میوب کیدرسین  
اللهی جست و جوایدرسین

« معلم ناجی »

تعقیب ایدن فعلک مثلاً مفرد غائب اولمسیله صیغه  
عطفیه نکه ده مفرد غائب حکمنده بولنسی لازم کلز ،  
بعضاً فعل مفرد متکلم اولورده — سـوق کلام  
اقتضاسـنیجه — صیغه مذکورده مفرد غائب تقدیرنده  
بولنور :

« دنیا ده نه قدر آلام واکدار وار ایسه جمله سی  
باشمه اوشوب بی اختیار زقاقه فیرلادم . »

« ن »

ایشته بو مثالده کی « اوشوب » صیغه عطفیه سی  
 « اوشدم » دکل ، « اوشدی » تقدیرنده در .

فقط فعل جمع اولوب ده صیغه عطفیه نك مفرد  
 حکمنده بولمسنه مساغ یو قدر . زیرده کی عبارده صیغه  
 عطفیه نك بو صورتلده استعمالنه دلیل اولماز ، برهان  
 مسامحه عد اولنور :

« سن عرض دیدار ایدنجه روزکار قوتدن دوشوب  
 بلوطلر حضورنده اثبات وجوددن شرم ایله فرار  
 ایدرلر . »

..

۲ — اسم فاعل ، اسم مفعول ، مصدر ، حال  
 ترکیبی ایله صله ، ربط صیغه لرندن برینه مربوط  
 اولورسه یا ایکی سی ده مثبت ، منفی ویابری منفی ، دیگری  
 مثبت اوله بیلیر .

برقاج مثال :

« مصدرده اولان خاندان عباسی شعبه سنی اورتهدن  
 قالدیروب ملوک عثمانیه نی خلیفه انام ایدن سلطان  
 سلیمدر . »

« ن »



## §

« طریق تعلیمده جداً چالیشامیوب مجالس عرفایه  
ملازمت ایدلمدکجه انسان کامل اولوق مشکدر . »  
« مستقیم زاده »

## §

بعضاری برخدمتده بولنمیوب کندی خانه سنده ویا  
چفتلکندده مقیم اولدیفی حالدده ارکان ایالتدن عد  
اولنور . »  
« جودت پاشا — بر مکتوبندن »

## §

« اسلوب ترکی اوزره جریان ایدن تتابع ، علامت  
اضافت اولان کاف ایله اولوب اولمامقدن خالی قالماز .  
کاف ایله اولورسه ایکیدن ، کافسز اولورسه اوچدن  
زیاده سی فصاحتی اخلال ایدر . »  
« معلم ناجی — معانی مقاله سندن »

تنبیه — صیغه عطفيه كرك افعال بسیطه و مرکبه دن.

و كرك اسم فاعل ، اسم مفعول ، مصدر ، حال ترکیبی  
ایله صله ، ربط صیغه لرندن برینه مربوط بولنسون ،  
بونلر بعضاً منفی اولورده صیغه عطفیه ، مثبت اولدیغی  
حالده منفی حکمنده بولنور .

بر قاج مثال :

« هانکی عارض رعنا واردرکه عذارمه تابانی حس  
وخاشاک جهاه قاریشوب کیتمه مشدر . »  
« سنان پاشا — تضرعاتندن »

§

ال ویرمدی مکاره دنیا دیه ای دل  
آواره اولوب ایلمه اظهار تلاشی  
جمع ایله مش مجلس عالم ( قورولادن )  
عرفان ایله بریزده خدا عقل معاشی  
« ابن کمال »

..

صیغه عطفیه نك مابعدنده افعال وصیغ مذ کوره دن  
بر قاج دانه سی بولنه بیلیر . صیغه مذ کوره بونلردن هر



وقت برنجیسنه مرتبط اولماز ، بعضاً صکره کیلردن برینه  
مربوط بولنور :

« حکیم مشارالیه — ولو حقسنز اولسون — کرک  
ذاته و کرک آثارمه متعلق هر نه سویلسه لر بنم ایچون  
اک موافق حرکت قطعاً مقابلهیه تصدی ایتیوب او یله  
بر حکیمک بنی نصل مؤاخذه ایتمکده اولدیغنی کوردرك  
ممکن مرتبه حصه یاب ایتباه اولمقدن عبارتدر .  
» معلم ناجی »

صیغه عطفیهیه بعضاً « ده » الحاق اولنور . بو  
« ده » صیغه مذ کورمهیه بیتشدیرلمز ، آیری یازیلیر :

پرتو کسیلوبده ای ضیا پوش  
ایتسه م سنی شویله بر در اغوش

« معلم ناجی »

نظمده صیغه عطفیه — برینه کوره — مربوط  
بولندیغنی افعال و صیغ مذ کورمدهن تأخیر اولنه بیلیر .

بر ایکی مثال :

جسمن احاطه ایلدی محروطی نظر  
کیردی نهان اولوب او پری زیر چادره

« سامی »

## §

ایلر نی طور میوب زیارت  
بیت الحزنمه بیک مسرت

« معلم ناجی »

صیغه عطفیه نك ما بعدنده بولنمی لازم كلن كلمات  
مباحوث عنہادن بریسی بولندیرلیوب صیغه مذکورہ نك  
ضمیر نسبی ایله « در » ادات خبرینہ ربط ایدلدیکی  
کوریلپورسہده بوصورت ، شیوۂ لسانہ مغایر اولمقلہ ،  
دكل نثرده ، نظمده بیله تجویز ایدلمز .  
بناءً علیہ زیردہ کی عبارتہ لر بویولدهده استعمالہ  
سند اولہ ماز :

• کویلری بیوت متفرقہدن عبارت اولوب هر  
فردك خانہ سی تارلاسی باشندهدر .

« برمکتوبدن »

## §

• اقدامك حسنیاتی و تسبیک قبحیاتی شخص واحدہ  
منحصراً اولیوب برہیئت مجتمعهده پك مؤثردر .  
« برمقالہدن »



برنجی عبارتده کی « اولوب » صیغه سی « در » ،  
 ایکنجی عبارتده کی « اولیوب » ، صیغه سی ده « دکدر  
 موقعنده ایراد ایدلمش .

— خاتمه —

شمدی صیغه عطفیه « در » الحاقیه اسحاقک :

فرقتکله ینه بردرده دوشوبدر اسحاق  
 گاه بیلمز اونودر کندیسنی گاه بیایر

بیتمده کورلدیکی اوزره « دوشوبدر » صورتندده  
 استعمالی مهجوردر .

\*

\* \*

— ۳۳ —

هناك پای حضرت فتوا بناهی به

معروض جاریه دیرینه لریدوکه  
 زوجم قدمای رجال علمیه دن ... افندی « جناب

یزدان افندمزی مقام معالی مشیخته الی آخر الدوران  
 کمال عافیت و اقبال ایله کامران بیورسون « بوندن اوچ  
 کون مقدم ارتحال ایدوب جاریه لریله مخدوم کوله لری  
 کیرا بوجاقلرنده بی کس و بی چاره بیراقش اولدیغندن  
 واحوال ضرورت اشمال کمتراه من حقیقه آجینه جق  
 براده اولوب بونک دوامنه ایسه مرحمت مسلمه  
 مفتی الانامیلرینک راضی اولیه جفی بدیهی بولندیغندن  
 احتیاج جزاء درجه سی سائرله قیاس ایدلیوب مقدار  
 کافی معاش تخصیص بیوریله رق برعاجز عائله نک یکیدن  
 احیای بیورماسی خصوصنی استرحامه مسارعت و دائماً ورد  
 زبانم اولان دعای تمادیء عمر واجلال حضرت پادشا  
 هی به تردیفاً دوام عافیت و اقبال فتواپناهیلری درود  
 مسعودیه مشغوله اولدیغمک عرضنه محاسرت ایلرم  
 اول بایده .

\*  
 \* \*

— ۳۴ —

جناب رب العالمین حامی شرح مبین نور دیده مسلمین



نائب مناب رسول امین شهنشاه عدالتمند من غازی عبد  
الحمید خان افند من حضر تلرینی الی یوم الدین مقام  
مقدس خسروانه لرنده کامبین بیورسون آمین .

داعیء کتاری یکرمی سنه دن بری . . . جامع نور  
لا معنده مذاکره علوم ایله اصرار وقت وساعت و بو  
وسيله ایله دعای دوام عمر و عافیت جهانبانیلرینه مواظبت  
ایتمکده اولدیغم حالده معاش داعیانهم اداره یتیمه غیر  
کافی اولوب دیون کثیره کرفتار اولدیغمدن ورمضان  
مغفرت نشانده حضور فیض انشور شاهانه لرنده تقریر  
اولنان دروس شریفه نك برنده بولمق شرقیه مظهر  
اولمق آرزوسی اوتهدن بری جایگیر ضمیر عاجزی  
بولندیغندن بوکره منحل اولان مخاطبلغه تعیین اولنه رق  
ایکی جهتله ده داشاد بیورلماغم خصوصنه اراده سنیه  
جناب ملوکانه لرینک بی دریغ بیورلمسنی استرحام ایلرم .  
اول بابده امر و فرمان شهریار مرحمت گستر و تاجدار  
علما پرور ولی نعمت بی منتمز پادشاهمز افند من حضر .  
تلرینکدر .

— ۳۵ —

سعادتلو افندم حضر تلری

بوکره عهدۀ داعیانہ ما احسان بیوریلان رتبہ نک  
 تبریکنی حاوی التفاتنامہ سامیلری پیرایش انملہ تعظیم  
 و عبارات عالیہ سی حق عاجزیدہ کی حسن توجہک  
 ازدیادینی تبشیرایتدیکی جہتله موجب سرور عظیم اولدی.  
 بویله توجه نامہ عالیلرینہ نائلیت داعیلرنجه شکرانی  
 غیر قابل بر نعمتدر . بناءً عالیہ وظیفہ شکر گذاریدہ  
 درکار اولان قصورمک عفونی تمنا وابدالنه عنایت  
 بیوریلہ کان توجہات معالی آیات کریمانه لرینک بقاوتزایدی  
 خصوصنی خاصہ استدعا ایلرم. هر حالده لطف و اراده  
 افندمنز کدر .

\* \*

— ۳۶ —

عربیہ نظارت علیہ سی مستشارلغنی جانب عالیہ

سماحتلو افندم حضر تلری

مأموریت مخصوصه ایله « ... » اعزام بیورلمش



وبوکره عودت ایتش اولان مستنطق ... افندی بنده-  
 لرینک حامل اولدیغی تعالیمات موجبنجه حسن ایفای  
 وظیفه یه پک کوزل صرف همت ایلیمش اولدیغنک عرض  
 و بیانی وسیله سیله مدار مباحات عدایده کلدیکم و دوامندن  
 امین بولندیغم توجهات جایله کر مکاریلرینک تجدد  
 وازدیادی تمنیات مخصوصه سنه اجتناسار ایلرم . اول بابده

\*  
\* \*

— ۳۷ —

( شیخ سعدی )

رفیق مهربان و یار همدم  
 همه کس دوست می دارند من هم

— ترجمه —

« رفیق صادقی ، یار موافقی هر کس دوست اتخاذا  
 ایتدیکی کی بنده ایدرم . »

\*  
\* \*

نظر بانیکو ان رسمیت معهود  
نه این بدعت من آوردم بعالم

— ترجمه —

« کوزلاره باقق رسوم معلومه دندر . بو بدعتی  
عالمده بن ایجاد ایتدم یا ! »

\*  
\*\*

توکر دعوی کنی پرهیزکاری  
مصدق دارمت والله اعلم

— ترجمه —

« اتقا دعواسنده بولنورسهك سنی تصدیق ایدرم .  
فقط طوغریسنی الله بیایر ! »

\*  
\*\*

وکر کوی که میل خاطر من نیست  
من این دعوی نمی دارم مسلم



— ترجمه —

« اکر خاطر مایل ایتیور دیر ایسه ک بن بود عواکی  
تسلیم ایتیم . »

\*  
\*\*

کرفتار گمند خو بر ویان  
نه از مدحش خبر باشد نه از ذم

— ترجمه —

« کوزلار ک گمند زلفنه کرفتار اولانک نه مدحدن ،  
نده ذمندن خبری اولماز . »

\*  
\*\*

چو دست مهربان بر سینه ریش  
بکیتی در ندارم هیچ مرهم

— ترجمه —

« دنیاده سینه مجروحده دست مهربان کبی هیچ  
بر مرهم بوله نم . »

بگردان ساقیا جام لبالب  
بیاموز از فلک دور دمام

— ترجمه —

« ساقی ! طولو قدحی دوندرو ، فلکدن دور دمامی  
اوکرن ! »

\*  
\*\*

اگر دانی که دنیا غم نیرزد  
بروی دوستان خوش باش و خرم

— ترجمه —

« دنیانک مکدر اولغه دکری اولدیغنی بیلیور  
ایسهک دوسته کوزل معامله ایله ، خرم کورون . »

\*  
\*\*

غنیمت دان چومی دانی که هر روز  
ز عمر مانده روزی می شود کم



— ترجمه —

« هر کون باقی قالان عمر کردن بر کون اکسلد یکنی  
بیلمیور ایسه ک ایام عمری غنیمت بیل »

\*

..

منه دل بر سرای عمر سعدی  
که بنیادش نه بنیاد است محکم

« سعدی ! کاشانه عمره کوکنمه ، زیرا بونک  
بناسی محکم دکدر . »

\*\*

\*\*\*

— ۳۸ —

﴿ ابواسحاق ﴾

برنج زرد و مرغ و قند باهم  
همه کس دوست می دارند من هم

— ترجمه —

« زرده‌بی ، مرغی ، شکری هرکس سودیکی کبی  
بنده سورم . »

\*

\*\*

زحلوا زله می بستند زین پیش  
نه این بدعت من آوردم بعالم

— ترجمه —

« بوندن اولده حلوان طوپ یاپارلردی بوبدعتی  
عالمده بن ایجاد ایتدم یا ! »

..

\*\*

اگر کوی که میل کشاکم نیست  
من این دعوی نمی دارم مسلم

— ترجمه —

« اگر کشاکم میلم یوق دیرسه که بن بو دعوای  
تسلیم ایتتم . »

\*

\*\*



و کر کو بی که صفرائی مزاجم  
مسلم دارمت واللہ اعلم

— ترجمہ —

«اگر صفرائی مزاجم دیر سداک بونی تساجم ایدرم،  
فقط طوغریسنی الله بیایر .»

\*

..

مراباری زکنکر زخم خاریست  
که آن رادنبه بریانت مرهم

— ترجمہ —

«بندہ آزیجق (کنکر) نام اوتدن دیکن یارمسی  
واردرکه آنک مرهمی بریان اولمش قویرقدر .»

\*

\*\*

مکو بارشته سوز دنبه زنهار  
که ناکه باز کوید پیش شلغم

« یوفقه یه قویروغك یانمسنی صاقین سویلمه ، زیرا  
آنسزین شلغمك یاننده بلیکه سویلر . »

\*  
\*\*

غنیمت دان در اول صحن بغرا  
که بنیادش نه بنیادیست محکم

— ترجمه —

« ابتدا بورك طباغنی غنیمت بیل که آنك بناسی  
محکم دكلدر . . »

\*  
\*\*

در آن دم وصف نان می گفت بسحاق  
که از کندم حذر می کرد آدم

— ترجمه —

« آدم بغدادین اجتناب ایتدیکی زمان بسحاقا کمکک  
وصفی سویایوردی . »

\*  
\*\*



— ۳۹ —

معروض داعی دیرینه لریدرکه  
 من غیر لیاقة عهدۀ داعیانہ مہ تفویض بیوریان برات  
 سنجاغنه کله لی ایفای حسن خدمت و عمومک خشنودینی  
 قازانه رق بوصورتله استجلاب دعوات خیریه لرینه  
 مواظبت ایتکده اولدیغمه بوندن ایکی ماه مقدم اهالی  
 طرفندن حضور مفتی الانامیلرینه تقدیم قیلان مضبطه  
 شهادت ایلیمکده بولندیغندن وانفصال عاجزانه مہ برایکی  
 آی قالوب موسم شتاتک تقریبی جهتله بورادن حرکت  
 ایسه ممکن اوله میه جفندن لطفاً و مرحمةً ایکی ماه دها  
 تمدیدمدته مساعدۀ جلیله حضرت شیخ الاسلامیلرینک  
 ارزان بیورلمسنی استرحام ایلرم . اول بابده

— ۴۰ —

مقام سامی منجبت علیابه

معروض بنده کمینه لریدر  
 ولایتی داخلمده نفس . . . قضا سنده . . . محله سی

اهالیسندن فلان و فلان ایله بینهلر مزده تحدث ایدن  
 وراثت دعواسی علی الاصول قضای مذکور محکمه  
 شرعیه سنده رؤیت اوله رقی ائمهده تنظیم و لاجل  
 التصدیق باب و الای حضرت فتوایناهیله رینه تقدیم ایدلمش  
 اولان برقطعه اعلام شرعی ایله خصملم طرفندن  
 برای تمیز و یریان لایحه اعتراضیه مکتوبی قلمنده هر  
 نصابه ضایع قیلنمش اولمغله باعرضحال وقوع بولان  
 مراجعت مستمندانهم اوزرینه خرج التمسین  
 مذکور اعلام ایله لایحه اعتراضیه نك برر صورت  
 مصدقه سنك مقام سامی جناب شیخ الاسلامیلرینه  
 ارسالی حقیقه قضاء مذکور نیابت شرعیه سنه فی ۲۳  
 رجب سنه ۳۰۹ تاریخی والی بش نومرولو برقطعه  
 امرنامه عالی شرف تسطیر بیورلمشیدی .

حال بوکه نائب افتدی اجرت ویرلمدجه اوراق  
 مذکورینی کوندرمیه جگنی بیلدیرمکده اولدیغندن  
 و مومالیهك شو حرکتی مغایر رضای عالی اولوب  
 حقوق صریحه عاجزانه مكده ضیاعنی مستلزم بولندیغندن  
 بلا خرج ضبط ورقه لریله لایحه اعتراضیه و اعلامك  
 مقام معالی حضرت مشیختیناهیلرینه سرعت ارسالی



ایچون قضای مذکور نیابت شرعیه سنه اکیذا بر قطعه  
امرنامه عالی تسطیری خصوصه مساعده جلیله جناب  
ولی النعمیلرینک سزاوار بیورلمسنى التجاکاه بی چارکان  
اولان آستان معالی عنوان گرامیلرینه ناصیه سالی عبودیت  
اوله رق استرحام ایلرم . اول بابده امر و فرمان حضرت  
ولی الامر کدر .

\*

\*\*

— ۴۷ —

معروض داعی دیرینه لریدر

من غیر لیاقة نیابتی عهده کترانه مه احسان بیوریلان  
... قضا سندن آب وهواسیله امتزاج ایده مدیکمدن  
طولانی بوندن سکرز ماه مقدم استعفا ایله در سعاده  
ککش ایدم .

قضاء مذکوره کیدیلوب ده ایکی بچق آی صکره  
بالاستعفا عودته مجبور اولیشم عاجز لرینی دیون بی شماره  
کرفتار ایتدیکی شویله طور سون او وقتدن بری حال  
داعیه انهمه مناسب بر قضا نیابتیله بکام بیورلمدیغمدن

احوال یأس اشمالم تحمل اولنه میه جق بر راده میه کلامه  
مسلم جهان اولان شفقت جناب ولی النعمیلرینه صیغنه رق  
آچیقده بوانان... قضاسی نیابتنه تعین بیورلمقلم خصوصنه  
مساعده جلیله فتوا پناهیلرینک بی دریغ بیورلمسی استر-  
حانه جرأت ایلرم. اول بابده

#  
\* \*

— ۴۶ —

محل مأموریت علیه لرینه بالعافیه مواصلت بیورلدیغی  
مژده سنی حاوی احساننامه کریمانه لری پیرایه دست  
تعظیم اولدی .

بوراده کچیریلن زمان محبتک شمدیلک رسیده ختام  
اولدیغی تکرار تخطر اولنمغله محزونیت ایچنده قالندیسه ده  
ابرازینه عنایت بیوریلان توجهات کر مشعاریلری بو  
محزونیتی تعدیل ایلدی .

قرباً حسن صورتله ینه شرف صحبت علیه لرینه  
نائلیتمی خدادن تمنی ایدرو توجهات مفیخرت آیات



حقوق پروریلرینک حق عاجزانه مده کوندن کونه متزاید  
اولنه جغنی امید ایلرم .

\*

\*\*

— ۴۳ —

دولتلو افندم حضر تلی

... نظارت جلیله سنک عهدۀ استیصال دولتیرینه  
تفویض بیورلدیفی خبر مسعدت آوری جمله دن زیاده  
داعیلرینی حصه یاب مسرت ایلمش اولدیغندن عاجزانه  
ایفای رسم بهین تسعیده هئابت و معتاد عبیدانه م اولدیغی  
اوزره دوام و ازدیاد عافیت و اقبال دستور اعظمیلری  
دعاسنده ویکانه باعث فیض و افتخارم اولان توجهات  
مکارم آیات داور افخمیلرینک بقا و توافری تماسنده  
بولندیغمک عرض و بیاننه جرأت ایلرم .

\*

\*\*

— ۴۴ —

فضیلتلو افندم حضر تلی

کفایت بلند رتبت فاضلانلرینک برکوچک اثری

ولمعه فشانی نیر اقبال کریمه لرینک بر مقدمه مسعدت  
 کستری اولمق اوزره بوکره ... باش کتابتک ذات عالی  
 کمالینا هیلرله تشرف ایتدیکی سامعه پیرای فخر و مسرت  
 اولمش اولمغله توافر شان و اقبالاری ادعیه خالصه سینه  
 تردیفالوازم صداقتدن بولندیغی وجه ایله عرض تهنیت  
 و بوکوزل وسیله ایله حق داعیانه مده مجزوم البقا اولان  
 توجهات دیرینه حقوق پروریلرینک آثار جلیله ازدیادینی  
 کورمه کله مفتخر بیوریه جغم خصوصنده کی امنیت اخلاص  
 صمدانه مک ابرازینه جرات ایلرم .

»  
 \* \*

— ۵۵ —

میرم !

ینه بر مکتوبکی آلام . بونده صنایع ادبییه دائر  
 خیلی سوز وار . « مناظر الانشا » ده اولان غزله  
 متعلق ایضاحاتی بکنیورسین .

واقعا حسین واعظک « بدائع الافکار فی صنائع  
 الاشعار » عنوانلی اثرنده غزله دائر بسط ایدیان



مطالعاته نظراً خواجه جهانك « مناظر الانشا » ده  
ویرمش اولدیغی ایضاحات ده شمولیجه در .  
فقط معلم ناجی افندی مرحومك آثار استادانه سندن  
اولان « اصطلاحات ادبیه » سنده غزله دائر تمهید  
ایدیلن مطالعات مشكل براندازانه بوبابده کیمسه سوز  
بیراقمامشدر .

مرحومك بواثر برکزیده سنی نظر مطالعهیه آلوبده  
روحنه فاتحه خوان اولیه جق بر سخن شناس تصور  
ایدهم .

شمیدییه قدر — ترکیه اولسون ، فرسجه  
اولسون — نظر مطالعه دن کچیروبده « صنعت ترصیع » ی  
حاوی اولان سوزلرده کوزل برپارچهیه تصادف اولنه  
مدیغی درمیان ایدلدکن صکره دینیورکه :  
« جناب جامنیک :

حرز جانها ست نام دایرما  
ما اعز اسمہ وما اعلی

مطلعی کی ابیات ملامعی پک سورم . بویله اولان بیتلرده  
باشقه قوت ، باشقه لطافت کوریلور . «

واقعا «ایکی فقره دن هر برینی تشکیل ایدن الفاظک  
وزن وقافیه جه بر برینه توافقندن عبارت» اولان «ترصیع»،  
کلفت محضه اولدیغندن آثار مرصعه ده کوزل سوزلره  
یکده تصادف اولنه مازسه ده هیچده یوق دکلدیر. بعضاً  
انورینک :

ای منور بتو نجوم جمال  
وی مقدر بتور سوم کمال

مطلع مرصعی کی آثار سایسه ده کورلدیکی واردیر.  
بومطلع، قوامی، کنجوینک :

ای فلک راهوای قدر توبار  
وی ملک راثنای صدرتو کار

مطلع مرصعندن خوشدر.  
شناسینک :

نقل و کتاب مائل تقدیر ایدر بزی  
عقل و حساب قائل تدبیر ایدر بزی

بیت مرصعی ده فنا دکلدیر .



غریب دگلی؟ بعض کتب ادبیہ دہ «ترصیع» ہ  
 دائرہ سرد ایدیان مثالار اکثریا مثل لہہ غیر مطابق!  
 از جملہ «مبانی الانشا» دہ صنعت مذکورہ یہ دائرہ  
 ایراد قیلان امثلہ میانندہ:

«بشردہ دائم اولان کادر، جمال متحول اولور»  
 اُردہ قائم اولان مقادر، مال منتقل اولور»  
 کلامی کوریلیور.

شمدی بوکا «مرصع» دینیله بیلمی؟

دینیله مز. چونکہ «متحول» کلمہ سنہ مقابل اولان  
 «منتقل» کلمہ سی قافیۃً موافق ایسہدہ و زناً یعنی حرکہ  
 وسکونندہ موافق دکادر.

مرحوم مشارالیه لغت کتابندہ «ترصیع» ی بروجه  
 بالا تعریف ایتدکن صکرہ نمونہ اولہرق بیت آتینی  
 ایراد ایدیور:

محصردر سوزلرم اوصافکہ

منتظر در کوزلرم الطافکہ

«لا»

سروزی مرحوم ( ۱ ) ده تالیف کرده سی  
اولان « بحر المعارف » ده صنایع بدیعیه بی جامع اولق  
اوزره تنظیم ایتش اولدیغی قصیده بك مطاعی اولان :

ای سکندر در سلیمان سطوت و داراب دار  
وی غضنفر فر نریمان رتبت و شهراب وار

بیثنی « ترصیع » ، مثال اوله رق یازیور .

دقت ایدیل یورمی ؟ برنجی بیتده « منحصر در » ایله  
« منتظر در » ، « سوزلرم » ایله « کوزلرم » ، « اوصافیکه »  
ایله « الطافیکه » کله لری قافیه اولدیغی کی وزناده یکدیگریله  
توافق ایلمیشلر .

حال بوکه ایکنجی بیتک ، صراع اولنده بولنان « سکندر ،  
سلیمان ، سطوت ، داراب » کله لرینه ، صراع نایسینده  
، قباللری اولان « غضنفر ، نریمان ، رتبت ، شهراب »  
کله لری قافیه موافق ایسه لرده وزناً موافق دکلر در .

( ۱ ) مثنوی شریفه فارسی ، کلمتانه عربی ، دیوان حافظه  
ترکی شرح یازان ذاتدر . بونلردن باشقه ده برچوق تالیفاتده  
وارددر . ( ۹۶۹ ) ده وفات ایتمدر .



نه جهتم نمی؟ حر که جهتمدن!  
 از جمله «سکندر» کلمه سنک برنجی حرفنک حر که سی  
 کسره اولدیفی حاده مقابلی بولنان «غضنفر» کلمه سنک  
 برنجی حرفنک حر که سی فتحه در.  
 اسلاف توسیعاً حر که ده مسامحه بی تجوینز ایتشلساده  
 معلم مرحومک بو بایده کوسه تردیکی نمونه نظرراً بوکا  
 جواز ویرمدیکی آکلاشیلیور.  
 البته مسامحه دن عدم مسامحه اولادر.

\*

\*\*

«شعری ایکی ویا اوچ لسانی مزج ایدهرک سویامکدن  
 عبارت بر صنعت ادبیه دیه تعریف اولنان «تلمیع»  
 دائر سویلییه حکم سوزلرک برنجیسی صنعت مذکورده  
 حاوی شعره «ملامع» دنیلمه سی توصیه سندن عبارتدر.  
 بو صنعت فارسی ایله ترکیه یه مخصوص کیدر. بلغای  
 اعجام ایچنده صنعت مذکورده ابراز مهارت ایدنلرک  
 برنجیسی جناب جامیدر.  
 مشارالیهک:

«اگر خصیصه فهمه مالک ایسه ک نایک اسراری

بتون سماعدره عقلك قياس ايله بونی ادراك ایتمی  
ممکن دکلدره « مآلنده اولان :

اسرارنی ارفهم کی جمله سماعیست  
لایمکن ان یدرکها العقل قیاسا

بیتمی « تلمیع » که کوزل نمونه لرننددر .  
لسانمزده « تلمیع » ایکی صورتله جلووه کر اولدیغندن  
اشعار عثمانیهده بو صنعتی حاوی ابیانه - فارسی به  
نسبتله - یک چوق تصادف ایدمک لازم کایر سهده شعر امن  
بو وادیده سخنوران عجم قدر خامه ران اوله مامشاردر .

سنسین ایدن امداد ايله ممون صعفای

دل قطره سیماب شدای صبر کجانی

« معلم ناجی »

بو بیتلری یازارکن وادیء نظامک اکثر اقسامنده  
اولادینی کی « تلمیع » لی شعر سویلمکده ده برنجیلاکی  
احراز ایتمش اولان فضولینک :

قدانارالعشق للعشاق منهاج الهدا

سالاک راه حقیقت عشقه ایلر اقتدا



مطامع عاشقانه سی خطاور ایتدیکندن بویله « تلخیص » لی  
 اشعارندن بر قاج بیت ده یازمخی مناسب کوروب  
 اوسخنور یکانه نك دیوانه بالمراجعه زیرده کی نعت کونه  
 غزلی انتخاب ایلدم :

### « غزل »

وصلک بکا حیات ویرر فرقتک ممات  
 سبحان خالق خالق الموت والحیات

هجرانکه تحمل ایدن وصلکی بولور  
 طوبی لمن یساعده الصبر والثبات

مهر کدر آفتاب مقاصد وسیله سی  
 ماشاء من اراد به الفوز والنجاة

دوگمش ریاض طبعمه باران شوقی  
 من انزل المیاه واحی بها النبات

حق افرینشه سبب ایتدی وجودی  
 اوجببت بالظهور ظهور المکونات

ایزد سریر حسنه سنی قیلدی پادشاه  
اعلی کمال ذانک فی احسن الصفات

قیلک ادای نعت فضولی تمام قیل  
کلت بالسلام و تمت بالصلاة  
خوش دگلی؟

— خاتمه —

« صنعت تلمیع » ده لعله فشان اقتدار اولق ایچون  
عربییه، فارسییه ایجه و قوف اقتضا ایدر. بوایکی کنجینه  
بی کراندن التقاطه قدر تیاب اوله میانلر صنعت . بد کورده ده  
ایشار نور معرفت ایده مزلر. باقی . . .












شیخ و صفی


---

# مطالع

هرنوع مسوداتی حاویدر



معارف نظارت جلیله سنک رخصتیه طبع اولمشددر



استانبول

قرمبت مطبعه سی — باب عالی جاده سنده

قره بت مطبعه سی — باب عالی جاده سنده



## مقدمه

﴿مطالع﴾ نامی ویردیکم بواثر، معلمخانه نوایده  
طلبه کرامه عاجزانه استکتاب ایتدیکم مسوداتدن  
متشکدر .

طلبه مومالیهم ، [لوامع - بدایع - سواطع]  
عنوانلی اثرلرم کبی بونک ده طبع و نشری خصوصنی  
التماس ایتدکارندن - دکر سزالکنه باقیهرق - ساحه  
مطبوعاتنه وضعنه متجاسر اولدم . و من الله التوفیق .

شیخ وصفی

---

## ذات خجسته صفات حضرت مشیختپناهی به

## عرض شکران

— ۱ —

ای خداوند مکارم پرور  
 مظهر عاطفتک اولمده یم  
 یوق ایکن بر دکر م ذره قدر  
 فیض لطفکله شرف بولمده یم

— ۲ —

عاجزم وصفکی املا ایدم  
 لالدر طوغریسی کلک شکران  
 لطف و احسانکی احصا ایدم  
 اولمش اولسهم ده حریری زمان

— ۳ —

کوره من مثلکی چشم دوران  
 علما و ادبا ایچره شنک  
 عالمه اولمده در غبطه رسان  
 نور عرفان ایله فیض سخنک

— ۴ —

یوکسلیر فکر معالی پرور  
 شرف ذاتکی یاد ایتدیکه



كلک تر جذبه لر اظهار ایلر  
شوق اوصافک ایلر کیتدیکه

— ۵ —

ایلرم ادعیه کی صبح و مسا  
رفع درگاه خدای علام  
اول شرفبخش مقام افتا  
دولت و شان ایلر تاروز قیام

\*  
\* \*

— ۶ —

ولی نعمت افندم

ینه بو کونلرده التفاتنامه لر یله قریر العین اولق شرفندن  
محروم بیور بیورم ! بویله مهجور التفات بیور یله جق قدر بر  
کستاخلق ایتدیکمی در خاطر ایده میورم . بناءً علیه فنا حالده  
مضطرب اولیورم .

داعیلری کی بی وایکانک هر حرکتی بر قصور صایله جغنی  
بیلز دگم . مع هذا افندمن کی وایه داران کرمک اک کوچک  
لطفی در ماندکانک اک بیوک قباحتنه نظر بیور مامق اولدیغی ده  
سوز کوتورر مواددن دکلر . « در عفو اندیست که در انتقام  
نیست » مصراعی ده بو حکمی تأیید ایدیور . باقی برات  
سعادت بیلدیکم لطفنامه لر یله شدت انتظار .

فی ۱۱ نهمان سنه ۳۰۹

\*  
\* \*

— ٢ —

برادرم افندم حضرتلری

شیرین و دلنشین سوزلرله خاطر نشان طرفین اولان محبت  
دیرینه یی مصور و مجدد و حق عاجزانه مده کی توجهات علیه  
لطفش عاریلرینک حال ترقیده بولندیغنی مبشر و مؤید فی ۱۵ ایلول  
سنه ۳۰۹ تاریخی تبریکنامه کریمانه لری زیور انامل احترام اولمشدر.  
اول وجه ایله اظهار آثار لطف و انسانیته مصروف  
بیوریلان هم والای مروتکستریلری موجب مزید ممنونیت  
اولمغله متقابلاً عرض کلدسته شکران ایله برابر بعد ازیں دخی  
کوکلرده کی ریاض طراوتنای محبتک بر بهار دائمی به مالک  
بولنسی تمنیات خالصانه سیله ختم گفتار ایلرم افندم.

فی ۱۸ اغستوس سنه ۳۰۹

\* \*

— ٣ —

مساند علیه دولتدن هر بری وجود مسعدتخود دولتلریله  
تشریف و استسعاده متهاک و منتظر بولندیغنی حالده بو شرفی  
عدلیه نظارت جلیله سی قازانه رق غبطه فرمای مقامات اولدیغنی  
استخبار و استبشار ایدلدیکندن ادای فریضه رسم تبریک ایله  
برابر بالاترین مراتبه قریباً شرفبخش صعود اولملری پیرایه  
زبان عبودیت قیلنمقده اولدیغنک عرضنه مجاسرت ایلرم.

فی ۲۲ اغستوس سنه ۳۰۹

\*

\* \*



— ۴ —

بو کره مقام مشیخت عظمی مکتوبجیلغنک وجود حصافت  
 پروریلریله تشریف که لیاقت برکزیده فاضلانه لری اقتضای  
 حکمت احتواسندندر . کمال مسرت و مفخرتله استخبار  
 اولمغله حسب الاختصاص وصول حسن موفقیت و تصاعد  
 کواکب سعادتلری دعای مفروضی پیرایه زبان اخلاص قیلنمش  
 اولدیغندن عرض تهنیت وسیله مسعوده سیله تجدید روابط  
 عبودیت و حق عاجزانه مده کی توجهات منعمانه لرینک تراید  
 اوزره بولنمی استدعای مخصوصنه مجاسرت ایلرم .

فی ۲۵ آغستوس سنه ۳۰۹

\*

\* \*

— ۵ —

صنوف التفاتی حاوی فی ۲۵ آغستوس سنه ۳۰۹ تاریخی  
 اراده نامه حضرت ولایتپناهیلری هامة پیرای اجمال اولدی .  
 بونده منظور دیده محمدت و مباہات اولان توجهات عالی درجات  
 دستور اکرمیلری موجب مزید منتداری و شکران اولدیغی  
 و مکتزلرینک مسلاک متخذم اوتهدن بری تمامیه ایقای وظائفه  
 سعی و اقدام اولدیغندن بو وظیفه نك محافظه سنه معیت شرف  
 منقبت کار آکاهیلرنده دها کوزل بر صورتده موفقیت عاجزانهم  
 لطف حقندن مستدعا بولندیغی عرض و بیانیه تقدیم تشکرنامه  
 رقیت علامه یه اجتسار ایلرم . فی ۲۵ آغستوس سنه ۳۰۹

— ۶ —

لیاقت مسلمة علیه نری اقتضاسی وجه ایله بو کره مجلس  
انتخاب حکام باش کتابتک وجود کفایت نمود کریمانه لریله تشرف  
ایتمش اولدیغی سامعه رس مفخرت اوله رق دعای تصاعد نجم  
اقبال مکارم کستریلری یکیدن آورده زبان مخالفت قیلندیغی  
موقع تبریکده عرض ایله برابر مقام جلیل مشیخت عظمایه  
اوله رق لفا و مکشوفاً متجاسر تقدیمی اولدیغم عریضه نك  
موافق رأی عالیلری بیورلدیغی حالد بر صورت مناسبه ده  
مقام مشارالیه عرض و تقدیمه بذل عاطفت وشو صیره ده آثار  
توجهات محاسن آیات مرو تکارانه لرینی کوره جلمی هر زماندن  
زیاده امید ایتکده اولدیغمدن شیمه مجربه انسانیت شعاریلری اوزره  
حق داعیانه مده معاونت ممکنه نك ابدانه عنایت بیورلمسی تمنیات  
مخصوصه سنه اجتسار و ظهور آثار لطف و عاطفتن شاریلرینه منتظر  
بولندیغمی تکرار ایلرم . اول بابده لطف و کرم برادر ستوده  
شیم افندمن حضر تلرینکدر .

فی ۲۸ صفر سنه ۳۱۱ و فی ۲۸ آغستوس سنه ۳۰۹

\* \*

— ۷ —

عین عنایت و مشهود چشم مفخرت اولان حسن توجهات  
محاسن نکات ادبانه لرنک سوبدای دله تودیع ایتمش اولدیغی



شوق انجذاب پیوسته تمایل افزای تجدید و تأیید انتساب اولدیغندن  
 حلول ایدن عید سعید فطرک تسعیدی وسیلهٔ جیله سیله  
 ابراز اختصاص و مخالصته ابتدار و بالاترین مراتبه شرف بخش  
 صعود اولملری تمنیات معتاده سندن بر آن خالی قالمامقده اولدیغمی  
 عرض ایله کسب افتخار ایلرم .

فی ۶ جمادی الاولی سنه ۳۱۱ و فی ۳ تشرین ثانی سنه ۳۰۹

— ۸ —

بورایه کلام کله لی حکمکده اولدیغم درد بی حد اکرچه  
 تجدید اختصاص خصوص منده وقوعه کلمکده اولان قصور می  
 نزد عالی حضرت سماحتیناهیلر نده قرین عفو جیل ایتدیره بیله جک  
 بر معذرت صحیحه عد اولنه بیلیر ایسه ده خاک پای ناصیه پیرای  
 کرامیلرینه شدت تعلق بداهتده بولنان کوکلم شو موفقیت سزایکه  
 بر تقصیر صحیح نظریله باقمقده اولدیغندن حلول ایدن عید مسعود  
 فطرک تبریکی وسیلهٔ جیله سیله تلاوتی تسلی بخش درون اولان  
 ادعیه خیریه ولی نعمتانه لرینه مواظبتدن آیرلمدیغمک و توجهات جلیله  
 خداوندا کرمیلرینک حق داعیانه مده بقاسی عندمده متحقق اولمق  
 جهتیه او مجتهد سوز ایرادنندن انصراف ایله قاعدهٔ تأدب و خصوص صیته

رعایتی انساب کوردیکمک عرض و پیاننه مجاسرت ایلرم . اول  
بابده امر و فرمان حضرت من له الامر کدر .

فی ۱۳ جمادی الاولی سنه ۳۱۱

و فی ۱۰ تشرین ثانی سنه ۳۰۹

\*  
\* \*

— ۹ —

محفوظ کوهردان قلب اخلاصند اولان جوهر اختصاص  
مفخرتمدار عنایتشعاریلری تجدد و تشدید رابطه صدق و مخالصته  
تهییج میل و شوق ایتمکدن خالی قالمدیغندن حلول ایدن لیلہ  
مبارکہ رغائبک وسیلہ تهنیتی ایلہ حق داعیانہ مده مشهود  
الآثار اولان توجهات مکارم آیات عاطفت دثاریلرینک استمرار  
و ازدیادی تمنای مخصوصنه مسارعت و منظور عین عنایت  
عالیه کرمکستریلری بیورلمقده اولمسنندن امین بولندیغم مخدوم  
عاجزی . . . . بنده لرینک دائره فاخره تربیت فاضلانه لری  
داخلنده بولمق شرفنه مظهریتندن طولایی حائر اولدیغم فخر  
و ممنونیت فوق العاده نک علاوه عرض و اظهارینه مجاسرت  
ایلرم . اول بابده امر و فرمان حضرت من له الامر کدر .

فی ۵ جمادی الآخره سنه ۳۱۱

و فی ۲۰ تشرین ثانی سنه ۳۰۹

\*  
\* \*



— ۱۰ —

نظر گاه ادبیانه لرینه

سعادتلو افندم حضرتلری

بو کره عهدۀ داعیانه مه احسان پیوریلان رتبه نك تبریکنی  
 حاوی التفاتنامۀ سامیلری پیرایش انملۀ تعظیم و عبارات عالیہ سی  
 حق عاجزیده کی حسن توجهک از دیادینی تبشیر ایتدیکی جهتله  
 موجب سرور عظیم اولدی .

بویله توجه نامۀ عالی لرینه فائلیت داعیلرنجه شکرانی غیر قابل  
 بر نعمتدر . بناءً علیه وظیفۀ شکر گذاریده در کار اولان قصور مک  
 عفونی تمنا و ابدالنه عنایت پیوربله کلن توجهات معالی آیات  
 کریمانه لرینک بقا و تزییدی خصوصنی خاصۀ استدعا ایلرم . هر  
 حالده لطف و اداره افندمن کدر .

فی ۱۰ جادی الآخره سنه ۳۱۱

و فی ۲۵ کانون اول سنه ۳۰۹

\*

\* \*

— ۱۱ —

سعادتلو افندم حضرتلری

فضیلت مغبوطۀ مسلهلری مقتضیات طبیعیه سندن اوله رق  
 بو کره روم ایلی پایه سی شرف نادرۀ نحریرانه لرینه انضمام ایله  
 کسب اعتلا ایلدیکی مع الافتخار استبشار قیلندیغندن تبریک

وسيلهٔ جيله سياه مشهود چشم مباحات اوله جق مآثر لطفیه سنی  
 سرمایه تأمین استقبال بیلدیکم توجهات فیض آیات سمو حیلرینک  
 حق داعیانه مده استمرار و ازدیادی تمنیات معتاده سنی توافر حسن  
 اقبال سماحتیناهیلری دعای واجب الایفاسنه تردیف ایله ختم  
 کلام ایلرم . هر حالده امر و اراده ولی نعمت افندمن  
 حضرتلرینکدر . فی ۸ کانون ثانی ۳۰۹

— ۱۲ —

حضور عالی سمو حیلرینه  
 سماحتلو افندم حضرتلری

ارباب لیاقت و استقامته هر آن الطاف مخصوصه ملو کانه لری  
 رایکان اولان شهریار فضیلت پرور تاجدار معدلت کستر  
 افندمن حضرتلرینک حق نحریرانه لرنده توالی ایتکده بولسان  
 آثار فیض مدار پادشاهانه لری جلهٔ جيله سندن اوله رق بوکرده  
 عهدٔ استیصال سمو حیلرینه احسان بیوریلان پایه نك تهنیتی وسيلهٔ  
 جيله سياه تزاید حسن نظر محاسن اثر کرامیلرینک تمناسنه مجاسرت  
 و روز و شب ذات فضائل آیات منعمانه لرینک بویله نیجه نیجه  
 رتب جلیله احراز یله کامور اولملری درودینی رفع بارگاه رب  
 متعال ایتکده اولدیغمک عرضنه مبادرت ایلرم . اول بابده امر  
 و اراده افندم حضرتلرینکدر . فی ۱۶ نیسان سنه ۳۱۰



تحت نظارت حضرت فتوایانهایارنده بولنان مکتب نواب  
شاگردانك هر سنه خروج و ترقی صنف امتحانلری بو سنه  
رمضان شریفدن صکرهیه تعلیق ایدلدیکی شاگردان مومالیهمه  
اولجه تبلیغ بیورلمش اولدیغنه بناءً اجرای امتحانلری ضمننده بهر  
کون داعیلرینه مراجعت ایتکده بولندقلرینك برای معلومات  
عرض و اشعارینه متجاسر اولدم. اول بایده امر و فرمان حضرت  
ولی الامر کدر .

فی ۲۴ شوال سنه ۳۱۱

و فی ۱۸ نیسان سنه ۳۱۰

\*  
\* \*

خاك پای عالیٰ فاضلانهلرینه

استاد محترم افندم حضرتلری

من غیر استحقاق نائل اولدیغم رتبهك تبریکنی حاوی اولان  
التفاتنامه تحریرانهلری انمله پیرای تکریم و قلب مستندانهم لبریز  
شکران عظیم اولدی .

مدار فیض و مباحاتم اولان نیر حسن توجه استادانهلرینك  
استیفاسنه ابتدار و وظیفه شکر گذاریده اولان قصورلر مه عطف  
نظر مسامحه بیورلمسی خصوصنی استعدا ایچون خاك پای

منعمانه لرینه یوز سور مکه توکیل ایتدیکم عریضه عبیدانه می تقدیمه  
اجتسار ایلرم . هر حالده لطف و مرجت حضرت استاد کدر .  
فی ۶ ذی القعدة سنه ۳۱۱ و فی ۳۰ نيسان سنه ۳۱۰

\*  
\* \*

— ۱۵ —

خاک پای فاضلانہ لرینه

فضیلتلو افندم حضرتلری

کوکله جلوه کر اولمقده بولسان حسیات شکر کذارانه  
مقتضاسی اوله رق صبح و شام توافر عمر و اقبال فاضلانہ لرینک  
درود فیض نمودینی رفع بارگاه رب انام ایتدیکده اولدیغیمک  
عرض و بیانه مسارعت و حق تلمیذانه مده ابدالنه عنایت  
بیوریه کلن حسن توجه استادانه لرینک دوام تمنیسنه تردیفاً طبع  
و نشرینه متجاسر اولدیغم . عنوانلی اثر عاجزانه مک  
— مجبول اولدقلری سجایای عالیہ خطا پوشانہ لرینه استناداً —  
دکرسز لکنه باقیه رق قبولی استرحامیله تقدیمه مثابرت ایلرم .

فی ذی القعدة سنه ۳۱۱ و فی ۴ مایس سنه ۳۱۰

\*  
\* \*



مودوع فطرت عالیہ لری اولان کفایت مغبوطہ مسلمہ لری  
 مقتضیات طبیعہ سندن اولدیغی وجه ایله بو کره رتبہ بالا اسباب  
 نادره عن وشرف حصافتنایه لری نه انضمام ایله کسب فخر واعتلا  
 ایلدیکی مع الافتخار استبشار قیلندی . تبریک وسیله جیله سیله  
 مشهود چشم مباهات اوله جق مآثر لطیفه سنی سرمایه تأمین  
 استقبال بیلدیکم محاسن توجهات رأفتکستریلرینک حق داعیانه مده  
 استمرار ازدیادی تمنیات معتاده سنی توافر حسن اقبال عاطفتشعاریلری  
 دعای واجب الایفاسنه تردیف ایله ختم کلام ایلرم .

فی ۲۵ ذی القعدة سنه ۳۱۱ و ۲۵ تموز سنه ۳۱۰

\*  
\* \*

حضرت !

هامه پیرای درویشانهم اولان صوک ایکی التفاتنامه کزه  
 — اوزرندن آیلر ، کونلر مرور ایتدیکی حالدہ — بر جوا بنامه  
 تحریرینه شمعی وقت بوله بیلدم . بو بابده کی قصور می عفو  
 بیورک .

مفتی افندی حضرتلرینک حق ناچیزانه مده کوسترمش  
 اولدقلری حسن توجهه تشکر ایدهرک مبارک اللرندن اوپرم .

عرض حال. خاک پای شیخ الاسلامیہ تقدیم قیلندی. مع التأسف  
حکمرن براقیلدیغنی عرض ایلرم.

قطعه لر خوش، سائرلری کبی بونلری ده مانند اوراد  
درویشان، صباح، اقشام او قویورم. وار اول حضرت باقی اخوت.

فی ۷ تشرین اول سنه ۳۱۰

\*  
\* \*

— ۱۸ —

شیء کریمه قدر دانیلری مقتضای سنجه گوشه کیر ضرورت  
اولان ارباب استقامت و لیاقتہ دستگیر لک خصوصنده دریغ  
عاطفت بیورمیه جقلری درکار اولدیغنه بناء شمدی به قدر  
بولندیغنی نیابتلرده ابراز حسن خدمت ایتش اولان و اباعن جد  
اصدقای سلطنت سنیهدن اولوب افصل قضاتدن بولنان ....  
افندی داعیلری حقنده نظر شفقت اثر جناب ولی النعمیلرینی  
جلبه مجاسرت و هر نه قدر صنفنک فوقنده ایسه ده یقینده  
آچیله جغنی استخبار ایدیلن ... قضاسی نیابتنه تعیین ایله گرفتار  
اولدیغنی تنکی معیشتدن رها بیورلمقلغی استرحامنه مسارعت  
ایلرم . فی ۸ تشرین اول سنه ۳۱۰

\*  
\* \*



خاك پای معالی پیرای حضرت فتواپناهیه

معروض داعی دیرینه لریدر

خاك پای ناصیه پیرای حضرت فتواپناهیلرینه اولان نسبت  
داعیانهمك فريضة تشكرنی ادادن عاجز اولدیغم حالدده حق  
ناچیزانه مدده متوالی الظهور اولان الطاف مراحم اتصاف  
ولی النعمیلرینه بر لاحقۀ فائقه اولمق اوزره بو كره عهدۀ  
كترانه مه .... پایه سی احسان بیورلمسی منتدارلغمی قات قات  
تزیید ایلشدر .

بو لطفك شكرنی ایسه طریق ثنا کاریده :

شمدی سجاده معنیده بنم مرشد کل

خرقه پوشان بیان بدن آیر فیض کلام

بیتمك قائل اولان نفی معجز بیان کبی شمسواران بلاغدن  
اولسه مدده ینه بحق ایفا ایده میه حکم هویدادر .

بناءً علیه بو بایده کی قصورمك عفویله جانمدن اعز بیلدیکم  
توجهات فیض آیات جناب مشیختپناهیلرینك دوام و ازدیادی  
تمنیدی معرضنده آستان مرحمت بنیان دولترینه وضع جبین  
افتقار و :

ایله صدر عافیتده کامران  
 حضرت مفتی الانامی یا اله  
 مشرق نور سرورایت قلبنی  
 لمعه پاش اولدقجه دهره مهر و ماه

قطعه دعائیه سیله تزیین لسان مصادقت ایتکده اولدیغیمک عرض  
 و بیانه اجتناسار ایلرم . هر حالده امر و فرمان حضرت  
 ولی الامر کدر .

\*  
 \* \*

— ۶۰ —

حضور عالی عرفانپناهیلرینه

عطوفتلو افندم حصرتلی

بورایه کله لی اوچ ماهی مرور ایتدیکی حالده هنوز بر  
 احساننامه سامیلرینه دسترس اوله مدیغ جهتله محزون اولیورم .  
 مع مافیه شمدی یه قدر بر التفاتنامه کرم پروریلرینه عدم نائلیم  
 باشقه بر شیدن اولیوب مجرد مشاغل عطوفیلرینک بو کونلرده  
 تکثرندن ایلری کلدیکنه حکم ایدهرک بر آرز تسلی بولیورم .

التفات محاسن آیات گرامیلرینه مظهریت داعی اصدقلری

ایچون هر حالده موجب فیض وسعادتدر . عکسی ایسه —

حفظنا الله تعالی — بادی ادبار ونخوستدر . بناء علیه لوازم

وظیفه شکر کناریدن بیلدیکم دعای ازدیاد عمر واقبال ولی



نعمتیلرینی هر بار رفع اجابتگاه پروردگار ایتمکده اولدیغیمک عرض  
 و بیانیه مبادرت و حسن نظر فیض اثر عالیلرینک ابدالی تمنیاتی  
 معروضنده بو ورقپاره حکمی ده خاک پای ناصیه پیرای سامیلرینه  
 تقدیمه محاسرت ایلرم . فی ۲۷ تشرین اول سنه ۳۱۰

\*

\*\*

— ۲۱ —

### دولتو افندم حضرتلری

آستان معدلت بنیان ولایتپناهیلرینه اولان انتساب عبیدا-  
 نه مدن طولایی عهدۀ داعیانهمه ترتب ایدن درود مسعود  
 مراجع شعاریلرینک اداسنده قصور ایتدیکم نزد دولتلرنده  
 بدیعی اولدیغندن بوبابده اظناب کلامدن صرف نظرله حق  
 عاجزانهمده دائمی اللعان اولان خورشید توجهات فیض غایات  
 آصف اکرمیلرینک بقاسندن امین اولدیغم جهتله آره صیره  
 تصدیعه جرات ایتمکده اولدیغم کی بو کرده متقدم عریضه  
 کمتری فلان افندی بندهلرینک اوراجه بر ایشله اشغال بیورلمسی  
 خصوصنی استرحامه مبادرت ایلدم .

مومالیه اولدجه اوقور یازار طاقدن اولوب بعض خد-  
 متلرده بولنش ایسه ده حسب القدر بو کونلرده برایش بوله میوب  
 آچیقده قالمش و بیچاره نك ضرورت اطرافنی المشدرد . کندیسسی

هر جهته شایان معاونت و داعی قدیمترینده مناسبتی اولمغله  
حقنده ابدال ایدیه جک مرحمت عاجزلرنجهده مستلزم محمدتدر .  
جبین نوراً کین گرامیلرنده درخشان اولان نجابت وانسانیتک  
دلالت ساطعه‌سنه نظراً بویله بر عا حزک وادی مضایقه و ضجرتده  
قالمسینه رضا ویرلمیه جکی بیدار اولدیغندن اسعاف مسئولنه  
مساعده جلیله جناب دستور اعظمیلرینک بی دریغ بیوریه جغنی  
بیلدیکم ایچون شمیدین تقدیم کلدسته منتدارییه مسارعت  
ایلرم . اول بایده امر و فرمان حضرت من له الامر کدر .  
فی ۲۷ تشرین اول سنه ۳۱۰

\* \*

— ۲۲ —

معروض شا کرا لا حسانلریدرکه

حسن صیت عالمگیر نحریرانه لرینک بر تعریف مختصری  
اولان کلمات فائقه کرمکاریلری اقتضای طبیعیهی وجه ایلله  
بوکره مجلس تدقیقات شرعیه ریاستی وجود مسعود سمو حیلریله  
تشریف ایتدیکی استبشار قیلنمش و حصافت مسئله فوق العاده لری  
امور ریاستی حسن ایفایه مع زیاده کفایت ایده جکی بدیهیاتدن  
بولنمش اولمغله السنه صادقانه کورد متینی بولنان موفقیت کامله  
ریاستیناهیلری دعواتیله حسب الصداقه تزیین لسان عبودیت



ایتمکده اولدیغیمک معرض تهنیتده عرضنه اجتسار ایلرم . هر  
حالده امر و فرمان حضرت من له الامر کدر .

فی ۲۰ صفر سنه ۳۱۳ و فی ۳۰ تموز سنه ۳۱۱

\*  
\* \*

— ۲۳ —

دولتلو افندم حضرتلری

شهور ثلاثه نك حلولی مناسبتیه از میره عزیمت ایدن خواجه  
فلان افندی داعیلری شایان حرمت بر صاحب فضیلت اولدیغندن  
و مجبول اولدقلری شیئه کریمه قدر دانیلری اقتضاسیجه ارباب  
علی عاطفت و حایت دولتلرندن دور بیورمیه جقلری بدیهی  
بولندیغندن افندی مومالیه حقنده ابدال عنایت و معاونت  
دستور اکرمیلری رجاسنه مجاسرت ایلدم .

فی ۱۳ تشرین ثانی سنه ۳۱۰

\*  
\* \*

— ۲۴ —

بورایه کله لی اوچ بچق آی اولدی، هنوز بر احساننامه  
گرامیلرینه دسترس اولق شرفنه مظهر اوله مدم .

کرم قیل کسمه ساقی التفاتک بی نوالردن  
الکدن کلدیکی خیری دریغ ایتمه کدالردن

یوللو فریاد ایتمه حقم یوقی ؟

اوت ! فلان افندی بنده لرندن آلمقده اولدیغم التفاتنامه لرده  
طرف سمو حیلرندن ده پرسش خاطر عاجزی یه تنزل بیورلدیغی  
تبشیر اولنیور . بونک ایچون عرض شکران ایدرم . فقط  
کوکل بالواسطه دکل ، بالذات مظهر توجه عرفانپناهیلری بیورلمق  
آرزوسنده بولنیور . چونکه لطف مخصوصلرینه نائل اولمق  
داعیلرنجه مستلزم شرف عظیمدر .

ارسال احساننامه یه تنزل بیورمیشلرینی حق عاجزیده بر  
نوع جزا اولمق اوزره تلقی ایتک ایستیورم . بویله بر جزایه  
لایق کورملککم ایچون ده بر قباحتیم اولمق لازم کلیر . حال بوکه  
مستحق مجازات اوله جق بر حرکته بولندیغمی در خاطر ایده میورم .

قباحتیم نه ایسه عفو بیورلمسنی کمال افتقار ایله استرحام ایدر  
و برات سعادت بیلدیکم مرحمتنامه سمو حیلرینی چارچشم ایله  
بکلام . هر حالده لطف و کرم افندمن کدر .

۲۴ کانون اول سنه ۳۱۰

\*

\*\*



برادر عزیزم افتدم

بر مخدوم عالی‌ری کهواره جهانہ شرفبخش اولدیغی واصل  
صماخ عاجزانہم اولدی . بو مرثدۀ نوله کوکلم تازہ جان بولدی .

جناب رب بی انداد فیض و عمرینی مزداد و دو جهانده  
الطاف مالا نہایہ صمدانیہ سیلہ دلشاد پیورسون .

ارسال مکتوبده واقع اولان قصور مک عفوینی نیازہ  
محاسرت و بویله نیجه نیجه احسان الہیہ مظهر اولملری دعاسنی  
رفع بارکاه احدیت ایلرم . باقی اخوت .

فی ۲۸ کانون اول سنہ ۳۱۰

\*

\*\*

معروض داعی دیرینه لریدر

داعی اصدقلری قسمت عسکریہ باش کاتبی اسبق متوفی  
فلان افندی‌نک مخدومی اولوب سایہ مرحمتوایہ حضرت  
خلافتپناہیده مخصصات علمیه دن الی غروش معاشه نائل اولمش  
ایسہم ده معاش مذکور اداره عاجزانہمه غیر کافی اولدیغندن  
و ذات مکارم صفات ولی النعمیلر نیجه ده معلوم اولان معلولیت

داعیانهم تأمین معیشت ایده‌جک بر خدمت‌ه سلوکه مانع بولندیغندن  
معاش ناچیزانه‌مک درجه کفایه ابلاغیه گرفتار اولدیغ قید  
ضرورتدن خلاص بیورلمقلم خصوصنه مساعدۀ جلیله جناب  
فتواپناهیلرینک بی دریغ بیورلمسنی خاک پای امل بخشای شفقت  
کستریلرینه وضع جبین افتقار ایده‌رک استرحام ایلرم . هر حالده  
امر و فرمان حضرت ولی الامر کدر .

فی ۱۰ کانون ثانی سنه ۳۱۰

\*

\*\*

— ۲۷ —

کوکل آرزوسی وجه‌ایله معیت مفاخر منقبت آصفانه‌لرنده  
بولنق شرف عظیمه نائلیت دیمک اولان نعمت جوار باعث مزید  
افتخار اولمقده بولندیغندن ولایت جلیله‌لری مرکزینه وقوع  
تشریف میمنت ردیف اکرمیلرینی تبریک وسیله جلیله‌سیله  
دیومت عافیت و اجلال وزیرانه‌لری ادعیه معتاده‌سنه مداوم  
بولندیغمی عرض ایله برابر حسن توجهات سلامت غایات  
مرحمتپناهیلرینک حق داعیانهمده مزاید المآثر بیورلمسی استرحام  
مخصوصنه اجتناسار ایلرم . اول بابده امر و فرمان حضرت

من له الامر کدر . فی ۲۲ نیسان سنه ۳۱۱

\*

\*\*



— ۲۸ —

خاك پای مراحم پیرای حضرت مشیختپناهی به

معروض داعی اصدق لیدر

سایه سعادتوایه حضرت ولی النعمیلرنده بوندن ایکی سنه  
مقدم اموال ایتم علمیه صندوقندن استدانه ایدرک بر کلبه جک  
ایدنمش ایدم . نه چاره که معاش عاجزانه مک کافه سنی صندوقه  
ترک ایتمش اولدیغم حالده هنوز دین مذکورى تماماً ادایه موفق  
اوله مدم . داعیلرینی اوسزلیکدن زیاده دوچار فتور ایدن بو  
حاله آرتق تحمل قالمدیغندن متداخل معاش ناچیزانه مک احسانی  
استرحامی معرضنده خاك پای مرحت پیرای جناب مفتی الانامیلرینی  
تصدیعه مجبور اولدم . هر حالده امر و فرمان حضرت ولی  
الامر کدر .

فی ۱۳ ذی القعدة سنه ۳۱۲

و فی ۲۵ نيسان سنه ۳۱۱

\*  
\* \*

— ۲۹ —

خاك پای عالی منعمانه لرینه

سماحتلو افندم حضرتلری

انتساب در دولتلیله مباحی اولان کونم، احتیاسات شکر

گذارانه سنی حضور عرفانیه ایلرینه هر زمان عرض ایتک  
ایستیور سده صیق صیق تصدیع ایتهمک ایچون بو باده اجاله  
خامه پی بر وسیله جیهلنک ساحه آرای بروز اولسنه براقش  
ایدم .

مبدأ سعادت سرمدیه اولان لیلہ مبارکہ ولادت محمدیه نک  
شرف حلوانی تحکیم رشتہ اختصاص ایچون نعم الذریعه عد  
ایده رک ایفای وجیهہ رسم تبریکنه متجاسر اولدم . هر آن :  
کورمیه روی کدر عالمده او خداوند فضائل پرور  
اوله هر ایشده معینی الله ایده ایامی سعادتله کدر  
قطعه دعائیه سیله تزیین لسان شکران ایتیکده اولدیغمک پیانہ  
مبادرت و واقع اولان قصور لر مک عفو بورلمسی معرضنده  
تقدیم ضراعتنامیه مشابرت ایلرم . هر حالده امر و اراده  
افندمن کدر .  
فی ۱۵ صفر سنه ۳۱۳  
و فی ۲۵ تموز سنه ۳۱۱

\*\*\*

— ۳۰ —

عاجزه لری پلونه ملحمه کبراسنده معیت جلادت منقبت  
داور اعظمیلرنده بولمق شرفنه نائل و دشمن دینک هجوم  
آتشبارینه مردانه کوکس کره رک مرتبه شهادته واصل اولان



صامسون ردیف میرآلای متوفی . . . . بکک حر می اولوب  
میر مومالیهک وفاتیه پک بکس قالمش و او وقتلر تخصیص  
بیورلمش اولان سکسان غروش معاش ایله قوت لایموت  
درجه سنده اولسون کچنمک قابل اوله میوب شمدی به قدر اوته  
بری صانه رق اصرار وقت ایدیلوب آرتق بو کونلرده فنا حالد  
بوکالمش اولدیغمدن احوال ضرورت اشمال جاریانه مه مرجه  
و زوج شهیدمک خون اهل کونه حرمة معاشمک حد لایقه  
ابلاغیه بو قید ضرورتدن رها بیورلمقلم خصوصنه همم جلیله  
آصف اکرمیلرینک بی دریغ بیورلمسی استرحامی معرضنده خاک  
پای شفقت احتوای عجزه پروریلرینه وضع جبین ابتهاله مجاسرت  
و مسئول ناچیزانه مک اسعافی ایچون ده حیت عسکریه لرینه  
دخالت ایلرم . هر حالد امر و فرمان حضرت ولی الامر کدر .

\*  
\* \*

— ۳۱ —

دستایه مباهات و شرف بیلدیکم عبودیت خالصه داعیانهم  
وسيله جوی تجدد بولمقده اولدیغمدن حلول ایدن عید خجسته نک  
ایفای تبریکنی نعم الذریعه عدایله حق کترانه مده لامع و بالجمله  
محاسن بنده پرورانه بی جامع بولنان توجهات معالی آیات حضرت  
ولی النعمیلرینک بقا و ازدیادی تمنیات مخصوصه سنی تزايد اجلال  
بنده نوازیلری دعای مفروضه تردیفاً یاد ایلرم .

\*  
\* \*

— ۳۲ —

## حضور مراجع نشور مشیختپناهی به

### معروض داعی دیرینه لریدر

ذات معالی صفات نجابتپناهیلرینک مقام معالی مشیخته  
 سایه بخش شرف اولدقلری کوندن بری حامی شرع مبین  
 خلیفه رسول امین افندمن حضر تلرینک رضای شفقت ارتضای  
 ملوکانه لرینی استجلابه بذل مقدرت و باخصوص مکتلری کبی  
 آستان مرجع بنیان فتوایپناهیلرندن باشقه استنادگاهی اولیان  
 آزرده دلانک تسریرینه وقف همت پیوره کلدکاری زیورالسنة  
 شکراندر . بناء علیه داعیلرینه علی الاصول احسان پیورلمش  
 اولان . . . قضااسندن انفصالم اون اوچ سنه بی مرور ایتدیکی  
 حالد هنوز دوریه مولوتی قضاارندن دیکر برینک دها احسانیه  
 تلطفم خصوصنه هر نصلسه عنایت پیورلمدیغندن و هر بار  
 دعوات خیریت آیات شیخ الاسلامیلرله سمحه شمار اولان بر  
 عاجزک چار چشم ایله مترقب اولدیغی بر نعمتدن بی بهره  
 قالیشنه شیئه کرمه عجزه پروریلری هیچ بر وجه ایله راضی  
 اولیه جغندن خاک پای ناصیه پیرای دولترینه عرض حال ایله  
 تصدیقه جرأت و مسئول ناچیزانه مک اسعافنه مساعدۀ جلیله  
 مشیختپناهیلرینک بی دریغ پیورلمسی نیازی باینده عاطفت و مرجع



جناب مفتی الانامیلرینہ کمال ابتہال ایله دخالت ایلرم . اول  
بابده وهر حالده امر و فرمان حضرت ولی الامر کدر .  
فی ۵ جادی الاولی سنه ۳۱۰

\*  
\* \*  
— ۳۳ —

حسن التفاتیکز ایله مفتخر بر داعیکز اولدیغم حالده بورایه  
کله لی بر احساننامه کزه نائل اوله مدیغم ایچون کوکلم بر اضطراب  
دائی ایچنده بولنیور . هر کون :

« سعادت صبحی ایرمنی شب غم زائل اولمازمی »

طرزنده فریادلر ایله پوسته خانه یه مراجعت ایدیورم ، فقط  
کمال تحسر ایله منتظر اولدیغم برات سعادتک کلدیکنی کورنجه :  
« صوچم نه در آی افندم آ باشمک تاجی »

دیهرک مکدرانه عودت ایدیورم .

خاک پای عالیکزه قارشى شمدی یه قدر بر کستاخلقده  
بولندیغمی در خاطر ایده میورم . مع مافیله ایتش اولدیغم بر  
کستاخلقدن طولای مظهر التفاتیکز اولق شرفندن محروم  
بیوریلیورسم چکمکده اولدیغم اضطرابات وجدانیه یی جزای  
کافی عد ایده رک متحسری بولندیغم لطفنامه کز ایله قریر العین  
اولمقلغم خصوصنه عنایت بیورمکزی نیاز ایلرم .

خاك پای فیض احتوای سامیلرینه

سماحتلو افندم حضرتلری

ذات خجسته صفات نحریرانه لری کبی بر وجود محاسن  
نمودك كوندن كونه اعتلایاب سلم اقبال اولملری اودای جناب  
سموخیلری ایچون موجب انبساط درون اوله جفی شهیددن  
وارسته در . هله توجهات مکارم آیات منعمانه لرینه مظهریتاه  
بین الامثال احراز شرف بی مماثل ایتیکده اولان داعی عاجزلری  
کبی بر بنده شا کر الاحسانك قریر العین اولمامسی فصل قابل  
اولور .

عهد استیصال عرفانیناهیلرینه مشیخت علیا مستشار لغنك  
تفویض بیورلدیغنی استبشار ایتدیكم کبی آستان فیض بنیان  
سعادتلرینه انتساب ایله مفتخر اولان کوکم سرور مجسم کسلدی .  
بو شوق ایله :

« ای ولی نعمت صباح حشره دك

مهر اقبالك اوله برتو فشان

بر زمان روی کدر کو ستر مسون

ایلسون هر دم سنی حق شادمان »

قطعه سنی کویا اوله رق عاجزانه ایقای فریضه رسم تبریکه مبادرت  
ودر ماندکانی درجات رفیعه بختیارینك مرتبه قصواسنه اعلا



ایتمک خصوصاً صنده تأثیر جلیلی مسلم اولان حسن توجه گرامیلرینک  
ابذالی نیازینه مجامعت ایلرم . هر حالده امر و اراده ولی نعمت  
افندمن حضرتلرینکدر . فی ۳ ربیع الآخر سنه ۳۱۲

\*  
\* \*

— ۳۵ —

فضیلتلو افندم حضرتلری

ذات عالی حضرت ولی النعمی به اولان عریضه ملفوفه  
عاجزانه مک بر وقت مناسبده حضور سامی مشار الیه تقدیمی  
باهر الآثار اولان لطف جیل مرحتیناهیلرندن مستدعادر .

مشار الیه افندمن حضرتلرینه نسبت قدیمه داعیانهم جهتیه  
حقمده تجدد و تزیادنندن مطمئن بولندیغم توجهات ثریا درجات  
مفتی الانامیلرینک مآثر عالیه لطیفه سنی عن قریب مشاهدهیه  
امیدوار و بو امنیه نک پک مساعد اولان شو زمانده تسریع  
حصولی ایچون وساطت علیه کرگستریلری کبی موافق و مثمر  
بر وسیله عالییه نائلیتله بختیار بولندیغمدن اول بابده مبدولی  
الطاف مخصوصه مروتشعاریلرندن امین اولدیغمک عرض  
ویاتی خاتمه کفتار ایلرم فی ۴ صفر سنه ۳۱۲

\*  
\* \*

— ۳۶ —

مقام سامیٰ صدارت عظمایہ

معروض داعیٰ کینہ لریدرکہ

عاجز لری شمدیہ قدر خاک پای مراجم احتوای حضرت  
 صدراعظمیلرینی تصدیعہ جسارتیاب اولمدیغم حالده بو سنه فاتح  
 عسکری رشدیہ سندن چیقوب علی الاعلی درجه ده شهادتنامه  
 اخذینہ موفق اولان مخدوم . . . افندی کولہ لرینک دائرہ  
 جلیلہ جناب صدارتیناہیلرنده مناسب بر قلمہ چراغ بیورلمسی  
 آرزو سنده بولندیغمدن و اوتهدن بری دار الامان بی چارکان  
 اولان آستان دولترینہ منسوبیتله مباهی بولنان داعیٰ مکتزلری  
 کبی بر عاجزک مراجعتی رد بیورلمیہ جغنی بیلدیگمدن مسئول  
 عبیدانه مک اسعافی خصوصنه مساعدہ جلیلہ عجزه پروریلرینک  
 بی دریغ بیورلمسی نیازینه متجاسر اولدم . هر حالده امر و فرمان  
 حضرت ولی الامر کدر .

\* \*

— ۳۷ —

مقام معلائی حضرت صدارتیناہیہ

معروض چاکر کینہ لریدرکہ

مکتزلری ابا عن جد اصداقای سلطنت سنیهدن اولوب



عاجزانه شمدی به قدر بولندیغ مأموریتلرده مخالف دخواه عالی  
هیچ بر حرکت کورلمدیکی حالدده آب و هواسیله امتزاج ایدیله مدیکی  
جهتله استعفا ایتش اولدیغ . . . قائم مقاملغندن انفصالم ایکی  
سنه بی تجاوز ایدوب هنوز مناسب بر قائم مقاملغه تعیین  
بیورلمدیغمدن وبو حالک دوامی ایسه بنده کز کی دیون  
کثیره آلتنده ازلمکده بولنان بر بی چاره بی محو ایده جکی بدیی  
اولدیغندن متخاق بیورلدقلری سحیه شفقت گستریلرینه استناداً  
آچیقده اولدیغنی خبر آلدیغ . . . قائم مقاملغنه تعیینم خصوصنه  
مساعده جلیله جناب صدارتیناهیلرینک بی دریغ بیورلمسنی استرحام  
ایلرم . اول بابده امر و فرمان حضرت من له الامر کدر .

\*  
\* \*

— ۳۸ —

هیچ بر دکریم اولدیغنی حالدده حق کترانه مده رایکان  
بیورلمقده اولان توجهات مکارم غایات سمو حیلری ثمره باهره سی  
اوله رق مدت نیابت داعیانهمک بش آی دهاممدیدی خصوصنه  
مساعده بیورلدیغنی کمال مسرت ایله خبر آلدیم .

اگرچه طریق شکر کناریده راجل ایسه مده عاجزانه تقدیم  
کلدسته شکرانه مبادرت وهر بار دعای دوام عمر و اقبال

منعمانه لرینی رفع بارگاه جناب پروردگار ایتمکده اولدیغیمک عرض  
و بیانله محتاجی بولندیغیم حسن نظر فیض اثر عرفانپناهیلرینک بقاسی  
استرحامنه مسارعت ایلرم . هر حالده لطف و کرم افندمن  
حضر تلرینکدر .  
فی ۱۰ تشرین ثانی سنه ۳۱۰

\*  
\* \*

— ۳۹ —

بالیکسیرینک ... محله سندن فلان بن فلان حقنده شرفوارد  
اولان ۲۵ نومرولو فی ۲۷ کانونی ثانی سنه ۳۰۹ تاریخی امرنامه  
کریمانه لری . و جبنجه کیفیت بالیکسیر سنجاغی نفوس مأمورلغنه  
یازلمش ایدی . بوکره مذکور نفوس مأمورلغندن جواباً وارد  
اولان تحریراتده نفس بالیکسیری سنجاغنده ... محله سی اولمیوب  
مشابعتی اولان ... محله سنک دردنجی خانه نک برنجی نومروسنده  
فلان بن فلان مقید اوله رق تذکره عثمانیه سی ویرلمش و مرقوم  
الآن بالیکسیریده اولوب اتمکجیلک ایتمکده بولندیغی و بوندن باشقه  
برقیده تصادف ایدیله مدیکی پلدرلمش اولغله اول وجه ایله بیان  
کیفیتته اجتناسار قیلیندی .

\*  
\* \*



— ۴۰ —

## دولتو افندم حضر تلی

دائماً حق عا جزانه مده اشعه بار اولان خورشید توجهات  
 معالی غایات آصف اکرمیلرینه استناداً آرہ صیرہ ذات محاسن صفات  
 ولایتیناھیلرینی تصدیقہ متجاسر اولدیغم کی بو کرده داعیلرینه  
 مناسبت کاملہ سی اولان وھر جهتله سزاوار مرحمت و معاونت  
 بولنان متقدم عریضہ کتری فلان بندہ لرینک حالنه مناسب برایشله  
 قایر بلہ رق احیا پیورلمسی استرحامنه مسارعت ایلدم اول بابده .

\*

\*\*

— ۴۱ —

## دولتو افندم حضر تلی

... نظارت جلیله سنک عہدہ استیمال دولتیرینہ تفویض  
 پیورلدیغی خبر مسدت آوری جملہ دن زیادہ داعیلرینی حصہ یاب  
 مسرت ایلمش اولدیغندن عا جزانه ایفای رسم بہین تسعیدہ مثابرتله  
 برابر معتاد عبیدانہ م اولدیغی اوزرہ دوام ازدیاد عافیت واجلال  
 دستور اعظمیلری دعاسنندہ ویکانہ باعث فیض واقتمارم اولان  
 توجهات مکارم آیات داور افخمیلرینک بقا و توافری تمناسنندہ  
 بولندیغمک عرض و بیانہ جرأت ایلرم .

\*

\*\*

## — ۴۲ —

محلہ مزیدہ محمد آغا جادہ سہندہ ... نومرو لو خانہ دہ مقیمہ  
تحصیلات قومیسویندہ مستخدم ... طوپچی صاغ قول آغاسی  
متوفی فلان افندینک والدہ سی ... خانم الیوم بر حیات اولوب مومالیہ  
... افندینک وفاتندن شمعیہ قدر بر ارہ وار مدیغنی و نامنه تنظیم  
قیلنن سند رسمی حامل علم و خبر طوپچی دائرہ سی چاوشلارندن  
... چاوشہ تسلیمہ بر بآس اولمدیغنی مبین اشبو علم و خبر ویرلدی.

\* \*

## — ۴۳ —

زوج سابقم طوزجی ... آغانک ذمتندہ با حجت شرعیہ شهری  
... غروش نفقہ نك اخذ و قبضہ و تسویہ سندہ امتناع ایلدیکی  
حالدہ حبسنه و صلح و ابرایه و وضع امضایه و حجز و فکک و متوقف  
اولدیغی امورک کلیسنه طرفندن قبوله مقارن بیوک پدرم ...  
آغایی وکیل نصب و تعیین ایلدیگمی مبین اشبو و کالت علم و خبری  
بالتنظیم در سعادت اعلا مات شرعیہ اجرا دائرہ سنه تقدیم قیلندی.

\*

\* \*

## — ۴۴ —

فلان دائرہ دہ چهارشنبه بازار ی جوارنده قوغه جی دده  
محلہ سندہ تکه زقاقنده ... نومرو لو خانہ دہ ... قلمی کتبه سندن



...افندی دمتنده بر قطعه سند مو جنبه آله جفم اولان ... غرو شک  
 تأمین استیفاسی ضمننده مدیون مومالیهک تحت تصرفنده اولوب  
 ایکنجی دائرة بلدیة داخلنده ... محله سندده فلان زقاقنده ...  
 نومرولو بر باب عقار دکانک تحت حجزه آلمسنى و ... نسخهدن  
 عبارت اولان اشبو استدعالک اقتضا ایدن محله لره تبلیغیله معاملات  
 مقتضیه قانونیه نک ایفاسنه قرار ویرلمسنى طلب ایلرم .

\*  
\* \*

— ۵۵ —

معارف نظارت جلیله سی جانب عالیسنه

دولتلو افندم حضر تلیرى

باب والای فتواینهاى سجل قلمنه تقدیم ایتدیکم ترجمه حال  
 ورقه سندده « فلان ، فلان ، فلان » عنوانلی اثرلرم ذکر اولتمش  
 و حال بوکه قلم مذکوره اراءه سی لازمه دن اولان رخصتنامه  
 رسمیلری ضایع ایدلمش اولدیغندن آثار مذکوره نک بارخصتنامه  
 رسمی طبع ونشر ایدلدیکنک عرضحال داعیانهمه شرح ویرلمسنى  
 خصوصنه مساعده جلیله جناب نظارتینهایلرینک بی دریغ بیورلمسنى  
 نیاز ایلرم . اول بابده

\*

\* \*

— ۵۶ —

عاجزلیرى اون سنه یی متجاوز بر زماندن بری ایوب محکمه  
 شرعیه سی باش کتابت معاونلرکنده ایفای حسن خدمته چالشمنده

ایسه مده عائدات داعیانهم تعیشمی تأمین ایده میوب دیون کثیریه  
کرفتار اولدیغمدن حال ضرورت اشتماله مرجه بالامتحان مسبوقین  
سلیکنه قید و قبولم ایله چراغ بیورلمقلمم خصوصنه مساعده جلیله  
جناب فتوایناهیملرینک ارزان بیورلمسنی استدعا ایلرم

\*

\*\*

— ۴۷ —

من غیر لیاقة عهده داعیانهم تفویض بیوریلان برات سنجاغنه  
کله لی ایقای حسن خدمت و عمومک خوشنودیسنی قازانه رق بو  
صورتله استجلاب دعوات خیریله رینه مواظبت ایتیکده اولدیغمه  
بوندن ایکی ماه مقدم اهالی طرفندن حضور مفتی الانامیلرینه  
تقدیم قیلنان مضبطه شهادت ایتیکده بولندیغندن و انفصال عاجزانه مه  
بر ایکی آی قالوب موسم شتانک تقریبی جهتیه بورادن حرکت  
ایسه ممکن اوله میه جغندن لطفاً و مرجه ایکی ماه ده اتمدید مدته  
مساعده جلیله حضرت شیخ الاسلامیلرینک ارزان بیورلمسنی  
استرحام ایلرم .

\*

\*\*

— ۴۸ —

کترلرینک ... نیابت شرعیه سندن انفصالم تام ایکی سنه یه رسیدیه  
اولوب هر نه قدر بوندن بر سنه مقدم ... و بر آی صکره ...



— 30 —



०५॥३

— 10 —

عاجزای خلی زماندن بری فلان محکمہ شریعی باشی  
کتابتندہ ایفای حسن خدمتدہ قصور آتدہ کہ خالصتہ سروسرودہ  
کتابت مذکور کو عائد اولان عائدات اولان طقوز تقرہ بالغ اولان  
عائدہ داعمائدہ ملک اعمائدہ سی نامین آتدہ مدد کی جتہ کہ یقیندہ  
آجہ کہ حق اولان مستوفین امجدانہ قبول یورایہ رقم اہلایہ نامین  
آتدہ کی صورتہ کمال کد از اولان حال ضرورتہ مدد جتہ همان  
مناسبت بر فضا بایتدہ قایلہ و قلعہ خصوصہ مساعداہ جتہ کہ جناب  
ولی الشریعہ ملک ارزان یورایہ سی تہی آتدہ کہ .

وادیست او لای فلاحی احسانیه عالمه خیر ۹ تیسری



اولادیندن اولدوغی خبر الیم مسوقین  
 قیامت ایشی کسب کلامی بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله

— ۵۵ —  
 \*  
 \*

مستی تینا ایلیم .  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله  
 اولدوغی خبر الیم مسوقین بختیله بختیله





دوام شان و سعادت و حصول حسن موفقیت کار آگاهیلری  
دعای مفروضیه بتکرار ترین زبان قیلندیغنک عرض و بیانیه  
محاسرت اولندی .

\*

\* \*

— ۵۵ —

تجیل ابدیه سزا بر شرف وار ایسه اوده ذات سمو -  
حیلرنده کی جوهر فضیلتدر . بونک جهان جهان تقدیره شایان  
اولدیغنی تصدیق ایتیه لك بر صاحب اذعان تصور اولنور می ؟  
مقام والای ریاستك عهده نحریرانه لرینه توجیهی تبشیرینی  
غزته لرده کورنجه بی اختیار :

شرفنحشا اولورکن خلقه مسند

تشرف ایتدی ذاتکله ریاست

بیتنی زیور لسان عبودیت ایلدم .

شو توجیه و جیهی یار و اغیار همزبان افتخار اوله رق تذکار  
ایده جکگرندن امینم . وجیهه رسم تبریکی حقیقه ایفادن عجز می  
اعتراف ایله برابر افندهرنك ذاتاً هر مظهریتنی ازلی اوله رق  
تسعید ایدنلردن اولدیغنك عرضنه اجتناسار و بو وسیله حسنیه ایله  
حق داعیانه مده ابذال بیوریه کلن حسن توجیهك بقا و ازدیادی  
تمناسنه ابتدار ایلرم . باقی مباد هرکه نخواهد بقای تو

\*

\* \*

— ۵۶ —

داعیلری من غیر لیاقة بش سنده دن بری ... ولایت  
 جلیله سی استیناف محکمه سی ریاستنده بولنه رق ایفای وظیفه ده  
 قصور ایتمه مکه چالیشیور سه مده وجود عاجزانه مه عارض اولان  
 علتدن طولای تبدیل آب وهوا ایتمک لکم لازم کلدیکی بلدییه  
 طبیی طرفندن ویریلن مربوط راپوردن آ کلاشیله جفی و علت  
 مذکور هک تشددی حالنده استیفایه مجبوریت حاصل اولوب  
 بوا یسه کترلری کبی بیوایکانک محوینی مستلزم اوله جفی جهته  
 بروسه ولایت جلیله سی استیناف محکمه سی رئیس یله بجایشمز  
 خصوصنه همت معالی منقبت مرحمت شعاریلرینک ابدانی حق  
 عاجزانه مده دائمی اللعان اولان تیر حسن توجه سمو حیلرینه  
 استناداً استرحام ایلرم . اول بایده امر و فرمان حضرت من له  
 الامر کدر .

\* \*

— ۵۷ —

شیء کریمه داعی نوازیلری مقتضیاتندن اوله رق نائل  
 اوله کلدیکم الطاف جلیله آصف اکرمیلرینک ادای حق تشکرندن  
 عاجز اولدیغم حالده بو کره انهای دولتلری آثار باهره سندن  
 اوله رق ... رتبه دن بر قطعه مجیدی نشان ذی شانی ایله تلطیف  
 بیور لمقلغم داعیلرینی بتون بتون غریق بحر منتداری ایلدیکنندن



لوازم شکر گذاریده کی قصور مک عفونی استرحامه ابتدار  
وتوجهات محاسن غایات دستور اعظمیلرینک حق کترانه مده  
بقا و ازدیادی نیازینه اجتناساز ایلرم .

..

— ۵۸ —

خاک پای مراحم پیرای حضرت صدر اعظمییه  
معروض جاریه مکینه لریدر که

چهارشنبه جوارنده فلان محله سنده عربلر زقاقنده ۳  
نومرولو خانه زوجم فلانک بلا ولد وفاتیه محلول اولوب  
حال بوکه ۱۰۰۰۰ غروش قیمتند بولنان منزل مذکور وقتیه  
اوتنده بریده خدمت ایدهرک تدارک ایده بیلدیکم پاره ایله  
آلتمش اولدیغندن وزوجم مومالیهک وفاتیه بویله محلوله کیتیمی  
اختیار و قتمده زقاق اورتهلرند قالمقلمغمی ایجاب ایدوب بوکا  
ایسه مسلم جهانیان اولان مرحمت جناب صدارتیناهیلری قائل  
اولیه جغی بدیهی بولندیغندن احوال ضجرت اشتماله مرحله  
مذکور کلبه جکک عاجزلرینه احسانیه آخر عمر مده دین و دولته  
دعا ایله دمکندار اولمقلمغم خصوصنه مساعدۀ جلیله عاطفت  
کستریلرینک رایکان بیورلمسنی کمال ابتهال ایله استرحام ایلرم .  
هر حالده امر و فرمان حضرت ولی الامر افندمن کدر .

— ۵۹ —

ینه کمال افتخار ایلله بر التفاتنامه کزی آلام. ارسال بیوریلان  
 « . . . » عنوانلی اثر عالیکزی ده مطالعه ایلله محتوی بولندیغی  
 بدایع طبیعتیه حیران قالدیم .

سوز بویله اولور . یوز کره اوقودم ، هر اوقویشده  
 کولکده بر ذوق دیگر حاصل اولدی .  
 برشی رجا ایده حکم . بیلم قبول ایدرمیسکز؟ معلم مرحومک  
 « ذات النطاقین » ی کبی سزده غزوه بدره دائر بر منظومه  
 یازسه کز خوش اولور .

موضوعنک بیوکلکنه باقوبده عز مکزه فتور کتیرمیکز ،  
 فیوضات محمدیه بی پایاندر .

دائما بویله التفاتنامه لر ارسالله داعیکزی مسرور بیورمقده  
 اولدیغکزدن طولانی نه قدر تشکر ایتسه م آزدر .

روزو شب ورد زبانم اولان « جناب حق ذات عالیکزی  
 محسود افصل اوله حق صورتده آثار عالیله تألیفنه موفق بیور .  
 سون « دعاسنی بو وسیله ایلده تکرار ایتکی وجیبه دن عد  
 ایلرم . باقی .

— ۶۰ —

عطوفتلو افندم حضرتلری  
 ذات خجسته صفات کرامیلری کبی خیر خواهان اودانک



توجهات معالی آیات کرمپوریلری شمره سی اوله رن نائل اولدیغم  
 پایه نك تبریکنی حاوی اولان التفاتنامه عالیهمتانه لری شرفبخش  
 هامة تعظیم اولدی .

حق داعیانهمده هر بار ساحه آرای افتخار اولان حسن  
 توجه سامیلرینک کمالیله ایفای وظیفه تشکرندن عجزمی اعتراف  
 ایله بوبابده کی قصورمک عفو بورلمسی خصوصنی استرحامه  
 مسارعت و دما دم اقبال و عافیتلرینک بقا و تزیایدی دعاسیله تزیین  
 لسان و جنان ایتیکده اولدیغمک عرض و بیاننه مباشرت ایلرم .  
 اول بابده امر و اراده افندم حضرتلرینکدر .

\*  
\* \*

— ۶۱ —

محلهمز مختار ثاپسی بولنان . . . آغانک وقوع استعفا سنه  
 مبنی . . . آغانک بواشی هروجه ایله ایفایه اقتداری کافی کورنمش  
 و مومی الیه اکثریت آرای اهالی ایله محلهمزه مختار ثانی انتخاب  
 قیلنمش اولدیغندن نامنه ایجاب ایدن مهر رسمینک حک و اعطاسی  
 خصوصنه مساعده امانتپناهیلری ضماننده اشبو مضبطه من بالتنظیم  
 تقدیم حضور عالی دستور اکر میلری قیلندی . اول بابدم امر  
 و فرمان حضرت ولی الامر کدر .

— ۶۲ —

در سعادت جزا محکمه سی مدعی عمومیلکی جانب عالیسنه  
وقعه نك شاهدلری

فلان دائره اوراق قلمی      فلان دائره مکتوبی قلمی  
کتبه سندن فلان افندی      کتبه سندن فلان افندی

... محله سنده ... زقاقنده پوسته خانه دکر مأمورلرندن  
پاپوشچی ... آغانك اوغلی ... افندی ذمتنده آله غم طقوز  
غروشی بر صورت مناسبه وادیبانه ایله طلب ایلدیکمده در حال حدت  
ایده رك عاجزلرینی فوق العاده ضرب ایتش و مر قومك شو  
حرکتی حقوق عمومیه بی مستلزم بولنش اولدیغندن حقنده طرف  
عالیالرندن حقوق عمومیه دعواسنك تعقیبنی عدالت و مرجع  
حصرت خلافتیناهی نامنه اوله رق کمال ابتهال ایله استرحام  
وبو میانده حقوق شخصیة احقرانه مك دخی محافظه سنی نیاز  
ایلرم اول باید امر و اراده افندم حضر تلرینکدر .

..

— ۶۳ —

اشراف ولایتدن ... زاده ... بك ایله تجارتدن ...  
افندی بیلرنده تحدث ایتش اولان ... محله کائن معلوم الحارود  
بر قطعه چیفتلك دعواسنه دائر بدایة ویریلن حکمك اسنینافنی



استدعا ایدن مومالیه . . . افندی کویا ادعای واقعنه حکم  
ابتدائی تصدیقاً جواب رد ویرلدیکنندن بحث و شکایتله استدعای  
معدلت ایتدیکنندن بوبابده جریان ایدن معامله نك سریعاً اشعارینی  
آمر فی ۳۰ کانون اول سنه ۳۰۸ و ۲۵ نومرولو امر نامه  
عالیٰ نظارتیناهییری مدرکه پیرای عاجزی اولدی .

مومالیه . . . فلان افندینك ویردیکی استیناف استدعاسیله  
بوبابده کی لایحه سی اوزرینه استینافاً اجرای تدقیقاته ایتدار  
اولمق اوزره علی الاصول طرفینه دعوتنامه لر ارسال ایدلدیکی  
حالده یوم معینده مستأنف مومالیه . . . افندی محکمه یه کلدیکی  
کی طرفندن بر وکیل دخی کوندردیکنندن مستأنف علیک  
طلبنه بناءً استیناف استدعاسنك ردینه قرار ویرلش و اعلامی  
دردست تنظیم اولوب قانون دائره سنده اعتراض وقوعنده  
اقتضاسنك ایفاسی طبیعی بولمیش اولدیغنك و بو معاملات دخی  
اصول محاکمه نك تعریف صریحنه تمامیه مطابق وعدل و قانونه  
موافق بولندیغنك جواباً عرض و اشعارینه مجاسرت قیلندی  
اول بابده امر و فرمان حضرت من له الامر کدر .

— ۶۴ —

سماحتلو افندم حضرتلری  
حقمده دائمی اللهمان اولان نیر حسن توجه سمو حیلرینك

برلمعه جدیده کوسترمسی و حضور فیض نشور حضرت  
ولی النعمیده بالمناسبه حق ناچیزانه مده اظهار حسن شهادتله فطرت  
عالیه کریمانه لرنده سرشته اولان شیعه فخره داعی نوازی  
و عاطفتک بیوکاکنه بر دلیل جیل دها کوسترملش اولدیغی استخبار  
و استیشار قیلندیغندن بو احسان مرحمت نشان توجّهات راسخه  
عاطفت کستریلرینک تزايد اوزره بولندیغنی تبشیر ایلله عاجزلرینی  
جدا و جدیداً منتدار ایلدیکندن بوکی الطاف علیه لرینک آثار  
جليله قریبه سنی کورمکله ده برقات دها بختیار اوله جغمه  
امیدوار بولندیغمک عرض و بیاننه اجتسار ایلرم .

عقیب صلوات عید اضحاده اقدم وظائف داعیانهم اولان  
درود فیض نمود حضرت خلافتپناهی به تردیفاً ادعیه خیریه  
جناب مفتی الانامیلرینی بخلوص البال رفع بارگاه رب متعال  
ایتدیکمک عرض و بیاننه مبادرت و بوزریعه جملله ایلله حق  
عاجزانه مده رایگان پیوریلله کلن انظار مکارم دثار جناب  
فتوایپناهی لرینک دوام و تزايدی نیازینه مجاسرت ایلرم .

\*  
\* \*

بو کره پیرایه انامل تکریم اولان احساننامه گرامیلرینک  
هر جله سی حق داعیانهمه ابداً پیوریلله کلن حسن توجهک



استقرارینی مبشر اولدیغندن کوکلم نور سرور ایله تولدی .  
 التفات محاسن آیات سموحیلرینه مظهریت هر حالده باعث  
 فیض و مفخرت اولدیغندن بویله بر شرف عالمهادن حصه دار  
 اولماغم ناقابل شکران بر نعمتدر .  
 ایفای لازمه رقیته واقع اولان قصور مک عفویله هر وقت  
 بویله مظهر التفات بیورلماغم خصوصنی تمنییه جرأت ایدرم .  
 باقی .

\*

\*\*

— ۶۶ —

عدلیه نظارت جلیله سی مستشار لغی جانب عالیسنه  
 سماحتلو افندم حضرتلری

مأموریت مخصوصه ایله ( ... ) اعزام بیورلمش و بوکره  
 عودت ایش اولان مستنطق . . . افندی بنده لرینک حامل  
 اولدیغی تعلیمات موجبجه حسن ایفای وظیفه یه پک کوزل  
 صرف همت ایش اولدیغنک عرض و بیانی وسیله سیله مدار  
 مباحات عدایده کلدیکم و دوامندن امین بولندیغم توجهات جلیله  
 کر مکاریلرینک تجدد و ازدیادی تمنیات مخصوصه سنه اجتناسار ایله  
 برقات ده کسب افتخار ایلرم . اول بابده امر و فرمان حضرت  
 من له الامر کدر .

\*

\*\*

— ۶۷ —

خاك پای مكارم احتوای منعمانه لرینه انتساب من كل الوجوه  
 باعث شرف بی حسابدر. بویله بر شرف عالمبایه قطعاً استحقاقی  
 اولمیان داعیلری کی بر عاجزی منسوبین دولتلری عدادینه  
 قبول ایله وایه دار عنایت بیورملری ایسه شکرانی ناقابل بر نعمت  
 بی معادلدر. بونك فريضة تشكرنی كاهی حقها ادادن اعتراف  
 عجز ایدهرك قصور واقعمك عفونی شیء کریمه عاطفتشعاریلرینه  
 حواله ایله محتاجی بولندیغم انظار محاسن دثار کرمکاریلرینك  
 کماکان ابدالیله شادمان بیورملقلغم خصوصنی نیاز ایدرم.  
 سعادتلو افندم حضر تلری

\*

\* \*

— ۶۸ —

خاك پای ولی نعمتلرینه اولان تدم عبودیتیه استناداً آره صیره  
 تصدیعه متجاسر اولدیغم کی بوکرده انقضاسنه اوچ آی قالمش  
 اولان مدت نیابت عاجزانه مک تمیدی خصوصی همم والای  
 کرم گستریلرندن بکار و شو رجاجعمك اسعافی باینده دریغ  
 عنایت بیورلمیه جغندن امین اولدیغم ایچون عاجزانه شمیدین  
 عرض شکرانه جرأت ایلرم. هر حالده لطف و مروت افندم  
 حضر تلرینکدر.

\*

\* \*

— ۶۹ —

دولتلو افندم حضر تلری  
 تسعید رتبه داعیانه می مشتمل فی ۶۲ ایلول سنه ۱۱۱۳



تاریخی لطفنامه عنایت شعاریلری شرفبخش هامة تکریم اولدی.  
 بونک منظور دیده افتخار اولان عبارات لطیفه سی حق عاجزانه مده کی  
 تمایلات قلبیه توجه کاریلرینک درجات عالیه سنی متضمن و مبشر  
 بولمغله مجرد شعار مروت کر مکاریلری حکم و اقتضای اوله رق  
 اول وجه ایله ابراز بیوریلان آثار حسن توجه مکارم پروریلرینه  
 متقابلاً عرض کمال شکران و اراده علیه لری اوزره مدیر  
 امور لری فلان آغانک واقع اوله جق خصوصاً تنیده تسهیلات  
 ممکنه نک ایفاسنه بالاقتخار سعی ایدیه جکی بدیهیاتدن بولندیغنی  
 علاوه عرض و بیان ایلرم . اول بایده امر و فرمان حضرت  
 ولی الامر کدر .

\*

\* \*

— ۷۵ —

بورایه کله لی یکر می کون اولدی ، هنوز یاران باصفادن  
 تنویر دیده مسرت ایده جک بر التفاتنامه آله مدم . بوقدر چابوق  
 اونودیه جغمی بیلیوردم . هله خاک پای حقوق پروریلرندن  
 بویله بر حالک صدورینه بر معنی ویره میورم . غربتده ایکی  
 سطرلق بر مکتوبک نه قدر صفا بخش درون اوله جغمی تقدیر  
 ایتک ذات والای عرفانپناهیلری ایچون او قدر کوچ بر شی  
 اولدیغنی دوشوندکجه مضطرب اولیورم .

بیگانه چیتدی حیف بنم یار صاندیغم (۱)

دیمکه دیلم وارمیور . فقط :

بنی بر یاد ایدر یوق یادلرده آشنالرده (۱)

دیه فریاد ایدیورم . بوکا حقم واردرد دگلی ؟

هرنه حال ایسه بو عریضه مک جوابسز بر اقلامسنی استرحام  
ایدر وکال خلوص بال ایله پدر افندی حضرتلرینک مبارک  
الارندن اوپرم .

\*  
\* \*

— ۷۱ —

معروض داعی قدیملریدر

کفایت عالمپسند تحریرانه لری مقتضای عالیسی اولمق اوزره  
... ریاستنه وقوع بولان مأموریت جلیله لری نی تسعید ذریعه  
جلیله سیله ادعیه مفروضه سمو حیلرینی بر معتاد پیرایه لسان صدق  
اعتیاد ایتمکده ووظائف عبودیت داعیانهمدن بولندیغی اوزره  
معیت علیه ریاستپناهیلرنده بولنمق شرفنه بدل بوراده برادر  
پاشا حضرتلرینک خدمت منخرت غایت دولترلرده بولنمقده  
اولدیغمک عرض و بیاننه اجتناسار قیلندی . قاطبه احوالده امر  
واراده افندمن کدر .

[۲] بو مصراعده « شیخ الاسلام یحی » نکدر .

\*  
\* \*



## - ۷۲ -

برادر جان برابرم افندم  
 فی ۲ کانون اول سنه ۳۱۱ تاریخلی کرمنامه عالیلرینی کمال  
 مسرت و منتداری ایله آلام . حق داعیانهمده ابدال بیوریلان  
 حسن توجهه تشکرلر ایدرم . بویله پارلاق پارلاق التفات  
 سامیلرینه نائل اولدجه افتخار ایدیورم . مشرب عالیجنابانهلرینی  
 بیله مش اولسه ایدم بونلرک صمیمی اولدیغنه اعتماد ایتزدیم . هر حالده  
 بویله احساننامهلر ارسالیله تسریر دل محزوننه عنایت بیورلمسینی  
 تمنی ایدرم . باقی اخوت .

## - ۷۳ -

سبب حیاتم پدرم افندم حضرتلری  
 پوسته کونلری :

چار چشم ایله پیام یاری کوزلر کوزلرم  
 مؤداسنجه برات سعادت بیلدیکم التفاتنامه ولی نعمتیلرینه  
 وقف دیده تحسیر ایتکده اولدیغیمک عرضنه حاجت کورهم .  
 فقط شوقدر دیه بیلیرم که احساننامهلرینه دسترس اوله مدیغم پوسته  
 کونلری :

آغلا ای کوزلرم آءلا نه کلیر وار نه کیدر  
 مصراعنی کویا اولماق المذن کلور . اضطرابی احساننامه .  
 لرندن باشقه برشی تعدیل ایده من . التفاتنامهلرینه تنویر دیده  
 افتخار ایتدیکم پوسته کونلری ایسه کولمده حاصل اولان نور  
 سروری تعریف ایده من . بو بابده تعبیرات توصیفیهک غیر کافی

اولدیغنی ادعا ایتش اولسه اثبات مدعادن عاجز قالمام ظن ایدرم.  
روحی تعریف ایتک ممکن ایسه بونی ده تعریف ممکن اوله یلیر ؟  
بو حالی مصور اولق اوزره :

الفاظه صیقشمیور معانی

دیمکدن باشقه چاره یوقدر .

بناءً علیه هر پوسته ایکی سطرلق بر مکتوب ایله قریرالین  
اولقلغم خصوصنه عنایت بیورلمسنی تمنی ایدرم . البته محزون  
اولقلغمه وجدان عالی مرجت پروریلری راضی اولماز .  
احساننامه لر ارسالیله مسروریتیم جهتی التزام بیوریلور دگلی ؟

\*  
\* \*

— ۷۴ —

عطوفتلو افندم حضرتلری

قلوب موحدینی انوار احتیاسات ایمانیه ایله بر قات دها  
منور ایدن لیله رغائب عیمه المواهیک تبریکنی حاوی بولسان  
التفاتنامه سامیتری انمله پیرای داعیانهم اولدی .  
مندرجات فیض آیاتی پامال غربت اولان کوکلی معشو -  
قه سینه قاویشان حسرتدیده کبی پر مسرت ایلدیکندن :

التفاتک بنی احیا ایتدی

پاشای داور عالی همت



ایلسون کعبه قلبک معمور

حشره دک حضرت رب عزت

نشیده سیله وظیفه شکر گذاری به متجاسر اولدم .

مدار افتخارم اولان حسن نظر مکارم اثر گرامیلرینک

دوام وتوافرنی رجا وآیین عبودیتده کورلمکده اولان قصور .

لرمک عفوی خصوصنی استدعا ایلرم .

\*  
\* \*

— ۷۵ —

سماحتلو افندم حضرتلری

حسب العبودیه نجم اقبال فاضلانه لرینک کوندن کونه

آفایکیر سعادت اولسی دعای بی ریاسیله اوقاتکذار اولمقده ایکن

فلان مأموریتک عهده استیمال فقیهانهرینه تفویض بیورلدیغنی

بو پوسته ایله کلن اوراق حوادلشن استبشار ایلدم . همان :

ای شرفبخش سریر علم و فضل و معرفت

یاور اولسون ذاتکه فیض خداوند عظیم

کامران اول سایه شاهانه ده تا حشره دک

نشر احکام ایلیوب بر وفق قرآن کریم

قطعه دعائیه سنی زیور لسان اخلاص ایدهرک ایغای وظیفه رسم

تبریکه ابتدار و بووسیله جیله ایله حق داعیانهمده درکار اولان

توجهات مكارم غايات نحريرانه لر ينك تمنى دوام و توافرينه اجتناسار  
قىلندى .

— ۷۶ —

سماحتلو افندم حضرتلرى

حق كترانه مده دائمى الكمال اولان حسن توجهات عواطف  
غايات داعى نوازىلرى مقتضاى مكارم احتواسى اولمق اوزره  
عاجزالرينك شمدى به قدر نابللك دائره سنده قالىشمدن تأسفناك  
اولانلرك برنجيسى افندمن اولدقلى غياباً و وجاهاً كوردىكم  
مأثر الطاف عاليه بنده پرورىلر به مدلل اولديغندن باب فتواجه  
آچيله جق مهمجه بر خدمت اچون خاطر معدلت ناشر  
سمو حيلرينه خطور ايدنلرك برنجيسى بولنه جفمندن امين ايسهمده  
موقع حاضر مده انتظار عبیدانهم خيلجه امتداد ايتش اولمسيه  
تحصل ايدن قلت تمكين واصطبار جنبه تصديعى اختياره باعث  
اجتناسار اولدى .

— ۷۷ —

معروض داعى ديرينه لر يدر

كتبه عائداتنه اطاله دست تعرض ايتكده اولديغم باشكايتنامه  
خاك پاي عدالت احتواى فتواپناهيلرينه بيلديرلمش اولمغله بونك  
مقارن حقيقت اولوب اولديغنىك عرض وپيائنى آمر ۹۱



نومرولو و فی ۱۱ شوال سنه ۳۱۲ تاریخلی استعلامنامه جناب  
شیخ الاسلامیلری هامة پیرای داعیانهم اولدی .

یکرمی سنه دن بری طریق نیابتده بوانوب بحول الله تعالی  
شمدی به قدر سرمو منهج قویم استقامتدن انحراف ایله باعث  
شر مساری اوله جق بر حرکتیم وقوع بولمادیغی باب فتواجه  
معلومدر . شو اسناده سبب ایسه محکمه باش کاتبنک کفایتسز .  
لکنه بناءً فلان افندی داعیلرینی مومالیهمه ترفیق ایدیشمدر .  
بو ایسه محضاً امور عبادی سورنجهیه بر اقامق وهروجه ایله  
مطلوب عالی اولان حسن جریان مصالحه خلل کتیرمه مک  
قضیه معتناپاسنه تمسکدن ایلری کلدیکنی خاک پای عدالت  
احتوای جناب ولی النعمیلرینه عرض ایله مرحمت مسئله عجزه  
پرورلرینه دخالت ایلرم . هر حالده امر وفرمان حضرت  
ولی الامر افندمن کدر .

\*  
\* \*

— ۷۸ —

بو کونلرده مشاغل عاجزانهم کثرتی اگرچه تجدید  
اختصاص خصوصنده وقوعه کلکده اولان قصور عبیدانه می نزد  
عالی حضرت ولی النعمیلرنده قرین عفو جیل ایتدیره بیله جک  
بر معذرت صحیحه عد اولنه بیلیرسه ده ذات مکارم صفات جناب  
مشیتپیا هیلرینه شدت تعلق بداهتده بولنان کوکم شومو فقییتسز لیکه

بر تقصیر صحیح نظریله باقمده اولدیغندن حلول ایدن ایله  
 رغائبك تهنیتی وسیله حسنه سیله تلاوتی تسلی بخش درون  
 اولان ادعیه مفروضه مفتی الانامیلرینه مع الاقتحار مواظبتدن  
 ایرلدیغیمك وتوجهات جلیله خداوند اکر میلرینك حق کترانه مده  
 بقاسی عنده مده متحقق اولق جهتیه او مجتهد سوز ایرادن  
 انصراف ایله قاعده تأدب رعایتی انست و اوقع کوردیکمك  
 عرض و بیاننه مجاسرت ایلرم .

( ختام )



# ﴿ فهرس ﴾

مقدمه

|                              |    |
|------------------------------|----|
| عرض شکران                    | ۴  |
| بر مکتوب                     | ۵  |
| بر جوابنامه                  | ۶  |
| تبریکنامه                    | ۶  |
| بودخی                        | ۷  |
| استدعای عاطفی متضمن جوابنامه | ۷  |
| تبریکنامه                    | ۸  |
| بایرام تبریکی                | ۸  |
| بودخی                        | ۹  |
| قندیل تبریکی                 | ۱۰ |
| جوابنامه                     | ۱۱ |
| بایه تبریکی                  | ۱۱ |
| بودخی                        | ۱۲ |
| مذکره                        | ۱۳ |
| جوابنامه                     | ۱۳ |
| عریضه                        | ۱۴ |
| رتبه تبریکی                  | ۱۵ |
| بر مکتوب                     | ۱۵ |

( فهرست )

|               |    |
|---------------|----|
| عسر ضحاحال    | ۱۶ |
| تشکر نامه     | ۱۷ |
| مکتوب         | ۱۸ |
| التماسنامه    | ۱۹ |
| تبریکنامه     | ۲۰ |
| توصیه نامه    | ۲۱ |
| مکتوب         | ۲۱ |
| تبریکنامه     | ۲۳ |
| عسر ضحاحال    | ۲۳ |
| عسر یضه       | ۲۴ |
| عسر ضحاحال    | ۲۵ |
| عسر یضه       | ۲۵ |
| عسر ضحاحال    | ۲۶ |
| بایرام تبریکی | ۲۷ |
| استراحامنامه  | ۲۸ |
| مکتوب         | ۲۹ |
| عسر یضه       | ۳۰ |
| بودخی         | ۳۱ |
| عسر ضحاحال    | ۳۲ |
| بودخی         | ۳۲ |
| تشکر نامه     | ۳۳ |



( فهرست )

|               |    |
|---------------|----|
| استعلامه جواب | ۳۴ |
| التاسنامه     | ۳۵ |
| تبریکنامه     | ۳۵ |
| علم و خبر     | ۳۶ |
| بودخی         | ۳۶ |
| استدعا        | ۳۶ |
| عرضحال        | ۳۷ |
| بودخی         | ۳۷ |
| استرمنامه     | ۳۸ |
| بودخی         | ۳۸ |
| بودخی         | ۳۹ |
| عرضحال        | ۴۰ |
| بودخی         | ۴۱ |
| استرحامنامه   | ۴۱ |
| بودخی         | ۴۲ |
| جوابنامه      | ۴۲ |
| تبریکنامه     | ۴۳ |
| عرضحال        | ۴۴ |
| عرض شکران     | ۴۴ |
| عرضحال        | ۴۵ |
| جوابنامه      | ۴۶ |

|               |    |
|---------------|----|
| بودخی         | ۴۷ |
| علم و خبر     | ۴۷ |
| عریضہ حال     | ۴۸ |
| استدعا        | ۴۸ |
| عریضہ         | ۵۰ |
| جوابنامہ      | ۵۰ |
| التماسنامہ    | ۵۱ |
| عریضہ         | ۵۲ |
| استرحامنامہ   | ۵۲ |
| جوابنامہ      | ۵۲ |
| مکتوب         | ۵۳ |
| تیریکنامہ     | ۵۴ |
| جوابنامہ      | ۵۵ |
| مکتوب         | ۵۵ |
| قندیل تبریکی  | ۵۶ |
| تیریکنامہ     | ۵۷ |
| استرحامنامہ   | ۵۸ |
| استعلامہ جواب | ۵۸ |
| عریضہ         | ۵۹ |







DATE DUE

To renew  
call 292-3900

[illegible]

HIGHSMITH 45-220







